

1844

SUMPTIBUS MATTHÆI RIEGER, BIBLIOP. 1759.

MONACHIO ORDINIS
CONGREGATIONIS

Bien. H. III. 8 (6)



SPIRITUS SS. P. N. BENEDICTI.

PARS QUARTA.

Continens Meditationes à primo Octo-
bris usque ad 1. Januarii.

OCTOBER.

DIES I.

PRO FESTO SS. ROSARII B. V.
MARIE.

De puritate, compunctione, & inten-
tione recitandi Rosarium B. V. M.

Cum omni puritatis devotione supplican-
dum est. Cap. 20. v. 2.

PUNCTUM PRIMUM.



SI unquam preces ad mentem Ss. P. N.
cum omni puritatis devotione perfol-
vendæ sunt, sanè Rosarium hoc mo-
dò orandum est. Angelus sit in pu-
ritate, qui dignè cum Angelo B. V. Mariam
salutare velit. Cogita singula verba saluta-
tionis Angelicæ, & inexhaustibile omnium

A 2

ejus

ejus Excellentiarum mare deteges. Planè speciosa laus tam speciosæ Virginis in ore peccatoris esse nequit. Quomodo enim ausit purissimas Virginis perfectiones in salutatione angelicâ memorare, qui eas memorando se vitiis plenum esse recordatur? Nónne mox ab initio in semetipso confunditur? Rectè Jeremias hortatur, ut corda nostra cum manibus levemus. Cor cum manibus levat, qui orationem suam puris operibûs roborat. Si ergò dignè in Ss. Rosario B. Virginem cum Angelo salutare cupis, puritatem vitæ tibi ante omnia procura; secûs cum illo impuro juvene potum dulcissimum in vase immundo offeres, quem tamen illa nunquàm gustabit.

PUNCTUM SECUNDUM.

Rosarium B. V. *in compunctione lachrymarum*, ut ait Ss. P. N. quàm maximè recitandum est; quia mysteria vitæ, passionis, & gloriæ Jesu Christi in eo commemorantur. Sunt enim lachrymæ, quæ proveniunt ex gaudio Redemptionis. Sunt lachrymæ, quæ oriuntur ex compassione patientis Salvatoris. Sunt lachrymæ, quæ nascuntur ex desiderio participandi gloriæ Regis nostri. Quantam igitur materiam lachrymarum habes in Ss. Rosario? Quàm acceptabilis erit ejusmodi oratio Filio, & Matri ejus? Planè ejusmodi Rosaria sunt acceptissima, quæ nunquàm marcescunt; sunt longè vernis floribûs

bûs redolentiora, ut quæ non aquarum fontibus, sed lachrymarum imbre rigantur. Neque enim perinde omnium fontes floridos reddunt hortos ut hæcæ rosas, salutationis angelicæ fontes lachrymarum super Ss. mysteria vitæ, passionis, & gloriæ JESU CHRISTI irrigantes faciunt ad summam pulchritudinem excrefcere. Ritè hinc pensa mysteria Ss. Rosarii; nec lachrymis, nec fructu exauditionis carebis.

PUNCTUM TERTIUM.

Rosarium B. V. *in intentione cordis*, prout Ss. Pater de oratione statuit, præcipuè absolvendum est. Quas enim intentiones supplicationis nostræ non formemus; dum ultimam illam precationem ab Ecclesiâ salutationi angelicæ annexam, sancta Maria Mater Dei &c. oraverimus? Omnia nobis potest & vult impetrare. Mater Filii Dei est; hinc omnia nobis exorare valet. Mater nostra est; ideo omnia vult nobis à Filio suo obtinere. Ipsius enim bonitas, misericordia, pietas, benignitas, clementia, fidelitas, benevolentia, & charitas erga homines tanta est, ut nullis verbis explicari possit. Unde & nullum tam execrabilem peccatorem orbis habet, quem ipsa abominetur, si toto corde cum verâ emendatione, & charitate ad eam confugerit. Quamdiu namque tempus gratiæ agitur, nequit benignissimos oculos suos

à misèris, ac pœnitentibus peccatoribus, se invocantibus, avertere. Continuas enim pro eis fundit preces, & ut Mater fidissima curam salutis eorum gerit. Citiùs cœlum cum terrâ perierit, quàm ipsa aliquem, seriò se implorantem, suâ ope destituat. O quantam spem salutis habes, dum devotè & in intentione cordis Rosarium B. V. recitas!

PUNCTUM QUARTUM.

AN ergò, ô Religiose! Rosarium B. V. in puritate cordis oras? Mulier est amicta sole, ipsisque solis radiis purior. An Rosarium B. V. in compunctione cordis absolvis? Nihil tam agglutinat Redemptori, ut illæ lachrymæ, quas amor effundit. An Rosarium B. V. in intentione cordis recitas? In æternum perire non potest, quisquis illam devotè, & perseveranter colit, atque invocat. Dole, quòd tam tepidè hucusque Rosarium B. V. deblateraveris. Propone

1. Rosarium B. V. in puritate,
2. In compunctione,
3. In intentione cordis semper recitare.

DIES II.

PRO FESTO S. ANGELI CUSTODIS.

De

De Angelorum Custodiâ.

Ab Angelis nobis deputatis quotidie die, noctuque Domino Factori nostro opera nostra nunciantur. Cap. 7. Reg.

PUNCTUM PRIMUM.

Quàm eximius cultor Ss. Angelorum Beatissimus Pater Noster Benedictus fuerit, testantur illa sacre Regulæ suæ verba: *Ab Angelis nobis deputatis quotidie die, noctuque Domino Factori nostro opera nostra nunciantur.* Hisce magnam suam erga Ss. Angelos Custodes pandit reverentiam. Et meritò. Angelus siquidem in suâ creatione tantâ Deo conformitate unitus est, ut esset potius signaculum similitudinis de quo formaretur homo quàm simile, vel signatum. Unde Ezechiel de ipso dicit: Tu signaculum similitudinis, plenus sapientiâ, & decore. Angelus enim eò similior Deo est, quò purior, & tantummodò spiritus est. Tanta equidem est Sanctorum Angelorum claritas, & gloria, ut eam homo nec cogitare, minùs loqui possit. O quantam reverentiam nos habere oportet erga tam potentes cœli Principes! quantâ nobis solitudine opus est, ut dignos nos exhibeamus eorum frequentiâ, ne fortè sanctos eorum obtutus offendamus. Væ nobis! si quando provocati ingrata nostrâ præsentia suæ oblivione, aut peccatis nostris irritati

indignos nos judicaverint præsentiâ, & visitatione suâ. Ah! tum meritò cum Propheeta plangemus; amici mei, & proximi mei adversum me appropinquaverunt, & steterunt. Et qui juxta me erant, de longè steterunt, & vim faciebant, qui quærebant animam meam.

PUNCTUM SECUNDUM.

AB Angelis nobis deputatis quotidie die, nocteque Domino Factori nostro opera nostra nunciantur. Quare? Quia amant nos propter Deum, propter nos, propter seipsos. Propter Deum, cujus tanta erga nos misericordiæ viscera ipsi quoque (uti dignum est) imitantur. Propter nos, in quibus nimirum propriæ similitudinis misereantur. Propter seipsos, quorum ordines instaurandos ex nobis totò desiderio præstolantur. Amant & præcipuè nos; quia nos Christus amavit. Eodem quippe Redemptore, quò nos, servatos se agnoscunt. Qui namque hominem crexit lapsum, dedit stanti Angelo, ne laberetur, sic illum de captivitate eruens, sicut hunc à captivitate defendens. Hinc cum ament Dominum, amant & juxta vulgare proverbium canem ejus. O beati Angeli! nos ergò catelli sumus Domini illius, quem tanto affectu diligitis, catelli, inquam, cupientes saturari de micis, quæ cadunt de mensâ Dominorum nostrorum, qui estis vos.

O quando tanto amore redamabimus vos;
sicut nos amatis?

PUNCTUM TERTIUM.

AB Angelis nobis deputatis quotidie die, no-
cturneque Domino Factori nostro opera nostra
nunciantur. Cur? Ut ampliorem semper
gratiam nobis reportent. Nunquam enim
anima sine Angelorum Custodiâ est, qui eam
æmulantur Dei æmulatione, solliciti suo viro
servare, & virginem castam exhibere Christo.
Ne dixeris in corde tuo; ubi sunt? Quis
eos vidit? Vidit eos Propheta Elisæus, insu-
per & fecit orando, ut videret etiam Giezi.
Vidit Patriarcha Jacob, & ait: Castra Dei
sunt hæc. Vidit & Doctor Gentium, qui di-
cebat; nonne omnes administratorii spiritus
sunt, missi in ministerium propter eos, qui hæ-
reditatem capiunt salutis? Hinc talis anima
angelicis fulta ministeriis, & superno stipata
agmine incedens similis est equitatu Domi-
ni, illi utique, qui quondam in curribus Pha-
raonis tam stupendo divini adjutorii miracu-
lo triumphavit. Si enim diligenter adver-
tas cuncta, quæ ibi miraris magnifice perpe-
trata, invenies hîc nihilominus admiranda.
Nisi quòd in eo nunc magnificentius trium-
phatur, quòd quæ illic corporaliter præces-
serunt, hîc spiritualiter adimplentur. Nonne
enim magnificentius est Diabolum, quàm
Pharaonen prosternere? Quid ergò timeas

sub tam potenti custodia? Si nihilominus
trepidas, ascende cum juvene illo Monacho
cellam Senioris, prospice per sinistram fene-
strellam, videbis quidem ingentem Dæmo-
num te impugnantium exercitum; at pro-
spice quoque per dextram, & cernes multò
copiosiores Angelorum in tuum subsidium
missas copias. Hac verò visione confortatus
cum juvene descende, ejusque fiduciam erga
Custodes Angelos imitare.

PUNCTUM QUARTUM.

AN ergò, ô Religiosè! revereris in omni lo-
co S. Angelum Custodem? Ne contem-
nendum putes; quia non dimittet, cum pec-
caveris. An amas Angelum Custodem? An-
gelis suis Deus mandavit de te, ut custodiant
te in omnibus viis tuis. An fiduciam habes
in Angelo tuo Custode? Quid videbis in
Sunamitide nisi choros castrorum? Dole,
quòd hucusque Angelo tuo Custodi nec de-
bitam reverentiam, amorem, & fiduciam ex-
hibueris. Propone

1. Illum revereri in omni loco,
2. Illum amare,
3. In eum sperare.

beata præsentia, Sanctorum Spirituum indefessa noscitur custodia vigilare; imò Deus ipse suis adesse beneficiis aperte monstratur. O si Moyſes non potuit niſi ſolutis calceis terram ſanctam calcare; quia ob temporalem Dei viſionem ſanctificata erat: quantâ putas reverentiâ in S. Eccleſiis verſandum erit; quas ſemper inhabitat? Si Daniel ob reverentiam templi Jeruſolymitani in ſuâ captivitate, dum oravit, faciem ſuam ſemper verſus illum vertit: quid te avertet, ne ſemper in templo ores, vel ſi non poſſis, ſaltem verſus illum, ubi JEſus tuus eſt, faciem, & cor tuum convertas? Sic cum Daniele facile, quod petis, impetrabis.

PUNCTUM SECUNDUM.

O *Ratorium hoc ſit. quod dicitur.* Non erit, niſi tu prius ſanctum templum ſis in te-
metipſo. Licet enim parietes templi & dici ſanctos, & eſſe faciat conſecratio Epilcopi, reliquæ Sanctorum, viſitatio Angelorum: minimè tamen eorum ſanctitas propter ſe credenda eſt honorari, quos nec propter ſe certum eſt ſanctificari. Quin imo ſancta eſt propter corpora domus, corpora propter animas, animæ propter inhabitantem ſpiritum. Felix ille, qui declinaverit à malo, & fecerit bonum. Dignus eſt Sancta Sanctorum ingredi; imò anima ejus, quia in ſe ſancta eſt, jam habet, ad quem ingredi cupit.

Ex

Ex suâ pietate Dominus, antequàm petat aliquid ab eo, jam dicit; adsum.

PUNCTUM TERTIUM.


O *Ratorium hoc sit, quod dicitur.* Tibi non erit, nisi jugiter concupiscas in atria Domini, quæ significat. Ante omnia enim oportet orare; adveniat regnum tuum. Et ô Admirabilis domus, & dilectis tabernaculis, & atriis concupiscibilibus præferenda! quàm dilecta tabernacula tua Domine virtutum! concupiscit, & deficit anima mea in atria Domini. Verùm multò magis beati, qui habitant in domo tuâ Domine in sæcula sæculorum laudabunt te. In hac gloriosâ domo ubertas, & torrens omnis voluptatis, & si quæ sunt alia, quæ nec oculus vidit, nec auris audivit, nec in cor hominis ascendit, quæ præparavit Deus diligentibus se. O qui ita Oratorium oculis internis aspiceret, quàm fervidè pro cœlo oraret? Quàm imensa bona ex oratione certò reportaret?

PUNCTUM QUARTUM.

AN ergò, ô Religiose! ut fructum condignum ex visitatione Oratorii acquiras, illud sanctum esse perpendis? Templum Dei sanctum est. An temetipsum sanctificas? An nescis, quòd corpus tuum sit templum Spiritus sancti? An significatam cœlestis Jerusalem

lem sanctitatem in Oratorio attendis? Latus sum in his, quæ dicta sunt mihi, in domum Domini ibimus. Dole, quòd ex visitatione Ecclesiæ non magis profeceris. Propone

1. Illam sanctam considerare, & ideo
2. Temetipsum sanctificare, atque
3. Ad æterna Sancta Sanctorum suspirare.



DIES IV.

De incertitudine mortis.

Mortem quotidie ante oculos suspectam habere. Cap. 4. Instr. 47.

PUNCTUM PRIMUM.

PROVIDUS Pater Filios suos hortatur: *Ut Mortem quotidie ante oculos suspectam habeant*; quia mors ubique hominem expectat. Certum quippe est; quia morieris. At incertum, quomodò, vel quandò, vel ubi. Mors ubique te expectat, & tu si sapiens fueris, ubique eam expectabis. Expectando autem redi ad Te, ut semper possis ascendere ad eum, ad quem creatus es. Tres siquidem ascensus sunt ad Deum. In primo ascendimus ab istis exterioribus, & inferioribus ad nos. Considerando namque ex incertitudine mortis, quàm caduca, & transitoria sint ista

ter-

terrena, contemnimus ea, & redimus ad nos. In secundo ascendimus ad cor altum. Cum enim instantem mortem pensamus, & cognoscimus, quàm pròni sumus ad malum, & quàm invalidi sumus ad bonum, contemnimus nos. Ascendimus supra nos tantò altius, quantò magis proficimus. In tertio ascendimus ad Deum. Dum namque imminentis mortis timore ubique corripimur, ad Deum ultimum finem cognitione, & amore ejusdem ubique ascendimus. O quanta inde securitas nobis affulget! parati sumus, quâcunque horâ Dominus venerit.

PUNCTUM SECUNDUM.

PROVIDUS Pater Filios suos hortatur, ut *mortem quotidie ante oculos suspectam habeant*; quia in morte fors justorum & iniquorum mutanda est. Hujus exemplum præbent nobis Ziphæi, & David. Venerant illi ad Saul, ut occiderent David. Nónne ecce David absconditus est apud nos? Ziphæi namque florentes interpretantur, & erant, sed David latens. Attende latentem. Vita vestra abscondita est cum Christo. At isti florentes erunt, quando apparuerit in morte ipsorum Christus; quia & cum ipso apparebunt. Cum verò isti in morte floruerint, Ziphæi arescent. Cui namque flori illorum comparetur gloria, attende. Omnis caro fœnum, & omnis honor carnis, ut flos fœni.

Quis

Quis finis? Fœnum aruit, & flos decidit. Hæc semper cogita, ô Religiosè! nullam gloriam hujus mundi affectabis. Ad nullum officium ambitiosè aspirabis. Cum David latere cupies, ut in morte cum Christo apparere possis. Cum David persecutiones mundi libenter sustinebis; quia tu non vis esse de, & cum mundo; sed vivere in abscondito! cum Christo. O quanta inde tibi felicitas in consolatione mortem ubique expectas. Cum gaudio in gloriâ morieris.

PUNCTUM TERTIUM.

PROvidus Pater Filiis suis inculcat, ut *mortem quotidie ante oculos suspectam habeant*; quia serò negligentes, & voluptatibus servientes Religiosi in morte evigilant. Impius quippe, cum dormierit, aperiet oculos suos, & nihil inveniet. In morte evigilat per veram cognitionem, & tunc nihil esse conspiciat, quod tenebat. Sæpè etenim contingit, ut per somnium miras delicias, & honores mens nostra sibi repræsentet. At repentinè evigilans, evigilasse se dolet, quæ interim vel dormiens iis fruebatur. Ita Religiosi quasi per somnium commoditatibus corporis, propriis voluptatibus, honoribus in vita pascuntur, at tardè oculi illis aperiuntur, quando videlicet cum damnandis dicturi sunt: quid nobis profuit superbia? Quid inobientia? Quid proprietas? Quid impuritas? Quid gula?

gula? Quid odium! Quid acedia? Quid tepida, vana, sæcularis vita? Quid pro œconomia, studiis, lucro animarum cum dispendio salutis propriæ consummatum tempus? Vilia, & fugitiva fuisse, quæ tenueramus, jam amissa cognoscimus, quæ quamdiu nunc aderunt. magna, & mansura credimus. O Religiose! contemne igitur omnes sensualitates. Abjice omnem corporalem requiem. Relinque omnia, quæ ad salvandam animam tuam non tendunt. Gaudebis in morte de pœnitentiæ labore. De paupertate, humilitate, & mortificatione lætaberis. Sape, prævide novissima tua.

PUNCTUM QUARTUM.

AN ergo, ô Religiose! mortem quotidie suspectam habes, ut cum Deo tuo ultimo fine te unias? Mors ubique te expectat. An mortem quotidie suspectam habes, ut mundanam gloriam contemnas? Ut flos sæni decidet in morte. An mortem quotidie ante oculos suspectam habes, ut sensualem, & negligentem vitam exuas? Velut somnium transit. Dole, quod hucusque non fructuosè mortem suspectam habueris. Propone

1. Mortem quotidie suspectam habere ad obtinendam unionem cum Deo ultimo fine tuo,

2. Ad contemnendam gloriam mundi, &
Spir. S. Ben. P. IV.

B

3. Ad

3



DIES V.

IN FESTO SS. MM. PLACIDI.

De Martyrio spirituali.

Abneget semetipsum. Cap. 4. Instr. 10.

PUNCTUM PRIMUM.

Sanctus Placidus Romæ Tertullo patre in primis nobili natus, mundum quem vix ingressus erat, jam reliquit, atque S. Benedicti monasticum institutum secutus est. Et hoc est primum testimonium, quod Jesu Christo, qui mundum fugere præcipit, strenuè reddidit. Ad hoc Præceptum Ss. Patris sui, *abneget semetipsum*, perfectè implevit. Abnegavit semetipsum, ne mundi gloriâ, voluptate, aut vanitate caperetur. Et ô quàm benè! omnis enim delectatio hujus mundi, universa Jesus gloria quicquid denique in eo concupiscitur, prorsus modicum est, in illius felicitatis, in illius gloriæ, in illius beatitudinis, quam hac abrenunciatio-
ne promeruit, comparatione: si tamen vel modicum dici debet, & non potius nihilum, vapor ad modicum parens. Acceperat beatus

tus Placidus nobile genus, amplas possessiones, hæreditatem multam. Acceperat hæc universa à Deo; ipsius enim dona sunt. Fidelem ergo se probavit ei, qui dederat, testem cum juxta doctrinam ipsius & pro ejus amore universa contempsit, omnia detrimentum faciens, & arbitratus ut stercora, ut in Religione Christum lucrifaceret. Et hoc testimonium tu Jesu Christo reddidisti, tantum abnega temetipsum perseveranter, ne affectu rursus ad sæculum redeas.

PUNCTUM SECUNDUM.

SANCTUS Placidus, quamvis tenerrimè diligeret Ss. Patrem suum, ejusque jugiter lateri in patrando miraculis adhæreret, nihilominus abnegavit desiderium propriæ voluntatis, obediit præcepto, abiit in Siciliam, Monasterium, & Ecclesiam propè Messanæ portum construxit. Et hoc est alterum testimonium, quod Jesu Christo, qui non venit facere voluntatem suam, sed ejus, qui misit se, reddidit. Implevit Regulam: *Si quis propriam non amans voluntatem, desideria sua non delectetur implere. Abnegavit semetipsum.* Genus quippe Martyrii est, sua abnegare desideria, & alterius sequi voluntatem. Licet enim dolores Martyrii intentione non adæquet, diuturnitate tamen temporis superat. Et ô quàm sublimem præcæteris, qui obediens non fuerunt, promeritus

tus est coronam! hanc & tu aspice, & libenter adimplebis illud Ss. Patris tui: *Voluntas habet pœnam, & necessitas parit coronam.* Sic & testimonium divinæ Voluntati per humilem subjectionem erga Superiorem semper præstabis.

PUNCTUM TERTIUM.


Sanctus Placidus cum Sociis suis non solum Jesu Christo testimonium reddidit per Martyrium, sed etiam per illibatam castitiam. Non enim castitas laudabilis est; quia invenitur in Martyribus, sed quia ipsa Martyres facit. Tu ergo si non potes Christum per sanguinis effusionem confiteri, cum S. Placido coram hominibus, ad exemplum illius confitere eum per castitatis observantiam. *Abnega te metipsum.* Testimonium perhibe veritati, quæ dixit: sunt Eunuchi, qui se ipsos castraverunt propter regnum cœlorum. Et quanta est ista confessio, in carne degere extra carnem? A carnis stimulo pungi, & tamen non lædi? In corpore mortali angelicam ducere vitam? Aureum os hinc aureæ loquitur; dum ait: *velox est labor Martyrum; prolixior labor, & dolor castitatem colentium.*

PUNCTUM QUARTUM.

AN ergo, ô Religiose! testimonium reddis Jesu Christo per abrenunciationem sæculi?

li? Omne, quod natum est ex Deo, vincit mundum. An testimonium reddis Jesu Christo per abnegationem propriæ voluntatis? Vir obediens loquetur victorias. An testimonium Jesu Christo reddis per mortificationem carnis! Virgines sequuntur Agnum, quocunque ierit. Dole, quod saltem in Martyrio spirituali omni Religioso ad salutem tam necessario Proto - Martyrem nostrum non secutus fueris. Propone illum imitari

1. Per abrenunciationem sæculi,
2. Per abnegationem propriæ voluntatis,
3. Per mortificationem carnis.



DIES VI.

De Avaritiæ malo.

Non subripiat avaritiæ malum. Cap. 57. v. 7.

PUNCTUM PRIMUM.

Longe abfuit à Ss. Patre nostro avaritiæ malum, qui omnia pauperibus ipsumque unicum, quod supererat, oleum noto illi Diacono elargitus est. Hac de causa statuit: *Non subrepat avaritiæ malum.* Avaritia quippe malum est; quia virtutes impedit. Qui enim avaritiâ semel infectus est, nullam de cætero veritatem, nec umbram humilitatis, charitatis, aut obedientiæ retinet. Indignatur ad omnia, atque ad singula ope-

ra sibi injuncta murmurat, ac suspirat. Non contentatur victu quotidianô, & solitô indumentô. Nullam servat reverentiam, sed fertur ad præcipitium vitiorum absque fræno; haud secûs, ac equus indomitus ad interitum. Agitur equidem semper magis, ac magis accensus sui affectione peculii, ut ipsius mens totaliter cogitatione, & appetitu lucri occupetur. Hinc miserabilis Monachus deceptus cogitat illa possidere in Monasterio, quæ nec ante possidebat in sæculo. Nî velis & tu omnibûs exspoliari virtutibûs, omnem concupiscentiam rei cujuslibet terrenæ extirpa. Impossibile namque est, eum non majori concupiscentiâ pravi desiderii inflamari, qui victus in exigua materia cupiditatis radicem in suo conceperit corde.

PUNCTUM SECUNDUM.

N*on subrepat avaritiæ malum.* Avaritia malum est; quia origo plurimorum scelerum est. Charitatem namque fraternam lædit; dum enim semper plura requirit, indignatur, si fortè indigentiori quicquam conceditur. Et cùm se ex hoc despici arbitretur, nec ulli operi manus suas apponit, quod utilitas Monasterii necessariò fieri exigat. Talibûs igitur vitiorum, & aversionum incrementis in deterius tantùm quotidie avaritia crescit, ut pro libro, aliisque rebus minimis litigare non erubescat. Sanè
ejus-

ejusmodi Monachi ideo in cœnum avaritiæ labuntur; quia rursus desiderant, & resumant ea, quæ in exordio abrenunciationis suæ viriliter abjecerunt. Et nisi nuditatem priorem amplectantur, nullum erit vitium, quod pro cupiditate sua perpetrare verebuntur. Itaque, *non subripiat tibi avaritiæ malum.* Veritatis etenim effatum est; qui volunt fieri divites, incident in tentationes.

PUNCTUM TERTIUM.

Non subrepat avaritiæ malum. Avaritiæ malum est; quia duplici crematur igne; hic concupiscentiæ, ibi gehennæ. Ita Spiritus sanctus. 12. *Job.* 25. Ignis devorabit tabernacula eorum, qui munera libenter accipiunt. Tabernacula eorum namque sunt corpora eorum, quæ animæ eorum inhabitant. In his torquentur igne cupiditatis. Et tabernacula eorum sunt tenebræ exteriores. In istis cruciantur ignibus gehennæ. Hic ergo fatigantur in desideriis, & illic in tormentis, eisque de labore cogitationis, labor doloris nascitur; dum ab æstu avaritiæ ad æstum ignis æterni trahuntur. Et unde Monachis tantus interitus? Abs malo, & vitioso initio conversationis religiosæ. A principio se non penitus ab universis mundi cupiditatibus denudârunt. Hoc ipsum sanctus Basilius exprobravit Sincretio, qui de propriis facultatibus sibi met aliquid reservavit, nolens veram

ram humilitatem, paupertatem, & operis contritionem monastica subjectione acquire. Senatorem Sincretium aiebat perdidisti, & Monachum non fecisti. Tu, ne teipsum quoque perdas, omnia prius perde.

PUNCTUM QUARTUM.

AN igitur, ô Religiose! non concupiscis ea habere in Monasterio, quæ foris nunquam habuisses? A minore quippe usque ad maiorem omnes avaritiæ student: à Propheeta usque ad maiorem omnes avaritiæ student: à Propheta usque ad Sacerdotem cuncti faciunt dolum. An non priora saltem per concupiscentiam reassumis? Omnes in viam suam declinaverunt, unusquisque ad avaritiam suam, à summo usque ad novissimum. An non ab initio conversionis tuæ aliquam mundanæ substantiæ concupiscentiam tibi reservasti? Væ qui congregat avaritiam malam domui suæ, ut sit in excelsis nidus ejus, & liberari se putat de manu mali. Dole, quòd malum avaritiæ tantum dilexeris. Propone

1. Non concupiscere in Monasterio, quæ nec foris habere potuisses.
2. Non concupiscere, quæ jam semel reliquisti.
3. Nullam tibi ab initio reservare concupiscentiam alicujus terrenæ substantiæ.



DIES VII.

De probatione Spiritûs.

Probate Spiritus, si ex Deo sunt. Cap. 55. v. 2.

PUNCTUM PRIMUM.

Ista probatio Spiritûs, quam Ss. Pater pro Novitiis præscribit; *probate Spiritus, si ex Deo sunt*, non solum necessaria est ipsis noviter venientibus, sed etiam conversatione diutinâ Monasterii probatis. Sæpe quippe Angelus Sathanæ in Angelum lucis se transfigurat. Veri Spiritûs, qui es Deo est, hinc prima probatio est; *si illatas sibi injurias visus fuerit patienter portare*. Patientia enim opus habet perfectum, nec quidquam imperfectionis, aut falsitatis admittit. Hâc probantur homines, sicut aurum in fornace; in quo aurum semper à scoria secernitur. Quod si patienter adversa quis pati non potest, nunquam veram sibi promittat sanctimoniam. Talis Spiritus ex Deo non est, qui jubet crucem post se portari. Ex Deo non est, qui patientiam Filii hominis non imitatur. Sit ergo tibi suspectus omnis Spiritus, qui amorem crucis non spirat.

PUNCTUM SECUNDUM.

Probate Spiritus, si ex Deo sunt. Altera proba est, si Spiritus sit conformis S. Re-

B. 5. . . . gulæ.

gulæ. *Ecce Lex, sub qua militare vis: si potes servare, ingredi; si vero non potes liber discede. Quod si aliquando aliter feceris, à Deo te damnandum scias, quem irrides.* Ergo Spiritus conformis Regulæ ducit ad vitam; Spiritus vero difformis Regulæ ad damnationem. Pro quot non sub Schino falsæ, & fucatæ perfectionis aliena instituta sequuntur; & in fine decipiuntur? Quot non triam viam declinant, ac in via ignota gradiuntur, cum Prophetâ dicentes: Singulariter sum ego; donec transeam; & totò cœlò aberrant? Quot non altiora supra vocationem suam æmulantur charismata; & præsumptuosi, qui voluerunt nidum suum ponere in cœlo, pereunt in cœno? Sittibi igitur suspectus omnis Spiritus, qui spiritum Ss. Patris tui non spirat.

PUNCTUM TERTIUM.

Probate Spiritus, si ex Deo sunt. Tertia probatio Spiritûs est, si in bono perseveret. Hoc denotat Ss. Pater dum ait: *promittat de stabilitate. Sciat, lege Regulæ constitutum, quod ei ex illa die non liceat de Monasterio egredi. Ut si aliquando suadente Diabolo consenserit, ut egrediatur de Monasterio (quod absit) tunc exutus rebûs Monasterii projiciatur.* Sic quippe Spiritus Sathanæ instigat ad instabilitatem. Unum enim post aliud bonum Opus suadet; donec præter vitium

vitium inconstantia nihil remaneat. Et quem tam facilem in mutandis piis exercitiis invenit, etiam faciliter ad deferendam vocationem suam abducit. E contra Spiritus Dei ad perseverentiam perpetuò allicit. Quid enim aliud, quàm salutem quæreret, qui omnes homines vult salvos fieri? Qui autem perseveraverit usque in finem, hic salvus erit. Sit proinde tibi suspectus omnis Spiritus, qui Spiritum stabilitatis tibi non inspirat.

PUNCTUM QUARTUM.

AN ergò, ô Religiose! probas Spiritum tuum, utrùm Dei, & Ss. Patris tui sit, per patientiam? Probasti nos Deus: igne nos examinasti, sicut examinatur argentum. An probas Spiritum per conformitatem ad Regulam? Quicumque secuti fuerint hanc Regulam, pax super illos. An probas Spiritum per stabilitatem in bono? Deus confirmabit vos in finem sine crimine. Dole, quòd sapias alio, quàm Dei Spiritu ductus fueris. Propone Spiritum tuum crebrò probare, an Deo, & Ss. Patre tuo sit

1. Patientiâ,
2. Conformitate ad Regulam,
3. Perseverentiâ in bono.



DIES VIII.

De vitandis suspicionibus.

Non sit nimis suspiciosus. Cap. 64. v. 21.

PUNCTUM PRIMUM.

Merito Ss. Pater N. hortatur : *Non sit nimis suspiciosus.* Suspicio enim tollit quietem animi. Hinc statim subjungit ; *quia nunquam requiescet.* Modò enim hoc , modò aliud malum sibi imminere levi de causa suspicabitur. Modò ista , vel illa prospera sibi ex vano præfagiet. Unde perpetua cordis instabilitate agitur. Nunc prosperis elevatur. Nunc adversis deprimitur. De ejusmodi rectè Spiritus sanctus ait : Non est pax impiis. Semper quippe eadam cupiditate , vel formidine torquentur , quam suspicantur. Et nisi timorem Dei , atque humilitatem assuescant , nunquam requiescent. Super quem enim requiescet Spiritus pacis , nisi super humilem , & quietum , & trementem verba ejus ?

PUNCTUM SECUNDUM.

N*on sit nimis suspiciosus.* Suspicio namque tollit amorem , & unitatem cum proximo. Cum suspicioso enim quis conversabitur ? Cavendus planè est instabilis , ac suspicio-

suspiciosus amicus ; quia fructus amicitiae est securitas. Quomodo credendum amico, qui omni circumfertur ventô , qui molli comparatur luto omnium formas in se suscipienti ? Quid etiam magis competit amori , & unitati , quàm continua tranquillitas cordis , cujus expers est omnis suspiciosus ? Quales in semetipso concipit suspiciones , tales etiam erga proximum format affectiones. Unde cum in semetipso nunquam quiescat , etiam alios quiescere non permittit.

PUNCTUM TERTIUM.

N*on sit suspiciosus.* Pacem equidem turbat cum Deo. Meritò enim offenditur Deus ; quandò homo iudicium Dei sibi arrogat. Ipse solus scrutatur renes , & corda. Ipse novit abscondita. Ipsi soli confitebitur cogitatio hominis. At suspiciosus levi ex causa præsumat proximum iudicare. Prò ! quis homo iudicat de homine ? Temerariis iudiciis plena sunt omnia. De quo desperavimus , subitò convertitur , & fit optimus. De quo præsumpsimus , subitò deficit , & fit pessimus. Nec timor noster certus est , nec amor noster certus est. Quid sit hodie quisque homo , vix novit ipse homo : ramen utcunque ipse sit hodie ; quid autem cras ? Nec ipse. Justè igitur iudicat Deus hominem suspiciosum , quandò temerariè divinum sibi assumit iudicium. Et quodnam illud est Dei
judi-

judicium? In ea, de quibus proximum judicat, peccata labi permittit.

PUNCTUM QUARTUM.

AN ergò, ô Religioſe! fugis ſuſpiciones, quia pacem internam perturbant? Cogitavit Abraham, quòd forſitàn non ſit timor Dei in Geraris, & homines illius terræ eum occiderent propter uxorem ſuam. An fugis ſuſpiciones, quia pacem cum proximo perturbant? Dum Uxor Putipharis pallium Joſeph Domino ſuo monſtràſſet, valdè iratus eſt contra Joſeph. An fugis ſuſpiciones; quia pacem cum Deo perturbant? Cùm vidiffent barbari pendentem viperam in manu Pauli, adinvicem dicebant: utique homicida eſt hic. Dole, quòd toties per ſuſpiciones pacem amiſeris. Propone eas vitare,

1. Ut pacem tecum,
2. Pacem cum proximo,
3. Pacem cum Deo conſerves.



DIES IX.

De peccato omiſſionis Religioſorum.

Scientes pro hoc ſe recepturos mercedem bonam, ſi faciant, ſicut è diverſo peccatum, ſi negligent. Cap. 64.

v. 7. & 8.

Pun-

PUNCTUM PRIMUM.

SCientes pro hoc se recepturos mercedem bonam, si faciant; sicut e diverso peccatum, si negligent. Hicce Ss. Pater nos cautos facit, ne solum peccata commissionis, sed quàm maximè omissionis vitemus. Eò frequentius enim perpetrantur, quò occultius nobis insidiantur. Numerà omissiones actuum interiorum, quos S. Regula omni horâ, vel omni die, vel semper eliciendos præscribit: Prò! quantum numerum inibis? Et non timeas? Sint minimæ licèt negligentia; an nescis, quia qui spernit modica, paulatim decedit? Certè, qui minimas negligentias quotidie fere, ac devitare negligit, non quidem repente, sed partibus totus cadit. Tantum quippe quotidie de gratiâ illi decedit, quantum negligentia in exercitio præscriptarum virtutum admittit. O Deum meum immortalem! ista peccata hucusque non agnovi. Ab occultis meis munda me Domine!

PUNCTUM SECUNDUM.

SCientes pro hoc se recepturos mercedem bonam, si faciant; sicut e diverso peccatum, si negligent. Numerà omissiones in exercitiis externis, prò! numerum invenies sine numero? Et non timeas: quia oculis tuis magis sunt abscondita; quin commissiones? Certè hoc agit sentina latenter excreescens,
quod

quod patenter procella defæviens. Paulatim navim mergit eò periculosius, quò occultius. Aperta peccata etiam plangimus, & non nunquam emendamus: occulta nec deflemus, nec vitamus. Hinc est, quòd nos per contemptum in profundum vitiorum demergant. O Domine! quis salvus fiet, cum ad judicandum veneris? Reverà apud homines est impossibile. Ab occultis meis munda me Domine.

PUNCTUM TERTIUM.

SCientes pro hoc se recepturos mercedem bonam. si faciant; sicut è diverso peccatum, si negligant. Numeram omissiones in officiis, & functionibus tuis, prò? qualis numerus erit? Quantum inde detrimentum. Religio, substantia Monasterii, animæ &c. tu ipse non patiaris? An nescis illud, quò Ss. Pater tuus Abbatem adhortatur; *Sciat Abbas culpæ pastoris incumbere, quidquid in ovibus paterfamilias utilitatis minùs potuerit invenire?* Idem tibi dictum reputa. Non solum discutiet peccata omissionis, quæ per neglectum præceptorum incurristi, sed etiam illas negligentias, quibùs profectum impedisti. O quantum in morte ista te gravabunt peccata? Erunt quasi moles cordi tuo superposita. Nullam tunc anima tua inveniet requiem. Coangustabunt eam undique inimici ejus. Ergò nunc deplora peccata tua. Evita negligentias. Sæpiùs cum Prophetâ ora. Ab occultis meis munda me Domine!

Pun-

PUNCTUM QUARTUM.

AN ergò igitur, ô Religiose! multos actus internos à sacrâ Regulâ præscriptos omittis? Miserere mei Deus, quoniam iniquitates meæ supergressæ sunt caput meum. An non subinde sine scrupulo unum, aut alterum exercitium externum omittis? Vir peccator adjiciet ad peccandum. An non plurima agenda in tuis officiis omittis? Peccator cum in profundum venerit, contemnit. Dole de tot omissionibus. Propone eas vitare

1. In actibus internis S. Regulæ,
2. In exercitiis externis;
3. In functionibus tuis.

~~~~~  
DIES X.

De vitanda anxietate.

Non sit anxius. Cap. 64. v. 21.

PUNCTUM PRIMUM.

**P**lissimus Pater, ut nemo ex suis tristitiâ absorberetur, cavet, *ne quis sit anxius*. Prima, & maxima anxietas oritur de peccatis commissis. Bona quidem est, si compunctiōnem pariat, & spem non auferat. At mala est, si in diffidentiam, & pusillanimitatem nimiam vergat. Tanta siquidem misericordia  
*Spir. S. Ben. P. IV. C Do-*

Domini est, ut dum quispiam peccator cum contritione, & amore sese ad Deum convertit, cuncta ejus peccata in immensæ benignitatis Dei abyssu citius absorbeantur, quam possit oculus aperiri, & claudi. Fasciculus stuparum in ingentem ignem missus non ita repente incenditur, quam repente Deus propter ineffabilem pietatem suam peccatori vere pœnitenti ignoscit. Si totus mundus globus foret, igneus, & in medium ejus fasciculus lini mitteretur; hic ex naturali suâ inclinatione non tam citò flammam reciperet, quam recipit abyssus miserationum pœnitentem. In illâ siquidem actione intercedit necessariò aliqua morula, quamvis fortassis imperceptibilis: at inter pœnitentem, & remittentem nulla penitus mora intervenit. Et quis ergò anxietur de peccatis præteritis, si verè doleat?

### PUNCTUM SECUNDUM.

**N***on sit anxius.* Altera anxietas oritur ex continuis, & gravibus tentationibus. At nec hîc ansiandum. Dæmon latrare potest, non potest mordere, nisi volentem. Non nocet sensus, si desit consensus. Quidquid præter voluntatem tuam sustines, non te perdet. Nullum vitium tibi dominabitur, furant licet caro, dæmon, & mundus; quamdiu in superioris mentis ratione quietus cum voluntate Deo adhæreas. Contemptu subinde faci-



faciliùs superantur tentationes,quàm multâ;  
 & magnâ resistentiâ. Planè si optio tibi dare-  
 tur, nequaquàm tamen vitiosis propensio-  
 nibûs deberes velle absolvi. Nónne ille est op-  
 timus pugil,qui vitiosas propensiones,& ten-  
 tationes superat? Vitiosæ propensiones, &  
 tentationes inducunt virtutes in animum,  
 nos in Dei servitio studiosiores efficiunt,men-  
 tem ad sui ipsius observantiam excitant, pur-  
 gant peccata præterita,à futuris præservant.  
 Profectò propter istas nullum pium exerci-  
 tium est omittendum. Jam inimicus, quod  
 intendit,assequeretur. Plus Deo placet opus  
 bonum cum talibus tentationibus peractum,  
 quàm sensibilis in illo consolatio. Et quis  
 tentationum laborem subterfugiat, aut an-  
 xius sit?

### PUNCTUM TERTIUM.

**N**on sit anxius. Tertia anxietas ex scrupu-  
 lis provenit. Aliquando enim usque ad-  
 eò perplexus est scrupulosus,ut nesciat, quid  
 de præteritis,quid de præsentibus actionibus  
 statuere debeat. Hinc raptus in diversa in  
 omnibus miserabiliter fluctuat. Timet ubi-  
 que peccatum, ubi peccatum non est. Et  
 dum unum vult vitare, centum alia sibi vi-  
 tanda esse,vel fuisse occurrunt. Tantâ enim  
 anxietate constringitur, ut ad ultimum inep-  
 tus sit ad omnia. Hanc ergo anxietatem præ-  
 cipuè proscribit Ss. Pater, quæ gratiam Dei

impedit. Nisi quis ergò in principio illi resistat, in immensum crescet. Solum ille mox ab eâ liberabitur, qui scit cæco modò Patri spirituali obedire. Si tamen permittente Deo ab eâ liberari non potes, porta hanc crucem patienter. Per hanc quoque sequèris Salvatorem ad coelum.


### PUNCTUM QUARTUM.

**A**N ergò, ô Religiose! nunquàm inordinatè anxius es propter præterita peccata? Miserationes Domini super omnia opera ejus. An nunquàm anxius es propter tentationes? Christum quoque tentavit Sathanas. An non anxius es propter scrupulos. Supra modum gravati sumus, supra virtutem, ita ut cederet nos etiam vivere. Dole, quòd mentis anxietati toties locum dederis. Propone

1. Non anxius esse propter peccata præterita,

2. Nec propter gravissimas, & continuas tentationes,

3. Nec demùm propter perpetuos scrupulos.



### DIES XI.

#### De Examine Nocturno.

Mala

Mala sua præterita cum lachrymis, vel gemitu quotidie in oratione Deo confiteri, de ipsis malis de cætero emendare.

Cap. 4. Instr. 58.

## PUNCTUM PRIMUM.

**D**um Ss. Pater nobis Instr. 58. *Mala sua præterita cum lachrymis, vel gemitu quotidie in oratione Deo confiteri, de ipsis malis de cætero emendare* præscripsit, etiam exercitium vespertinum, seu examen nocturnum commendavit. Ad hoc verò exigit primò, ut *in oratione Deo confiteamur*. Necesse enim est, ut Deo omnium bonorum largitori omni die pro iis omnibus, quæ in eo nobis data fuerint, feliciterve nobis evenerint, gratiarum actio succedat. Ingrato nulla amplius gratia dabitur, & auferetur ab eo gratia, quam habet. Nullò ferè peccatò sic irritatur Deus, atque ingratitudine. Etenim, si Ammonites & Moabites ita ab eo puniti sunt, ut post decimam generationem intrare in Ecclesiam suam eos prohibuerit; quia ingrati fuerunt Filiis Israël; quantum punientur, qui ipsimet Deo pro acceptis beneficiis gratias agere neglexerunt? Ne gratiâ Dei igitur excidas, gratus esto pro quotidianis beneficiis.

## PUNCTUM SECUNDUM.

**S**ecundò vult, ut *confiteamur mala nostra præterita*. Eadem confiteri non possu-

C 3

mus,



mus, nisi prius ritè ea exanimaverimus. Se-  
deat ergò mens tua Iudex in animam, & con-  
scientiam tuam. Adducas omnia peccata tua  
in medium. Scrutare quæ mala commisisti,  
quæque bona neglexisti. Attende diligenter,  
quantùm in Ss. Regulâ proficias, vel quan-  
tùm deficias. Quod si in dictis, factis, aut co-  
gitationibus tuis quoddam peccatum repe-  
rias, accusa, increpa, & castiga temetipsum, ne  
rursùm peccare præsumas. Hoc quotidie fe-  
cit, qui dixit; in cubilibus vestris compungi-  
mini, semetipsum ut postea Paulus dijudica-  
vit, ne judicaretur à Domino. Idem & tu  
facito, lætus quoque tribunali futuri iudicis  
assistes. Non enim judicabitur, qui semet-  
ipsum severè & sine excusatione peccati di-  
judicaverit.

### PUNCTUM TERTIUM.

**T**ertiò præcipit; ut *mala præterita cùm la-  
chrymis, vel gemitu cordis Deo confitea-  
ris, & de cætero emendes.* Hisce contritio-  
nem, & propositum denotat. Parùm aut ni-  
hil proficit examen, nisi amaram contritio-  
nem, & propositum habeat adjunctum. Ex  
horum neglectu omnis in Religione defectus  
provenit. Quis enim ritè de præteritis do-  
leat, quis firmum habeat propositum, & ta-  
men se non emendet? Nonne ex defectu do-  
loris, & efficacis propositi fit, ut media emen-  
dationis nunquàm applies, semper iisdem in  
vitiis

vitiis maneat, in quibus antea fuisti? ut verè poeniteas; cogita dies antiquos, & annos æternos aliquantum in mente habeto. Qui sunt isti anni? Magna cogitatio. Hinc dices: nunc coepi. Hæc mutatio dexteræ excelsi; commendabis temetipsum cum tuo proposito in ardenti oratione Deo, B. V., Ss. Patri, atque reliquis Patronis tuis. Ita verò in pace requiesces. Sin aliter; quomodo soporari poterit anima tua, cum ignores, quâ horâ fur venturus sit?

#### PUNCTUM QUARTUM.

**AN** ergò, ô Religiose! quotidie vespere Deo gratias agis pro acceptis beneficiis? Hoc autem scito, quòd in novissimis diebus instabunt tempora periculosa, & erunt homines ingrati. An examen conscientie ritè instituis? Si nosmetipsos dijudicemus, non utique judicemur à Domino. An dolorosam contritionem, & firmum propositum elicis? Dixi; confitebor adversum me injustitiam meam Domino, & tu remisisti impietatem peccati mei. Dole, quòd hoc præstantissimum exercitium toties vel omiseris, vel sine fructu peregeris. Propone

1. Vespere Deo pro acceptis beneficiis gratias agere.
2. Conscientiam tuam severè discutere.
3. De peccatis verè dolere, & eadem de cætero emendare.



## DIES XII.

## De adulationis vitio.

II, qui adulantur partibus, eunt in perditionem. Cap. 65. v. 9.

## PUNCTUM PRIMUM.

**B**Enè Ss. Pater monet, *quod ii, qui adulantur partibus, eant in perditionem.* Est enim vitium frequens, quod neque Monasteriis parcat. In multis namque maximè hoc tempore regnat. Ducitur quippe humilitatis, ac benevolentiae locò; in tantum, ut qui adulari nescit, aut invidus, aut superbus putetur. Est sanè grande, & subtile artificium istâ ætate, laudare alterum in commendationem sui, & decipiendo sibi animum obligare decepti, quodque hoc vitio maximè agi solet, fictas laudes certò pretiò vendere. Venduntur equidem pro favore, pro gloriâ, pro commodo quotidie. O quàm insipientes sunt, qui istud pretium reddunt! scorpiones mercantur. Scorpio non mordet in facie, sed à posterioribus nocet. Et adulator in faciem laudat; mox vero, ut recesserit, derogat. Cave ergò ab adulatione; secùs ibis & tu in perditionem.



## PUNCTUM SECUNDUM.

**I***I, qui adulantur partibus, eunt in perditionem.* Est enim adulatio enorme vitium. Veloces quippe sunt pedes adulatorum ad effundendum sanguinem. Animas, dum ob peccatum laudant, etiam interficiunt. Dum peccatori propter malum peractum applaudunt, in malo eundem confirmant. Unde in actis Apostolorum Paulus dicit: mundus sum à sanguine omnium; non enim subterfugi, quo minùs vobis annunciarẽ omne consilium Dei in vobis. O quàm crudelis est in semetipsum, qui adulationes recipit! Si namque conscientiam mordet veritas criminis, quid mihi proderit, si me continuùs laudibùs totus mundus attollat? Nec malam conscientiam sanat præconium laudantis, nec bonam vulnerat conviciantis opprobrium. Corripiet ergò me iustus in misericordiâ, & increpabit me; oleum autem peccatoris non impinguet caput meum.

## PUNCTUM TERTIUM.

**I***I, qui adulantur partibus, eunt in perditionem.* Est enim adulatio perniciosum vitium. Etiam adulatoris animam occidit quando laudat peccatum alterius. Hinc Prophetã ait: si videbas furem, currebas cum eo, & cum adulteris portionem tuam ponebas. Hoc dicit, non quòd fecerit furtum, vel adulteri-

C s. . . . . um;

um; sed quia placito suô concurrit, & portionem suam laudando posuit. Sic quoque ait: os tuum abundavit malitiâ, & lingua tua concinnabat dolos. Malevolentiam, & dolo-  
 sitatem quorundam hominum dicit, qui per adulationem, quamvis sciant mala esse, quæ audiunt, ne offendant eos, à quibus audiunt, non solum non reprehendendo, sed tacendo consentiunt. Consentiendo autem in foveam, quam foderunt, cadunt. Ah! Nemo gratuletur homini, qui prosperatur in viâ suâ, cujus peccatis deest ultor, & adest laudator; major hæc ira Dei est. Irritavit Dominum peccator, ut ista patiatur, id est, ut correctionis flagella non patiatur. Caveat quivis ab adulationis vitio, ne cum eo eat in perditionem.

### PUNCTUM QUARTUM.

**A**N igitur, ô Religiose! fugis adulationis vitium; quia malum frequens est? Videns Herodes; quia placeret Judæis, apposuit, ut apprehenderet & Petrum. An fugis adulationis vitium; quia malum enorme est? Melius est à sapiente corripì, quàm stultorum adulatione decipi. An fugis adulationis vitium; quia malum perniciosum est? Neque enim fuimus aliquando in sermone adulationis, sicut scitis. Dole, quòd hoc iniquissimò vitio etiam infectus fueris. Propone fugere adulationis vitium,





lis, qui omnes alios libros frequentius, quàm Regulam suam, quàm librum vitæ suæ legunt! nōne timendum iplis, ne in eo non scripti inveniantur?

## PUNCTUM SECUNDUM.

**H***anc Regulam sæpius volumus in Congregatione legi.* Regula etenim ducit ad perfectionem. Qui strenuè eandem observat, & si subinde aliquod illius mandatum transgrediatur, tamen semper ad perfectionem tendit; dummodò media contra transgressionē præscripta ex Regulâ diligenter applicet. Qui verò perfectionem suam aliundè, quàm ex Regulâ suâ quærit, omnia, quæ agit, ei ad defectum, non profectum cedunt. Jugiter enim illa agenda sunt, quæ Deus, & sacra Professio à nobis requirunt. Initium quippe viæ bonæ, testante Spiritu sancto, facere iusta: accepta autem Deo magis, quàm immolare hostias. Quid namque iustius, quàm Deo reddere, quod promisisti? Quid acceptius, quàm in iustitiâ coram Deo incedere? Ne ergò credideris per voluntaria sive oris, sive operis, sive cordis à te perfectionem obtineri posse, nisi prius Regulæ tuæ satisfeceris. Ita præceptum Domini præcipit: ambulate in eâ neque ad dexteram, neque ad sinistram; via recta est vobis, ita, ut stulti non errent per eam. O quis non semper in mente, in ore, in manu habeat Regulam.

Pun-


## PUNCTUM TERTIUM.

**H***anc Regulam sæpiùs volumus in Congregatione legi.* Regula equidem infallibiliter te perducit ad vitam æternam. Tota namque dirigitur ad charitatem. Hæc est enim charitas Dei, ut mandata ejus custodiamus. Ethæc est charitas, ut ambulemus secundum mandata ejus charitas autem est semen gloriæ æternæ, quæ nunquam evactiatur. Cur igitur non continuò legas S. Regulam tuam? Ipsa te custodit à peccato, & si peccasti remedium statim contra peccatum suggerit. Ipsa te dirigit ad perfectionem. Ipsa te ad vitam ducit æternam. O quàm infelix, cæcus, & miser es, si alium librum libentiùs, aut frequentius legis, quàm illum, ex quo salus tua, & vita pendet æterna?

## PUNCTUM QUARTUM.

**A**N igitur, ô Religiose! sæpiùs S. Regulam legis; quia te obligat sub peccato? Si aliter feceris à Deo te dampnandum scias, quem irrides. An crebrò S. Regulam legis; quia te ad perfectionem tuam ducit? Perfecti estote, sicut Pater vester cœlestis perfectus est. An crebrò S. Regulam legis; quia te perducit ad vitam æternam? Facientibus hæc regna patebunt superna. Dole, quod tam rarò S. Regulam legas. Propone sæpiùs S. Regulam legere,

1. Ut peccatum evites,
2. Ut perfectionem acquiras,
3. Ut ad vitam pervenias æternam.



## DIES XIV.

Quidnam Monachus in itinere vitare  
debeat?

Revertentes de viâ Fratres ab omnibus pe-  
tant orationem propter excessus, ne quid  
fortè subriperit in viâ visûs, aut auditus  
malæ rei, aut otiosi sermonis. Cap.

67. v. 3. & 4.

## PUNCTUM PRIMUM.

**D**um Ss. Pater revertentibus de viâ Fratri-  
bus orationem propter excessus præscri-  
bit, etiam exeuntibus de Monasterio præci-  
pit, ne patiantur, ut ipsis *fortè quid subripiat  
visus malæ rei*. Quàm citò enim oculus con-  
cupiscentiam cordis sequitur? Quàm citò  
oculus concupiscentiam cordis generat. Un-  
de in Job scribitur; si secutus est oculus cor  
meum: & pepigi fœdus cum oculis meis,  
ut ne cogitarem quidem de virgine. Sicut  
namque sæpè tentatio per oculos trahitur,  
sic nonnunquàm concepta intrinsecùs, com-  
pellit sibi extrinsecùs oculos deservire. Nam  
plerumque res quælibet innocenti mente re-  
spi-



spicitur, sed ipso conspectu animus concupiscentiæ gladiò confoditur. Non enim David Uriæ conjugem ideò studiosè respexit; quia concupierat: sed potius ideò concupivit; quia incautè respexit. Fit verò rectæ retributionis examine, ut qui exteriori negliger utitur oculò, interiori non injustè cæcetur. Quòcunque autem modò oculis abutamur, cogitationis immunditia protinus ad operationem transit, ut Job primæ suæ assertioni mox adjungit, etsi in manibus meis adhæsit macula. Scis, quàm gravem tentationem ex incauto aspectu foeminæ passus sit Ss. Pater tuus. Cautè igitur claude oculos tuos, ne mors per fenestras intret, aut exeat. Hinc quoque iter arrepturus sollicitè *omnium Fratrum, vel Abbatis orationi te commenda*; atque saltem manè in itinere constitutus illam *commemorationem omnium absentium, quæ semper ad orationem ultimam operis Dei fit*, devotè offer, *ne quid fortè per diem tibi subripiat visus malæ rei.*

## PUNCTUM SECUNDUM.

SECUNDò præcipit Ss. P. N., ne itinerantes patiantur, ut *ipsis subripiat quid auditus malæ rei.* Sic enim verba proximorum audiendo quotidie sumimus in mente, sicut flando, atque respirando aërem trahimus corpore. Et sicut malus aër assiduo flatu tractus inficit corpus, ita perversa locutio assiduo audita in-

infirmantium inficit animum, ut tabescat delectatione pravi operis, & assidui iniquitate sermonis. Sæpè namque carnalium verba, dum se importunè nostris auribus ingerunt, in corde bellum tentationis gignunt. Respuat hæc licèt ratio, & lingua reprehendat, cum labore tamen intùs vincitur, quod foris cum auctoritate dijudicatur. Unde necesse est, ut nec ad aures veniat, quod inens à cogitationis aditu vigilans repellat. Sancti igitur viri, cum æternitatis desiderii anhelant, in tantam altitudinem vitæ se sublevant, ut audire jam quæ mundi sunt grave sibi, ac deprimens pondus credant. Valdè namque insolens, atque intolerabile aestimant, quidquid illud non sonat, quod intùs amant. Hos si secutus non es in itinere, saltem *revertens de viâ pete orationem propter excessus.*

### PUNCTUM TERTIUM.

**T**ertiò præcipit Ss. P. N., ne itinerantes patiantur, ut *ipsis quid subripiat otiosi sermonis.* De omni enim verbo, quod locuti fuerint homines, reddent rationem. Reccedant igitur de ore nostro vetera otiosa verba, ut cum damnatæ vetustatis culpa etiam à sermone compescitur, in novi hominis pulchritudinem transeamus. Quod profectò si contemnimus, audiamus. Et ipsi præparantur cogitationes. Quasi à minori culpâ nos terreat, dicens: hinc otiosa loquentes cogitent,

tent, quam metùere culpam locutionis debeant, si is, cui loquendo delinquitur, etiam cogitationum excessus ad iudicii sui examen servat. Etenim quantò majoris culpæ erit otiosa loqui, quàm cogitare Monacho, de quo toties, & graviter scandalizantur sæculares? Si igitur & in hoc excessisti, saltem *revertens de via non præsumas aliis referre, quæcunque foris Monasterium videris, aut audieris, quia plurima destruetur est.*

#### PUNCTUM QUARTUM.

AN ergo, ô Religiose! oculos bene claudis? Infatiabilis oculus cupidi in parte iniquitatis. An aures concludis? Nonne auris verba dijudicat? An otiosos sermones vitas? Qui nescit refranare linguam suam, hujus vana est Religio. Dole, quòd toties hîsce modis deliqueris. Propone

1. Oculos benè clauderè.
2. Aures sepîre.
3. Otiosos vitare sermones.



#### DIES XV.

##### De vitanda Præsumptione.

Vitetur in Monasterio omnis præsumptionis  
occasio. Cap. 70. v. 1.

*Spir. S. Ben. P. IV.*

D

PUN-



## PUNCTUM PRIMUM.

**M**erito Ss. Pater noster præcipit, *ut vitetur in Monasterio omnis præsumptionis occasio.* Est enim ista præsumptio injuriola Superiori. Illi quippe divinitus data est potestas, & judicium à Deo, & nulli alteri. Ipsi à Deo injunctum est: audite illos, & quod justum est, judicate; quia Dei judicium est. In tantum equidem licitum est judicium hominis, in quantum procedit ad illud autoritate Divina. Et ne quis se intromitteret potestati alterius, aut potestatem sibi super alium arrogaret; vel propter damnum, vel propter fructum, qui inde provenit, Apostolus ejusmodi præsumptionem retundit; Domino suo stat, aut cadit. O maximam planè injuriam! ô intolerabilem superbiam! & tamen quoties contingit, si non actu saltem verbò, si non verbò, saltem judiciò ista præsumptio exercetur, dum quisvis melius alios regere, & instruere cogitat, dicit, attentat? Sanè Patres antiqui subesse omnes certabant, unde unus Superior aliqua millia velut unum regere Monachum poterat, cum modò unus vix aliquot propter præsumptionem quietè regere possit.

## PUNCTUM SECUNDUM.

**V**itetur in Monasterio omnis præsumptionis occasio. Etenim ista præsumptio est Inju-

injuriola proximo. Dum enim imperium super alium assumit, super quem jus nullum ei competit, nonne injuriosam tyrannidem in illum exercet? Nonne injurius est, qui imperiosis verbis, & duris mandatâs fratrem suum velut servum excipit, & tractat? Talem imperiosum hominem, quis æquô animô semper sustinere poterit? Profecto nullus non celerius injuriam remitteret, si caderetur, quàm si ita contemneretur. Merito taliter *peccantes coram omnibus arguuntur, ut ceteri metum habeant*: nam hac præsumptione, teste Gerardo Belgâ charitas, & pax Coenobii pebitus interit, & mutuâs plerumque vulneribus Frater uterque concidit. Ne unquam hoc præsumptionis Spiritu inflectis, cogita; *quia scriptum est: quod tibi non vis fieri, alteri ne feceris.*

## PUNCTUM TERTIUM.

**V**itetur in Monasterio omnis præsumptionis occasio. Est enim ista præsumptio injuriola ipsi præsumenti. Nemo quippe manifestius stultitiam, vel insaniam suam prodit, quàm qui privatus, velut in magistratu se gerit. Nullus se ipsum risui, & contemptui magis exponit, quàm qui sibi potestatem arrogat, quàm non habet. Imparè namque cum ei non pareatur, quid aliud sperabit, nisi contemptum, & despectum imperii sui? Et cum vix quis obediat Superiori legitimo;

quomodo obediēt Domino illegitimo? Pone igitur ambitionem tuam. Si vel uni præesse, aut dominari affectas, ipsi Christo præire affectas. Hac verò intolerabili superbiâ nūquid non ipsum Luciferum superas? Iste solum altissimo voluit esse similis? tu superior. Time hinc & illius lapsum.

### PUNCTUM QUARTUM.

ANigitur, ô Religiose! tua præsumptione nullam injuriam inferis Superiori tuo? Omnis potestas à Deo est constituta. An non tua præsumptione injuriam inferis Confratri tuo? Quis te constituit judicem ejus. An non tua præsumptione injuriam inferis tibi-  
met ipsi? Superbum sequitur humilitas. Dole de tua præsumptione. Propone

1. Nec Superioribus,
2. Nec Confratribus,
3. Nec tibi ipsi per præsumptionem injuriosus esse.



### DIES XVI.

De mutua Fratrum obedientia,

Sibi invicem obediānt Fratres. Cap. 71. v. 2.

### PUNCTUM PRIMUM.

O Dignum tanto Patre præceptum? *Sibi invicem obediānt Fratres!* Superioribus



ribus etenim obedire, quis recuset, nisi qui Religiosum, imò & Christianum exuere velit; *qui vos audit, me audit?* At obedire æqualibus, aut etiam inferioribus hoc profectò maximæ subjectionis est. Vide ergo, qualiter hanc obedientiam præstes, & quid in ea semper vites, Ut omnibus obedias, omnes juxta Apostolum tibi Superiores æstima. Tunc quippe solida pax in Cœnobio, quando quisque colitur pro Domino, quisque se alteri exhibet pro servo. Et verè felix, & digna est servitus, quâ quis redditur sui ipsius Dominus. Et planè hic dominatur omnibus, qui omnium servit moribus. Sic à quovis colitur, & exambitur, ut sibi convenientissimus. Facile autem etiam injurias, & convitia patitur, qui dominis suis ita licere, & decere arbitratur. Et revera hic in terris jam cælum reperit. Reperies & tu, si occasionem aliis obediendi, & serviendi sponte quæras morosiorum voluntati, & sensui te libenter accommodes, & honorem, amorem, atque servitium non tam offeras, quàm impendas. Ita cum *omni charitate, & sollicitudine obedies. Itaper hanc obedientiæ viam ibis ad Deum.*

PUNCTUM SECUNDUM.

*Sibi invicem obediant Fratres; præmissò tamen Abbatis, aut Præpositorum, qui ab eo constituuntur imperio, cui non permitti-*

*mus privata imperia præponi.* Et ô pulchrum ordinem ! primo quidem respici Superiorem, exin à juniore revereri Seniores, denique omnes obedire sibi invicem, adeoque nullum ab hac lege exsortem, omnes ad eandem destinari libertatem, & servitutem. Hunc ordinem invertunt, qui potius privato ex amore agunt, quod *Confratri*, quàm Superiori placet. Hunc ordinem dehonestant, qui plùs juniorum, quàm Seniorum reverentur imperia. Hunc ordinem despiciunt, qui superbò superciliò omnibus dominari gestiunt. Sed ô æternum, ô æternum infelices, qui hunc non tenuerint ordinem ! *sciunt, quia per hanc obedientiæ viam non sint ituri ad Deum.* Ad quem vero deinde ibunt?

### PUNCTUM TERTIUM.

*Sibi invicem obediant Fratres.* Ad hoc oportet, ne quis contentiosus reperiatur. Nunquam enim ritè vel Superiori, vel Seniori, vel juniore obediunt, qui sensui suo in omnibus credit, atque illum aliorum sententiæ præfert. Ab omni vera obedientia extorris est, qui velle suum in omnibus adimpleri vult. O quàm magnum incendium Cœnobii contentio non est ? Omnem pacem, charitatem, & mutuam obedientiam absumit. Planè nil differt ab incendiario, qui contentit. Imò quantò periculosius contentionis ignis, quàm elementaris grassatur, tan-

tantò majoricum periculo contentiosus toleratur. Tu ne tam infami, & summè omnium nocivò incendiò Monasterium tuum, domum Matris tuæ Ss. Religionis incendas, præ omnibus assuesce, nec opinione, nec verbulò, nec nutu, nec opere contrariò cuiquam contradicere, aut contravenire. Ad hoc cogita, quòd cùm obedientiam secundum Regulam Ss. Patris Benedicti voveris, etiam omnibus sine contradictione subesse promiseris.

#### PUNCTUM QUARTUM.

**AN** igitur, ô Religiose! omnibus obedis? Superiores invicem æstimate. An in ista mutua obedientia caves, ne juniorum imperia Superiorum, aut Seniorum iussionibus anteponas? Obedite Præpositis vestris, & subjacete eis. An caves, ne contentiosus cuipiam, & in aliquo reperiaris? Si contentiones sunt inter vos, nonne animales estis? Dole igitur, quòd animum, studiumque totum huic S. Obedientiæ necdum addixeris. Propone

1. Obedientiam omnibus impendere;
2. Non tamen Superiorum imperiis alias iussiones praponere,
3. Aut in aliquo contentiosus esse.





## DIES XVII.

## De vera Devotione.

Zelum ferventissimo amore exercent Monachi. Cap. 72. v. 3.

## PUNCTUM PRIMUM.

**Z**elus, quem Ss. P. N. *ferventissimo amore exercere Monachos* vult, aliud non est, quàm devotio. Devotio quippe est prompta, & fervida voluntas serviendi Deo. Hinc primò verus devotus semper curat esse devotior. Figura veræ devotionis est scala Jacob. Vidit Jacob in scala Angelos ascendentes & descendentes. Nunquid stantem quempiam, aut sedentem? Non est stare omnino in pendulo fragilis scalæ, neque in incerto hujus mortalis vitæ quicquam in eodem statu permanet. Non habemus hîc manentem civitatem, nec futuram adhuc possidemus; sed inquirimus. Aut ascendas necesse est, aut descendas: si attentas stare, ruas, necesse est. Minimè pro certo devotus est, qui devotior esse non vult. Et ubi incipis nolle fieri devotior, ibi etiam desinis esse devotus. Voluntas etenim serviendi Deo, cum prompta, & fervida est, semper ambit meliora charismata. Nec contenta est mandata servare, sed etiam libenter, cum gaudio, & magnanimitate, atque profectu, eadem observat.

PUN-

## PUNCTUM SECUNDUM.

**Z**elum ferventissimo amore exerçant Monachi. Hinc secundò verus devotus æquè in adversis, quàm prosperis devotionem suam exhibet. Vera enim devotio in vera sui ipsius submissione, resignatione, abnegatione, ac nihili pensione sita est potius, quàm in sensibili sapore, & dulcedine. Certè multis ad salutem utilius est, ariditatem, amaritudinemque cordis sentire, quàm affectuosa desideria, & suavitatem. Magna subinde in hisce & naturæ, & dæmonis deceptio est. Ille Deo valdè placet, qui fide, & amore divino plenus, quamvis totus aridus, tentatus, & desolatus, juxta divinum beneplacitum ad Dei gloriam universa S. Regulæ præcepta, quantum potest libenter exequitur. Nimis infidelis Deo est, qui quandò Deus illum consolatur, Deo servire, ejusque mandata servare vult: sed quandò spiritali consolatione destituitur, mox à Deo recedit, & præcepta sacræ Regulæ parvi pendit. Nonne talis nunquam veram devotionem obtinebit?

## PUNCTUM TERTIUM.

**Z**elum ferventissimo amore exerçant Monachi. Hinc verus devotus semper secundum fidem, spem, & charitatem ambulat. sine his enim virtutibus nulla devo-

tio esse potest. In his consistit vita spiritua-  
lis, & spirituale perfectionis ædificium has  
tres habet portas. Unam scilicet ad Orien-  
tem, aliam ad aquilonem, tertiam ad me-  
ridiem. Porta in oriente est fides viva; quia  
per ipsam lux vera, & infallibilis nascitur in  
mente. Porta ad aquilonem spes firma;  
quia unusquisque, si hæsitaverit, & despe-  
raverit, funditus perit, si vero indubitato  
speraverit, habebit, quodcunque petierit  
ad salutem. Porta ad meridiem charitas;  
quia igne amoris ardet. In meridiana ete-  
nim parte sol in altum ducitur; & fortitu-  
do spei, in Dei & proximi dilectione suble-  
vatur. O qui tantum secundum fidem, spem,  
& charitatem viveret, quàm ingens deside-  
rium Deo serviendi jugiter haberet! ô qui  
per portas fidei, spei, & charitatis spiri-  
tuale perfectionis ædificium conscenderet,  
quàm subito ejus culmen attingeret? Ex ha-  
rum virtutum defectu venit, ut ferme sem-  
per, in devotione langueas, nec nunquam  
in ea perseveres.

#### PUNCTUM QUARTUM,

**A**N ergo, ô Religiose! veram habes devo-  
tionem semper proficiendo in melius?  
Nescit tarda molimina Spiritus S. gratia.  
An veram devotionem retines in adversis?  
Tentatio probat homines. An veram devo-  
tionem perennas per fidem, spem, & cha-  
rita-



ritatem? Nunc autem tria manent fides, spes, charitas. Dole, quod veræ devotioni hucusque non intenderis. Propone

1. Veram habere devotionem semper proficiendo,

2. Veram devotionem retinere in adversis,

3. Veram devotionem conservare per fidem, spem, & charitatem.



## DIES XVIII.

### De selectu Librorum.

Ad perfectionem conversationis sunt doctrinæ Sanctorum, Cap. 73. v. 2,

## PUNCTUM PRIMUM.

**V**aldè multum interest, qua librorum lectione quis utatur. Eundem equidem Spiritum legenti conferunt, quem in se continent. Unde Ss. P. N. verum suis instillaturus Spiritum Sanctorum, primò præscribit S. Scripturam: *quæ enim pagina, aut quis sermo divinæ authoritatis veteris, ac novi testamenti, non est rectissima norma vitæ humanæ?* Etenim cum S. Scriptura divino ore tradita sit, omnem veritatem, & perfectionem complectitur; dummodo eodem Spiritu, quò facta est, legatur. Nunquam equidem ingreditur in sensum Pauli, qui non usu bonæ intentionis in lectione ejus,

&

& studio assiduæ meditationis, ac piæ operationis Spiritum ejus imbiberit. Nunquam intelliget David, nisi ipsa experientia ipsos Psalmorum affectus induerit. Sicque de reliquis. Oportet quoque præ omnibus, ut mundo corde legatur; quia in animam malevolam non intrabit sapientia. O qui ita legeret, quam citò doctus, quam citò perfectus esset? Hôc legendi modò mirabilem planè scientiam & sanctitatem adepti sunt Ss. Patres in eremo; quamvis litteris nunquam vacaverint.

## PUNCTUM SECUNDUM.

**S**ECUNDò præscribit *doctrinas sanctorum Patrum.* Quis liber sanctorum Catholicorum Patrum hoc non resonat, ut recto cursu perveniamus ad Creatorem nostrum? Ubi enim magis gustes sumæ sanctitatis fructum, quam in libris Ss. Patrum, qui utique aliter non scripserunt, quam vixerunt? In ipsis verus Spiritus Christi semper viguit. Hinc Religiosis, qui ad *majora doctrinæ, virtutumque culmina* anhelant, præ cæteris omnibus legendi sunt. O quot non à vero Spiritu Christi, & Ss. Patris nostri deficiunt, qui laxas doctrinas, & conclusiones Neotericorum sive Ascetarum, sive Theologorum sequuntur? Planè miseri ac cæci in fine oculos aperient, quòd à cæcis ductoribus seducti, in summo cadendi in foveam infer-

infernî periculo sint constituti. Manebit semper S. Regulæ sua veritas : *Ecce lex , sub qua militare vis : si potes observare , ingredere ; si vero non potes , liber discede ; quia si aliquando aliter feceris , ab eo te damnandum scias , quem irrides.*

### PUNCTUM TERTIUM.

**T**ertiò præscribit collationes Patrum instituta , & vitas eorum , sed & Regulam S. Patris nostri Basilii. De his enim ait : *quid aliud sunt , nisi benè viventium , & obedientium Monachorum instrumenta virtutum ?* Ipsemet exactè eorum vitas , & doctrinas secutus est. Verè quippè mentem illuminant ad discernendum verum à falso , ad separandum pretiosum à vili , ad cognoscendum , quomodo in via Dei ambulare debeamus. Nec solùm vim intellectivam ad capiendum sensum validè occupant ? sed etiam vim affectivam mirò modò accendunt. Ipsi namque antiqui Monachi cunctis virtutibus , atque scientia perfecti , perfectionem desiderantibus & sermonem , & conversationem pro exemplo subministrant. Ubi enim aquam Divinæ Sapientiæ puriorem invenias , quàm quæ proximè fonte Apostolicæ Sapientiæ manat ?


### PUNCTUM QUARTUM.

**A**N ergo , ô Religiose ! præprimis legis S. Scripturam ? Quàm dulcia faucibus meis  
elo-



eloquia tua? An legis Ss. Patres? Ipsi Spiritu Dei pleni erant. An legis collationes, & vitas &c. Ss. Patrum. Nec displiceant tibi parabolæ Seniorum. Dole, quòd hucusque omni alteri lectioni magis intenderis, quàm illi, ad quam obligaris. Propono præprimis

1. S. Scripturam,
2. Ss. Patres,
3. Collationes &c. legere.



### DIES XIX.

Quòd Deus velociter adest his, qui in veritate quærent illum.

Antequam me invocetis, dicam vobis: Ecce adsum. Prolog. §. 2. v. 15.

### PUNCTUM PRIMUM.

**T**anta est Divinæ Bonitatis immensitas, ut teste Ss. Patre nostro his, qui in veritate quærent illum, *antequam ipsum invocent, dicat: Ecce adsum.* Unde oportet primò magnatib ipso sperare. Nihil quippe Deo magis proprium est, quàm magna tribuere. Ex hac spe omnia possibilia fiunt credenti? dummodo verè Deum quærat. Hinc Propheta ait; spera in Domino, & fac bona nitatem; & inhabita terram, & pascèris in divi-

divitiis ejus. Sperans etenim non debet esse otiosus, sed contemptis sæculi bonis inhabitare cor suum, ne spinis vitiorum, fructu verò virtutum, exuberet. Tunc equidem abundantissimè pascètur divitiis bonitatis Dei. Istud expertus est Ss. Pater noster; quandò vacua dolia, & horrea oleò, & frumentò per firmam suam fiduciam implevit, vel obstinatos Idololatrias ad fidem convertit, vel dæmones solâ inflicta alapâ fugavit. Magna & tu spera à Domino, omnia mox impetrabis; si tamen in veritate quæris illum.

PUNCTUM SECUNDUM.

**A** Ntequam me invocetis, dicam: Ecce adjum. Unde oportet secundò mox confugere in tribulationibus ad Dominum; statim namque eruet nos ex omni tribulatione. Deus enim refugium nostrum, & virtus, adjutor in tribulationibus est, quæ invenerunt nos nimis. Si equidem ad alia refugia confugis, ubi non est virtus, magis infirmaris, quàm confirmèris. Solus Deus refugium verum est; quia virtus est. Quò cum confugeris, mox firmus eris. Non enim tu, aut alius tibi fortitudo erit, sed ille solùm tibi fortitudo erit, qui tuum refugium factus est. Omnes quippe alii, quantumvis potentes, gratiâ ejus indigent, sine qua nihil omnino possunt, aut valent. Vides, cur tam diuturnis tribulationibus vexatus  
tuo

tus fueris. In veritate refugium tuum non quæstivisti. Ss. Pater tuus, quia in persecutione Florentii in Deo refugium quæstivit, per subitanæ hujus mortem in Deo adiutorium invenit.

### PUNCTUM TERTIUM.

**A***Ntequam me invocetis, dicam: Ecce adsum.* Unde oportet tertio beatitudinem suam petere. Non enim Deum in veritate quærit, nec Deus in cæteris omnibus petitis mox illi aderit, qui non præprimis Deum ipsum, unicam beatitudinem suam exquirat. Impleas equidem tu Domine eos, qui nihil aliud desiderant præter te, & facis dignos te, sanctos, immaculatos, qui omnia reputant, ut stercora, ut lucrifaciant te solum. Ecce! Domine Deus meus, summe; optime, omnipotentissime! inveni locum ubi tu habitas; quia in anima, quam creâsti ad imaginem tuam, quæ te solum quærit, & desiderat; quia non in illa, quæ te non quærit, & desiderat. Ergo erravi sicut ovis, quæ perierat, quærens te exterius, qui es interius, & multum laboravi quærens te extrâ me, & tu habitas in me, si tamen ego desiderem te. Quære igitur anima mea, Deum tuum in te, hîc, & in æternum beata eris; quia tibi semper præstò erit beatitudo tua.


PUN-



PUNCTUM QUARTUM.

**A**N ergo è Religioſe ? magna à Deo ſperas ?  
Quis ſperavit in Domino , & confuſus  
eſt ? An mox ad eum in tribulationibus con-  
fugis ? Exquiſivi Dominum , & ex omnibus  
tribulationibus meis eripuit me. An Deum  
ipſum toto corde petis ? Ego merces tua  
magna nimis. Dole de tua diſſidentia. Pro-  
pone

1. Magna à Deo ſperare ,
2. In tribulationibus mox ad Deum con-  
fugere.
3. Deum ipſum toto corde deſiderare , &  
in omnibus tibi ſtatim aderit.



DIES XX.

**De Timore incomprehenſibilium judi-  
ciorum Dei.**

Timorem Dei ante oculos ſemper ponens ,  
oblivionem omnino fugiat. Cap. 7. §. 2. v. 9.

PUNCTUM PRIMUM.

**T**Imor Dei ex nulla alia conſideratione ,  
quàm ex meditatione inſcrutabilis judi-  
cii Dei obtinetur. Judicia enim Dei abyſſus  
multa. Omnes eorum rationes Divinæ tan-  
tùm cogitationi reſervatæ ſunt , quibus ſin-

*Spir. S. Ben. P. IV.*

E

gula

singula dispensantur. Si namque quæris, cur peccatoris vita prorogetur? Cur justî inco-  
latûs dies abbrevientur? Quare injustus pro-  
speretur? Quare justus affligatur? Unde sint belal, unde naufragium, unde terræ  
motus, siccitates, immodici imbres? Un-  
de hic servus, ille liber, hic ditescit, ille  
pauperefcit? Quare hic optimos nactus vi-  
tæ moderatores salvatur, ille pessimis instru-  
ctoribus traditus, quasi per vim in peccato  
detinetur, & damnatur? Hæc sanè omnia,  
ubi inciderint menti tuæ, fac memineris;  
quia judicia Dei sunt abyssus multa, fac *Ti-  
morem Dei*, juxta monitum Ss. Patris tui,  
*semper ante oculos tibi ponas.*

### PUNCTUM SECUNDUM.

**O** Quàm incomprehensibilia sunt judicia  
Dei! multi ab Oriente venient, & re-  
cumbent cum Abraham, Isaac, & Jacob;  
filii autem regni ejicientur in tenebras exte-  
riores. Non solum Judæis hoc accidit; sed  
in multis quoque fidelibus. Nam Judas filius  
regni erat, audivitque cum aliis discipulis  
illud, sedebitis super sedes duodecim, fa-  
ctus est autem gehennæ filius. At vero Æthi-  
ops, quamvis barbarus homo esset, unus  
tamen eorum factus est, qui ab ortu, atque  
occasu erant, suntque venturi, ut cum  
Abraham, Isaac, & Jacob æternis bonis  
fruantur. Non ergo nimium confidant, qui  
stant,

stant, sed secum crebro illud repetant; qui stat, videat, ne cadat. Nec desperent, qui ceciderunt, sed dicant secum; nunquid qui cadet, non adjiciat, ut resurgat? Omnes sequantur hortamentum Ss. Patris, ut *timoris Dei oblivionem omnino fugiant.*

### PUNCTUM TERTIUM.

**O** Quàm tremenda Dei judicia! sunt multi, qui ad ipsius cœli ferè verticem conscenderunt, omnes virtutes numerò habuerunt, deserta, deviaque loca à vita hominum aliena coluerunt; & tamen negligentia lapsi ad vitiorum barathrum devenerunt. Contraque sunt non nulli, qui à vitiorum barathro commoti, cœlibem vitam acceperunt; tantumque virtute potuerunt, ut demones ejicerent, aliisque multis signis præfulgerent. Quamvis ergo nesciamus, quo judicio Deus ista vel faciat, vel fieri sinat, apud quem summa virtus est, & summa sapientia, summaque justitia, nulla infirmitas, nulla temeritas, nulla iniquitas; salubriter tamen discimus non magnipendere seu bona, seu mala, quæ videmus esse bonis, malisque communia, & illa bona quærere, quæ bonorum, atque illa mala maxime fugere, quæ propria sunt malorum. Judicium enim Dei justa omnia fuisse decernet. Ad hoc vero assequendum juvabit, ut quis ad mentem Ss. Patris nostri *animo suo semper*



*revolvat, qualiter contemnentes Deum in gehennam pro peccatis incidunt, & vitam æternam, quæ timentibus Deum præparata est.*

### PUNCTUM QUARTUM.

**AN** ergo, ô Religiose! ob inscrutabilia judicia Dei timorem illius jugiter tibi ante oculos tuos ponis? Initium sapientiæ timor Domini. An ob inscrutabilia judicia Dei oblivionem timoris Domini omnino fugis? Qui timet Dominum, nihil trepidabit. An ob inscrutabilia judicia Dei, atque timorem Domini declinas à malo, & facis bonum? Timor Domini odit malum. Dole, quòd tam raro memor sis judiciorum Dei, atque hac de causâ Dominum non timeas. Proponere ob inscrutabilia judicia Dei

1. Timorem Dei jugiter tibi ante oculos ponere, &
2. Oblivionem ejus omnino fugere, atque
3. Ideo declinare à malo, & facere bonum.

\*\*\*\*\*X\*\*\*\*\*

### DIES XXI.

**De fuga peccati ob ejus nocumenta.**

Custodiens se omni hora à peccatis, & vitiis. Cap. 7. v. 11.

PUN-

PUNCTUM PRIMUM.

**M**erito Ss. Pater noster nos hortatur, ut quisvis *se custodiat omni hora à peccatis, & vitiis.* Peccatum enim spoliat nos gratia Dei. O quantum est istud nocumentum! Ecce! Parentes nostri comederunt, & aperti sunt oculi amborum, & cognoverunt, quòd nudi essent. Nudati quippe propter peccatum supernæ gratiæ amictu, etiam sensibilis suæ spoliationis sensum acceperunt, ut per erubescentiam, quæ invadebat ipsos, certo scirent, in quantum periculum se adduxisset mandati Dominici prævaricatio. Ah! cogita hîc, quomodo & à quanto fastigio in profundum præcipitium dejecit illos Diaboli consilium. Tanta siquidem gloria dudum circumdati, nunc folia ficûs consuunt. Hoc diabolicæ deceptionis lucrum est. Hoc machinabatur illius consultatio, ut non solùm non majora conferret, sed & denudaret, & destitutos ab his, quæ habebant, ostenderet. Tantum malum est peccatum, ut non solùm nos à superna gratia alienos faciat, sed ad multam confusionem, & humilitatem nos deducat. Et cùm nos privat bonis, quæ jam possidebamus, omnem etiam fiduciam aufert. Fuge ergo peccatum quasi à facie colubri.

PUNCTUM SECUNDUM.

**J**ure *se quisvis custodiat omni hora à peccatis, & vitiis.* Peccatum enim spoliat quiete

conscientiæ. O quantum est istud nocumentum ! ecce tibi Cain ? vix Fratricidium commiserat , mox ingentibus conscientiæ stimulis adactus , egressus est à facie Dei. Non potuit amplius mala illius conscientia sustinere faciem Domini , neque semetipsam ferre ; sed profugus huc , illuc terram peragravit quærens requiem , & nullibi inveniens. Ita enim se habet peccatum , ut priusquam fiat , & ad opus perveniat , obtenebret , & decipiat mentem. Postquam autem consummatur , manifestè nobis suam absurditatem proferat , & ostendat. Unde brevis illa , & absurda voluptas peccati continuum menti dolorem inserit , conscientiæque fiduciam aufert , & confusione captam perfundit , tali peccatori neque somnus suavis , sed terrore , & formidine plenus ; neque cibus voluptatem præbet ; neque amicorum colloquia ab urgente anxietate liberant. Carnificem enim interius gestat se lancinantem , ita , ut post peccatum intolerabiles poenas sustineat , & iudex sui ipsius factus , & accusator. Fuge ergo peccatum quasi à facie colubri.

### PUNCTUM TERTIUM.

**R**Ecte se quivis custodiat omni hora à peccatis , & vitiis. Peccatum enim hominem mortuo deteriorem facit. O quantum est istud nocumentum ! ecce tibi Lazarum mor-




mortuum. Verbô Salvatoris resuscitatur ad vitam; at peccator verbô vitæ non sanatur. Nec mihi dices, non clausisse hunc oculos, nec in sepulchro jacere, nec institis detineri, nec postremo vermibus esse projectum; cùm multò pejoribus hic, quàm qui obierunt, vexetur. Non devorant vermes, sed perturbationes animi omni feroci bestiâ turculentiùs exagitant. Clausi oculi sunt mortuorum nihil prorsus cernentes; hic vero mille sibi morbos oculis cernendo quotidie contrahit. Ille jacet in monumento ad peccandum jam immobilis; hic in sepulchro malo à se ipso intrusus, ingenti peccatorum mole obruitur. Dices: sed hic corpus habet integrum? Magna res! si anima deperdita, & corrupta est. Quare tanto discrimine hòc melior est ille, quantò naturali solum corruptioni subjectus est; hic vero, antequam ad illam perveniat, quam non effugiet, peccatorum undique foedissimam putredinem sibi in dies colligit. Fuge ergo peccatum, quasi à facie colubri, quod tam infelicitè inficit, & perimit.

#### PUNCTUM QUARTUM.

**AN** igitur, ô Religiose! fugis peccatum; quia gratia Dei privat? Ecce parturit injustitiam, concepit dolorem, & peperit iniquitatem. An fugis peccatum; quia quiete conscientiae spoliatur? Non est ei bene, qui

est assiduus in malis. An fugis peccatum; quia mortem generat? Stipendia peccati mors. Dole, quòd peccatum hucusque non debito cum horrore vitaveris. Propone peccatum sumino perè fugere

1. Ob privationem gratiæ,
2. Ob inquietudinem conscientiæ,
3. Ob generationem mortis.



## DIES XXII.

### De vitanda mala consuetudine.

Custodiens se omni hora à peccatis, & vitiis. Cap. 7. v. 11.

### PUNCTUM PRIMUM.

**S**lab ullo vitio, aut peccato nos abstinere convenit, à nullo certe magis nos abhorreere oportet, quàm à peccato consuetudinis. Hinc bene Ss. Pater præcipit, ut *custodiamus nos omni hora à peccatis, & vitiis*; quia cum tempore augentur, & consolidantur, ut ipso usu fiant insuperabilia. Cum enim culpa in usum venerit, ei jam animus, etiam si appetat, debilius resistit; quia quot vicibus pravæ frequentationis adstringitur. quasi tot vinculis ad mentem ligatur. Tandem usitata culpa ita obligat mentem, ut nequaquam surgere possit ad reformationem. Conatur, & labitur: quia ubi diu

diu spontè perstitit, & ibi, cùm noluerit, quasi coacta cedit. Tenent etenim pravae consuetudines, quem semel ceperunt, atque quotidie duriores existunt: & non nisi cum peccatoris vitâ finiuntur. Peccata siquidem quamvis magna, & horrenda, cùm in consuetudinem venerint, aut parva esse, aut nulla creduntur, usque adeò, ut sine remorsu deinceps committantur. O quàm horrendus est usus peccatorum! cave, ne in hunc sam & tu venias.

## PUNCTUM SECUNDUM.

**C***ustodiat se omni bona à peccatis, & vitiis;* quia usus peccatorum est maxima pœna peccatoris, cùm dicat Propheta; Dominus immisit eis Spiritum erroris, ut faciant, quæ non conveniunt, sicut seducitur ebrius? An non usus peccati est pœna peccatoris, ubi Deo dicit Propheta: quid errare fecisti nos de viâ tuâ, obdurâsti corda nostra, ut non timeremus te? Sic multa commemorare possem, in quibus liquidò apparet, occultò Dei judiciò fieri, perversitate cordis, ut sit ipsum peccatum pœna præcedentis peccati. Hinc Apostolus ad Thessalonicenses scribit: pro eo, quòd dilectionem veritatis non receperunt, ut salvi fierent, & ideò mittit illis Deus operationem erroris, ut credant mendacio. Ecce peccati pœna peccatum est. Et ô quàm terribilis est ista pœna peccati! non erra-



ro, si malum hujus poenæ malo inferni præposuero: nam infernus non nisi propter malum culpæ, malum censeretur debet.

### PUNCTUM TERTIUM.

**C**ustodiat se omni hora à peccatis, & vitiis: quia usus unius peccati plurima alia diversa peccata parit. Nam cum culpa culpæ adjungitur in uno genere peccati, aliæ quoque peccatorum species non vitantur. Unum equidem peccatum alterum, haud scilicet ac annulus annulum in catenâ post se trahit. Cogitandum quippe est, quod lux veritatis prævaricatorem unius legis deserat, ut desertus fiat cæcus, & cæcus in omnibus offendat, & semper in deterius cadendo in fundum sine fundo cunctorum scelerum prolatabatur. Et quanto plura peccata sic committit, tanto uberiores thesauros iræ sibi thesaurizat in die furoris Domini. O quam abominabilis est iste usus peccati, qui tam multiplicia peccata, & peccatorum supplicia generat!


### PUNCTUM QUARTUM.

**A**N ergo, ô Religiose! vitas consuetudinem peccati, quia paulatim fit poenæ insuperabilis? Peccator cum in profundum venerit, contemnit. An vitas peccati consuetudinem; quia poena maxima peccatoris est?

Per

Per Dominum factum est confirmari cor gentium, ut obviam irent ad bellum Israël, ut exterminarentur. An vitas consuetudinem peccati; quia plurima diversa peccata, & supplicia parit? Erit cubile draconum, & pascua struthionum, & occurrent dæmonia onocentauris. Dole, quod hucusque peccatum non statim ab initio extinxeris, ne in usum tibi verteretur. Propone saltem modo vitare malam consuetudinem

1. Quia pœnè insuperabilis fit;
2. Quia pœna maxima est;
3. Quia diversa generat peccata.



DIES XXIII.

De Religioso interiore.

Scrutatur corda, & renes Deus. Cap. 7.

§. 2. v. 13.

PUNCTUM PRIMUM.

PARUM proficiet, qui profectum suum in externis solum Religionis exercitiis ponere voluerit. Deus cor mundum exigit; prout Ss. Pater noster testatur: *scrutatur corda, & renes Deus*. Non placent ei sacrificia orationum, jejuniorum, laborum, atque vigiliarum, si cor immundum sit, ac vitiis, & passionibus refertum. Mundandum igitur est

est primò ab affectibus malis juxta illud Salvatoris: Qui vult venire post me, abneget semetipsum. Primum equidem fundamentum perfectionis Religiosæ est abnegatio. Sine hac non poterit consummare ædificium Religionis; Sed inimici ejus incipient illudere ei dicentes: quia hic homo cœpit ædificare, & non potuit consummare. Abnegare autem semetipsum aliud non est, quàm propriis voluptatibus renunciare; ut qui superbus erat, non sit superbus; & iracundus non sit iracundus; & qui luxuriosus, non sit luxuriosus. Planè qui hòc modò cor suum non quotidie emundat, nunquàm verus Religiosus erit; sed etiam per exactam disciplinæ exterioris observantiam Deo *per tonsuram mentiri noscetur; quia interioribùs adhuc operibùs sæculo servat fidem.*

### PUNCTUM SECUNDUM.

**S***crutatur corda, & venes Deus.* Cùm cor mundatum est à vitiosis affectibus, virtutibùs Religiosis exornandum est; secùs Dei oculis placere non poterit. Multùm Deo displicuit servus ille, qui licèt mnam suam non perdiderat, tamen cum eâ etiam nihil operatus est; ita & displicebit Religiosus, qui quamvis gratiam vocationis per malas affectiones non perdat, attamen cum eâ virtutes Religiosas non exercet. Imò sine humilitate, & mititate cordis, sine patientiâ, & charitate,



te, sine obedientiâ, & subjectione nunquàm Religiosus erit. Eas enim Deus à Religioso virtutes imprimis requiret, ad quas gratiam vocationis contulit. Hos fructus si in Religione non protulerit, certò certius ceu arbor infructuosa exscindetur, & in ignem mittetur. Percurre singulas S. Regulæ virtutes. Vide, qualem fructum retuleris. Si nullum; time, post annum veniet, & fructum exiget Paterfamilias.

### PUNCTUM TERTIUM.

**S**crutatur corda, & renes Deus. Non contentatur corde mundo, & virtutibus ornato; sed sicut ipse cor semper scrutatur, ita vult, ut cor rursus ipsum intelligat. Non enim diu mundum erit, nec virtuosum, si non jugiter & unice cum Deo conversetur. Nam qui non incessanter mentem suam ad Deum revocat, mox ad terrenas consolationes, vel inutiles cogitationes evagabitur. Unde deinde necessario sequetur ariditas cordis, & ex hac intermittetur tam utile, & homini Religioso tam necessarium virtutum exercitium. Ab initio quidem grave videbitur, & laboriosum, sed cum tempore in consuetudinem, & quasi alteram naturam transibit, ut non possit se non convertere in omni loco, & occasione, atque negotio ad Deum suum. Hinc non solum à noxiis vitiis semper mundus, & ab omnibus externis liber  
erit,


erit, verum etiam de horâ in horâ inenarrabilem fructum virtutum Religiosarum proferet. Quoties equidem aliquis ab omnibus rebus caducis abstractus ab intra se ad Deum convertit, toties Deus illi occurrens, novam ei gratiam infundit. Prô quàm legendi sunt illi Religiosi, qui veram mortificationem, & quotidianum virtutum profectum parvi faciunt; quique ætatem, & vires in his, quæ præcipuè necessaria non sunt, absumunt, semper in eodem luto hærent, nec unquam ad unionem cum Deo assurgunt!

### PUNCTUM QUARTUM.

**AN** ergò, ô Religiose! ab intra ambulas? Omnis decor Filiæ Regis ab intus. An passiones cordis mortificas? Cor mundum crea in me Deus! an virtutes sacre Regulæ exerces? Ecce! hæc sunt instrumenta artis spiritualis, quæ cum fuerint à nobis incessabiliter adimpleta, in die iudicii reconfignantur. An semper ab intra cum Deo conversaris? Ambula coram me, & esto perfectus. Dole, quòd exterioribus Ordinis exercitiis duntaxat intentus, interiora Religiosi hominis parùm aut nihil curaveris. Propone ab intra semper ambulare, &

1. Passiones cordis mortificare,
2. Virtutes S. Regulæ cordi implantare,
3. Cum Deo præsentem semper conversari.

**DIES**



DIES XXIV.

De vivacitate Fidei.

Succinctis fide lumbis nostris per ducatum Evangelii pergamus. Prolog. §.

3. v. 18.

PUNCTUM PRIMUM.

Fides cum sit fundamentum omnium virtutum, merito Ss. Pater eandem nobis commendat in prologo Ss. Regulæ: *succinctis fide lumbis nostris per ducatum Evangelii pergamus.* Verum nunquam fide per ducatum Evangelii pergemus, nisi nostra fides viva sit. Viva non est, quando una veritas non æquè, ac altera creditur. Omnis enim veritas fidei ab infallibili Dei veritate promanat; hinc & omnis certam, & infallibilem credibilitatem meretur. A verâ fide alienus est, qui in uno illius articulo offendit. Credi vult Deus veritates suas omnes, nullam examinari. Verum nonne tu ex illis es, qui aliquas solum fidei veritates vivaciter credis? Recense singulos fidei articulos, prò! quot, & quantis languidam, & vix non mortuam adhibes credulitatem? Crede ergo illi in omnibus, qui omninò non fallit; crede illi in omnibus, qui credentibus præmia æternæ vitæ dabit; crede illi, qui vel in uno  
in-



incredulis æterna supplicia gehennæ ardoribus irrogabit. Quæ tunc erit fidei gloria, quæ pœna perfidiæ, cum iudicii dies venerit?

## PUNCTUM SECUNDUM.

**S***uccinctis fide lumbis nostris per ducatum Evangelii pergamus.* Vivâ fide per ducatum Evangelii non pergit, qui de aliquâ veritate fidei dubitat, aut in eâ hæsitat. Qui enim hæsitaverit in corde suo, non credat, quod aliquam gratiam sit accepturus homo ille. Omnia quidem possibilia sunt credenti, sed non fluctuanti. Hinc Petrus, cum super aquas ad Magistrum suum properâisset, atque parum timuisset, mox cœpit mergi; mox meruit ab Auctore fidei increpari: modicæ fidei, quare dubitasti? Firmitas fidei semper secunda est, absque timore est, absque dubitatione est; quia certa est, quia infallibilis est, quia necessario impleri debet: jota enim unum, aut apex unus non præteribit à lege; donec omnia fiant. Prius cœlum, & terra transierint, quàm verba Domini præterierint. Habésne talem & tu fidem vivam? Hanc habuit Ss. Pater tuus, quando falcastrum Gothi super aquas natare, & Maurum super lacum currere fecit.

## PUNCTUM TERTIUM.

**S**uccinctis fide lumbis nostris per ducatum Evangelii pergamus. Vivâ fide per ducatum Evangelii non pergit, qui doctrinam Evangelii non opere complet. Fides enim si viva est, prava desideria frænat, effrænes appetitus cohibet, feroces cordis motus sedat, virtutes inserit, mollia calcit, aspera tolerat, in prosperis non erigitur, in adversis non de-jicitur. Nihil est tam arduum, & tam durum, quod non aggrediatur propter Deum, qui vivâ fide credit in Deum. Tunc quippe verè fideles sumus, quando, quod ore profitemur, opere complemus. In vanum fidem suam jactat, si quæ fidei sunt, non agat. Fides namque sine operibus mortua est. Fides sine operibus non Christiani, sed dæmonis est. Tu qualem habes, an vivam? An mortuam? O gratiosam, & amabilem fidei virtutem, quis te non in seipso vivificet, quæ fundamentum es omnis gratiæ, connectis membra capiti suo Christo, quæ miracula operaris, in omnibus triumphas, atque æternâ felicitate perseverantes in te coronas?

## PUNCTUM QUARTUM.

**AN** ergò, ô Religiose! omnes fidei articulos æqualiter, & vivaciter credis? Testimonia tua credibilia facta sunt nimis. An vivaciter sine timore, & hæsitatione credis? In-

*Spir. S. Ben. P. IV. F cre-*

crepavit incredulitatem eorum. An vivaciter credis operando id, quod credis? Qui credit Deo, attendit mandatis ejus. Dole, quòd vivam hucusque fidem non habueris. Propone

1. Vivaciter omnes fidei articulos æqualiter credere;
2. Vivaciter sine timore illos credere;
3. Vivaciter eos opere complere.



### DIES XXV.

#### De sui Diffidentia.

Malum sibi reputet. Cap. 4. Instr. 43.

#### PUNCTUM PRIMUM.

**D**iffidentia sui summè necessaria est Religioso, ne in præsumptionem cadat. Inde est, quòd Ss. Pater seriò illum hortetur, ut *malum sibi reputet*. Malum verò semper sibi reputabit, qui cogitaverit, quòd sine gratiâ Dei nihil sit, nihilque possit; quòd sine Divinæ gratiæ auxilio in omnia peccata sit lapsurus; quod non sit peccatum, quod fecit homo, quod ipse facere non possit. Malum sibi reputabit, cum consideraverit; si Angeli corruerunt, multo magis, qui Angelis paulo minùs pares evaserunt, lapsum timere debent, ne fortè post parilitatem illam Angelorum, quam

quam virginitatis sibi exercitatione acquisierant, videntes filias hominum, quia pulchræ sunt ad ipsas carnalis concupiscentiæ instinctu devolvantur, dicatúrque eis. Ego dixi: Dii estis, & Filii excelsi omnes. Vos autem sicut homines moriemini, & sicut unus de principibus cadetis. Solet enim elatio, & præsumptio corporis impuritate castigari, ut quisque humiliatus sic saltem discat sibi ipsi diffidere. O quàm longè à præsumptione absuit Ss. Pater noster? Cùm Rusticus ille filium suum mortuum peteret resuscitari, mox hoc Apostolorum esse, se verò peccatorem existere clamavit. Ita se ipsum agnovit. Ita sibi ipsi diffidit.

## PUNCTUM SECUNDUM.

**D**iffidentia sui ita necessaria est Religioso, ut pusillanimitatem tamen arceat. Nam & Ss. Pater, qui jubet, ut *malum sibi reputet*, eodem capite præcipit, *de Dei misericordia nunquàm desperare*. Vera etenim diffidentia sui nullam admittit desperationem. Hinc Apostolus, cùm patitur aliquid, quod non vult, diffidit quidem sibi, at non desperat; sed ter propterea rogat Dominum. Et licèt statim non exaudiatur, contentus est, & sufficit ei gratia, quam à Domino ad resistendum carni obtinet. Audivit enim, quòd virtus in infirmitate perficitur. Sic & tu minimè desperare debes, cùm quid humani pateris,



aut tuam fragilitatem in te recognoscis. Facienti enim, quòd in se est, Deus non denegabit gratiam. Imo quo magis tuam miseriam recognoscis, eò majorem tibi misericors Deus misericordiam exhibebit. Dat equidem ibi suam gratiam, ubi vasa vacua invenerit.

### PUNCTUM TERTIUM.

**D**iffidentia sui ita Religioso necessaria est, ut eo firmitus in Deum speret, quò magis sibi ipsi diffidit. Hinc Ss. Pater præcepto, ut *malum sibi reputet*, mox præposuit & aliud, ut *spem suam Deo committat*. Nemo enim firmitus sperat, quàm qui nihil se posse autumat. Ipsa miseria sua in spem illum erigit. Scit enim non confundi illum, qui sperat in Domino. Credit Divinæ promissioni, quæ fallere non potest, & ideo omnia se posse in eo, qui se confortat, certus est. Quo verò plura, & majora sic à Domino sperat, & ex cognitione propriæ infirmitatis ampliori gratiarum actione Deo omne bonum cum Apostolo adscribit, eò ampliora, & uberiora gratiarum charismata sine periculo alicujus præsumptionis, vel elationis percipit. Quàm dives, quàm potens essem, si hòc modò & mihi diffiderem, & spem meam Deo committerem? Ad ejusmodi diffidentiam, & confidentiam Ss. Patris mei mortuus ille rustici filius revixit.

PUNCTUM QUARTUM.

**A**N igitur, ô Religioſe ! diffidentia tui pellit à te præſumptionem ? Arrogantiam odia-  
vi. An pellit à te puſillanimitatem ? Humi-  
liare Deo, & expecta manus ejus. An auget  
ſpem tuam ? Ego in miſericordiâ tuâ ſpera-  
vi. Dole, quòd in diffidentiâ tui toties erra-  
veris. Propone

1. Tibi diffidere, ne præſumas ;
2. Tibi diffidere, ne deſperes ;
3. Tibi diffidere, ut ampliùs ſperes.

\*\*\*\*\*

DIES XXVI.

De Felicitate Pacificorum.

Inquire pacem, & perſequere eam. Pro-  
log. v. 13.

PUNCTUM PRIMUM.

**Q**uis enarraverit immenſam illam felicitatem, quâ anima fruitur, quæ pacem cum Deo habet ? Factus enim eſt in pace locus ejus, nec eſt umbraculum Domini, niſi ubi pax eſt, ubi conſcientia ſine peccato eſt, ubi anima munda eſt. Ubi zelus, & diſcordia, ibi non eſt protector Deus. Locus Dei non eſt, niſi in animâ, quæ pacem habet. Quæ ergo anima non habet pacem, ſciat ſe non eſſe

locum Dei. Pacem meam do vobis, pacem meam relinquo vobis. Hæc est Salvatoris hæreditas. ibi in Jerusalem, quæ interpretatur pax, confregit potentias, arcum, scutum, gladium, & bellum peccati. Imò ipse ibi factus est pax nostra, quando chyrographum tulit, & suspendit in cruce. Quomodo namque sapientia facit sapientes, & justitia justos, & sanctificatio Sanctos, sic & ipsa pax facit nos pacatos. Si autem Christus credentium pax est; quicumque sine pace est, consequenter Christum non habet. O miserrimam sortem illius, qui Christum non habet, nihil in eo reperitur, quàm sempiternus horror! ô felicissimam sortem illius, qui Christum habet, cœlestem beatitudinem prægustat! *inquire* ergò ad mentem Ss. Patris tui cum Deo *pacem, & persequere eam.*

### PUNCTUM SECUNDUM.

Quis enarraverit felicitatem Religiosi, qui pacem cum proximo possidet? Inenarrabili dilectionis dulcedine jugiter pascitur, ut sæpius cum Prophetâ exclamet: quàm bonum, & quàm jucundum fratres habitare in unum! ô quàm bonum, ô quàm jucundum, ô quàm divinum est habitare Fratres in unum, ut unum sit cor, una voluntas, una omnium anima, & una forma vivendi; nam talem domum, vel mentem, in qua pax ista dominatur, diabolus intrare non potest. Tan-

ta est eminentia hujus virtutis, quòd de eâ Prophetâ prius miraretur, quàm ostenderet, quid esset, vel quid utilitatis afferet, quando dixit: Ecce. O quàm mirabilem utilitatem prædicavit, quando subjunxit: quàm bonum, & quàm jucundum. Sed scire debes, ô Frater! quòd quædam bona sunt, sed non jucunda, uti vigilia, carnis macerationes &c.; quia caro in his non jucundatur, sed læditur. Alia sunt jucunda, sed non bona, uti commestrationes, & similia. Hæc enim agentes lætantur, cum male fecerint, & exultant in rebus pessimis. O Monache! non poteris invenire in præsentī unum, quod sit bonum, & jucundum. Cupis tamen illud invenire? *Inquire pacem, & persequere eam.* Hæc est sola virtus, quæ habet bonum, & jucundum. Hæc est illa felicissima bonitas, quæ facit unius moris habitare in domo, ut simul vivere, simulque mori semper optemus.

## PUNCTUM TERTIUM.

Quis enarravet felicitatem animæ, quæ pacem secum ipsâ retinet? In hac nulla amplius passio animum occupat, nulla desideria accendunt, nulla perturbatio turbat, nulla tristitia dominatur. An non hîc status est Beatorum? An non quis per hanc pacem talem felicitatem obtinet, quàm nemo comprehendere potest, nisi qui tenet? Nunquàm tamen hâc felicitate fruetur, qui non prius om-



nes passionēs, concupiscentiāsque frānave-  
rit, Justitia enim, & pax osculatæ sunt. O  
Monache! hanc ergo *inquire pacem, & per-  
sequere eam*. Hæc pax est, quæ exspoliāt ho-  
minem servitute vitiorum, dat nomen inge-  
nuum, mutat cum conditione personam, fili-  
um facit ex servo, amicum facit ex Deo, pa-  
trem reddit ex Domino. Filius Dei esse in-  
cipit, qui ita in se pacificus esse cœpit. Quan-  
ta est hujus pacis retributio, hæreditatem  
possidere cum Christo?

### PUNCTUM QUARTUM.

**A**N ergo, ô Religiose! felicitate pacis frue-  
ris: quia pacem habes cum Deo? Quis  
ei restitit, & pacem habuit? An felicitate pa-  
cis potiris; quia pacem habes cum proxi-  
mo? In tribus placuit spiritui meo, quæ sunt  
probata coram Deo, & hominibus: concor-  
dia Fratrum, & amor proximorum, & vir &  
mulier benè secum consentientes. An feli-  
citate pacis gaudes; quia pacem tecum ipso  
habes? Beati pacifici; quoniam Filii Dei  
vocabuntur. Dole, quòd hucusque felicitate  
pacis nec agnoveris, nec gustaveris. Pro-  
pone in hunc finem;

1. Pacem cum Deo,
2. Pacem cum proximo,
3. Pacem tecum ipso conservare.



ron. Quomodo namque prædicabit, nisi mittatur? Monachi primum officium est plangere, & orare pro peccatis suis, & totius mundi. Quod si à Deo ad conversionem animarum vocandus sit, per Superiorum voluntatem voluntas Dei jam ei innotescet. Prò! quot mores suos perverterunt, dum alios converterunt?

### PUNCTUM SECUNDUM.

Secundo talis nociva tentatio Religioso est præposterus amor solitudinis; dum se à Confratrum consortio omnino abstrahere nititur. Cogitat enim in solitudine multo copiosiores fructus spiritûs se percepturum; at necesse est, ut istæ *malæ cogitationes cordi advenientes ad Christum allidantur*. Est firma sententia Ss. Patris: *Monachus nil agat, nisi quod communis Monasterii Regula, vel Majorum cohortantur exempla*. Aliud esset, si communis Monasterii Regula esset, contra Regulam, vel Majorum exempla, ut locò colloquii Sancti, aut ædificatorii verba duntaxat scurrilia, otiosa, & risum atque iras, dissensiones moventia audirentur. In hoc casu deberet Deo magis obedire, quàm hominibus, qui præcipit: Cavete à scandalis. Væ mundo à scandalis. Fugite mundum. Secus præposterus amor solitudinis, & abstractionis à Fratribus semper est nocivus. Quantos enim charitate Dei & proximi ferventes solitudo  
non

non suscepit, & vel tepesfactos evomuit, vel remissos retinuit? Propter charitatem agenda, vel omittenda sunt omnia.

### PUNCTUM TERTIUM.

**T**ertio talis nociva Monacho tentatio est indiscreta aviditas corpus per abstinentiam, vigilias, & alias carnis macerationes affligendi. Ad vitam quidem gratiæ conservandam tam necessaria est mortificatio carnis, quàm necessaria est spiratio, ac respiratio ad vitam corporis; at valdè periculosa est, si sit indiscreta. Hinc convenit ejusmodi *malas cogitationes cordi suo advenientes ad Christum allidere*. Non vult Deus, ut corpus destruat, sed ut concupiscentiæ carnis per moderatam afflictionem domentur. Rationabile in omnibus exigit à nobis obsequium. Sanè qui hanc discretionis regulam non sequuntur, non solum sibi, sed toti communitati molesti fient, & graves. Prò! quot non omnem mortificationem abjecerunt, qui supra vires primitus corpus affligerunt?

### PUNCTUM QUARTUM.

**AN** ergo, ô Monache! tentationem convertendi animas allidis ad Christum? Ecce! ego mitto vos. An tentationem, & amorem præposterum solitudinis allidis ad Christum? Væ soli! an tentationem indiscretæ mortifica-

tio.




tionis ad Christum allidis? Unusquisque proprium donum habet ex Deo, juxta quod mortificatio Christi in corpore circumferenda est. Dole, quod hñce tentationibùs & tu deceptus fueris. Propone

1. Præposterum desiderium convertendi animas,

2. Solitudinem, & abstractionem contra Regulam observandi,

3. Corpus supra vires gratiæ, & naturæ macerandi semper abnegare.



## DIES XXVIII.

### IN FESTO SS. APOST. SIMONIS ET JUDÆ.

#### De afflictione Justorum.

Propter te morte totâ die afficimur; æstimati sumus ut oves occisionis.

Cap. 7.

#### PUNCTUM PRIMUM.

PLANè necessaria est afflictio justo, ut probetur virtus ejus. Undè in personâ Justorum teste Ss. Patre nostro Benedicto S. Scriptura dicit: *propter te morte tota die afficimur; æstimati sumus ut oves occisionis.* Nemo namque *in ipsâ obedientiâ duris & contra-*

trariis rebus, vel etiam quibuslibet irrogatis injuriis tacita conscientia amplecti patientiam poterit, nisi adversa sentiat. Nemo omni vilitate, & extremitate contentus erit, nisi defectum in rebus necessariis patiatur. Nemo se ad omnia, quæ sibi injunguntur, velut operarium malum, & indignum verè judicabit, nisi ad vilia servitia deputetur. Et sic de reliquis virtutibus. Tentatio probat, an veræ, an fictæ; an cælo, an supplicio dignæ sint. Sequere ergo Ss. Apostolos Simonem, & Judam, qui fideles in temptationibus cum Christo permanserunt, nec passi sunt se avelli ab ejus præceptis, & consiliis, & fideliter virtutes Ss. Regulæ exerce, licet varie tenteris. Sic Deo & Ss. Ordini virtutem tuam probabis.

## PUNCTUM SECUNDUM.

**P**ropter te mortificamur tota die; æstimati sumus ut oves occisionis. Hoc necessarium est Religioso, ut virtus ejus purificetur. Nullus equidem reperitur ab ipso mundi exordio verus palmes, qui non tribulatione purgatus sit. Semper & justum sequuntur sui manes. Nemo sine nævo. Hinc Dominus justitias quoque judicabit. Bonum tibi, si per tribulationem, & afflictionem tuæ jam purgatæ sint. Ideò tot persecutiones, tot tormenta, imò mortem ipsam Ss. Apostoli nostri subierunt, ut purum amoris sui sacri-

sacrificium Deo offerrent. Tolle enim charitati patientiam, quæret, quæ sua sunt, non quæ Jesu Christi, imo nullis radicibus, aut viribus perseverabit. Sequere igitur Ss. Simonem, & Judam in patientia, ut virtutes tuæ ab omni imperfectione purgentur. Melius est hic pati, quàm in altero mundo.

### PUNCTUM TERTIUM.

**P**ropter te mortificamur tota die, aestimatisumus, ut oves occisionis. Hoc necessarium est Religioso, ut virtus ejus in cœlo coronetur. Nullus namque in cœlo Monachus nisi Martyr. Oportuit & Christum pati, & ita intrare in gloriam suam. Passi sunt & Ss. Apostoli nostri, & calicem passionis usque ad fundum ebiberunt. Quid dicis, quid agis, quid cogitas, ô Religiose! cœlum paras ascendere, & regnum cæli invadere? & interrogas, ne quæ tibi difficultas occurrat in itinere, ne quid asperum tibi in via accadat, aut laboriosum, & non erubescis? Non pudore oppressus sub terra temetipsum defodis? Quidquid agas, ad cœlum non evades, nisi probè contusus. Unica via ad cœlum est, via S. Crucis. Quò plura in hac via sustinueris, eò amplior te merces manebit in Patria.

### PUNCTUM QUARTUM.

**A**N igitur, ô Religiose! probam virtutis sustines per patientiam? Patientia probatio-

bationem operatur. An libenter purificationem virtutis sustines per patientiam? Caritas patiens est, omnia sustinet. An coronam virtutis per patientiam tibi paras? Fructum afferunt in patientia. Dole, quod ad exemplum Ss. Apostolorum Simonis, & Judæ patientiam amplexus non fueris. Propone

1. Virtutem tuam per patientiam probare,
2. Purificare,
3. Coronare.



## DIES XXIX.

## De dignis pœnitentiæ fructibus.

Mala sua præterita cum lachrymis vel gemitu quotidie in oratione Deo confiteri, de ipsis malis de cætero emendare.

Cap. 4. Instr. 58.

## PUNCTUM PRIMUM.

Cum sine virtute pœnitentiæ nullus sit verus Monachus, utpote cujus officium proprium est continuo plângere; hinc Ss. Pater recte quemvis nostrum monet: *Mala sua præterita cum lachrymis, vel gemitu quotidie in oratione Deo confiteri, & de ipsis malis de cætero emendare.* Dignus quippe fructus pœnitentiæ primo est, ut quamdiu aliquis adhuc vitiis, & concupiscentiis peccati tentatur, tamdiu peccata sua contra se  
sta-



statuat, & desuper compungatur. Sic enim ex persona pœnitentis loquitur S. Scriptura. Peccatum meum cognitum tibi feci, & in-justitiam meam non abscondi. Dixi confitebor adversum me injustitiam meam Domino. Non enim remissionem culpæ præteritæ, nec præservationem à futura merebitur, qui non assiduo peccata, affectiones, & inclinationes malas cum fletu, aut gemitu planxerit. Nequaquam dignus erit dicere: & tu remisisti impietatem peccati mei. Ad hunc fructum pœnitentiæ tamdiu faciendum astringetur, quamdiu pravorum actuum recordatione mordebitur. Ita Dominus præcipit: iniquitatum tuarum non recordabor; tu vero memento. Hoc modo veniam affectus est, qui dixit: quoniam iniquitatem meam ego cognosco; cogitabo pro peccato meo.

### PUNCTUM SECUNDUM.

**M***ala sua præterita cum lacrymis, vel gemitu quotidie in oratione Deo confiteri, & de ipsis malis de cætero emendare.* Alter hinc fructus pœnitentiæ est, si quis non solum pœnitentiâ, sed aliis quoque operibus, quibus remissio peccatorum promissa est, pro peccatis suis satisfacere studeat. Tale est primò charitas; charitas enim operit multitudinem peccatorum. Secundò afflictio cordis, & corporis; & sic quippe testatur Pro-  
phe-

pheta ; vide humilitatem meam , & laborem meum , & dimitte universa delicta mea. Tertiò misericordia ; & fides ; sic namque legitur : per misericordiam , & fidem purgantur peccata. Quartò remissio injuriæ ; si dimiseritis hominibus peccata sua , dimittet & vobis Pater vester cœlestis peccata vestra. Quintò intercessio Sanctorum ; scriptum est enim : *Qui scit fratrem suum non peccare ad mortem ; petat , & dabit Deus vitam peccanti ad mortem.* O quantas vias ad misericordiam obtinendam nobis non patefecit clementia Salvatoris ? Nemo sanè salutem cupiens , desperatione frangi potest , cum videat tantis remediis se invitari ad vitam.

### PUNCTUM TERTIUM.

**M***ala sua præterita cum lacrymis , vel gemitu quotidie in oratione Deo confiteri & de ipsis malis de cætero emendare.* Ex hoc enim sequitur tertius , & perfectus fructus penitentiae , ut nequaquam amplius admittamus peccata de quibus dolemus , vel quibus remordetur conscientia nostra. Porro indicium satisfactionis , & indulgentiae est , expulisse affectus vitiorum de cordibus nostris. Noverit siquidem unusquisque nondum penitus se absolutum à pristinis vitiis , quamdiu imago commissorum malorum , aut consimilium criminum sibi præluserit ante oculos suos , dum satisfactioni , gemitibus-

*Spir. S. Ben. P. IV.*      G      que

que inhæret, & eorum, non dicam, delectatio, sed vel tenuis cogitatio turbaverit mentis suæ arcana. Is ergo, qui pro satisfactione invigilat, sciat tunc se à criminibus absolutum, ac de præteritis culpis veniam suscepisse, cum non senserit, cor suum perstringi illecebris, aut imaginatione earumdem. Hinc indulgentiæ iudex residet in conscientia nostra, qui nobis indicat remissionem peccatorum. An & te jam absolvit?

### PUNCTUM QUARTUM.

**AN** igitur, ô Religiose? ad faciendos dignos fructus poenitentiae peccata tua contra te statuis? Peccatum meum contra me est semper. An opera, quibus remissio peccatorum promissa est, exerces? Dignos fructus poenitentiae facite. An obtines fructum poenitentiae, ut nulla amplius concupiscentia te mordeat? Gravium peccatorum tunc accipit poenitentia finem, quando affectus eorum consumuntur per bonam conversationem. Dole, quòd hos fructus colligere neglexeris. Propone in hunc finem

1. Semper compungi super peccato tuo,
2. Opera satisfactoria exercere, & per hæc
3. Memoriam, & concupiscentiam præteritorum peccatorum delere.



# DIES XXX.

## De Amicitia.

Charitatem fraternitatis casto impendant  
amore. Cap. 72. v. 8.

### PUNCTUM PRIMUM.

**N**ihil præponendum est charitati. Hæc  
autem stabilitur per indissolubile ami-  
citiam. Ad hanc nos hortatur Ss. Pater,  
quando jubet: *charitatem fraternitatis ca-  
sto impendant amore.* Nemo vero hanc cha-  
ritatem obtinebit, nisi primo agnoscat, un-  
de nascatur. Neque enim amicitiam seu cha-  
ritatem istam indissolubile vinculum dilectio-  
nis, neque gratia commendationis, neque  
magnitudo officii, neque necessitas, sed so-  
la similitudo virtutum parit, ac unit. Hæc  
est charitas, quæ nullis unquam casibus scin-  
ditur, quam intervalla locorum, aut tem-  
porum dissociare, aut remove non præva-  
lent, imo mors ipsa non divellit. Quamdiu  
amici in virtute, & perfectione pares erunt,  
tamdiu stabit ista amicitia. Quamprimum  
dissimiles extabunt, finietur quoque chari-  
tas. Licet namque fortiores imperfectos to-  
lerent, ipsi tamen imperfecti plurimas cau-  
sas commotionum, & dissensionum arripiunt;  
haud secus ac infirmi infirmitates suas impu-



rant ministris, quamvis solícite eis inserviant. Utrobique vitio insitæ infirmitatis istud contingit. O qui ergo seipsum prius curaret, ac virtuosum redderet, quàm semper cum proximo charitatem conservaret!

### PUNCTUM SECUNDUM.

**C***haritatem fraternitatis casto impendant amore.* Ad hoc necesse est secundò, ut alta fundamenta patientiæ jactentur. Primum consistit in contemptu mundanæ substantiæ, & omnium rerum exteriorum. Valde enim injustum est, ut post abrenunciationem mundi aliquid præferatur pretiosissimæ dilectioni. Secundum est, ut unusquisque sic refecet proprias voluntates, ne se judicet sapientem, atque per hoc amplius acquiescat, judicio suo, quàm proximi. Tertium, ut sciat omnia etiam quæ utilia, ac necessaria reputantur postponenda esse bono pacis, & charitatis. Quartum, ut credat penitus irascendum non esse ex causis justis, sive injustis. Quintum, ut curare desideret iram fratris etiam injustè contra se conceptam eodem modo quo suam, sciens sibi æqualiter esse nocivam fratris tristitiam, ac si ipse contra illum contristetur, nisi eam repulerit de mente fratris, quantum in se est. Quicumque ista tenuerit, nec in se, nec in fratribus dispendium charitatis patietur. An observas?

PUN.

## PUNCTUM TERTIUM.

**C**haritatem fraternitatis casto impendant amore. Ad hoc necesse est tertio, ut charitatem quidem omnibus, sed amicitiam non nisi paucis exhibeamus. Primam namque etiam inimicis exhibere obligamur; at amicitiam, cum tantum inter pares virtute subsistat, non nisi paucis exhibere possumus. Pauci enim sunt, qui verè ad perfectionem tendant, aut perfecti jam sint. Ita Jacob Patriarcha vir justus omnes quidem duodecim filios suos dilexit, sed præ cæteris Joseph. Et cur? Quoniam Joseph, utpote Christi typum gerens, dulcius ac indulgentius inhærebat affectui Patris. Sic Christus Dominus omnes suos discipulos intimo, & Divino dilexit amore, præcipuo tamen Joannem, qui de seipso semper scribit: Discipulus, quem diligebat Jesus. Hæc quippe dilectio unius non designat charitatis teporem circa alios, sed largiorem amoris abundantiam circa unum, qui sua virginitate hoc meruit. Ista equidem est vera, ordinataque charitas, quæ nullum odiens, omnes amans, quosdam jure meritorum plus diligit. Hoc & SS. Pater præcipit, dum ait: *Non unus plus ametur, quàm alius, nisi quem in bonis actibus, aut obedientia invenit meliorem.*

## PUNCTUM QUARTUM.

**A**N ergo, ô Religiose! amicitiam colis cum tibi in virtute similibus? Anima

Jonathæ conglutinata est animæ David, & dilexit eum Jonathas quasi animam suam. An, ne lædas amicitiam, alta fundamenta patientiæ jactas? Expoliavit se Jonathas tunica sua, & dedit David. An ad indissolubilem amicitiam habendam cum paucis eandem inis? Vir amicabilis ad societatem, magis amicus erit, quàm frater. Dole, quòd hanc amicitiam hucusque colere non studueris. Propone ergo ad hanc colendam.

1. Amicitiam inire cum tibi in virtute similibus;
2. Amicitiam per patientiam conservare,
3. Amicitiam paucitate amicorum stabilire.



## DIES XXXI.

### Recollectio Menstrua.

Diverte à malo, & fac bonum. Prolog. v. 13.

### PUNCTUM PRIMUM.

**P**Rima plane occupatio sicut Ss. Patris in deserto Sublacensi fuit juxta Prophetam *divertere à malo, & facere bonum*; ita quoque fuit continuum ipsius negotium, ut de tempore ad tempus quò magis à malo recederet, eò magis ad bonum contenderet. In isto quippe omnis perfectio sanctitatis consistit. An sequeris illum quoad obligationes statûs

statûs tui erga Deum? An inscrutabilia iudicia Dei tibi ante oculos semper ponis ut à *malo recedas*? Initium sapientiæ timor Domini. An *ad faciendum bonum* magna à Deo speras? Quis speravit in Domino, & confusus est? An sine timore, vel hæsitatione credis in Deum, & quæ credis, opere complēs? Qui credit Deo, attendit mandatis ejus. Profecto si mortem ubique suspectam haberes, semper in timore Dei, fide, & spe in Deum stares.

## PUNCTUM SECUNDUM.

AN sequeris Ss. Patrem tuum in obligationibus statûs tui erga Religionem? An *ad divertendum à malo* fugis avaritiæ malum? Omnes in viam suam declinaverunt, unusquisque ad avaritiam suam, à summo usque ad novissimum. An sensus tuos etiam in itinere benè claudis? Insatiabilis oculus cupidi in parte iniquitatis. An examen nocturnum ideo rite instituis? Si nosmetipsos dijudicemus, non utique judicaremur à Domino. An dignos pœnitentiæ fructus facis? Peccatum meum contra me est semper. An *ad faciendum bonum* sæpe probas spiritum tuum utrum Ss. Patris tui sit? Probate spiritus, si ex Deo sunt. An in puritate, compunctione, & intentione cordis oras Rosarium? In æternum perire non potest, quisquis devote B. Virginem invocat. An in omni loco reve-




reris S. Angelum tuum custodem? Ne contemnendum putes, quia non dimittet, cum peccaveris. An crebro S. Regulam legis? Ecce lex, sub qua militare vis. An propriis Ss. Scripturam, collationes; & vitas, & alios libros catholicorum Patrum legis? Spiritu Dei pleni sunt. Certe si omni momento mortem prospiceres, semper hoc modo *à malo declinares, & faceres bonum.*

### PUNCTUM TERTIUM.

AN sequeris Ss. Patrem tuum in obligationibus statûs tui erga proximum tuum? An *ad declinandum à malo* abstines à suspitionibus? Dum Uxor Putipharis pallium Joseph Domino suo monstrasset, valde iratus est contra Joseph. An fugis adulationis vitium? Qui adulantur partibus, eunt in perditionem. An *ad faciendum bonum* perpendis felicitatem pacificorum? In tribus placuit spiritui meo, quæ sunt probata coram Deo, & hominibus: concordia fratrum, & amor proximorum, & vir, & mulier benè secum consentientes. An veram amicitiam colis? Expoliavit se Jonathas tunica sua, & dedit David. An obedientiam Confratribus impendis? per hanc itur ad Deum. Vere si semper instantis mortis potius, quam longioris vitæ recordareris, faciliter ista fraternæ charitatis munia quotidie obires.

## PUNCTUM QUARTUM.

AN sequeris Ss. Patrem tuum in obligationibus statûs tui erga temetipsum? An *ad declinandum à malo* fugis ob ejus nocumenta omne peccatum maxime omissionis, & consuetudinis malæ? Fuge peccatum quasi à facie colubri. An abhorres anxietatem? Miserationes Domini super omnia ópera ejus. An vitas præsumptionem? Superbum sequitur humilitas. An diffidis tibi met ipsi? Arrogantiam odivi. An *ad faciendum bonum* veram foves devotionem? Nunc autem tria manent hæc, fides, spes, & charitas. An ab intra ambulas? Omnis decor Filiæ Regis ab intus. An probam, purificationem, & coronam virtutis tuæ expectas à patientia tua? Fructum afferunt in patientia. Absque dubio ita *recederes à malo, & faceres bonum*, si corpus tuum semper ceu cadaver foetidissimum aspiceres. Dole, quòd tuis obligationibus rursus non satisfeceris isto mense. Propone meliora. Pœnitentiam age; secus ut fur in nocte, ita repentinus super te veniet interitus.



## NOVEMBER.

DIES I.

IN FESTO OMNIUM SAN-  
CTORUM.

G f De

## De Cultu Sanctorum.

In Sanctorum Festivitatibus, sicut diximus  
Dominico die agendum, ita agatur.

Cap. 14. v. 1.

## PUNCTUM PRIMUM.

**UT** Ss. Pater noster ad cultum Sanctorum nos incitaret, præcipit nobis, ut eorum Festivitates ea devotione, qua Dominicum diem, peragamus. *In Sanctorum Festivitatibus, sicut diximus Dominico die agendum, ita agatur.* Ipsemet singulari devotione ad eos afficiebatur. Hinc in monte Cassino oraculum beati Martini, & S. Joannis construxit: S. Maurum vero, in Gallias abeuntem, Capsula Ss. Reliquiarum donavit. Primo igitur à nobis requirit, ut Sanctos honoremus Psalmis. Digni sunt; quia virtuti semper honor debetur. Digni sunt; quia sedes Dei semper fuerunt, & adhuc sunt. Sedes quippe Dei est, in quo plenitudo scientiæ, & charitatis inhabitat. Digni sunt; quia Divinus sermo, ascendit super eos, ut per ipsos quàm plurimi salventur. Digni sunt; quia coronam justitiæ ipsis repositam receperunt, & gloria, & honore à Deo coronati sunt. Ex his conclude, quàm ferventer Deus in Sanctis suis laudandus sit, qui tanto eos amore, & beatitudine prosequitur.

PUN-

## PUNCTUM SECUNDUM.

**I**N Sanctorum festivitatis, sicut diximus Dominico die agendum, ita agatur. Hinc secundo requirit, ut Sanctos devote in orationibus nostris invocemus. Tanta siquidem charitate Deus illos prosequitur, ut propter eorum merita, & memoriam salutem tribuat supplicantibus. Unde aquid Isaiam dicit; protegam civitatem istam, & salvabo eam propter me, & propter David servum meum, adeo enim diligit Deus justitiam, ut etiam posteros Sanctorum non suo merito, sed majorum virtute tueatur. Et si Moyses à sua intercessione pro populo in terris desistere noluit; quamvis hoc ipsum jubere Deus: quanto putas, ardore intercedet pro nobis quivis in cœlo Sanctus, dum à nobis rogatur; cum in cœlo charitas perfecta sit? Ipsi namque agnoscunt pericula, miseras, & necessitates nostras multo melius in Deo, quam si nobis præsentes jugiter astarent. Ipsi quoque, quia salutem nostram, ut suam exoptant, continuo intercedunt pro nobis. Ex his æstima, qua fiducia Sanctos in orationibus tuis invocare debeas.

## PUNCTUM TERTIUM.

**I**N Sanctorum Festivitatibus, sicut diximus Dominico die agendum, ita agatur; excepto quod lectiones ad ipsum diem pertinentes dicantur.




*dicantur.* Hinc tertio requirit, ut vitas Sanctorum legamus, quatenus imitemur. Quidquid in ipsis scriptum est, ad nostram salutem, & informationem scriptum est. Equidem Deus propter nos Patriarchas, Prophetas, Apostolos, Martyres, Confessores, Virgines dedit, ut eorum virtutes sectando, gloriam quoque ipsorum obtineremus. Ideo etiam narrantur gesta Sanctorum, ut ad imitationem corda provocentur infirmorum. Cumque victricia eorum facta commemorantur, contra vitiorum praelia debilia nostra confirmantur, fitque, ut mens eo minus inter certamina trepidet, quo ante se positos tot virorum fortium triumphos videt. Virtus quippe Majorum vitam nostram fovet, & eorum poenitentia spem veniæ nobis confert. Neque vero simus contenti si externas eorum actiones imitemur, sed quam maxime sequamur internas. Solis namque corticibus repletur, qui cor bene operantium imitari negligit. Ex his judicæ; quantam gloriam sanctis tribuas, dum eorum dicta, & facta in vita tua exprimis. Toties novam ipsis à Deo accidentalem gloriam acquiris. Visitabunt autem te in morte, sicut eos colueris.

#### PUNCTUM QUARTUM.

AN ergo, ô Religiose, colis sanctos Psalmis? Laudare Dominum in Sanctis ejus.  
An Sanctos colis invocatione? Ite ad Job;  
Job

Job servus meus orabit pro vobis, faciem  
ejus suscipiam. An Sanctos colis imitatione?  
Multi cibi in novalibus Patrum. Dole, quòd  
hoc modo Sanctos hucusque non colueris.  
Propone

1. Psalmis,
2. Invocatione,
3. Imitatione illos studiosius deinceps ve-  
nerari.



## DIES II.

IN COMMEMORATIONE OM-  
NIUM FIDELIUM DEFUNCTORUM.

De consolando dolentes in purgatorio  
animas.

Dolentem consolari. Cap. 4. Instr. 19.

## PUNCTUM PRIMUM.

Quis magis dolet, quàm anima in purga-  
torio detenta? Hinc recte, & ad men-  
tem Ss. Patris nostri applicabis illi instrumen-  
tum istud; *dolentem consolari*. Plane con-  
solatione tua indiget. Quales enim putas  
pœnas animæ in purgatorio tolerant? Si om-  
nes pœnæ, tormenta, afflictiones, quæ in  
mundo cogitari possent, minori, quæ in  
purgatorio habetur pœnæ, & tormento com-  
paren-

parentur, solatia erunt. Mallet enim quilibet viventium omnes, quæ hic videntur, pœnæ, & tormenta, si illas experientia nosceret pœnas, usque ad finem mundi omnibus his simul sine remedio cruciari pœnis, quas omnes homines ab Adam hucusque sigillatim pertulerunt, quàm uno die in purgatorio minori, quæ illic habetur pœna, torqueri. Unum est, quo differant ab infernalibus pœnis, quòd istæ finem non expectant, sed incrementum in die iudicii. Ita S. Augustino testatus est, qui pœnas purgatorii expertus est. Ergo animabus in purgatorio compatere. Consolare illas hodie precibus, & sacrificiis. Qua mensura misericordiam eis mensus fueris, remetietur tibi.

### PUNCTUM SECUNDUM.

**D***olentem consolari.* Consolatione dignæ sunt animæ purgantes. Tandiu enim in illo purgatorio moras habebunt, quàm diu minuta earum peccata; lignum, fœnum, stipula consumantur. Nec dicas, quid ad me, quamdiu moras habeam, si tamen ad vitam æternam perrexero. Etenim ignis ille purgatorius durior; & diuturnior erit, quàm cogitari potest. Ecce! de die iudicii scriptum est: Erit dies unus tanquam mille anni, & mille anni, tanquam dies unus idem senti de purgatorio. Ibi una hora in pœnis mille anni tibi videbitur. Et quis scit, an non  
 -ustaq  
 pluri-

pluribus diebus, mensibus, aut annis per illum ignem sis transiturus? Compatere igitur animabus purgantibus. Mitte digitum tuum per unum saltem momentum in ignem, ut ex momentaneo dolore discas æstimare brevem dolorem purgatorii, atque eundem ab illis per opera pœnitentiæ avertere studeas. Esto misericors, ut & tu misericordiam consequaris.

### PUNCTUM TERTIUM.

**D***olentem consolari.* Consolatione dignæ sunt animæ purgantes. Ingenti quippe desiderio afficiuntur fruendi Deo. Sicut autem in inferno pœna maxima est, quòd damnati priventur visione Dei; ita in purgatorio gravissimum est, quòd à fruitione, & visione Dei animæ purgantes retardentur. Tanto enim majore dolore ex hac privatione afficiuntur, quanto altiori cognitione, & amore Dei præditæ sunt. Atque eo magis affliguntur ex dilatione Visionis Beatificæ, quo magis Dei unionem desiderant. Si enim sponsa ex amore languet, si fortis ut mors dilectio; quanto putas dolore affici animam, quæ cupit esse cum Christo? Agnoscit dilectum, & hinc quiescere non potest; donec eo potiatur. Compatere ergo animabus in purgatorio. Juva eas variis virtutum actibus, maxime autem desiderio cœlestis Patriæ. Si vel uno momento illis visionem Dei sui



sui acceleraveris ; æternum se tibi gratas exhibebunt. Cogita & hic quàm maxime , quòd tibi in tali statu velles fieri , ut & animabus illud facias.

### PUNCTUM QUARTUM.

AN ergo , ô Religiose ! dolentes in purgatorio animas consolari oratione , & sacrificiis ? Judas facta collatione duodecim millia drachmas argenti misit Jerosolymam offerri pro peccatis mortuorum sacrificium ; Sancta ergo , & salubris est cogitatio pro defunctis exorare , ut à peccatis solvantur. An dolentes in purgatorio animas poenitentiae operibus consolari ? Panem , & vinum tuum super sepulturam justi constitue. An dolentes in purgatorio animas solari virtutum exercitio , maxime autem cœlestis Patriæ desiderio ? Spes , quæ differtur , affligit animam. Dole , quòd hucusque misericordiam animabus defunctis non exhibueris. Proponere dolentes in purgatorio animas

1. Orationibus , & sacrificiis ,
2. Operibus poenitentiae ,
3. Virtutum exercitio , & cœlestis Patriæ desiderio consolari.



### DIES III.

#### De exercitio amoris Dei.

Inprimis Dominum Deum diligere ex toto corde, tota anima, tota virtute. Cap. 4. Instr. 1.  
Pun-

## PUNCTUM PRIMUM.

**T**Ota Vita Ss. Patris nostri exercitium sancti Amoris fuit, & tota ipsius Regula ordinatur ad charitatem. Hinc si Filii tam amantissimi Patris esse volumus, *inprimis Dominum Deum diligamus ex toto corde.* Quid est autem Dominum Deum diligere ex toto corde, nisi super omnia Deum diligere? Si ergo cor tuum affectat celsitudinem; quære illam in Deo: unus super omnia excelsus est. Si affectat honorem; quære illum in Deo: unus gloriosus est in æternum. Si affectat voluptatem; quære illam in Deo: nil blandius est ipsius charitate, nec amatur quicquam salubrius, quàm illa præ cunctis formosa, & luminosa veritas. Si affectat studium scientiæ; quære illud in Deo: ipse novit omnia, & dat scientiam parvulis. Si affectat quietem; quære illam in Deo: nulla certa quies præter Dominum. Si affectat satietatem, atque abundantiam; quære illam in Deo: ipse plenitudo, & indeficiens copia est incorruptibilis suavitatis. Si affectat multa possidere; quære illa in Deo: ipse possidet omnia. Si affectat excellentiam; quære illam in Deo: ipsò excellentius nihil est. Si affectat vindictam; quære illam in Deo: ipsò iustius nemo vindicat. Sic ergo super omnia & in omnibus amare Deum, & toties dilectionem Dei ex toto corde exerce, quoties aliud extra illum desideraveris.

Spir. S. Ben. P. IV.

H

Pun-

## PUNCTUM SECUNDUM.

**I***n primis Dominum Deum diligere ex tota anima.* Quid est Dominum Deum diligere ex tota anima, nisi eum agnoscere, ejus voluntati se submittere, eum semper præsentem cogitare? Et quid utilius cognoscere potes, quàm Deum? Hunc si noscis, nôsti omnia, & beatus eris. Et quid justius, quàm voluntatem suam divinæ voluntati subjicere? Qui se plenariè illi subjicit nunquàm à justitiâ, & sanctitate deflectit; in omnibus prosperis, & adversis quiescit, neque ad dexteram, neque ad sinistram declinat. Et quid delectabilius, quàm Deum semper sibi præsentem in memoriâ retinere? Ecce! ipse implet te totum; quia non esses, nisi caperes illum. Ecce! totus in ipso es, ex quo omnia, per quem omnia, in quò omnia. Ecce! adest tibi Deus tuus, Dominus tuus, summus, optimus, potentissimus; misericordissimus, & justissimus; pulcherrimus, & fortissimus; stabilis & incomprehensibilis; immutabilis mutans omnia; nunquam novus, nunquàm vetus, innovans omnia, & in vetustatem perducens superbos, & nesciunt. Quid igitur deinceps aliud cogitabis, ô anima mea! quam Deum tuum? Quid voles, nisi voluntatem Dei tui? Cujus recordaberis, nisi Dei tui? Planè si non sæpè per diem intellectum, voluntatem, & memoriam in hoc Divino amore exercueris, non uteris hîs nobilissimâs po-  
ten-

tentiis ad finem, ad quem creatæ sunt; non amas Deum ex tota anima tua.

### PUNCTUM TERTIUM.

**I***mprimis Dominum Deum diligere ex tota virtute.* Quid est Dominum Deum diligere ex totâ virtute, quàm in omnibus amare? Quidquid igitur cogitas; ex amore Dei cogita. Quidquid desideras, vel amas; ex amore Dei desidera, vel ama. Quidquid dicis, audis, gustas, tangis, olfacis; omnia ex amore Dei dic, audi, gusta, tange, olfacito. Quidquid agis, omittis, aut pateris; omnia ex radice charitatis procedant. Videbitur quidem hoc leve, ac facile esse; at in praxi multâ, & magnâ abnegatione indiget. Continuô opus est exercitiô, ut hõc modô Deum ex totâ virtute diligas. Hoc enim est, quod Apostolus nobis inculcat: omnia quæcunque facitis sive in verbo, sive in opere, omnia in nomine Domini nostri Jesu Christi facite. Verùm grave sit hoc sancti amoris exercitium? In nullo alio sanè amorem nostrum Deo magis probamus, quàm in abnegatione, patientiâ, & exantlatione magnorum laborum. Eo plus diliges quo plus pro Deo sustinueris. Et tanto acceptior eris Deo, quanto ardentior fueris in amore. Plus valet apud eum amor, quàm opus. Vile hoc est, quantumvis magnum sit, apud ipsum; si ex amore non processerit. Magnum est, quæ



tumvis vile sit, apud eum; si ex magno amore provenerit.

### PUNCTUM QUARTUM.

**A**N ergò, ô Religiosè! exerces amorem Dei ex toto corde in omni desiderio cordis tui? Inquietum erit cor tuum; donec requiescat in eo bono, ad quod creatum est. An exerces amorem Dei ex totâ animâ sæpè per diem omnes ejus potentias Divino amori impendendo? Diligamus & nos Deum; quoniam prior dilexit nos. An exerces amorem Dei ex totâ virtute in omnibus ipsum amando? In omni virtute tuâ dilige eum, qui te fecit. Dole, quod hucusque mandatum primum tam rarò opere compleveris. Propone quotidie

1. In omni desiderio tuò,
2. Per omnes potentias animæ tuæ,
3. In omni actione, & passione tuâ Deum diligere.



### DIES IV.

#### De tribus patientiæ gradibus.

Patientiam amplectatur. Cap. 7. gr. 4.

v. 37.

Pun-

PUNCTUM PRIMUM.

Quanta mala à dæmone, à mundo, à carne passus sit Ss. Pater, & quàm patienter eadem pertulerit, constat ex S. Gregorio in vita ipsius. Unde non mirum, quòd sæpiùs patientiam nobis commendet: *Patientiam amplectatur.* Patientia nobis quotidie necessaria est, ut facientes voluntatem Dei reportemus repromissiones. Tres autem gradus sunt patientiæ. Primus est, ut *tacitâ conscientia in duris, & contrariis rebus patientiam amplectatur.* Facile ad injurias tacet, qui bonam habet conscientiam. Veritas liberabit eum. Etiam mala conscientia dum tacet, facilius absolvitur. Christus ipsemet defendit poenitentem, & patientem Magdalenam contra Phariseum. Facillimè demùm semetipsum perferet, qui tacere suas infirmitates siue animi, siue corporis, atque Deo soli conqueri didicerit. In hac sanctâ taciturnitate abyssus miseriæ humanæ abyssum Misericordiæ Divinæ invocat, & mox exauditur. Vix equidem in tentationibus, ariditatibus, aut quibusvis tribulationibus tacitè intùs ad cor te recipis atque Divinæ voluntati te resignas, statim tibi ex altò auxilium mittetur. Quid hæcenus verbis querulosus, aut impatientiâ tuâ profecisti. Malum auxisti, non sublevasti. Tace, & melius habebis.

## PUNCTUM SECUNDUM.

**P***atientiam amplectatur.* Alter hujus patientiæ gradus est, ut *pro Domino universa etiam contraria sustineat.* Amor omne amarum dulce reddit, ac lapidum. Quis enim non libenter patiat; dum contemplatur Dominum priorem nos per passionem suam dilexisse? Quis non libenter sequatur vestigia ejus, qui ex amore nostri prior passus est relinquens nobis exemplum? Quis non ex amore possidendi, & fruendi summò bonò libenter patiat; quandoquidem oportuit Christum pati, & ita intrare in gloriam suam? Sola vera patientia est, quæ & ipsum amat, quem portat. Nam tolerare, sed odisse, non est virtus mansuetudinis, sed velamentum furoris. Hinc quæcunque, dum pateris, ex amore ejus, qui prior dilexit te, sustine. Quid enim te juvaret, si in eo, quod exterius portas, interiùs doleres. Noli tantæ virtutis sacrificium, quod integrum foris immolas, intùs malitiæ peste corrumpere. Tantò deterior culpa interioris doloris coram districto judice sit, quanto magis sibi ante homines virtutis speciem vendicat.

## PUNCTUM TERTIUM.

**P***atientiam amplectatur.* Tertiùs denique hujus patientiæ gradus est, ut quis *sustineans non lassescat, vel discedat, dicente Scriptura:*

*ptura: qui perseveraverit usque in finem, hic salvus erit.* Nil prodest, si ab initiô tacitè crucem, & ex amore portes, sed in fine in murmur, aut odium erumpas. Calicem passionis usque ad ultimam guttam ebibit <sup>vis</sup>, qui dixit: consummatum est. Hujus exemplô cor confortandum est, quando diuturnitate doloris frangi incipit. Unicus quippe aspectus Crucifixi omnes nostras adversitates in tantum dulcorare potest, ut sine tribulatione esse nolemus. Quid enim adversa omnia nostra respectu passionis ipsius sunt, quàm flores in comparatione spinarum? Deinde quid nobis nocere poterit, si Deus nobiscum, & in nobis, & pro nobis est? Adversentur nobis omnia; omnia etiam nobis cooperabuntur ad salutem. Et si salutem per patientiam consequamur; quid refert, quantum, aut quale, vel à quô patiamur? Imò hoc unum refert, ut quàm plurimùm, & constanter patiamur. Patientiâ gloriæ pondus in coelis semper augetur.

#### PUNCTUM QUARTUM.

**A**N ergò, ô Religiose! tacitè adversa sustines? Stultus profert iram suam. An ex amore adversa pateris? Charitas benigna est. An perseveras in patientiâ? Non sunt condignæ passionibus hujus temporis adfuturam gloriam, quæ revelabitur in nobis. Dole, quòd necdum primum gradum patientiæ ascenderis. Propone



1. Tacitè,
2. Amorosè,
3. Perseveranter adversitates in hoc sæculo tolerare.



## DIES V.

De mediis conservandi castitatem usque ad mortem.

Castitatem amare. Cap. 4. Instr. 63.

## PUNCTUM PRIMUM.

**A**Mantissimus castitatis semper fuit. Ss. Pater noster; ideo ad superandam carnis tentationem corpus suum in spinis volutavit; ideo carnem suam totâ vitâ maceravit; ideo suis sequacibus omnibus *castitatem amare* præcepit. Nemo sincerè amat, quicquam non jugiter conservare satagit. Conservatur autem primò corporis castigatione. Etenim si corpus delicatè nutritur, & sensus suâ vivacitate liberè fruuntur; necessariò caro recalcitrabit. Quamprimum duro victu, & amictu, jejuniis, flagellis, atque sensuum externorum continentiam frænatur, omnis mox carnalis concupiscentia dissipatur. Sensus quippe exteriores portæ sunt, per quas mors ascendit. Gula quoque fomes, & mater libidinis est. Ventrem cibò distentum, & vi-

ni

ni potionibûs irrigatum voluptas genitalium naturaliter sequitur. Prô! multi conquerruntur de gravissimis carnis tentationibus; at comiseratione digni non sunt. Quomodo incendium extinguet, qui oleum flammæ jugiter adjicit? Qui ardenti corpusculo fomenta ignium ministrat? Planè non ita sentiebant Sancti. S. Hilarion, cùm in juventute acribûs luxuriæ stimulis agigaretur, ita corpus suum alloquebatur: ô asine! tu recalcitras contra me: at ego tibi locò avenæ paleas, & verbera dabo, onera tibi intolerabilia imponam; quousque non ampliùs impura somnies, sed solum cogites, ne præ lassitudine, & defectu virium moriaris. Et ecce! hæc agendo perfectam usque ad mortem castimoniam possedit. Sequere eum discretionem, & consiliò Patris spiritualis illum, si verè castitatem amas.

## PUNCTUM SECUNDUM.

**C***astitatem amare.* Verè amabis, si otium vitaveris. Conservatur enim castitas utili labore, & studiò Ss. Litterarum. Quæ enim fuit iniquitas Sodomæ? Otium. Quæ causa adulterii Davidis? Otium. Domi otiosus hærebat. Multam siquidem malitiam docuit otiositas; & nihil agendo, malè agere discimus. Tribûs namque funibûs nos Dæmon ad peccatum pertrahit. Primus est oblivio obligationum statûs, alter otium, &

H s ter-

tertius concupiscentia carnis. Oblivio obligationum statûs post se otium; otium verò post se concupiscentiam carnis trahit. Quod si solliciti simus, ne spiritus noster obligationum suarum obliviscatur, nunquàm otiosi erimûs. Si nunquàm otiosi sumus, nec locus tentationi carnis remanebit. Impossibile demùm est, ut cogitatio, & delectatio nostra simul versetur circa studia sacrae Scripturae, & circa objecta carnis; unum enim dum cogitamus, alterius obliviscimur. Hinc ama studia Ss. Litterarum, & carnis concupiscentias non amabis. Verùm qui hîs solùm mediis castitatem conservare nititur, teste Climaco, similis est homini in mare lapso, qui unâ manu natando mortem evadere cogitat. Industriæ nostræ semper jungenda est diffidentia sui, & confidentia in Deum. Sic nunquam etiam à decumanis tentationum procellis suffocabimur.

### PUNCTUM TERTIUM.

**C**astitatem amare. Non amabis, nisi cautè occasiones peccandi vitaveris. Vis scire ita esse? Accipe exempla! Samson leone fortior, & saxo durior, qui & unus, & nudus mille persecutus est armatos, in Dalilæ mollescit amplexibus. Salomon, per quem se cecinit ipsa Sapiencia, qui disputavit à cedris Libani usque ad hyssopum, quæ exit per parietem; recessit à Domino, quia amator mulie-

lierum fuit. Nihil periculosius viro, quàm  
fœmina; nec fœminæ quicquam periculo-  
sius, quàm vir: uterque ignis, uterque stipu-  
la. Hinc rectè monet Spiritus sanctus: in  
mediò mulierum noli commorari. O quot  
Viri sancti, quia occasiones non vitârunt, san-  
ctitatem cum castitate exuerunt! quod non  
ex puro amore Dei fœminas aut hospitio  
susceperunt, aut legem Dei docuerunt, &  
paulatim deficiente amore Dei, atque succe-  
dente naturali affectu tandem impuro igne  
absumpti sunt! rectè ad exemplum, & in-  
structionem suorum discipulorum Ss. Pater  
nec per unam noctem & quidem præsentibus  
aliis suis Religiosis cum sorore etiam vult  
pernoctare. Nonne securior eris & tu à  
vulnere, si hostem fugias, quam si cum eo  
congregiaris?


#### PUNCTUM QUARTUM.

**AN** igitur, ô Religiose! amas castitatem  
& mortificando corpus tuum? Servo male-  
volo tortura, & compedes. An amas castita-  
tem operando? Mitte servum in operatio-  
nem, ne vacet. An amas castitatem vitando  
pericula? Crede mihi, Episcopus sum, veri-  
tatem loquor, non mentior: cedros Libani,  
& gregum arietes sub hac specie corruisse  
vidi, de quorum casu non magis præsume-  
bam, quam Gregorii Nazianzeni, & Ambrosii.  
Fuge ergò laqueos mulierum, qui non es Da-  
vide



vide sanctior, nec Samfone fortior, nec sapientior Salomone. *S. Aug.* Dole, quòd ista media non adhibueris. Propone castitatem amare

1. Mortificando corpus,
2. Diligenter operando,
3. Vitando occasiones.



## DIES VI.

### De exercitio voti castitatis.

Castitatem amare. Cap. 4. v. 63.

### PUNCTUM PRIMUM.

**D**um Ss. Pater jubet *castitatem amare*, etiam præcipit, ut castitatem exerceas. Quod enim cor amat, circa illud & omnis ejus cogitatio, & actio occupatur. Duplex verò castitatis datur exercitium. Uno opus est tempore tentationis, altero tempore pacis. Castitatem hinc exercebis primo tempore tentationis. Vix enim dum minima se suggerit cogitatio libidinis, mox eam tene, & allide ad Christum. Nil quippe sic omnem libidinis sensum statim aufert, quam pia conversio animi ad Crucifixum. Juvat, ut & cogites nobilitatem animæ, & sublimitatem status tui; mox enim contemnes foeditatem carnis. Unde Spiritus sanctus monet: Fili!

glo-

glorifica animam tuam, & da illi honorem secundum meritum suum: peccantem in animam suam quis justificabit, & honorificabit exhonorantem animam suam? Oportet, ut quoque viriliter tentationi violentæ resistas, vium vi repellas. Qui enim diu quasi cum tentatione ludit, timendum, ne mortem secus introitum delectationis positam incurrat. Tu sequere exemplum S. Bernardi: quando ab inimico tentaris. Vade retro Satana; quoniam non sapis ea, quæ Dei sunt, sed magis sapientia tua inimica est Deo!

## PUNCTUM SECUNDUM.

**U**T *castitatem amare*, opere comprobes, secundo tempore tentationis Abbati, vel Seniori spirituali cogitationes malas aperi. Dæmon enim in nullius alterius peccati confessione tantum confunditur, quantum in confessione tentationis lubricæ. Mox totus pudenter abscedit. Hoc expertus est juvenis ille Eremita, qui quoties impuram tentationem sensit, toties Senem, sive Abbatem suum pro confessione accessit. Et sic evasit manus spurcissimi Asmodæi. In hoc denique prælio oportet semper esse magnanimum. Sæpe enim nimius timor labendi, ipsum lapsum procurat: quia animam, & corpus ad resistendum enervat. Nimius quoque horror hujusmodi tentationum, nonnunquam ipsas tentationes auget, multiplicat. Non nocebis  
tibi

tibi sensus, si desit consensus. Nullo modo Dæmon te circumvenire poterit, nisi ipse velis. Latrare potest mordere non potest nisi volentem. Hinc quidquid siue in anima, siue in corpore contra puritatem tibi accidat, noli timere, noli anxari. Quamdiu ab eo abhorres, tamdiu Christus manet in medio cordis, haud secus ac olim in gravissimis tentationibus mansit in corde magni illius Abbatis Antonii. Si vero Christus in te, tecum, & pro te pugnat, nonne audacter cum Davide dices: non timebo, quid faciat mihi caro?

### PUNCTUM TERTIUM.

**U**T *castitatem ames*, tempore pacis quam maximè eandem exercebis. Magni hinc æstimabis castitatem, summè amabis, crebro etiam hoc votum renovabis. Per hoc enim Christo cœlesti sponso tuo copulaberis; sequèris Agnum sine macula quocunque ierit. Secundo omnes impuras cogitationes, & affectiones per continuam Divinæ præsentiæ meditationem, per ardentem cœlestis Sponsi tui amorem, per multiplicata eodem brevi in cœlo fruendi desideria ita penitus exclude, ut omnis fornicatio, vel immunditia nec nominetur vel in cogitatione tua, vel in verbo tuo. Ita decet Sponsam Christi. Sic Diabolo impuro illi Lenoni omnem viam præcludes, ne corpus, aut animam  
cor-

corrumpere possit. Ah ! ne fiat , obsecro cum S. Hieronymo , meretrix fidelis Sion , ne post Trinitatis hospitium ibi Dæmones sal- tent , & sirenes nidificent & hericii.

### PUNCTUM QUARTUM.

**A**N ergo ô Religiose? exerces castitatem al- liquando mox parvulos cogitatus ad Chri- stum? Beatus , qui allidet parvulos ejus ad Petram. An exerces castitatem Seniori , vel Abbati malas cogitationes cordi tuo adve- nientes statim patefaciendo ? Vade ad Ana- niam ! an exerces castitatem jugiter per amo- rem cœlestis Sponsi desideria carnis exclu- dendo? Dilectus meus mihi , & ego illi. Do- le , quòd hucusque tam pretiosum votum exiguo in pretio , & exercitio habueris. Pro- pone deinceps castitatem exercere tempore belli , & pacis

1. Mox parvulos cogitatus malos alliden- do ad Christum ,

2. Seniori spirituali eosdem statim ape- riendo ,

3. Per ardentem amorem cœlestis Sponsi omnem ipsis introitum sive ad mentem , si- ve ad sensum continuo præcludendo.

\*\*\*\*\*X\*\*\*\*\*

### DIES VII.

De sublimi Religiosorum statu.

Cœnobitarum fortissimum genus. Cap. I. v. 6.

Pun-



## PUNCTUM PRIMUM.

Summam laudem Ss. Pater noster vitæ Cœnobiticæ admetitur; dum *Cœnobarum fortissimum genus* appellat. Et plane meretur. Est enim Angelica vita. Quis namque cœlibem vitam, vitam Angelicam, & cœlestem dicere vereatur? Quid futuri sunt in Resurrectione omnes electi? Nonne quod jam nunc sunt omnes Cœnobitæ, sicut Angeli Dei in cœlo, à nuptiis penitus abstinentes? Nunquid hic sublimis gradus est, quo nihil à nobis sublimius affectari potest? In corruptio siquidem facit proximum esse Deo. Ita ergo non nostro quidem merito, sed gratia Dei sumus, quod sumus: quod ad castitatem, & sanctimoniam spectat, Angeli quidem, aut potius cœli cives; sed interim in terra peregrini. Quamdiu enim sumus in hoc corpore, peregrinamur à Domino. Amplectere igitur, ô Frater! amplectere preciosissimam margaritam, amplectere castitatem quæ te Sanctorum efficit similem, & domesticum Dei.

## PUNCTUM SECUNDUM.

*Cœnobarum fortissimum genus.* Est enim vita Prophetica. Veritas quidem ait: Lex & Prophetæ usque ad Joannem. Verumtamen non erat ille adversarius, sed Discipulus utique veritatis, qui dicebat etiam  
post

post Joannem: Ex parte cognoscimus, & ex parte prophetamus, Cessavit ergo Prophetia, quia jam cognoscimus; nec tamen tota cessavit, quia adhuc ex parte prophetamus. Cessavit Prophetia de primo adventu; at non cessavit de secundo adventu Domini. Magnum sane prophetandi genus, cui dediti sunt Cœnobitæ. Quod illud? Nempe juxta Apostolum non considerare, quæ videntur, sed quæ non videntur, sine dubio prophetare est. Ambulare in Spiritu; ex fide vivere; quæ sursum sunt querere, non quæ super terram; oblivisci, quæ retro sunt, & extendi in anteriora, ex magna parte prophetare est. Alioquin quonam modo nisi per spiritum Prophetiæ conversatio nostra in cœlis est? Sic nimirum Prophetæ olim, quasi non inter homines erant sui temporis; sed virtute, & impetu quodam Spiritûs dies illos transilientes exultabant, ut viderent diem Domini, & videbant, & lætabantur in ea. O quàm sublimis ergo est status Religiosorum! amplectere, ô Frater! amplectere pretiosissimam margaritam; amplectere conversationem, quæ in cœlis est, & sicut fuisti in terris in gradu Prophetarum, ita & in ordine Prophetarum eris in cœlis.

### PUNCTUM TERTIUM.

**C***œnobitarum fortissimum genus.* Est enim vita Apostolica. Si gloriari licet, habemus  
*Spir. S. Ben. P. IV.* I


bemus plane gloriam: sed si sapimus, habere curabimus apud Deum. Hæc namque est vera gloriatio, ut qui gloriatur, in Domino gloriatur. Nam neque manus nostra excelsa; sed Dominus fecit hæc omnia. Fecit nobis magna, qui potens est; ut merito magnificet anima nostra Dominum. Ipsius enim magno munere factum est, ut magnum illud propositum, unde magni gloriabantur Apostoli, magnifice sequeremur. Ecce! nos reliquimus omnia: & secuti sumus te. Forte si & in hoc gloriari volumus, non erimus insipientes. Veritatem enim dicemus, esse aliquos, qui plusquam navem, & retia reliquere. Quid vero illud, quod ipsi quidem Apostoli, reliquerant omnia, sed ut præsentem Dominum in carne sequerentur? Non est nostrum dicere, securius ipsum Dominum audiamus. Quia vidisti me, inquit, Thoma! credidisti: beati, qui non viderunt, & crediderunt. Amplectere ergo, ô Frater! pretiosam margaritam; amplectere cum Apostolis perfectam mundi abrenunciationem, & sedebis cum ipsis judicans duodecim tribus Israël.

#### PUNCTUM QUARTUM.

**AN** igitur, ô Religiose! castitatem colis, ut Angelicæ sublimitatis dignus fias in Cœnobio? Erunt sicut Angeli Dei, qui nec nubunt, nec nubentur, An conversatio tua  
in

in coelis est, ut Propheticae sublimitatis dignus fias in Cœnobio? Ex parte prophetamus. An abrenuncias mundo, ut Apostolicae dignitatis dignus fias in Cœnobio? Relictis retribus secuti sunt eum. Dole, quòd hucusque ad sublimitatem status tui non contende-  
ris. Propone ad illam

1. Per castitatem,
2. Per conversationem cœlestem,
3. Per abrenunciationem mundi contendere.



DIES VIII.

De periculosa Religiosorum ruina.

Sarabaitarum deterrimum genus. Cap. I. v. 3.

PUNCTUM PRIMUM.

Sicut verorum Religiosorum status sublimis est, ita & periculosa eorundem ruina est. Unde Ss. Pater vitam *Sarabaitarum deterrimum genus* appellat. Prò? quàm periculosus lapsus est, qui ex alto gradu fit? Prò! quàm deterrimi evadunt, quibus *pro lege est desideriorum voluptas*? Ex Angelis in foedissimos Dæmones mutantur, qui abjecta castitate luxuriosè vivunt, & siliquis porcorum loco Angelici panis pascuntur. Nonne haud secus ac Dæmones quasi ignibus inferni ardent? *Luxuria ignis est us-*



*que ad perditionem devorans.* Reatus namque hujus facinoris non solum usque ad inquisitionem maculat; sed usque ad perditionem vorat: quia igne luxuriæ omnia bona opera concremantur. Nulla quippe ante omnipotentis Dei oculos justitiæ, pietatisque sunt opera, quæ corruptionis contagio monstrantur esse immunda. Quando itaque hic ignis semel exarsit, ardebit usque ad inferos deorsum, cum consumpto corpore mox spiritum à clibano carnis succenso ad clibanum miserit ignis æterni. O quam profunde lapsus est, qui jam per castitatem tertium cælum ascendit? Ah! qui stat, videat, ne cadat. Videbam Satanam tanquam fulgur de cælo cadentem. Ex alto corruit, confractus, & comminutus est. Quis non timeat?..

### PUNCTUM SECUNDUM.

**S***Arabaitarum deterrimum genus.* Est enim vita animalis. Prò! quantus lapsus non est? Quorum conversatio uti Prophetarum in cælis fuit, nunc omnis eorum cogitatio, & actio versatur in terris. Non amplius secundum fidem, spem, & charitatem ambulant; sed secundum sensum, & sensualitatem, atque in iis, quæ vident, quæ experiuntur, ut muta animalia corrumpuntur. Et quidem eo deterius, quo magis perverse ipsam rationem sensui subiciunt, atque per eam infinita quodammodo desideria concipiunt,

piunt, ut pariant iniquitatem. Nullum eorum plane opus Religionis ex radice supernaturali, sed omne ex corrupta natura procedit. Hinc & nullum meritorium est vitæ æternæ; omne corruptæ naturæ vitiis commaculatum est. Ah! qui stat, videat, ne cadat. Videbam Satanam tanquam fulgur de cœlo cadentem. Desperata est plaga ejus. Quis non expavescat?

PUNCTUM TERTIUM.

**S***Arabitarum deterrimum genus.* Prô? Quantus casus non est? Qui cum Apostolis ad judicandos peccatores electi fuerunt, mox ipsi peccatores constituuntur, & judicantur; quia ut sus ad volutabrum, ita ad seculum redierunt. Ita tamen cadunt, quotquot post abrenunciationem adhuc operibus servantes sæculo fidem mentiri Deo per tonsuram noscuntur. Ita cadunt, qui quod reliquerunt, illud rursus re, aut affectu assumunt. Ita cadunt, quotquot pauperes videri, sed non esse volunt. Ita cadunt, qui pauperem Jesum sequi profitentur; sed Mammonæ deserviunt. Apostoli nunquam ad ea, quæ dimiserunt, reversi sunt, illi Discipulo non permissum est, ut reverteretur ad sepeliendum Patrem suum. Judicabunt igitur duodecim tribus Israël. Ah! qui per abrenunciationem sæculi cum Apostolis stat ad judicandum, videat, ne ipsemet cadat in iudicium, cum aliquid de

mundo rursùm accipiat. Videbam Satanam tanquam fulgur de cœlo cadentem. Factus est Spiritus ejus vadens, & non rediens. Quis non horreat?

### PUNCTUM QUARTUM.

**P**Nigitur, ô Religiose? times, ne à statu Angelico ad Diabolicum per impuritatem cadas! Ignis est omnia eradicans gemina. An expavescis, ne à statu Prophetarum ad animalium statum per vitam sensualem cadas? Caro non percipit ea, quæ Spiritus sunt. An horres, ne à statu judicium ad statum judicandorum per reditum ad sæculum cadas? Durissimum erit his judicium. Dole, quòd & tu huic ruinæ pateas magnæ. Propone semper deinceps

1. Quamlibet minimam impuritatem,
2. Omnem vitam sensualem,
3. Quemlibet affectum ad sæculum angue pejus devitare.



### DIES IX.

Quàm grata debeat esse Monachis Monasterii sui paupertas.

Ubi autem loci necessitas exposcit, ut nec supra scripta mensura inveniri possit; sed multo minus, aut ex toto nihil, benedicant Deum, qui ibi habitant.

Cap. 40. v. 7.

Pun-

PUNCTUM PRIMUM.

**U**T Religiosi de paupertate sui Monasterii non causarentur, Ss. Pater eos sequentibus adhortatur verbis: *Ubi autem loci necessitas exposcit, ut nec supra scripta mensura inveniri possit; sed multo minus, aut ex toto nihil, benedicant Deum, qui ibi habitant.* Quare? Paupertas Religiosa magis splendescit in tali loco. Votum paupertatis magis Deo redditur, cui promissum est. Quomodo enim pauper est, qui in nullo defectum sustinere vult? Quomodo pauper est, qui ipsa etiam necessitate subinde carere non gaudet? Quomodo pauper est, qui nullius egere semper studet? Benedic ergo Deum, qui in tali paupere loco habitas. Ecce! & qui abundant temporalibus bonis, iis sine violatione voti S. Paupertatis ad abundantiam uti non possunt. Non licet plus lætari in conviviiis, & locutionibus divitum, quàm in paupertate, & abstinentia Religiosorum Fratrum. Non licet in amictu ornatum quærere. Amputari debet omne, quod superfluum est. Superfluis Pedes Christi, pauperes fovendi sunt.

PUNCTUM SECUNDUM.

**U***bi autem loci necessitas exposcit, ut nec supra scripta mensura inveniri possit, sed multo minus, aut ex toto nihil, benedi-*  
cant



*cant Deum, qui ibi habitant.* Quare? Patientia Religiosa magis elucet. Individua siquidem comes paupertatis patientia est. Vere Spiritu pauper non est, qui non cum gaudio frigitis, & æstum, atque omnem inopiam pati paratus est. Plane & qui abundant, hisce gaudere debent. Hæc sunt pars votorum, quæ distinxerunt labia eorum. O quam felices sunt, qui in paupere Monasterio habitant! ibi exulat murmur, si quid ipsis denegatur. Ibi exulat mala voluntas invidentium. Ibi exulat omnis habendi cupiditas. Benedic ergo Deum, qui ibi habitas. Quòd si Monasterium tuum abundat, ipsemet amputa subinde necessitatem, ut inopiam pauperis, ac patientis Jesu experiri possis. Aspice Monasteria à Ss. Patre in monte Cassino erecta. Vide primævos Sanctos Monachos. Aspicias summam egestatem patientes. Videbis de oblati fidelium votis, de divitiis, de omnium bonorum abundantia nihil sibi usurpare nisi necessitatem, imo & hanc respicere, ut paupertatis incommoda pati possint.

### PUNCTUM TERTIUM.

**U***Bi autem loci necessitas exposcit, ut nec supra scripta mensura inveniri possit, sed multo minus, aut ex toto nihil, benedicant Deum, qui ibi habitant.* Quare Religiosa humilitas magis enitescit. Non enim  
Ss. Pa-


Ss. Pater vult, ut solum internam, sed etiam externam humilitatem ad ædificationem videntium præ nobis feramus. Quæ autem alia est humilitas externa, quàm vilitas in victu, & amictu, in omni supellectili? ubi verò major superbia, quàm ubi abundantia bonorum largiter, & supra statum dividitur? Rectè hujusmodi lamentabundus occinit illud Threnorum S. Bernardus. Quomodo obscuratum est aurum, mutatus est color optimus? dispersi sunt lapides Sanctuarii in capite omnium platearum. Verè obscuratum est aurum; quando vita Religiosorum antea per gloriam virtutum erat clara, nunc verò per sæcularia opera est obscura. Verè mutatus color optimus; quando ampliùs habitus Religiosorum componitur, ut placeat in conspectu populi, quàm in conspectu Dei. Verè dispersi sunt lapides in capite omnium platearum, quando Religiosi viri quærendo vana, & sæcularia foris vagantur. Benedic ergò Deum, qui in paupere Monasteriò habitas. Verus enim Filius Ss. Patris esse non potest, nisi qui *omni vilitate contentus est.*

#### PUNCTUM QUARTUM.

AN igitur, ô Religiose! in Monasteriò paupertatem colis? Beati pauperes Spiritu; quoniam ipsorum est Regnum cœlorum. An in Monasteriò patientiam paupertatis exerces? Patientia vobis necessaria est, ut repor-

tetis repromissiones. An in Monasteriô vilitatem paupertatis amas? Respexit Dominus humilitatem Ancillæ suæ. Dole, quod ob paupertatem Monasterii tui sapè conquestus, vel abundantia illius contra votum paupertatis abusus fueris. Propone in Monasterio semper

1. Paupertatem, & in paupertate
2. Patientiam, atque
3. Humilitatem cum gaudiô exercere.



## DIES X.

### De crebra votorum Renovatione.

Promittat de stabilitate suâ, & conversione morum suorum, & obedientiâ. Cap.

58. v. 18.

### PUNCTUM PRIMUM.

**V**aldè utile, necessarium, & requisitum est, ut quæ vota semel iussit Ss. Pater vovere; *promittat de stabilitate suâ, & conversione morum suorum, & obedientiâ*, frequenter eadem renovemus. Utile enim est; quia novam nobis gratiam ad reddenda vota, quæ promissimus, impetrat. Insignis equidem actus amoris est, quoties eâ voluntate, quâ in professione primitus vota emisimus, postmodum eadem renovamus. Tunc verificatur  
de

de nobis illud Psalmistæ: hæc est generatio quærentium Dominum. Sed quærentium dicam, an habentium? Habemus enim Dominum; quia nos genuit in professione in spem vitæ, ut adoptionem Filiorum reciperemus. Quomodo namque nbs genuit? Verbô utique veritatis. Ergo verbo geniti, verbum, quod est Dominus, habemus. Quærimus autem Dominum, quando per renovationem votorum semper ampliores gratias de cumulo gratiæ benedictione dulcedinis requirimus. Sic de se loquitur, & testatur ipse Dominus, quem habemus, & quærimus. Qui me edit, adhuc esuriet. Quis proinde non crebro renovet vota sua, ut in gratiâ coram Deo, & hominibus magis proficiat?

PUNCTUM SECUNDUM.

**P***romittat de stabilitate sua, & conversione morum suorum, & obedientia.* Necessaria est crebra renovatio votorum iis, qui ea perfidè violarunt. Non enim peccatori datur venia peccatorum, nisi malam voluntatem retractaverit. Non efficaciter potest retractare, nisi rursus vota voveat, & reddat Domino. Scriptum namque est; vovete, & reddite: displicet Deo stulta promissio. Nónne Dominus ejusmodi transgressoribus jugiter acclamat: vae tibi generatio prava, & exasperans; mala & adultera generatio, mendacium usque hodiè quæritans, & diligens  
va-



vanitatem, nec servans fidem, cui desponsata fuisti veritati? Nunquid non opus habes nasci denuo, iterum generari? An non ad gratiam meam eodem modo, quo in professione rursus pervenire debes? Et maximè. Nempe gemina viperarum facti, tantò magis nunc necesse habent in ventrem matris gratiæ iteratò introire, & nasci, quantò facta noseuntur posteriora eorum, deteriora prioribus. Gratias ipsi gratiæ, & si dici potest plusquam gratiæ miserationi, quæ beneficiis obruit non modo immeritos, sed nimium male meritos, & ingratos. Gratias ei, qui etiam post tot lapsus rursus regenerat verbò veritatis suæ. Jure cum Propheta cantabis: voluntariè sacrificabo tibi, & confitebor nomini tuo Domine, quoniam bonum est.

### PUNCTUM TERTIUM.

**P**romittat de stabilitate sua, & de conversione morum suorum, & de obedientia. Requisita est crebra votorum renovatio ad perfectam eorum adimpletionem. Quid enim eorundem obligationem nobis magis inculcat; quàm frequens illorum reiteratio? quid fortius nos impellit, ut ea exactè observemus; quàm repetita vota, eadem servandi? Cerrè, qui vota vovent Domino, & exterius tantum servant ea, nimis imperfectè votis suis satisfaciunt; at qui ex intentione, & renovatione voti sui opus, quod Deo voverunt, per-

peragunt, ii sunt, qui perfectè votum suum exsolvunt. Hæc est generatio querentium Dominum. In simplicitate cordis querunt illum. Non enim aliud tanquam illum, non aliud præter illum, non aliud post illum præterunt; sed sicut in professione voverunt vota sua ad colendum Deum, ita reddunt vota sua ad cultum illius, dum renovant, & opera, quæ voverunt, præstant. Non ergo solvamus vota tantum externè, sed internè. Veritas est Deus, & tales quæsitores requirit, qui querunt eum, in Spiritu & veritate. Facilius tunc cælum, & terram erit transire, quam ut sic quærentes non inveniamus Dominum.

#### PUNCTUM QUARTUM.

**AN** igitur, ô Religiosè! crebrò vota tua renovas ad obtinendas novas gratias eadem observandi? Vota mea Domino reddam. An post transgressionem votorum crebrò vota renovas ad obtinendam primam stolam S. Professionis? dirupisti vincula mea, tibi sacrificabo hostiam laudis. An crebrò vota renovas ad eadem perfectè adimplenda? Si quis votum Domino voverit, non faciet irritum verbum suum, sed omne, quod promisit. Implebit. Dole, quod tam raro vota tua renovaveris. Propone vota

1. Ad obtinendas novas gratias, vel
2. Ad acquirendam rursus primam gratiam, &
3. Ad perfectè illa implenda crebro renovare.

**DIES**



## DIES XI.

## IN FESTO S. MARTINI EPISCOPI.

## De imitatione humilitatis S. Martini.

Non est exaltatum cor meum. Cap. 7. §. 1. v. 3.

## PUNCTUM PRIMUM.

Cum Ss. Pater noster specialis cultor S. Martini fuerit, utpote ad cujus honorem oraculum in templo Apollinis construxit; merito & nos eundem venerari, atque imitari debemus. Præ omnibus autem ejus virtutibus, atque in cunctis illius excellentiis, & prærogativis Sanctitatis resplendet admirabilis humilitas, quâ dicere potuit: *non est exaltatum cor meum*. Non illum splendor militaris profapiæ, non favor Imperatoris extollere potuit; quin non proprio servo calceamenta extraheret, purgaret, ac sedenti ad mensam inserviret. O quanta est ista humilitas! nonne se verè omnium vilissimum intimo cordis credidit affectu? At quàm longè nos ab eâ distamus? Plerumque enim se aut congenita nobilitas, aut per virtutem obtenta prærogativa animo nostro objicit, cumque tumidis cogitationibus fallit, ut amore Christi aliis humiliter servire dedignetur. Verùm nunquid omnes homines æquales natura sumus?

mus? deprimamus, quod dispensatorio ordine nobis accessit, ut quibusdam praelati videamur, & inveniēmus citius, quod naturaliter sumus. Consideremus virtutes etiam vilissimorum hominum ad peccata nostra; vel si nullas possident, æstimemus illos ad occulta Dei judicia, in quibus nos forsan meritis longè superabunt, & humiliter illis servire gaudebimus. Væ Jesum non sequentibus, qui venit ministrare, & non ministrari! approximabunt in pœnis superbo Lucifero, quem in terris imitati sunt.

## PUNCTUM SECUNDUM.

**N***On est exaltatum cor meum.* Ad omnia se indignum æstimavit S. Martinus. Noluī officium Diaconatūs, Sacerdotiī, minūs Episcopatūs in se recipere, semper indignum se esse vociferans; fortiter reluctatus est honorantibus se. Et cur? Benè ponderavit illud Regum: pedes Sanctorum suorum servabit. Quid enim in utroque pede intelligitur, nisi fortitudo, & humilitas? Ne igitur rueret, in utroque pede substitit. Benè scivit, humiles in judicio divino in sublimi collocandos esse; qui nunc temporalem honorem rectæ cogitationis examine calcarent. Benè comprehendit, eo lapsum esse periculosiorem, quo ex altiori gradu fit. Semper sibi ante oculos posuit exemplum Eleazari, qui in prælio elephantem feriens stravit, sed sub ipso, quem



quem extinxit, occubuit. Hinc timuit & ipse, ne onus, quod in se susceperet, cum contereret. O qui cum B. Martino hujuscemodi considerationes mente, animoque constanter volveret, puto, quod pedibus, manibusque honores à se propelleret!

### PUNCTUM TERTIUM.

**N***on est exaltatum cor meum.* Quantumvis enim virtutibus, & miraculis B. Martinus claruit, humillimus tamen in se mansit. Et quamvis à Deo, & hominibus honoraretur, nil tamen boni in se recognoscebat. Usque ad mortem pœnitentialem, atque humillimam vitam duxit. Nullum siquidem eum opus bonum, nulla gratia inflare potuit, qui altè cordi suo habuit inscriptum: quid habes, quod non accepisti? Si autem accepisti, quid gloriaris, quasi non acceperis? Non sumus sufficientes ex nobis cogitare quidquam boni, quasi ex nobis, sed omnis sufficientia nostra ex Deo est. Gratia Dei sum id, quod sum. Hac vero humilitate semper ampliora à Deo promerebatur charismata gratiarum. Omnis namque vallis implebitur. Nos quia de bonis nostris actibus superbimus, & acceptas gratias per superbiam perdimus, & indignos nos reddimus ad novas accipendas. Sed redeamus ad cor. Imitemur S. Martinum. Opere impleamus illud Ss. Patris nostri bonorum operum instrumentum: *bonum ali-*

*aliquod in se cum viderit, Deo applicet, non sibi; malum verò semper à se factum sciat, & sibi reputet.*

PUNCTUM QUARTUM.

**A**N ergò, ô Religiose! cum S. Martino aliis libenter servis? Si quis vult inter vos primus esse, erit omnium novissimus, & omnium minister. An cum S. Martino ad omnia munia te indignum reputas? Cum invitatus fueris ad nuptias, non discumbas in primo loco, ne fortè te honoratior sit, & tunc incipias cum rubore novissimum locum tenere: quia omnis, qui se exaltat, humiliabitur; & qui se humiliat, exaltabitur. An cum S. Martino in donis supernaturalibus humiliter de te sentis? Ego enim sum minimus; omnium peripsema usque adhuc. Dole, quòd hanc S. Martini humilitatem non fueris imitatus. Propone

1. Aliis ex humilitate libenter servire.
2. Ad omnia munia te indignum reputare.
3. De donis supernaturalibus non superbire.

\*\*\*\*\*

DIES XII.

*De necessitate Spei.*

Spem suam Deo committere. Cap. 4.  
Instr. 41.

*Spir. S. Ben. P. IV.*

K

Pun-

## PUNCTUM PRIMUM.

**S**anctissimus Pater noster hōc instrumentū;  
*spem suam Deo committere*, nobis summo-  
 pere frequentēs actus fiduciæ in Deum com-  
 mendat. Et meritō. Spes nobis necessaria est  
 ad vitanda peccata. Nunquā enim tenta-  
 tiones superabimus, aut passionum tumultus  
 sedabimus, nisi mentem nostram spes coele-  
 stium solidaverit. Sic quippe firma in Deum  
 fiducia animum obfirmat, ut eum ad perpe-  
 trandam nequitiam nec blandimenta suasio-  
 num pertrahant, nec dolores suppliciorum  
 frangant. Spes siquidem in æternitatem ani-  
 mam erigit, & idcirco, nulla mala, de quibus  
 tentatur, admittit. Verificatur nempe illud  
 Job in eo, qui confidit in Domino. Confusi  
 sunt; quia speravi. Etenim cū iusti spes in-  
 teriūs figitur, & nequaquā malignis tenta-  
 tionibus ad ima reclinatur, inimicum humani  
 generis confusio occupat: quia dum perve-  
 nire ad iustorum intima nequit, incassum se  
 existere crudelem tentatorem erubescit, &  
 fugit. Spera igitur ad omnem tentationem in  
 Domino, & spem sicut anchoram habebis ani-  
 mæ tutam, ac firmam.

## PUNCTUM SECUNDUM.

**S***pem suam Deo committere.* Spes necessa-  
 ria est ad superandas hujus vitæ adversi-  
 tates, & mundi prosperitates. Hæc etenim  
 fidu-

fiducia speciale specimen electorum est, quòd sic sciunt præsentis vitæ iter carpere, ut per spei certitudinem noverint jam se ad alta pervenisse, quatenus cuncta, quæ præterflunt, sub se esse videant. Unde de tali electo Dominus dicit: sustollam te super altitudines terræ. Quasi namque inferiora terræ sunt damna, contumeliæ, egestas; at mens, quæ sperat in Domino, ista secura pertransit, quando ceu transacta, vel mox transigenda cogitat, & pro illis præmium in cœlis sperat sine fine duraturum. Quasi autem altitudines terræ sunt lucra rerum, blandimenta, honores. Hæc, quisquis per ima adhuc desideria incedit, eo ipso alta aestimat, quo magna putat. At si semel cor in cœlestibus per spem figitur, mox quàm abjecta sint, quæ alta videbantur, recognoscit. Nam sicut, qui in montem ascendit, eo paulisper subterjacentia despicit, quo ad altiora gressum ampliùs tendit; ita qui in summis intentionem figere nititur, dum annisu ipso nullam præsentis vitæ gloriam, vel voluntatem esse deprehendit, super terræ altitudines elevatur. Et quod priùs in imis desideriis positus super se credidit, post ascendendò proficiens sibi subesse experitur. Spera igitur in Deo tuo, & nec in prosperis, nec in adversis spe tuâ frustraberis.

### PUNCTUM TERTIUM.

**S***Pem suam Deo committere.* Spes necessaria est ad acquirendas virtutes, & perfectio-



nem monasticam. Spes quippe majora semper charismata æmulatur. Nunquam à cœpta virtute deficit, sed quotidie ad maiorem perfectionem proficit. Ipsa beatitudo, quam per gratiam Dei, & propriam cooperationem sperat, animum, roburque addit, ut continuo progrediatur. Fidelis enim Dominus in omnibus viis suis. Promisit in hac vita poenitentibus veniam. Manifestum hinc est; quia sicut consentientibus remissionem tribuit peccatorum, ita ab ista spe non decidentibus dabit regnum cœlorum. Spera igitur in Domino, mutabis fortitudinem, assumes pennas ut aquilæ, volabis, & non deficies.

#### PUNCTUM QUARTUM.

**AN** idcirco, ô Religiose! speras in Domino ad vitanda peccata? Salvum faciet ege-  
num de gladio oris eorum. An speras in Domino ad superandam adversitatem, & prosperitatem hujus sæculi? Væ his, qui perderunt sustinentiam. An speras in Domino ad acquirendam perfectionem? Elevabitur aquila, & in arduis ponet nidum sibi. Dole, quod tam raro actus spei elicueris, nec ad animæ tuæ profectum fiducia in omnibus usus fueris. Propone in Domino sperare

1. Ad devitanda peccata.
2. Ad superandam prosperitatem, & adversitatem hujus sæculi,
3. Ad acquirendam perfectionem.

DIES

ॐ नमो भगवते वासुदेवाय ॐ नमो भगवते वासुदेवाय ॐ नमो भगवते वासुदेवाय

DIES XIII.

IN FESTO OMN. SS. MONACHO-  
RUM ORD. SS. P. BENEDICTI.

### De exemplo Majorum.

Nihil agat Monachus, nisi quod Majorum co-  
hortantur exempla. Cap. 7. gr. 8. v. 69.

## PUNCTUM PRIMUM.

**O** Quam gloriosum est Rēgnum, in quo Ss. Pater noster. cum Filiis suis triumphat? Quis non ad illam innumerabilem sanctorum Confratrum turmam pervenire desideret? Pervenies, *si nihil agas, nisi quod Majorum cohortantur exempla.* Et quale in primis tibi præbent exemplum? Nōne poenitentia etiam in summa innocentia, & sanctitate vitæ? Ab externa austeritate vitæ metire internam cordis compunctionem. Ordinem plantabant in sanguine suo, in labore, & ærumna, in fame, & siti, in frigore, & nuditate, in persecutionibus, & contumeliis, & angustiis multis. Ipsi sibi cellas ædificabant, in quibus tecti tantummodo, & circumsepti à turbine, & à pluviâ tutabantur. Nemini otiosum esse licebat; omnes manibus laborabant. Nullus præsumebat loqui, cuncti perpetuum firmè silentium colebant. Ipsi olus cibaria fuere,

vel legumina, potumque lympha præbuit, humusque dura lectulum. Et ut nihil de stupendis aliis, non imitandis Patrum nostrorum austeritatibus dicam, quomodo eos sequeris in virtute pœnitentiæ? Certe Monachus non est, qui pœnitentiam non agit.

### PUNCTUM SECUNDUM.

**N**ihil agat Monachus, nisi quod Majorum cohortantur exempla. Et quænam sunt præcipua exempla Majorum nostrorum? Nonne incessabilis laudis Divinæ? Anticipaverunt nocturnas vigiliis, imo integras noctes in psallendo consumpserunt. Nihil unquam operi Dei præposuerunt; sed mox ad signum relictis omnibus quilibet alterum ad officium Divinum prævenire contendit. Nemo psallentium choris deesse voluit; omnes, nisi lethifera infirmitas impedisset, cum cæteris Fratribus laudes Divinas decantare gestiebant. In ipsa psalmodia non jam homines, sed Angeli, in quorum conspectu psallebant, astantibus semper visi fuerant. Et quamvis statis horis operi manuum juxta Ss. Regulam vacabant, tamen in mente continuo Psalmos ruminaverunt. Hinc factum, ut à Tyrannis in arboribus suspensi laudem Divinam cantare minime cessarent. Et quod mirum est, post mortem & visi sunt, & auditi dulciter laudare nomen Domini. Plane nihil agit Monachus, si opus Dei agit negliger.

Pun-

PUNCTUM TERTIUM.

**N**ihil agat Monachus, nisi quod Majorum  
cobortantur exempla. Qualia sunt ista  
exempla Majorum nostrorum? Nonne inenarrabilis dilectionis fraternæ? Ipsi verè jucundum erat habitare in unum; quia semper cor unum habebant, & animam unam. Nulla æmulatio apud ipsos, nisi tantum charismatum meliorum. Nulla invidia, aut contractio cordis. Quivis omni extremitate, & vilitate contentus erat, atque omnium se vilissimum reputaverat. Hinc nemo præesse, cuncti subesse æmulati fuerant; quia quilibet reliquos suos Fratres, suos quoque Superiores æstimaverat. Et ut fraternæ charitatis obsequia unus alteri exhibere posset, non raro noctem in auxilium vocabant; quatenus unus alterius laborem pie furari, perficere, atque sic onus portare posset. Nemo desolatus, turbatus, aut tristis relinquebatur; cuilibet sua solatia ministrabantur. Verè nihil aget Monachus, si ista Majorum exempla non sequatur. Nihil enim est, qui charitatem non habuerit.

PUNCTUM QUARTUM.

**A**N igitur, ô Religiose! sequeris Majorum exempla in poenitentia? Monachi officium est semper plangere. An sequeris Majorum exempla in opere Divino? Monachi



officium est puram Deo orationem offerre. An sequeris Majorum exempla in charitate fraterna? Sine charitate fraterna Monasterium tartarus est; & qui ibi habitant, non Monachi, sed Dæmones sunt. Dole, quòd sanctos tuos Confratres non fueris imitatus. Propone Eorum exempla sequi

1. In pœnitentia,
2. In opere Divino,
3. In charitate fraterna &c.



#### DIES XIV.

De miseria Religiosorum à sua vocatione deficientium.

Si aliquando aliter fecerit, ab eo se damnandum sciat, quem irridet. Cap. 58. v. 20.

#### PUNCTUM PRIMUM.

**N**ON immerito Ss. Pater gravissima comminatione Professo comminatur; *si aliquando aliter fecerit, ab eo se damnandum sciat, quem irridet.* Prævidit quàm plurimos a sua vocatione ad sæculum affectu, & moribus redituros. At quanta istorum miseria est? Qui enim vocationem suam derelinquunt, & operibus sæculo servant fidem, efficiuntur nigri sicut carbones frigidi. Quare? Quia per torporem mentis ab igne charitatis Dei sunt mortui, & extincti. Unde  
bea-

beatus Isidorus : Qui de bona vita ad malam revertuntur per cupiditatem mundi, sunt contenebrati, & nigredine vitiorum sunt foedati, & fuscati, atque lucernæ charitatis Dei sunt extranei. Qui affectu ad sæculum fugiunt, à societate Angelorum separantur, & Dæmonibus sociantur. Qui sanctam conversationem relinquunt, & ad sæcularem vitam descendunt : a societate Dei elongantur. Considera igitur, ô Religiose ! quotidie : qualem vitam professus es, unde venisti, & ad quid venisti, & quare venisti ; ne unquam ad sæculum aut affectu, aut moribus redeas.

## PUNCTUM SECUNDUM.

*SI aliquando aliter fecerit, ab eo se damnandum sciatur, quem irridet.* Quanta miseria votifragorum ? Maximam enim immanitatem peccati committunt, qui vota sua frangunt. Nam etsi aliqui etiam inordinati, & indisciplinati, ac peccatores sint, non tamen sunt prævaricatores. Hinc quantumlibet cæteroquin religiose se quis habeat, Deo tamen minus accepta est ejus religio, quam deturpat voti prævaricatio. Imo Deo omnino gratum esse non potest, quidquid religionis ei obtulerit ; quamdiu voti prævaricator non redierit ad cor. Incassum laborat, jejuna, vigila, orat ; quia à Deo damnabitur, quem irridet. Et tanto damna-

tio erit major, quanto corona fuisset auctior, si votis suis fecisset satis. Etenim si teste calvaria illa, quæ Macario Abbati locuta est, præ cæteris in inferno torquentur Christiani, certe Religiosi adhuc graviores dabunt pœnas, qui inter Christianos debuissent esse perfectiores. Noli ergo nunc exultare in rebus pœssimis, ne Deus rideat in interitu tuo.

### PUNCTUM TERTIUM.

**S***ialiter fecerit, ab eo se damnandum sciat, quem irridet.* Quanta miseria tepidorum? Summopere enim Religiosus tepidus Deo displicet. Frigidus sæculares Deus patienter exspectat de frigore ad calorem converti; at Religiosum in vocatione sua tepidum indignans cum advertit, incipit eum evomere ex ore suo. Et merito: quia ipse ad vomitum suum redit; quia ipse gratiam vocationis evomit. Heu quomodo Christum fastidit, de quo scriptum est: mel, & lac sub lingua ejus? Miror, quod ad gustum dulcissimi cibi nauseare possit; si tamen gustavit; quam dulcis est Dominus. Aut certe nondum gustavit, & nescit, quid sapit Christus, ideoque non appetit inexpertum: aut si gustavit, & dulce non sapuit, sanum non habet palatum. Ipse quippe Dei est sapientia, quæ ait: qui comedit me, adhuc esuriet, & qui bibit me, adhuc sitiet. Sed quomodo potest esurire, vel sitire Christum plenus quotidie


tidie siliquis porcorum ? Non potest bibere calicem Christi, & calicem Dæmoniorum. Calix Dæmoniorum superbia est. Calix Dæmoniorum detractio, & invidia est. Calix Dæmoniorum crapula est. Calix Dæmoniorum carnalis delectatio, & repausatio est. Spirituales namque, ac carnales deliciae in eodem se non compatiuntur. Eja latare ergo in Deo tuo, & exulta, ne decedente temporali lætitia, succedat, quæ te absorbeat, æterna tristitia.

#### PUNCTUM QUARTUM.

**A**N igitur, ô Religiose ! nunquam ad sæculum affectu, vel moribus redis ? Qui retrospicit, non est aptus regno Dei. An vota non violas ? Multo melius est non vovere, quam post votum promissa non reddere. An non tepidus es ? Utinam calidus esses, aut frigidus ; sed quia tepidus es, incipiam te evomere ex ore meo. Dole, quòd miseriam Religiosorum à vocatione sua deficientium & tu hucusque laboraveris. Propone

1. Neque affectu, aut moribus ad sæculum redire.
2. Neque vota violare,
3. Neque tepidus in vocatione tua existere.





## DIES XV.

De quotidiano charitatis proximi exercitio.

Deinde diligere proximum tanquam seipsum.  
Cap. 4. Instr. 2.

## PUNCTUM PRIMUM.

Cum mandatum maximum sit, *diligere Dominum Deum ex toto corde, ex tota anima, & ex totis viribus*, alterum autem simile huic, *deinde proximum tanquam seipsum*; merito ad mentem Ss. Patris nostri quotidie & amorem proximi exercemus. Porro hoc exercitium in tribus consistit. Primum est, ut quotidianas offensiones libenter proximo nostro condonemus. Impossibile namque est, quamdiu in hac vita sumus, ne quotidie invicem & offendamus, & offendamur. Unde necesse est, ut quotidie offensas indulgeamus. Divina siquidem dispensatione permittimur offendi, ut dum aliis quotidianas injurias remittimus, Deus quoque habeat, unde quotidiana peccata nobis ignoscat. Preci enim, quam composuit, conditionem inseruit dicens: Dimitte nobis debita nostra, sicut & nos dimittimus debitoribus nostris. Aut ergo non facientes dicimus hanc precem, & nosmetipsos dicendo amplius ligamus:  
aut

aut fortasse conditionem hanc in oratione intermittimus, & advocatus noster precem, quam composuit, non recognoscit. Quid hinc nobis agendum est, nisi ut veræ charitatis affectum impendamus Fratribus, nulla in corde malitia maneat? tunc enim omnipotens Deus considerabit charitatem nostram, & nostris, impendet iniquitatibus pietatem suam.

PUNCTUM SECUNDUM.

*Deinde diligere proximum tanquam seipsum.*

Alterum hujus sanctæ dilectionis exercitium est, ut quotidie unum aut alterum opus misericordiæ proximo nostro impendamus. Ad hoc nos Ezechiël hortatur, quando ait: sub firmamento autem pennæ eorum rectæ alterius ad alterum. Tunc quippe pennæ virtutum sub firmamento rectæ sunt, quando bonum, quod alter habet, hoc alteri misericorditer elargitur. Sic, qui potest, & audet, pauperes recreet. Qui doctrinæ gratia plenus est, ignorantis proximi tenebras verbo suæ prædicationis illustret. Qui soli Deo vocare meruit, pro delinquentibus proximis exoret. Pennæ enim nostræ rectæ jam non sunt, si ad utilitatem nostram solummodo reflectuntur. Sed tunc rectæ fiunt, cum in utilitatem, proximi dirigimus, quod habemus. Quia enim bona nostra non à nobis sunt, sed ab eo hæc accepimus,

mus, à quo factum est, ut essemus, tanto ea nobis non debemus retinere privata, quanto ea nobis conspiciamus ab Authore nostro ad communem utilitatem data. Qui ita in proximum misericors est, habet Divinum promissum; quia misericordiam consequetur.

### PUNCTUM TERTIUM.

**D***Einde diligere proximum tanquam seipsum.*

Tertium hujus sanctæ dilectionis exercitium est, ut bono exemplo proximum nostrum quotidie ædificemus. Nullo enim modo ipsius salutem efficacius promovere possumus, quàm exemplo. Ad hunc quippe actum amoris ipsa veritas nos hortatur: luceat lux vestra coram hominibus, ut videant opera vestra bona, & glorificent Patrem vestrum, qui in cœlis est. Hanc veritatem sequitur, qui in omni, quod dicit, atque in omni, quod agit, non solum profectum suum; sed etiam proximorum ædificationem quærit. Aliquando in quibusdam semetipsum dijudicat, ut negligentes, & tepidos ad sui cognitionem revocet. Aliquando bona opera ostendit, ut spectatores eorum erubescant non imitari, quod vident. Aspera siquidem sæcularium corda, si prius Religiosorum exempla non vident, nec latitudine devotionis se valent distendere, nec Christianæ perfectionis normam imitari. Tu igitur zelo amoris proximi inardesce, & bo-  
no

no virtutum odore fac omnes currere in odorem unguentorum Christi.

PUNCTUM QUARTUM.

AN igitur, ô Religioſe ! exerces charitatem proximi remittendo illi quotidianas offenſiones ! Dimittite, & dimittemini. An exerces charitatem proximi per quotidiana miſericordiæ opera ? Beati miſericordes ? quoniam & ipſi miſericordiam conſequentur. An exerces charitatem proximi per quotidianum bonum exemplum ? Qui fecerit, & docuerit, magnus vocabitur in regno cœlorum. Dole, quòd charitatem proximi tam raro exercueris. Propone charitatem proximi quotidie exercere

1. Per indulgentiam offenſarum,
2. Per opera miſericordiæ,
3. Per bonum exemplum.



DIES XVI.

Quòd æternæ pœnæ ſunt veluti præſentes conſiderandæ.

Sit memor, qualiter contemnentes Deum in gehennam pro peccatis incidunt. Cap. 7. v. 10.

PUNCTUM PRIMUM.

**H**isce : *Sit memor, qualiter contemnentes Deum in gebennam pro peccatis incidunt,*  
Ss. Pa-



Ss. Pater nobis commendat considerationem pœnarum inferni, non tanquam primum futuræ, sed tanquam præsentis sint. Hoc indicat tempore præsentis; dum ait: *incidunt*. Solet enim ejusmodi consideratio altius cor penetrare, atque à peccato magis absterre-  
re. Considera igitur præsentem pœnam damni, qua damnati excluduntur æternum à visione beatifica. Super eos enim cecidit ignis, non viderunt solem. Ignis super impios cadit; sed sol igne cadente non cernitur; quia illos, quos gehennæ flamma devorat, à visione veri luminis cæcat: ut foris eos dolor combustionis cruciet, & intus pœna cecitatis obscuret: quatenus qui Authori suo corde, & corpore deliquerunt, simul corde, & corpore puniantur. At præ cunctis cruciatibus major est pœna damni, quæ æterno lumine, æterna beatitudine damnatos spoliât. Aspice namque hos sedentes in tenebris, & in umbra mortis, videbis, quod sicut mors exterior ab anima dividit carnem; ita mors interior separet à Deo animam. Prô! quale hujus mortis tormentum? Qualis ista est separatio? A longe quidquam cognoscere poteris, si cogites, à quo separet. Et si istam pœnam præsentem admireris, quomodo cogitatione peccare poteris?

### PUNCTUM SECUNDUM.

**S**it memor, qualiter contemnentes Deum pro peccatis in gehennam *incidunt*. Conside-  
ra

ra præsentem pœnam sensûs, modo enim torquetur, qui damnatus est tali igne, tali frigore, ut omnis ignis, & calor hujus sæculi in comparatione illius ardoris, & frigoris nihil sit. Visus illius semper conspiciat tētras, & horrendas Dæmonum facies. Auditus percipit voces desperantium. Odor repletur fœtore intolerabili. Gustus felle Draconum satiatur. Nullum membrum est, nullus sensus est, qui non amarissima sentiat tormenta; quæque ita varia, multa, & magna sunt, ut nec numerari, nec comprehendere possint. O qui ista ceu præsentia attenderet, an ullo sensu excedere auderet?

PUNCTUM TERTIUM.

*S*it memor, qualiter contemnentes Deum pro peccatis in gehennam incidunt. Considera præsentem omnium pœnarum æternitatem. Luit enim damnatus, quæ fecit omnia nec tamen consumitur. Persolvit in tormento ea, quæ hic illicita servavit desideria, & flammis ultricibus traditus semper meritur; quia semper in morte servatur. Non enim in morte consumitur: quia si consummaretur vita morientis, cum vita etiam pœna finiretur. Sed ut sine fine cruciatur, vivere, sine fine in pœna compellitur, ut cujus vita hic mortua fuit in culpa, illic ejus mors vivat in pœna. Cruciatur ergo, & non extinguatur; moritur, & vivit; deficit, & subsistit;

*Spir. S. Ben. P. IV.*

L

fistit;

sistit; finitur semper, & sine fine est. Sic mors depascet peccatores in æternum. Hæc sole auditu terribilia sunt, quanto magis passione? Quis istam æternam mortem præsentem cogitet, & præsentem voluptatem, & vanitatem mundi non contemnat?

### PUNCTUM QUARTUM.

**A**N ergo, ô Religiose? præsentem poenam damni consideras, ne cogitatione delinquas? Quantum exaltavit se, tantum date illi luctum. An præsentem poenam sensus consideras, ne sensibus exterioribus pecces? Quantum in deliciis fuit, tantum date illi tormentum. An præsentem poenarum æternitatem consideras, ne Deum præsentem voluptate, & vanitate deceptus offendas? Ita maledicti in ignem æternum. Dole, quòd novissimorum tuorum hucusque tam immemor vixeris. Propone illa ut præsentia intueri, ne Deum offendas

1. Cogitatione,
2. Sensu exteriori,
3. Vanitate, aut voluptate hujus sæculi.

\*\*\*\*\*

### DIES XVII.

Quòd in ordinariis potius, quàm in singularibus quærenda sit perfectio.

Nihil

Nihil agat Monachus, nisi quod communis  
Monasterii regula cohortatur. Cap.

7. gr. 8. v. 69.

## PUNCTUM PRIMUM.

**A**urea plane ista Ss. Patris nostri Regula est:  
*nihil agat Monachus, nisi quod communis  
Monasterii regula cohortatur.* Damnat sin-  
gularitatem; jubet, ut in communi Regulæ  
observantia perfectio quærat. Quæ enim  
singularia sunt, suspecta sunt de superbia,  
& vana gloria. Dum quippe singularia quis  
agit, jam non melius vivere, sed videri vi-  
vere gestit, quatenus dicere possit: Non  
sum sicut cæteri hominum. Plus sibi blandi-  
tur de uno jejunio, quod cæteris pramenti-  
bus facit, quàm si cum cæteris septem dies  
jejunaverit. Cum autem ex his, quæ sin-  
gulariter agit, famam, & æstimationem  
comparat, adhuc fortius ad singularia affici-  
tur, & ad communia Ordinis, & Monaste-  
rii exercitia magis piger efficitur. Quis in-  
curabilem hujusmodi singularistæ errorem  
non deprehendit? Nonne in vanum laborat?  
Nunquid ei dicetur. Recepisti mercedem  
tuam? Fuge igitur singularitatem. Qui  
enim hoc facit, quod nemo; mirantur om-  
nes. Ea tantum age, quæ communia sunt.  
Ista si cum magna humilitate, & charitate  
perfeceris, perfectus eris. Non enim Deus  
tantum pensat, quantum quis agat, sed ex  
quanto faciat.



## PUNCTUM SECUNDUM.

**N**ihil agat Monachus, nisi quod communis Monasterii regula cohortatur. Solent enim singularia plerumque infecta esse propria voluntate. Qui namque singularis est, semper privata, quæ voluntas propria appetit, inquit, & communia, quæ obedientia iungit, negligit. Hinc dum alii labori, ipse orationi; dum alii somno, ipse vigiliis vacat. Nihil grave ei accidit, quantumvis grave sit, quod ex propria voluntate agit; at quodvis commune exercitium illi intolerabile videtur; quia ab obedientia illud procedit. Quis fraudem Diaboli in hoc nequissimo singularitatis vitio non animadvertit? Nunquid non ejusmodi exprobrabitur: Non placet mihi jejunium vestrum; quia in eo invenitur voluntas vestra? Voluntas Dei sanctificatio nostra est, & quæ ex hac voluntate sunt, sancta sunt, perfecta sunt. Unde qui communia cum verâ mortificatione omnis proprietatis, & ex obedientia peragit, perfectus erit. Hac in re exemplo nobis est ipsemet Salvator, cujus utique cibus fuit facere voluntatem Patris sui, qui in cœlis est.

## PUNCTUM TERTIUM.

**N**ihil agat Monachus, nisi quod communis Monasterii regula cohortatur. Quævis enim singularia plerumque acediam maxi-  
mam

nam in communibus post se trahunt. Sic singularista vigilat in lecto, dormit in choro, eumque aliis psallentibus dormitet, solus in oratorio post vigilias remanet, vigilat, orat. Minima negligit, magna & singularia attentat. At ipsa demùm, quæ agit singularia, sine omni devotione, & puritate peragit; quia non Deum, sed ubique seipsum in omnibus quærit. Quis hanc grandem deceptionem non intelligit? Nónne talis; quum ubivis seipsum quærat, etiam seipsum inveniet, sed ad perditionem? Nónne quia spernit modica, paulatim decidet? Nunquid audiet, maledictus homo, qui facit opus Dei negligenter? Sanè qui nihil negligit, minima quæque, ac communia cum singulari devotione peragit, perfectus est. Plus etenim Deo opus minimum cum magnâ devotione perfectum placet, quàm opus magnum in acediâ consummatum.

#### PUNCTUM QUARTUM.

AN ergò, ô Religiose! singularia fugis, & perfectionem in communibus quæris per magnam humilitatem, & charitatem? Major autem horum charitas. An singularia fugis, & perfectionem quæris in communibus per magnam mortificationem, & obedientiam? Non veni facere voluntatem meam, sed ejus, qui misit me. An singularia fugis, & quæris perfectionem in communibus per magnam

devotionem? Beati mundo corde. Dole, quòd hucusque ad singularia promptus, & ad communia piger extiteris. Propone singularia fugere, & perfectionem in communibus quærere

1. Per magnam humilitatem, & charitatem,
2. Per magnam mortificationem, & obedientiam;
3. Per magnam, & singularem cordis devotionem.

### DIES XVIII.

#### De triplici Religiosorum statu.

Diverte à malo, & fac bonum: inquire pacem, & sequere eam. Prolog. §. 2. v. 13.

#### PUNCTUM PRIMUM.

**T**Riplicem Religiosorum statum Ss. P. N. hñce nobis declarat: *Diverte à malo, & fac bonum: inquire pacem, & sequere eam.* Alii enim sunt incipientes, qui peccatum ante omnia fugere conantur, & opere servant illud: *Diverte à malo.* Etenim cùm sensibus corporis servierint, atque omnia secundum sensualitatem suam aestimaverint, in varia peccata in sæculo inciderunt. Hinc conversionem monasticam amplexi, per fidem incipiunt agnoscere gravitatem peccati, & pœnas

nas peccatis debitas. Unde & eadem sum-  
mopere detestantur, ac fugiunt. Continua  
eorum occupatio est, corpus suum subdicere,  
atque in servitutem redigere. Nec desistunt;  
donec plenè omnes vitiosas passiones in se-  
metipsis mortificaverint. Ecce! hæc est vita  
incipientium Religiosorum. Sed nunquid &  
tu adhuc hanc vitâ vivis, etiam post tot annos  
Professionis tuæ? utinam omni anno unum  
saltem vitium superâsses, profectò ab omni-  
bus jam liberatus fores. Ah! saltem modò  
pone manum tuam ad radicem; secùs nun-  
quàm perfectionem, ad quam tendere obli-  
garis, obtinebis.

## PUNCTUM SECUNDUM.

**ALii** sunt proficientes, qui bonum agnosce-  
re, & exercere laborant. Et hi observant  
illud Ss. P. N. *Fac bonum.* Cùm enim à vi-  
tiis sint purgatì, per fidem agnoscunt pretium  
virtutis, ejusque immensam in cœlis merce-  
dem. Unde omni conatu eandem exercere  
tamdiu student; donec bonam sibi consue-  
tudinem in quavis virtute faciant, atque in  
omni re quasi naturaliter, & ipsa delectatione  
virtutis virtuosos se exhibeant. Non enim  
solum virtutem magni æstimant, sed etiam  
mirò modò ad eam afficiuntur. Quo nam-  
que sæpiùs illam exercent, eò faciliùs, & li-  
bentius, atque frequentius in eadem versan-  
tur. Ah! cur tibi virtus adhuc tam ardua



est? Cur eam tam rarò executioni mandas? Hucusque consuetudinem bonam tibi facere neglexisti. Nescis æstimare virtutem. Non afficeris ad eam. Et quid mirum, quòd tam parùm proficias in Regulâ tuâ, quæ virtutes multas, & magnas tibi præscribit.

### PUNCTUM TERTIUM.


ALii sunt perfecti, qui pacem in crebrâ sui  
 unionem cum Deo acquirere contendunt.  
 Isti adimplent illud Ss. Patris nostri: *Inquire  
 pacem, & persequere eam.* Etenim cum vir-  
 tutibus polleant, amore summi boni dulciter  
 ad Deum trahuntur, speculantur gloriam Dei,  
 transformantur in eandem imaginem à cla-  
 ritate in claritatem sicut à Domini Spiritu,  
 cum Apostolo dicunt: vivo ego, jam non  
 ego; vivit verò in me Christus. Quis hic  
 cogitare possit, quâ torrente voluptatis ani-  
 ma perfecta perfundatur? Quis comprehen-  
 dere, quâ dulcedine pacis fruatur? Nónne  
 præ gaudio clamavit Ss. Pater, quando Deum  
 vidit? Nónne angusta ei erat omnis creatu-  
 ra? De hoc gaudio, de hac pace participat,  
 qui dulciter per fidem Deum contemplatur,  
 & per amorem in illum rapitur, ut & ipse  
 clamare possit: Quis nos separabit à chari-  
 tate Christi? Neque mors, neque vita, neque  
 Angeli, neque principatus, neque virtutes,  
 neque instantia, neque futura, neque fortitu-  
 do, neque altitudo, neque profundum, neque  
 crea-

creatura alia poterit nos separare à charitate Dei. Ah! vel à longè ad hanc perfectionem conaris?

PUNCTUM QUARTUM.

AN igitur, ô Religiose! si in statu incipientium versaris, viriliter passiones tuas abnegas! Qui vult post me venire, abneget semetipsum. An si in statu proficientium versaris, in virtutibus te exerces? Discite à me; quia mitis sum, & humilis corde. An si in statu perfectorum versaris, crebrò te Deo tuo unis? Ipsi in nobis unum sint. Dole, quòd per hos status ad perfectionem tuam non contenderis. Propone

1. In statu incipientium te abnegare.
2. In statu proficientium virtutes exercere.
3. In statu perfectorum crebrò te unire cum Deo.



DIES XIX.

Quod à Religiosæ vitæ deliciis abstrahi sit grave, & dolendum.

Inenarrabili dulcedine curritur via mandatorum Dei. Prolog. v. 34.

PUNCTUM PRIMUM.

Qui semel gustavit illud Ss. Patris nostri,  
*Inenarrabili dulcedine curritur via man-*  
L 5 *dato.*

*datorum Dei*, utique valdè dolebit, si ab illâ abstrahatur. At doleat; utilis dolor est, ne in externa negotia se totum effundat, & ad interiora totus insensibilis reddatur. Paulatim enim mens à compunctione cordis, ab exercitio divinæ præsentiae, ab utili recordatione novissimorum, ab actibus virtutum sic evacuatur, ut non tantum non amplius se recolligat, sed etiam se recolligere penitus negligat. Sic fit, ut sacram Regulam in pluribus quoad interiorē hominem transgrediatur. Verum dum de tempore ad tempus dulcis suæ quietis, in quâ per varias mentis elevationes ad Deum deliciabatur, cum dolore reminiscitur, nondum ad exercitia insensibilis fit, ut nullum ex ipsis gustum, vel fructum referat. Dole igitur, quando ab amplexibus speciosæ Rachelis per externas occupationes abstraheris, ne insensibilis fias. Nauseam equidem Deo movet insensibilitas, ut evomat insensibiles ex ore suo.

## PUNCTUM SECUNDUM.

**I**n *enarrabili dulcedine curritur via mandatorum Dei*. Utilis est dolor, ut saltem in externis negotiis conetur rursus mentem ad interiora recolligere. Dixi, conetur: nam quoties vis, & incassum? Quoties moves, nec permoves? Quoties conaris, & non datur ultra? Eniteris, & non obtines? Parturis, & non paris? Tentas, & abriperis? ubi incipis,

ibi

ibi deficiſ : & dum adhuc ordiris, ſuccidunt te curæ externæ? Venerunt filii uſque ad partum (ait Propheta) & vires non habet parturiens. Noſti hoc? Nemo te meliùs. Attritæ frontis es, & inſtar vitulæ Ephraim doctus diligere trituram, ſi omnem hunc quoque conatum abjiciſ, & pacata conſcientia in exterioribus jaces. Abſit : hæc eſt pars illius, qui datus eſt in reprobum ſenſum. Ab his ſanè cupio tibi pacem, non cum his. Nihil plùs me tuo tibi pace iſtâ. Mirariſ, ſi unquàm poſſit accidere? Etiam dico tibi, ſi res, ut aſſolet, per conſuetudinem in incuriam venerit. Conare igitur cum dolore, & ſemper conare. Deus reſpiciet humilitatem, & laborem tuum, ne hâc falſâ pace cum reprobis fruariſ.

### PUNCTUM TERTIUM.

**I***Nenarrabili dulcedine curritur via mandatorum Dei.* Utilis eſt dolor, ut tandem per hunc ipſum ſæpè quis excitetur inter externa negotia, & curas ad frequentem introverſionem. Vix enim conſuetudinem bonam per frequentes mentis elevationes ad Deum tibi feceriſ, haud ſecùs ac lignum ſuper aquas ita & tu ſuper omnia terrena ſemper enatabiſ. + Nunquam grave & difficile tibi erit in omni externo opere, aut converſatione cum Deo tuo converſari dolebiſ, imò vix ſuſtinere poteris, ſi vel per brevem moram




ab hoc sancto exercitio cessaveris. Et quanta inde dulcedo mentis non oritur? Qualis profectus? Quantus fervor? Qualis devotio? Quanta perfectio? Planè hoc exercitium ita familiare fuit antiquis Patribus, ut vix non toties mente oraverint, quoties ore respiraverint.

### PUNCTUM QUARTUM.

**A**N ergò, ô Religiose! Doles, si per externa negotia ab introversione abstraheris, ne insensibilis fias? Gustate, & videte; quoniam suavis est Dominus. An doles, ut saltem ad introversionem coneris, ne falsâ pace fruaris? Vide humilitatem meam, & laborem meum, & dimitte universa delicta mea. An doles, si vel per brevem moram à Deo præsentem mentem, animumque avertis? Bonum est confiteri Domino. Dole, quòd hucusque libens in exterioribus jacueris. Proponere te totum ad interiora convertere, & dolere, si per exteriora ab introversione abstraheris,

1. Ne ad sacra exercitia insensibilis fias.
2. Ne falsa pace, & securitate conscientie decipiaris,
3. Ne vel per brevem moram à Divina præsentia abstraharis.



DIES XX.

De falsa Religione.

Mentiri Deo per tonsuram noscuntur.

Cap. I. v. 3.

PUNCTUM PRIMUM.

**M**ulti veram mundo profitentur Religio-  
nem, sed ut Ss. Pater ait: *Mentiri Deo  
per tonsuram noscuntur. Mentiuntur enim  
Deo per tonsuram*, qui portant crucem Chri-  
sti, & non sequuntur Christum. Duplici con-  
tritione conteruntur, qui hujusmodi sunt,  
quando & hinc pro temporali gloria tempo-  
raliter se affligunt, & in futuro pro interna  
superbia ad æterna supplicia pertrahuntur.  
Laborant cum Christo, sed cum Christo non  
regnant. Sequuntur Christum in paupertate  
sua, sed in gloria non sequuntur. De torren-  
te in via bibunt, sed non exaltabunt caput in  
patria. Lugent nunc, sed tunc non consola-  
buntur. Et meritò. Quid enim facit super-  
bia sub pannis humilitatis Jesu? Nunquid  
non habet, quo se palliet humana malitia, nisi  
unde involuta est sanctitas Salvatoris? An  
non illi superbissimi de Psalmo, quorum pro-  
diit ex adipe iniquitas eorum, multò tutius  
operti sunt iniquitate, & impietate sua: quàm  
nos latemus sub sanctitate aliena? Quis enim  
magis

magis impius, an profitens impietatem, an mentiens sanctitatem? Nónne is, qui etiam mendacium addens, geminat impietatem?

## PUNCTUM SECUNDUM.

**M***Entiri Deo per tonsuram noscuntur.* Qui consolatiunculas miseræ carnis suæ sequuntur. Amat enim in carne sua terrenas consolatiunculas sive in verbo, sive in signo, sive in factò, sive in aliquo alio, & hæc interrumpunt aliquando, non tamen penitus rumpunt. Inde est, quod raro affectiones suas dirigunt in Deum, & eorum compunctio non continua, sed horaria est. Inde tam pernicio-sa tepiditas emanat, ut voluntas eorum nunquam plenè purgetur, nec bonum sic velint, sicut noverunt, à propria concupiscentia abstracti graviter, & illecti. Inde non sapit ipsis Christus, sed caro; non sapiunt ipsis sua exercitia spiritualia, sed terrena solatia; non sapit ipsis Religiosa mortificatio, sed carnalis repaulatio. De uno cum cæteris pane comedunt, sed non cum ipsis satiantur. Semper esuriunt. Quare? Impleri visitationibus Domini anima non potest, quæ carnis desideriis adhuc subiacet: & quanto magis illis evacua-bitur, tanto amplius istis implebitur, si multum, multum; si parum, parum; vel certè si magis probas, nunquam istæ illis misceri poterunt in æternum; quia non mittitur vinum novum nisi in utres novos, ut ambo con-  
ser-

serventur. Neque enim caro, & spiritus; ignis, & tepiditas in uno domicilio commorantur, præsertim cum tepiditas ipsi Domino soleat vomitum provocare. O quantum mendacium! exterius spiritum, interius vero carnem sequendo toti mundo illudere!

## PUNCTUM TERTIUM.

**M**Entiri Deo per tonsuram noscuntur, qui scandala suscitant, & patiuntur in domo Dei. Quomodo enim in domo concordie habitare fingat sine mendacio, qui in ea suscitatur iras, dissensiones, & æmulationes? Quomodo ambulare cum consensu in domo pacis sine mendacio simulet, qui quotidie in eadem conturbatur? Nónne enim scandalizamus, quando oculus noster, dicam, voluntas nostra minus rectam, & simplicem nobis ingerit intentionem? Nónne scandalizamus, quando voluntas propria manus nostras à bonis operibus ad aliena opera trahit? Nónne scandalizamus, quando pes noster, qui in sancta conversatione per gradus scalæ, quæ Jacob apparuit, de virtute in virtutem deberet ascendere, temper magis per pusillanimitatem descendit, & per negligentiam remissius ire conatur? Cave igitur, ne propter scandala Deo per tonsuram in domo Dei mentiaris. Erue oculum scandalizantem, & projice abs te. Hoc fiet, si resistas sinistrae intentioni. Erue manum scandalizantem, & projice abs te.

Ustud



Istud accidet, si operetur manus tua instanter bonum quod potest. Erue pedem scandalizantem, & projice abs te. Hoc continget, si pes gratiæ, qui stat in directo, currat sine offendiculo.

### PUNCTUM QUARTUM.

**A**N igitur, ô Religiose! Deo non mentiris sub humilitatis habitu per superbiam? Ne accesseris ad Deum duplici corde. An non Deo mentiris sub habitu mortificationis per carnis desideria? In dolo renuerunt scire me, dicit Dominus. An non Deo mentiris sub habitu charitatis per scandala? Non ætati nostræ dignum est, ut multi propter simulationem meam decipiantur. Dole, quod & tu hucusque Religionem falsam colueris. *Propone non Deo mentiri*

1. Per superbiam,
2. Per carnis desideria,
3. Per scandala.



### DIES XXI.

IN FESTO PRÆSENTATIONIS B. V. M.

De vera Religione.

Constituenda est à nobis Dominici schola servitii. Prolog. §. 4. v. 33.

Pun-

## PUNCTUM PRIMUM.

**V**erè vita B. V. Mariæ in templo schola est, in qua perfectam Monasticen addiscere possumus. Unde, dum Ss. Pater noster Dominici scholam servitii erigit: *constituenda est à nobis Dominici schola servitii*, aliam in hac Magistram quærere non debemus, quàm B. V. Mariam in templo. Ipsa enim reliquit paternam domum in tenella adhuc ætate, ut & nos perfectè inundo renunciaremus. Impossibile namque est, quemquam doctrinam Christi exequi posse, nisi prius renunciaverit omnibus, quæ possidet, ac Patrem, & Matrem, Sorores, & Fratres reliquerit. Imò nec sufficit ista exterius reliquisse, nisi etiam interiùs ex toto affectu eadem relinquat. Facile iterum etiam exteriora reassumet, qui non continuo Patrem, & Matrem, adhuc autem & animam suam propter Dominum odio habuerit. Sequere igitur Magistram tuam, poteris esse discipulus in Dominici schola servitii.

## PUNCTUM SECUNDUM.

**C**onstituenda est à nobis Dominici schola servitii. Et quàm lectionem prælegit nobis Magistra nostra? Ecce! ascendit iola per quindecim gradus templi sine adjumento ad Sacerdotem, quo magis Deo appropinquet. Postquam enim omnia reliquimus, necesse est, ut quotidie magis, ac magis in Deum proficiamus.

*Spir. S. Ben. P. IV.*      M      ficia-

ficiamus. Nunquam equidem justus arbitrat<sup>ur</sup> se comprehendisse, nunquam dicit; satis est, sed semper esurit, sititque justitiam, ita, ut si semper viveret, semper quantum in se est, justior esse contenderet, semper de bono in melius proficere totis viribus conaretur. Non enim ad annum, vel ad tempus instar mercenarii, sed in æternum instar filii cum B. V. Maria Divino se mancipat famulatui. Audi enim vocem hujus Magistræ tuæ: in æternum non obliviscar justificationes tuas. Non igitur ad tempus. Proinde justitia ejus manet non aliquanto tempore, sed in sæculum sæculi.

### PUNCTUM TERTIUM.

**C**onstituenda est à nobis Dominici schola servitii. Qualis est demum ultimata lectio hujus dulcissimæ Magistræ? Ecce! talis fuit Maria, ut ejus unius vita in templo omnium sit disciplina. Quantæ namque in una Virgine species virtutum emicant! secretum verecundiæ, vexillum fidei, devotionis obsequium, quid ego verò exequar, ciborum ejus parsimoniam, officiorum redundantiam: alterum ultra naturam superfuisse; alterum penè ipsi naturæ defuisse? Illic nulla intermissa tempora, hic congeminatos jejunio dies. Dormire non prius cupiditas, quam necessitas fuit: & tamen cum quiesceret corpus, vigilaret animus, qui frequenter in somnis

somnis aut lecta repetit, aut somno interrupta continuat, aut disposita gerit, aut gerenda prænunciat. Sic enim diu, noctuque in amore crevit, ut illud de se à Spiritu sancto prædictum strenue adimpleret. Ego dormio, & cor meum vigilat. Sequere igitur Magistram tuam, & perfectus discipulus eris in schola Dominici servitii.

PUNCTUM QUARTUM.

**A**N ergo, ô Religiose! sequeris Magistram tuam in abrenunciatione? Nisi quis renunciaverit omnibus, quæ possidet, non potest meus esse discipulus. An sequeris Magistram tuam in continuo profectu? Currite, ut comprehendatis. An sequeris Magistram tuam in omni virtutum genere? Estote perfecti, sicut Pater vester cœlestis perfectus est. Dole, quòd hucusque Magistram tuam secutus non fueris in schola Dominici servitii. Propone eandem imitari

1. In abrenunciatione,
2. In quotidiano profectu.
3. In omni virtutum genere.

\*\*\*\*\*

DIES XXII.

Quòd non liceat aliis Ordinibus obtrectare.

Omnes in Christo unum sumus. Cap. 2. v. 16.



## PUNCTUM PRIMUM.

**N**E aliquem Ordinem despiciamus, oportet, ut illud Ss. Patris nostri iugiter ante oculos ponamus: *Omnes in Christo unum sumus.* Quomodo enim membrum Christi, aliud ejusdem corporis membrum sine grandi superbia despiciet? Convenienti plane sunt, qui contra illam sententiam, nolite ante tempus judicare, quoadusque veniat Dominus, qui & illuminabit abscondita tenebrarum, & manifestabit consilia cordium, aliis Ordinibus derogare non formidant. Quia enim suam justitiam solam volunt constituere, justitiæ Dei non sunt subiecti, atque nullius Ordinis. Nam etsi ordinate vivant, loquentes tamen superbe cives se faciunt Babilonis, id est, confusio- nis, imo filios tenebrarum, ubi nullus ordo. Tu igitur, qui hujusce modi es, post audita- tam parabolam de Publicano, & Phariseo redi ad cor; noli aspernari cæteros ordines: sed tuum opere tene, reliquos vero charita- te. Faciet deinde charitas, ut ne quidem illorum fructu frauderis, quorum instituta non sequeris.

## PUNCTUM SECUNDUM.

**O***Mnes in Christo unum sumus.* Quomodo ergo quis sine grandi injustitia alium Ordinem judicaverit? Quid ad te de alienis  
fer-

servis? Suo Domino stant, aut cadunt. Quis te constituit judicem super eos? Cur in Fratrum oculis tam curiose festucas perquisis? Cur in Regula gloriaris, & contra Regulam detrahis? Cur contra Evangelium ante tempus, & contra Apostolum alienos servos judicas? An Regula non concordat Evangelio, vel Apostolo? Alioquin Regula jam non est Regula; quia non recta. Audi igitur, & discce prius Regulam tuam, qui aliis Ordinibus derogare præsumis. Hypocrita, inquit, ejice primum trabem de oculo tuo, & sic videbis ejicere festucam de oculo fratris tui. Æstima quidem Ordinem tuum, ut in eo ordinate vivas; sed reliquos etiam sincere ama. Sicut enim in domo Patris æterni mansiones multæ sunt; ita hic sunt multi Ordines in Ecclesia una. Et quomodo hic divisiones gratiarum sunt, idem autem spiritus: ita ibi distinctiones quidem gloriarum, sed una domus. Omnis autem unitas tam hic, quàm ibi una consistit in una charitate.

### PUNCTUM TERTIUM.

**O***Mnes in Christo unum sumus.* Quomodo igitur quis sine gravi læsione charitatis alteri Ordini deroget? Omnes enim pariter concurrimus in unam tunicam; & ex omnibus constat una. Nam etsi ex pluribus, & diversis, una est tamen columba mea, formosa mea, perfecta mea. Alioquin nec ego

M 3                      solus,

solus, nec tu sine me, nec ille sine utroque; sed simul omnes fumus illa una, si tamen solliciti fumus servare unitatem Spiritûs in vincolo pacis. Non, inquam; tantum ordo noster, aut solus alter ad illam pertinet viam; sed noster simul, & alter quilibet: nisi forte invicem invidentes, invicem provocantes, invicem mordeamus, & invicem consumamur. Illa equidem una dicit in canticiis: ordinavit in me charitatem, ut etsi una sit in charitate, divisa tamen sit ordinatione. Omnes hinc amandi sunt, & magnificandi Ordines, sed non omnes tenendi. Quare? Unusquisque in ea vocatione, in qua vocatus est, permaneat.

#### PUNCTUM QUARTUM.

**A**N igitur, ô Religiose! despicias alios Ordines? Gratias ago tibi Deus; quia non sum, sicut cæteri hominum. An dijudicas cæteros Ordines? Nolite judicare, ut non judicemini. An aliis Ordinibus derogas? Maledici regnum Dei non possidebunt. Dole, quòd unitatem Ss. Ordinum dividere, & scindere hucusque non reveritus fueris. Propone

1. Alios Ordines non despiciere,
2. Non dijudicare,
3. Non ipsis derogare, sed omnes amare, honorare, & tuum adimplere.

DIES



DIES XXIII.

Quibus mediis amor proprius eradicandus sit.

Abnegare semetipsum sibi. Cap. 4. Instr. 10.

PUNCTUM PRIMUM.

**A**Mor proprius cum sit radix omnium vitiorum, merito quivis jubetur à Ss. Patre, *abnegare semetipsum sibi*; Nam hic amor à semetipso semper incipit, & in semetipso finitur. Verum quomodo abnegandus? Amore Dei. Ait Job. Cap. 7. 15: *Elegit suspendium anima mea, & mortem ossa mea; desperavi, nequaquam ultra vivam.* Quid enim per animam, nisi mentis intentio; quid per ossa nisi amor proprius designatur? Anima ergo suspendium eligit, ut ossa moriantur: quia dum mens ad charitatem Dei se sublevat, omnem amorem proprium in se necat. Sancti namque viri certissime sciunt, quod habere in hac vita requiem non possunt; & idcirco suspendium eligunt, ut sua desideria deferentes ad alta animum tollant. Pars mea Dominus dixit anima mea; propterea expectabo eum, ipse Dominus pars ejus est, cujus amore omnia despicit, & ipsum solum præ se, & omnibus habere eligit.



## PUNCTUM SECUNDUM.

**A** *Bnegare semetipsum sibi*, hoc est, amorem proprium. Et quomodo? Contemptu terrenorum. Omnis enim anima infirma quærit sibi aliquid terrenum, ubi requiescat, velut sunt ista, quæ etiam diligunt homines innocentes. Non equidem mala est solum illa cupiditas, quæ carnem, aut prohibitas voluptates mundi infectatur; sed inordinata quoque est, omnis ea, quæ nimio amore præter æternam beatitudinem aliquid appetit. Hinc Deus volens nos amorem non habere, nisi æternæ vitæ, omnibus aliis delectationibus miscuit amaritudines, quatenus eo libentius terrenorum contemnamus amorem, quo acerbiores in his experimur tribulationes. Docemur quippe amare meliora per amaritudinem inferiorum, ne viator tendens ad patriam, stabulum amet pro domo sua. Ego dixi: Domine miserere mei, sana animam meam auferendo etiam amorem licitum rerum sæcularium. Quod si ex isto damna sequuntur homini, quanta, & qualia consurgunt nocumenta ex amore malo?

## PUNCTUM TERTIUM.


**A** *Bnegare semetipsum sibi*, hoc est, amorem proprium. Et quomodo? Contemplatione mortis. Non enim se moriturum; sed

sed jam mortuum credit. Qui cum Apostolo sibi mundum, & se mundo crucifixum esse cupit. Sicut enim mortuus nec delectabile quidquam videt, aut gustat; ita nec ipse quidquam ex his, quæ sensibus haurit, amat. Et sicut mortuus sic vituperantes, ut laudantes æqualiter attendit; ita ipse: imo vero non attendit; quia mortuus est. Omnino felix est ista cogitatio mortis, quæ immaculatum servat, imo alienum facit penitus ab amore proprio, ut non vivat amplius in se; vivat vero in eo Christus. Ad alia namque mortuus est; non sentit, non curat, non cupit, nisi ea, quæ Christi sunt. Hæc solum illum vivum inveniunt, & paratum ad omnia. O qui hac vita viveret, plane divina vitâ viveret!

#### PUNCTUM QUARTUM.

**A**N igitur, ô Religiose! amorem proprium amore Dei eradicare studes? Omnes, quæ sua sunt, quærunt, non quæ Jesu Christi. An amorem proprium contemptu terrenorum eradicare studes? Omnia detrimentum feci propter eminentem scientiam Domini mei Jesu Christi. An amorem proprium contemplatione mortis eradicare studes? Mortui estis, & vita vestra abscondita est cum Christo. Dole, quòd amorem proprium eradicare hucusque non laboraveris. Pro-

1. Amorem proprium amore Dei.
2. Contemptu terrenorum,
3. Contemplatione mortis eradicare.



## DIES XXIV.

De nociva familiaritate cum sæcularibus.

Monachis vagari foras omnino non expedit animabus eorum. Cap. 66. v. 8.

## PUNCTUM PRIMUM.

QUàm nociva sit Monacho familiaritas cum sæcularibus, testis est puerulus ille, de quo S. Greg. in vita Almi Patris nostri narrat; quòd parentes suos, ultra quàm deberet, diligens, ad eorum habitaculum tendens, atque sine benedictione de Monasterio exiens, eodè die mox ut ad eos pervenit, defunctus sit. Graviter enim hoc SS. Pater vetuit, quando in S. Regula ait: *Monachis vagari foras omnino non expedit animabus eorum.* Et merito. Familiaritas ista rursus nos immiscet curis, & negotiis sæculi. Nonne ipsemet Dominus hunc tenerum affectum erga parentes, propinquos, aut alios dilectos sæculares, quantumvis pios, mortificare suo nos exemplo docuit, quando in nuptiis Matri suæ respondit: quid mihi, & tibi est mulier? Hoc utique non dixit velut indignans, sed propter nos, ut conversos  
ad

ad Dominum jam non sollicitet carnalium cura parentum, propinquorum &c. & necessitudines illæ non impendant exercitium spirituale. Quamdiu enim sumus de mundo, debitores nos esse constat parentibus &c. At postquam reliquimus nosmetipsos, multo magis ab eorum solitudine liberi esse debemus. Retrospicit, quisquis familiariter cum sæculi hominibus conversatur. Necessarium equidem est, ut quos amore prosequitur, hos quoque magna cura, sed majori dispendio Religionis juvare nitatur.

## PUNCTUM SECUNDUM.

**M***Onachis vagari foras, omnino non expedit animabus eorum.* Quia ex familiaritate cum sæcularibus discunt principia eorum. Unde namque quidam Religiosi sapientia hujus sæculi, cui abrenunciârunt, toti quanti pleni sunt? Didicerunt eam ex consortio sæcularium. Unde principia mundi extra mundum in Monasterio constituti probant, & exequuntur, atque principiis Religionis multum præponunt? Didicerunt à sæcularibus. Unde sapientia abundant; quam caro & sanguis revelat, & cui juxta Apostolum acquiescere noluisse videbantur? Sæculares istam eos sapientiam docuerunt. Sed pro quam desipis vehementer, si ita sæcularibus sapis Non sapiēs ea, quæ Spiritus; sed quæ carnis sunt. Non sapiēs ea,  
quæ



quæ vocationis tuæ sunt; sed quæ mundi sunt. Non sapiēs ea, quæ Dei sunt; sed quæ Principis tenebrarum harum sunt. Ex hac conformatione cum hoc sæculo nequam, cui conformari vetamur, omnis ruina disciplinæ Monasticæ, imo ipsorum Monasteriorum provenit. Mundus enim non amplius esset mundus, si monastica amplecteretur principia. Et Religio non potest amplius esse Religio, dum mundana tenet principia.

### PUNCTUM TERTIUM.

**M**onachis vagari foras, omnino non expedit animabus eorum; quia per familiaritatem cum sæcularibus rursus eorum vitiis implicantur. Videas enim eos rursus ambitione majori, quàm in sæculo, inflari; gulæ desideriis satisfacere; avide lucra captare præsentia; sæculariter transitoriis utilitatibus adgaudere; ad terrenarum damna vel minima facultatum pusillanimiter turbari, ac si in his tota esset eorum portio, universa substantia. Vah! quinam alieni comederunt ita robur Religiosi? Sæculares. Ex horum multa conversatione didicit opera eorum, & servivit sculptilibus eorum. Tu sequere fratrem illum in eremo conversantem; si quis tuam familiaritatem sæcularis expetit. Etenim cum carnalis ejus frater ad eum auxilii gratia adventasset, respondit, ut adiret alterum fratrem eorum. Cumque admiratus,

tus, qui venerat, responderet: quia ille obiit; Eremita se quoque similiter obiisse reposuit.

## PUNCTUM QUARTUM.

**AN** igitur, ô Religiose! nullam cum sæcularibus familiaritatem habes, ne eorum curis impliceris? Fugite mundum, & quæ in mundo sunt. An nullam cum sæcularibus familiaritatem habes, ne eorum principia addiscas? Nolite conformari huic sæculo. An nullam cum sæcularibus familiaritatem habes, ne vitiis eorum inquineris? Quidquid in mundo est, concupiscentia carnis, concupiscentia oculorum, & superbia vitæ est. Dole, quòd hucusque nimium mundo addictus fueris. Propone omnem cum sæcularibus familiaritatem fugere,

1. Ne eorum curis,
2. Principiis, aut
3. Vitiis inquineris.



## DIES XXV.

IN FESTO S. CATHARINÆ VIRGINIS ET MARTYRIS.

Quomodo sapientia acquiratur.

Universa incipiet custodire delectatione virtutum. Cap. 7. v. 89.

PUN-

## PUNCTUM PRIMUM.

AD acquirendam Sapientiam necesse est, ut primum quis mundetur à vitiis. Unde S. Catharina Sapientiæ increatæ non potuit prius desponsari, quàm à peccatis per Baptismum abluta fuit. Hoc ipsum affirmat Ss. Pater noster; quando ait: *universa incipiet custodire delectatione virtutum; quæ Dominus jam in operarium suum mundum à vitiis, & peccatis Spiritu sancto dignabitur demonstrare.* Quid enim aliud est sapientia, quàm amor virtutis? Ubi autem amor est, labor non est, sed sapor. Et forte sapientia à sapore denominatur, quòd virtuti accedens quoddam veluti condimentum eam sapidam reddat, quæ per se insulsa quodammodo, & aspera sentiebatur. Hunc saporem perdidimus ab ipso pene exortu generis nostri. Ex quo cordis palatum sensu carnis prævalente infecit virus serpentis antiqui, cæpit animæ non sapere bonum, sed malum. Proni namque sunt sensus hominis, & cogitationes ad malum ab adolescentia sua. Hinc sapor mali excludendus est, ut boni quidam intimus sapor mentis intima occupare tota suavitate sentiat. Ad hoc vero oportet præcedere notitiam boni: quia non est societas luci sapientiæ, & tenebris ignorantia. Oportet & bonam præire voluntatem; quia in malevolam animam non introibit sapientia.

Pun-

PUNCTUM SECUNDUM.

**U***N*iversa incipiet custodire delectatione virtutum. Ad istam sapientiam obtinendam requiritur, ut sapientiam hujus mundi & carnis vincamus. Unde & mundanam sapientiam in illis 50. Philosophis ad fidem conversis triumphavit B. Catharina. Quantos enim mundi, & carnis sapientia maledicta supplantat, & conceptum in eis Spiritum extinguit, quem voluerat Dominus vehementer accendi? quantos retardat à capefenda Evangelica perfectione, quam tamen tam solemner professi sunt? Quantos à cæpta jam perfectionis semita retrocedere persuadet? At vocat eos nunc magni consilii Angelus, ut quid aliena consilia præstolentur? Quis fidelior, quisve sapientior illo? Sane cunctandum non est, ut ejus consilia exequamur, quando per ea ab ore putei gehennæ eripimur. Aut quis hic inducias petat, aut retardetur? Perseverandum plane in ejus consiliis est, quando perseverantibus salus æterna offertur. Secus quid Evangelium frequentamus, si Evangelio obedire nolumus? Ut sequamur ergo Evangelium, prudentia carnis, & sapientia mundanæ elationis calcanda est. Hanc quia abjicere noluit, qui dixit: Magister volo te sequi, quocunque ieris; responsum aliud à Domino non retulit, quàm vulpes foveas habent, & volucres cœli nidum: Filius autem hominis non habet,



bet, ubi caput reclinet, prudentiam carnis in fovea vulpis; in nido vero volucris arguente mundi elationem. His quippe exclusis primum sapiet virtus.

### PUNCTUM TERTIUM.


**U***N*iversa incipiet custodire delectatione virtutum. Ad istam sapientiam acquirendam requiritur, ut unaquæque res sapiat, prout secundum Deum est. Nam in eo veræ dilectionis sapor est, qui quascunque res secundum Deum examinât, & pro earum bonitate, quàm habent ad Deum, amat. Et primo quidem, quia Deus summum bonum est, sapiet tibi super omnia. Deinde sapiet etiam tu tibi ipsi, sed non nisi in quantum Dei es; quia solum per ipsum bonus es. Sapiet quoque tibi proximus non aliter, quàm tu tibi ipsi propter Deum; quia, ut tu, homo est. Aliæ quæcunque demum res aliter tibi sapere non poterunt, quàm te ad æternum tuum bonum deducunt. Quæ te vero ab eo avertunt, sapient tibi minime, quia tibi summe malæ sunt. Ecce! hæc fuit sapientia S. Catharinæ, per quàm ei tormenta, rotæ falcatae, verbera, mors ipsa; plusquam deliciae, blanditiæ, honores, divitiæ, aut vita longæva placuerunt. Et qui eam non sequitur, nunquam sapiens erit, quia virtus nunquam ei sapiet. Ut consequatur, necesse est, ut res non in se, sed secundum fidem in ordine ad Deum ponderet.

Pun.

PUNCTUM QUARTUM.

AN ergo, ô Religiose! vitia abjicis, ut sapiat tibi virtus? Sapientia non habitabit in corpore peccatis subdito. An mundi, & carnis prudentiam abjicis, ut virtus tibi sapiat? Placuit Deo per stultitiam prædicationis salvare credentes. An res secundum Deum æstimas, ut sapiat tibi virtus? Ordinavit in me charitatem. Dole, quòd S. Catharinam in sapientia imitatus non fueris. Proponē eam sequi,

1. Abjiciendo vitia,
2. Relinquendo mundi, & carnis prudentiam,
3. Æstimando, & amando res in ordine ad Deum.



DIES XXVI.

De misericordia S. Conradi Ep. erga tribulatos.

In tribulatione subvenire. Cap. 4. Infr. 18.

PUNCTUM PRIMUM.

SANCTUS Conradus postquam in Episcopum ob doctrinam, & morum sanctitatem electus est, summopere studuit, ut pauperibus, & quibusvis corporaliter afflictis succurreret: hinc ad eorundem usum Xenodochium

*Spir. S. Ben. P. IV.*

N

chium

chium construxit. Hunc misericordiæ affectum & nobis commendavit Ss. P. N. Benedictus; dum cap. 4. Instr. 18. ait: *In tribulatione subvenire.* Et merito. Charitas etenim in misericordiæ operibus consistit; nam probatio dilectionis, est exhibitio operis. Si quidem, qui habuerit substantiam hujus mundi, & viderit fratrem suum necessitatem patientem, & clâuserit viscera sua ab eo, quomodo charitas Dei manet in eo? Si enim fratrem suum, quem videt, non diligit; Deum, quem non videt, quomodo posset diligere? Quomodo ejusmodi audient: quia quod uni ex minimis meis fecistis, mihi fecistis. Venite Benedicti Patris mei, percipite regnum, quod vobis paratum est? An non potius audient; quia non fecistis uni ex minimis meis, nec mihi fecistis. Ite maledicti in ignem æternum? Ergone dices ô Religiose! reprobus sim, quia opera corporalia misericordiæ exercere ad me non pertinet? Absit Non enim impotentes; sed nolentes condemnantur. Viscera equidem non claudit à proximo suo, qui si posset, vellet subvenire. Hanc ipsam voluntatem Deus pro facto reputat. Examina ergo te, an hanc habeas voluntatem, & si habueris, non condemnaberis. Nequaquam vero habebis, dum pauperem, infirmum, peregrinum vides, & nullam compassionem sentis, nec orationem, nec gemitum pro illo effundis. Etenim si non das compassionis affectum, qui

quo

quo plus datur, plus abundat; quomodo terrenam substantiam dares, quæ divisa minuitur?

PUNCTUM SECUNDUM.

**S**anctus Conradus non solum opera corporalia, sed & spiritualia misericordiæ exercuit; quando errantes in viam salutis reduxit, dubitantibus consuluit, peccatores ad poenitentiam permovit, omnibus Mariam afflictorum auxiliatricem dedit, mirabilem, & miraculosam ejusdem Capellæ Einsidlen-sis consecrationem mundo patefaciendo. Et hunc affectum misericordiæ recommendat nobis hisce: *In tribulatione subvenire* Ss. P. N. Ab hisce operibus misericordiæ nemo se excusare poterit, quandoquidem ipsemet Ss. P. N. suo nos exemplo ad eadem invitat. An non enim rusticam plebem ad se venientem in Sublaco instruxit, atque multos ad pietatis gratiam à bestiali mente mutavit? An non Idololatrias prædicando ad fidem convertit? An non sancti ejus discipuli integras nationes ad Ovile Christi reduxerunt? Divinum sane opus est, convertere peccatores. Quid enim aliud potius egit filius Dei, quàm ut errantes doceret, sedentes in tenebris illuminaret, omnes dirigeret in viam salutis? Salutiferum quoque opus est, convertere peccatores. Scire enim debet, quoniam qui converti fecerit peccatorem ab errore viæ suæ, salvabit animam ejus à mor-



te, & operiet multitudinem peccatorum. Ergo & tu, si aliud opus misericordiæ ad conversionem peccatorum exercere non potes, ora saltem, ut salventur: multum enim valet deprecatio iusti assidua.

### PUNCTUM TERTIUM.


**S**anctus Conradus misericordem se demum exhibuit animabus in purgatorio, cum ad catharactas Schaffusianas duas ejusmodi in aquis dire cruciatus lecto sacro mox à pœnis liberavit. Et hunc affectum misericordiæ nobis commendat Ss. Pater noster, dum hortatur *in tribulatione subvenire*. Nam quinam magis merentur nostram subventionem, quàm animæ in purgatorio? Seipsas juvare nequeunt; & grandis est cruciatus earum. Juvemus igitur illas, quantum valeamus. Etenim qua mensura mensi fuerimus, remetietur nobis. Nam & per ignem nobis transeundum erit, & uniuscujusque opus, quale sit, ignis probabit. Ibi enim aurum nostrum vertetur in scoriam, ibi revelabitur universa impuritas, ibi veritas ipsa accepto tempore, quod nobis interim datum contemnimus, justitias judicabit. Quid verò illic omnes justitiæ nostræ, nisi pannus menstruatae reputabuntur? Quidquid nunc parvipendendo transimus, palpando tegimus, dissimulando negligimus, quanto illic cruciatu vindex flamma consumeret? Utinam modo erga purgantes animas misericordes essemus,

mus, ut & nos misericordiam tunc consequeremur!

PUNCTUM QUARTUM.

ANigitur, ô Religiose! misericors es erga corporaliter afflictos? Infirmus fui, & visitaſtis me &c. An misericors es erga ſpiritualiter tribulatos? Quid vobis videtur? ſi fuerint alicui centum oves, & erraverit una ex eis; nonne relinquit nonaginta novem in montibus, & vadit quærere eam, quæ erravit? An misericors es erga animas purgantes? Sancta, & ſalubris eſt cogitatio exorare pro defunctis. Dole, quòd misericordiam S. Conradi hucusque non exercueris. Proponere miſericors eſſe

1. Erga corporaliter afflictos,
2. Erga ſpiritualiter tribulatos,
3. Erga animas in purgatorio detentas.



DIES XXVII.

Quomodo abuſus invaleſcant, ut pro ordine teneantur.

In omnibus omnes magiſtram ſequantur Regulam, neque ab ea temere devietur à quoquam. Cap. 3. v. 6.

PUNCTUM PRIMUM.

MAGnum ſane, & grave Ss. Patris noſtri præceptum eſt; *in omnibus omnes magiſtram*

*gestram sequantur Regulam, neque ab ea temere devietur à quoquam: sed prò? quot non abusus contra eam in tantum invalescunt, ut pro ordine jam teneantur; dum antiquus, & à Patribus nostris semper cultus rigor remittitur. Ipsi enim usque ad infirmos per statuta regulæ temperarunt rigorem, non Regulam destruxerunt, ut in ea plures salvarentur. Absit autem, ut tantas vanitates, ac superfluitates, quantas subinde videre est, præceperint, vel concesserint. Miror etenim, unde inter Monachos tanta intemperantia, vanitas, ac superfluitas, atque remissio inolescere potuit: quatenus, ubi hæc studiosius, voluptuosius, atque effusius fiunt, ibi ordo melius teneri dicatur, ibi major putetur religio. Ecce enim parcitas putatur avaritia, sobrietas austeritas creditur, silentium tristitia reputatur. Econtra remissio discretio dicitur, effusio liberalitas, loquacitas affabilitas, cachinnatio jucunditas, mollities, vanitas & superfluitas honestas, neglectus correctionis regularis misericordia. Cumque hæc alterutrum impendimus, charitas appellatur. Ista charitas destruit charitatem, hæc discretio discretionem confundit. Talis misericordia crudelitate plena est, quâ videlicet ita corpori servitur, ut anima juguletur. Quæ enim charitas est, carnem diligere, & Spiritum negligere? Quæve discretio, totum dare corpori, & nihil animæ? Qualis verò misericordia, ancillam reficere, & dominam interficere! Tu ergo  
nihil*

nihil remitte de rigore Regulæ à Patribus per ſtatuta temperato, ne temerè à Regulâ declines.

### PUNCTUM SECUNDUM.

**I**N omnibus omnes magiſtram ſequantur Regulam, neque temerè ab eâ devietur à quocumque: at quot non abusus contra eam inducuntur, quando transgreſſiones eſus in uſum deducuntur! Poſtquàm enim terribili Dei judiciò primas transgreſſiones impunitas ſequitur, libenter repetuntur, repetitæ blandiuntur. Sic paulatim ſopitur timor, ligat conſuetudo, ut jam indifferenter libita pro licitis uſurpentur, nec ab illicitis cogitandis, patrandis, inveſtigandis animus, manus, vel pedes prohibeantur; ſed quidquid in cor, buccam, ad manum venerit, contra Regulam fiat. Ipla hæc conſuetudo transgreſſionibus demum obtenditur; at fruſtrà: nam conſuetudo in vitiis non juſtificat, ſed multiplicat peccata. Cave igitur, ne & tu per conſuetudinem abusus contra Regulam inducas, & ſic temerè ab eâ devies.

### PUNCTUM TERTIUM.

**I**N omnibus omnes magiſtram ſequantur Regulam, neque temerè ab eâ devietur à quocumque. Sed prò! quanti abusus contra eam fiunt; quando eis nemo reſiſtit. Nonnulli enim vanitatibùs, aut ſuperfluitatibùs contra Regulam, vel ſtatuta pro aliorum more utuntur;



tur; sed tanquàm non utantur, & ideò aut cum nullâ offensâ, aut cum minimâ. Aliquantum contra Regulam, aut statuta agunt, ne discorditer vivant ab aliis, sectantes in his non suam libidinem, sed aliorum pacem. Alii autem; quia multitudini resistere non valent contradicentium. At & istis modis nimium abusus invalescunt, ut ferè ab omnibus sine querelâ, atque irreprehensibiliter observentur. Væ tamen illis, qui possent, & deberent resistere! væ illis, per quos scandala ista innumera veniunt! tu verbò, & exemplò, aut saltem bonâ voluntate resiste, si aliter malo remedium afferre nequeas. Ita poenâ scandalizantium obnoxius non eris.

#### PUNCTUM QUARTUM.


**A**N igitur, ô Religiose! non remittis à rigore Regulæ, & statutorum, ne abusus pro ordine observandos introducas? Ecce lex, sub qua militare vis! an non abusus introducis per consuetudinem transgrediendi S. Regulam, ut pro ordine observentur? Sciat, se omnem Regulæ disciplinam servaturum. An resistis verbo, exemplo, aut bona saltem voluntate, ne abusus pro ordine observentur? Præcipuè præsentem Regulam in omnibus conservet. Dole, quod & tu forsan ansam plurimi abusus contra Regulam, & statuta dederis. Propone ideo

1. A rigore Regulæ, & statutorum nihil remittere.

2. Nul-

2. Nullam consuetudinem transgrediendi Regulam admittere.

3. Abusibus verbo, exemplo, aut saltem bona voluntate semper, quantum in te est, resistere.



DIES XXVIII.

De contemptu humanæ laudis.

Elationem fugere. Cap. 4. Instr. 67.

PUNCTUM PRIMUM.

Quantum Ss. Pater contempserit humanam laudem, testatur S. Gregorius in ejus vita, dum ait, quod fracto per nutricem capisterio, & à se per miraculum reparato, Benedictus plus appetens mala mundi perpeti, quam laudes, nutricem suam occulte fugerit. Ipsemet hinc eundem nobis humanæ laudis contemptum inculcat; quando jubet, *Elationem fugere*. Quid enim magis causat elationem, quam laus humana? At merito fugienda est; quia vana est. An non vanum est; cum sæpe id, de quo te laudant homines, laude dignum non sit? Aut si dignum sit, nunquid non vanum est, gloriam suam labiis hominum, arcæ sine clave, sine sera committere? Nonné stultum est, thesaurum suum ibi recondere, unde resumere quis non valeat,

leat, cum voluerit? Si etenim ponis gloriam tuam in os meum, jam non in tua potestate, sed in mea est; quandoquidem pro meo libitu vel laudare te possum, vel tibi derogare. Et qui de hac hora laudo, post horam de eadem re fors vitupero: aut qui nunc in faciem te magnifico, mox à tergo irrideo, & denigro: vel qui ore te exalto, corde te despicio. Quis igitur non contemnat laudem humanam, quæ tam vana, falsa, & inanis est, atque tam velociter cum sonitu verborum transit? Tu, si sapis, gloriam tantum quæres in conscientia tua, quæ illam tibi servabit vivo, & illam mortuo restituet. Ubique enim tibi vel gloria, vel confusio inseparabilis adest.

### PUNCTUM SECUNDUM.

**E***Lationem fugere*; quia laus humana nociva est. Si enim falsa est; tunc qui te beatificant, in errorem te mittunt. Cum verò laudari te comperis de bono, quod fortè te habere cognoscis; nihilominus, quantum in te est, scuto veritatis cura à te repellere jaculum favoris, dans Deo gloriam, & dicens: gratia Dei sum id, quod sum. Secus, si tibi adscripseris, bonum, quod habes, desperdis, atque ad novas gratias recipiendas indignum te reddis. Tinea corrumpet thesaurum tuum. Proba igitur tu ipse opus tuum, & sic in temetipso gloriam habebis, &  
non

non in altero. Ad hoc cogita illud Senis : quia, qui plus, quam dignus est, honoratur, aut laudatur, amplius patitur detrimentum : qui autem non fuerit omnino ab hominibus honoratus, hic desuper glorificabitur.

PUNCTUM TERTIUM.

**E***Lationem fugere* in laudibus humanis ; quia laus vera, & sincera à solo Deo est. Deus quippe solus nec falli potest, nec adulari. Deus neminem facile laudat, quem laude posse inflari videat, vel quem ex fine debere reprobari prævideat. Homini quidem rectè dicitur, ne laudet hominem in vita sua : cuius sicut scire non potest intima, sic nec præscire novissima ; cum de seipso quoque confiteri habeat ; nihil mihi conscius sum, sed non in hoc justificatus sum. Sunt enim iusti, & sapientes, & opera eorum in manu Dei sunt, & tamen nemo scit, utrum sit dignus amore, an odio ; sed omnia in futurum servantur incerta. Felix igitur, qui omnem suam laudem non ab hominibus, sed à Deo solo querit, & expectat. Sic nunquam decipietur à laudibus humanis, nec semetipsum decipiet elatione ob laudes hominum ; sed si gloriari voluerit, in Domino gloriabitur.

PUNCTUM QUARTUM.


**A**N igitur, ô Religiose ! laudem humanam ex animo contemnis ; quia vana est ? Vana

nus



nus vanum laudat. An laudem humanam ex animo contemnis; quia nociva est? Attendite, ne justitiam vestram faciatis coram hominibus, ut videamini ab eis; alioquin mercedem non habebitis apud Patrem vestrum, qui in cœlis est. An laudem humanam ex animo contemnis; quia vera, & sincera laus à solo Deo est? Dilexerunt gloriam hominum magis, quàm gloriam Dei. Dole, quod hucusque laudem humanam tam studiose quæsieris. Propone eandem ex animo contemnere, atque ideo

1. Gloriam tuam tantum quærere in conscientia tua,
2. Gloriam fideliter Deo adscribere, ac
3. Gloriam veram, & sinceram ab eo solo in cœlis exspectare.



## DIES XXIX.

De contemnendis vituperiis hominum.

Maledicentes se, non remaledicere. Cap.

4. Instr. 32.

## PUNCTUM PRIMUM.

**N**emo magis hoc instrumentum: *Maledicentes se non remaledicere*, observabit; quàm qui vituperia hominum contemnit. Contemnenda autem sunt; quia cum sonitu  
ver-

verborum evanescunt, nec capillum de capite lædunt. Si enim taces, & convitium convitio non reddis, mox vituperium ita transibit, ut post horam nemo amplius ejusdem recordetur. Quo vero tenacius illud à te repellere satagis, eo fortius, & longius id animis audientium inscribis. Quod si cum contemptu, & quasi non audiens sustinueris, à cæteris quoque non attendetur. Potius ille, qui vituperium intulit, quàm qui patienter tulit, despicitur. Sequere Ss. Patrem tuum, qui vituperantem, & clamantem Dæmonem: maledicte, non Benedicte! nullo responsionis verbo dignatus est, & eandem, quam ipse de hoste antiquo, tu de inimico tuo referes victoriam.

### PUNCTUM SECUNDUM.

**M***Aledicentes se non remaledicere*, quia contemnenda sunt vituperia hominum, cum ipsis potius, quam læsis noceant. Vituperator equidem non aliter se ipsum priùs vituperat, quàm qui accendit ignem priùs concalescit, qui duros filices manu cedit, ipse non lapides vapulat, qui ad stimulos calcitrat, seipsum ferit. Cui nocuit Semei, David virum sanguinum, & impium, milléque malis infectum appellans? Certè non David, sed sibi. Unde David nec irritatus est, nec vindictam de eo sumere voluit, sed Imperatorem exercitûs rogantem, ut caput illius truncaret, coercuit: Quid mihi, & tibi, fili Sarviæ! dimitte eum,  
ut

ut maledicat, si fortè aspiciat Dominus afflictionem meam, & reddat mihi bonum pro maledictione hac? Qui enim alterum vituperiò afficit, divinæ relinquitur vindictæ. Dominus ultionum namque dicit: Mihi vindicta, ego retribuam. Sed quam horrendum est incidere in manus Dei viventis! ecce! David contumeliis affectus cum pace redit ab exilio; Semei verò reddidit Dominus malitiam suam in caput suum; nam percussus à Banai à filio Jojadæ interiit.

### PUNCTUM TERTIUM.


**M**aledicentes se non remaledicere, quia gloriosum est contemnere vituperia hominum. Non enim injuriam pati, sed injuriam facere, aut nescire pati, ignominiosum est. Quot, quantasque injurias ferebat David? quot quantasque faciebat Saul? Quisnam horum fuit gloriosior? Nónne qui ignominias tulit, David? Nónne semper victorias de inimicissimo hoste suo reportavit? At quam primum & ipse injuriens factus est; nunquid non in conspectu solis confusus fuit? Nemo igitur potest tibi gloriam tuam auferre coram hominibus, quamdiu patiens fueris. Imò augebit tantò ampliùs eandem, quantò majora vituperia intulerit. Nec solùm gloriam tuam in terris, sed & in cœlis mirum in modum adauget, ita, ut modicum passus immarcescibilem illic coronam accepturus sis. Patientia enim opus habet perfectum.

Pun-

PUNCTUM QUARTUM.

**A**N ergò, ô Religioſe! vituperia hominum contemnis; quia vana ſunt? Capillus de capite veſtro non peribit. An vituperia hominum contemnis; quia ſeipſos lædunt? Memoria impiorum peribit. An vituperia hominum contemnis; quia hoc glorioſum eſt? Oportuit Chriſtum pati, & ita intrare in gloriam ſuam. Dole, quod hucusque tam ægrè vituperia hominum tuleris. Propone eadem ex corde contemnere;

1. Quia vana ſunt;
2. Quia vituperantem lædunt;
3. Quia illa pati glorioſum eſt.



DIES XXX.

IN FESTO S. ANDREÆ APOSTOLI.

*Recollectio Menſtrua.*

Securi de ſper retributionis divinæ ſubſequuntur gaudentes, & dicentes: ſed in his omnibus ſuperamus propter eum, qui dilexit nos. Cap. 7. v. 43. & 44.

PUNCTUM PRIMUM.

**C**onſidera glorioſum Apoſtolum S. Andream, quò deſideriò, & gaudiò ad mortem crucis anhelet: O bona Crux, diu deſiderata,



ta, & jam concupiscenti animo præparata, securus, & gaudens venio ad te, ita & tu exultans suscipias me discipulum ejus, qui pendit in te! unde illi tantum desiderium mortis, & quidem mortis crucis? A tempore, quo Christum secutus est, nil potius cordi habebat, quàm abnegare semetipsum, & crucem suam tollere. Sciebat, quod perfectionem divini amoris nemo obtineret; nisi prius hoc fundamentum posuisset. Secutus est hujus primi Apostoli exemplum Ss. Pater tuus in Sublaco. Scis, quomodo se ibi abnegaverit? Scis, qualiter corpus suum cruentaverit? Non mirum, quod & tantum amaverit. Sequere ambos sanctos. Sequere doctrinam Ss. Patris: *Securi de spe retributionis divinæ subsequuntur gaudentes, & dicentes: sed in his omnibus superamus propter eum, qui dilexit nos.* Et utrùm jam verum fundamentum perfectionis Religiosæ jeceris, examina, an amorem Dei perfectè, & quotidie sæpè exerceas? Inquietum erit cor tuum; donec requiescat in eo bono, ad quod creatum est. An speras in Domino? Væ his, qui perdiderunt sustententiam. Ex his facile colliges, an non aliquando inimici tui tibi illusuri sint; quia hic homo cœpit ædificare, & non potuit consummare?

#### PUNCTUM SECUNDUM.

**C**onsidera 2., quod S. Andreas tam gaudenter ad crucem properet, atque præsentem

sentem vitam contemnat, in causa esse; quia propter Deum omnia reliquit ab initio conversionis suæ, atque vocantem Dominum in omnibus spe cœlestis vitæ secutus est. Sequeris & tu illum, ac doctrinam sanctissimi Patris tui; *securi de spe retributionis divinæ subsequuntur gaudentes, & dicentes: sed in his omnibus superamus propter eum, qui dilexit nos*, perfectè adimplebis, si relictis omnibus vocationi tuæ satisfeceris. Examina igitur, an grata tibi sit Monasterii tui paupertas? Beati pauperes spiritu; quoniam ipsorum est regnum cœlorum. An media conservandi castitatem adhibeas, in iisdemque sæpè te exerceas? Mitte servum in operationem, ne yacet. An secundùm triplicem Religiosorum statum proficias? Non proficere, deficere est. An in communibus potiùs, quàm in singularibus perfectionem tuam quæras? Beati mundo corde. An non miser sis; quia à vocatione tuâ deficiis? Qui retrospicit, non est aptus Regnò Dei. An crebrò vota tua renoves? Vota mea Domino reddam. An veram, an falsam religionem habeas? Ne accesseris ad Deum duplici corde. An non in causa sis, ut abusus contra Regulam invalescant, qui pro ordine teneantur? Væ illi, per quem scandalum venit? An doleas à Religiosæ vitæ deliciis abstrahi? Gustate, & videte; quoniam suavis est Dominus. An sæpè consideres sublimem Religiosorum statum, & periculosam eorum ruinam? Aut

Angeli, aut Dæmones sunt. O qui pœnas æternas præsentēs consideraret, quàm exactè cum S. Andrea omnia relinqueret, & vocationi suæ satisfaceret !

### PUNCTUM TERTIUM.


**C**onsidera tertiò ; quòd S. Andreas populum roget, ne à cruce deponatur, sed in eâ mori posset, ideò fieri ; quia ex amore proximi omnia adversa, cunctos labores in peragratiōe Scythiæ, Epiri, Thraciæ, Achaïæ, prædicando Evangelium antea sustinuit. Voluit enim Crucifixum omnibus non solum verbò, sed & exemplò suò amabilem reddere. Et tu libenter adversa tolerares, si te amore proximi abnegares propter Crucifixum ; illum verè in omnibus amares, si impleres illud Ss. Patris tui : *Securi de spe retributionis divinæ subsequuntur gaudentes & dicentes ; sed in his omnibus superamus propter eum, qui dilexit nos.* Examina ergò te, an mortifices te, ne aliis S. Ordinibus obtrectes ? Omnes in Christo unum sumus. An mortifices te, ne sæculares per nimiam familiaritatem scandalizes ? Fugite mundum, & quæ in mundo sunt. An libenter adversa toleres, ut vivis, atque defunctis efficacius succurras ? Beati misericordes ; quoniam ipsi misericordiam consequuntur. An cum gaudio amore proximi, & à proximo patiaris, ut charitatem proximi semper exerceas ? Majorem charitatem nemo habet, quàm ut animam suam ponas

ponat quis pro amicis suis. O qui immensam charitatis proximi dulcedinem gustasset, quā libenter pro ejus ædificatione cum S. Andrea moreretur!

PUNCTUM QUARTUM.

CONsidera quartò, quod S. Andreas biduo cum Christo passus, cum Christo in cruce mortuus, demum in maximo splendore animam efflaverit. Unde illi ista gratia? Ad Christi exemplum vixit, ad Christi exemplum mortuus fuit. Et tu juxta promissum Ss. Patris in morte felici illum *subsequeris securus de spe retributionis divinæ*, dummodo te per vitam in omnibus superes propter eum, qui dilexit nos. Examina igitur temetipsum, an te abneges, ut patiens, & humilis fias? Discite à me; quia mitis sum, & humilis corde. An te abneges, ut contemnas laudes, & vituperia hominum? Gratiā Dei id sum, quod sum. An mediis proportionatis amorem proprium eradices, ut sapientiam acquiras? Ordinavit in me Charitatem. Dole igitur, quod hoc rursus in ense obligationibus status tui non satisfeceris. Saltem hodiè aliquibus mortificationibus defectum supplere, & in sequenti magis proficere propone. Ut possis, implorare Patrocinium S. Andreae Apostoli; quatenus crucem tuam in S. Religione usque ad mortem constanter ferre, atque in ea cum ipso mori valeas.





## DECEMBER.

### DIES I.

Cur omni hora vita æterna confideranda sit.

Vitam æternam animo suo semper revolvat.

Cap. 7. v. 10.

### PUNCTUM PRIMUM.

**S**ANCTISSIMUS Pater noster intendit quidem, ut *vitam æternam animo nostro semper revolvamus*: sed satisfaciemus menti Ss. Patris, dummodo omni hora ad exemplum illius sancti Senis, de quo narrant vitæ Patrum, quod omni hora se ad tolerantiam laborum, ad patientiam, & profectum exstimularit, & nos gloriam cœlestem recogitemus. Quis enim omni hora *vitam æternam animo suo revolvat*, & non libenter pro cœlo labores nunc ac hora in S. Lectione, nunc illa in oratione, nunc alia in studio cum ingenti fervore sine remissione perferat? Nonne tunc amplius non laborabimus, sed perpetuo requiescemus, quando pro modico hujus temporis labore replebit nos Dominus jucunditate cum facie sua. Hæc enim erit æterna requies, & beatitudo nostra; cum meruerimus eum facie ad faciem videre. Optime istud intellexit Philippus; quando ait: Domine, ostende nobis Patrem, & sufficit nobis.

Suffi-

Sufficit equidem illa jucunditas, faciem Domini videre, neque aliud ampliùs requiritur: quia nec erit, quid ampliùs requiratur, cum visus fuerit ille, qui est super omnia. Hæc cogita omni hora, & libens, ac fervens eris omni hora in opere tuo.

PUNCTUM SECUNDUM.

*Vitam æternam animo suo semper revolvat.*

Quis enim omni hora hanc cogitet, quin non cum gaudio tentationes in anima, morbos in corpore, afflictiones ab adversariis, adversitates hujus mundi omnes sustineat? Nonne pro momentaneo hoc & levi tribulationis momento æternum gloriæ pondus retribuitur? Tantam siquidem omnis gaudii, omnis delectationis, omniumque bonorum abundantiam hoc gloriæ pondus continet, ut si vel minimum momentum de eo ad instans solum nobis gustari daretur; tamen omnia mala usque ad finem mundi pro illo pati deberemus. Quæ, & quanta igitur, & quidem cum gaudio nos pati convenit; cum non sit quid temporaneum, sed interminabile, cujus gaudia nullo fine clauduntur, nullisque amaritudinibus perturbantur? Hæc cogita omni hora & nullis adversis frangeris. Etenim & nos oportet pati, si volumus cum Christo intrare in gloriâ.

PUNCTUM TERTIUM.

*Vitam æternam animo suo semper revolvat.*

Quis enim hanc omni hora cogitet, ut non

ad plures, & intensiores actus virtutum excitetur? Nonne in domo Patris mansiones multæ sunt; sed una altera sublimior est? Quò quis amplius in Evangelica perfectione proficit, eò augustiorem locum in cœlis obtinebit. Ibi non est acceptio personarum; sed respectus meritorum. Istam Proemiorum varietatem cogita, & sine intermissione cures in stadio virtutum, ut bravium consequaris. O quam beatus eris, si cùm tanta reproborum multitudo repellitur, tu ad nuptiale convivium ingredi poteris! O quantum gaudebis, quòd vitæ fontem & sitiens semper haurire, & hauriens sitire possis; quia ibi non valet tibi, vel aviditas passionem gignere, vel satietas fastidium! O quantum lætaberis, quòd semper magis in Deum profeceris! etenim licet & minimus sanctorum perfecte beatus sit, tamen pro meritorum qualitate majorem, aut minorem beatitudinem obtinent.

#### PUNCTUM QUARTUM.

**AN** igitur, ô Religiose! omni hora cogitas vitam æternam, ut semper ferventius pro cœlo labres! Quod oculus non vidit, nec auris audivit, nec in cor hominis ascendit, præparavit Deus his, qui diligunt eum. An omni hora cogitas vitam æternam, ut patienter feras adversa? Non sunt condignæ passionibus ad futuram gloriam, quæ revelabitur in nobis. An omni hora cogitas vitam  
æter-

æternam, ut in virtutibus magis proficias ?  
Stella enim à stella differt. Dole, quòd tam  
raro ad profectum animæ tuæ Beatitudinem  
tuam recogites. Propone omni hora ean-  
dem cogitare,

1. Ut ferventius labores,
2. Ut libentius patiaris,
3. Ut frequentius virtutes S. Regulæ ex-  
erceas.



DIES II.]

De necessitate, utilitate, & desiderio  
correctionum.

Correctioni Regulari subjaceat. Cap. 48. v. 18.

PUNCTUM PRIMUM.

SÆpe legimus in dialogo S. Gregorii, quòd  
Ss. Pater correctionem peccantibus fra-  
tribus adhibuerit. Sic Monachos extra Cœ-  
nobium comedentes corripuit; alios acci-  
pientes mappulas sine licentia redarguit; va-  
gum illum in oratione virga castigavit. Sæ-  
pius adhuc correctionem suadentem, & im-  
ponentem legimus Ss. Patrem in Regula:  
*Correctioni Regulari subjaceat.* Necessaria  
est enim Religiosis correctio. Ubi conven-  
tui frequens fraterni zeli correctio deest, Is-  
raeliticæ plebis mystica laborat inopia, quæ  
fabrum ferrarium non habebat. Sicut nam-



que ferrum reliqua metalla fortiter edomat ; ita correptionis malleus vitia delinquentium reprimat , & quasi cudendo rigida mentis duritiam frangit. Et sicut Philistæi caverant, ne forte facerent Hebræi gladium , aut lanceam ; ita maligni Spiritus falsæ pietatis obtentu , zelum correptionis , gladium Spiritûs auferre de fratrum labiis satagunt. Sic fit, ut verbum Dei cesset audiri, sacra exercitia desinant frequentari , disciplinæ vigor enervetur , & religio tota destruat. Nam dum unusquisque proprium sequitur arbitrium , nec illum districta Magisterii disciplina reprimat , necessario spiritualis observantiæ violat institutum. Unde quisquis est, cui Regularis vitæ fervor inæstuat , correptiones libenter amplectatur , & tunc etiam, cum innocens est , suis reprehensionibus delectetur. Non ut eum conscientia peccasse remordeat ; sed quoniam hoc prodesse cæteris audientibus sperat : ut unde ipse innocens , & mundus arguitur , alii vel lapsi, vel lapsuri forte corrigantur.

#### PUNCTUM SECUNDUM.

**C**orreptioni Regulari subjaceat. Utilis est enim correptio. Ad hoc namque homo de sæculo magisterio disciplinæ regularis submittitur ut rubiginem , quam de mundo lenocinante contraxerat, asperæ correptionis lima detergat. Unde Spiritus sanctus hortatur in Proverbiis : convertimini ad correptionem-

tionem meam, en proferam vobis Spiritum meum. Non dicit: ad blanditias meas; sed convertimini ad correptionem meam. Etenim quibusdam corripere dedignantibus ait: mane consurgens, & non invenient me; eo quod exosam habuerint disciplinam, & timorem Domini non susceperint, nec acquieverint consilio meo, & detraxerint universæ correptioni meæ. Hinc admonet, dicens: Disciplinam Domini, fili mi! ne abjicias: nec deficias; cum ab ipso corripieris: quem enim diligit Dominus, corripit: & quasi Pater in filio complacet sibi. Jure scilicet non hominis, sed Domini correptio dicitur, cum in amore Christi à proximo in proximum quælibet severitas derivatur, ut à malo declinet, & faciat Bonum. Tu tantas utilitates correptionis ne neglexeris. Eam diligenter adhibe, & libenter accipe.

### PUNCTUM TERTIUM.

**C**orreptioni Regulari subjaceat. Desiderabilis enim est correptio. Sapiens quippe austeritatis illatæ duritiæ animæ suæ vulneribus deputat medicinam. Unde scriptum est: si corripueris sapientem, intelliget disciplinam. Et iterum: Plus proficit correptio apud prudentem, quàm plaga apud stultum. Porro sicut æger, qui non capit antidotum, moritur, ita, qui non potest corripì, nequit ab animæ suæ languoribus relevari. Unde rursus per Salomonem dicitur:

O s... tur:


tur : noli subtrahere à puero disciplinam : si enim percusseris eum virga , non morietur : tu virga percutis eum , & animam ejus liberabis de inferno. Vis audire , quid illis immineat , qui respuunt corripì ? Qui dedignatur à Senioribus objurgari ! Viro , qui corripientem dura cervice contemnit , repentinus ei superveniet interitus , & eum sanitas non sequetur. Nonne correptio desiderabilis est ?

### PUNCTUM QUARTUM.

**A**N ergo , ô Religiose ! necessitatem correctionis regularis agnoscis ? Ecce ! ego creavi fabrum sufflantem in igne prunam , & proferentem vas in opus suum. An utilitatem correctionis regularis perpendis ? Melior est manifesta correptio , quàm amor absconditus. An desiderium habes correctionem regularem diligenter adhibendi , & libenter accipiendi ? Qui diligit disciplinam , diligit sapientiam ; qui autem odit increpationes , insipiens est. Dole , quòd & tu hucusque è numero horum insipientium fueris. Propono ideo crebro

1. Necessitatem correctionis regularis agnoscere ,
2. Utilitatem ejusdem perpendere , atque
3. Diligere , & desiderare eandem , ut eam & diligenter adhibeas , & libenter suscipias.

DIES



DIES III.

Quòd, qui vota non perficit, aut violat,  
Deum videtur irridere.

Si aliquando aliter fecerit, ab eo se damnan-  
dum sciat, quem irridet. Cap. 58. v. 20.

PUNCTUM PRIMUM.

Quàm grave peccatum sit eorum, qui vo-  
ta non perficiunt, violant, aut fidem  
suæ professionis frangunt, Ss. Pater noster  
hiscæ testatur: *Si aliquando aliter fecerit,  
ab eo se dammandum sciat, quem irridet.* Ir-  
ridet enim Deum, qui vota sua non perficit.  
Obtulisti temetipsum Deo, & factus-refuga  
subtraxisti? Deum puerum & te facis ovum.  
Nam dum te ipsi prius oblatum conaris quasi  
ludendo subducere, videris eum velle velut  
puerum obgannire. Nolite errare, Deus  
non irridetur: quæ enim homo seminaverit,  
hæc & metet. Deludis Auctorem, offen-  
dis mendacio veritatem. Porro cum Deus  
sit procul dubio veritas, nullo magis offen-  
ditur vitio, quàm mendacio. Spondesti,  
& sponsonem non perficere non metuis? Vo-  
visti, & votum, ut reddas, tardare non ti-  
mes? Audi Psalmistam: vovete, & reddite.  
Audi Moysen: cum votum voveris Domino  
Deo tuo, non tardabis reddere: quia requi-  
ret illud Dominus Deus tuus.

Pun-



## PUNCTUM SECUNDUM.

*SI aliquando aliter fecerit, à Deo se damnandum sciat, quem irridet.* Irridet enim Deum, qui vota sua violat. Apud homines jubetur promissum servari; quanto magis apud Deum? Homo itaque non amittit, quod semel accepit: Deus autem possessionis suæ jure fraudabitur? Terrenæ militiæ duces eos sibi, qui militiam professi sunt, vindicant: nos in divini procinctûs arma juramus, caracterem nobis militiæ cœlestis imprimimus, & notam nobis inurere transfugii non timemus? Nunquid non irridemus Deum, ac si ipse infirmior esset, quàm homo, quàm Dux militiæ, qui perfidos, & infidos vindicare non posset? Dedisti, ô Frater! Deo non aurum, non equum, non denique alienum, quod extra te, sed temetipsum per vôtâ tua; quam ergo mercedem vice tui Domino permutabis? Quam enim commutationem dabit homo pro anima sua? Ergo convertere ad Dominum, & relinque peccata tua; precare ante faciem Dei, & minue offendicula; renova, & redde vota tua Altissimo: nam observabis, & facies, sicut promisisti Domino Deo tuo, & propria voluntate, & ore tuo locutus es.

## PUNCTUM TERTIUM.

*SI aliquando aliter fecerit, à Deo se damnandum sciat, quem irridet.* Deum quippe irridet, qui fidem illi datam frangit. Non  
ne

ne enim Deum irridet, qui dupliciter Deo spondet. Spondet ore, sed opere, quod sponderat, subtrahit. At cogita illud Proverbiorum; Fili mi, si sponderis pro amico tuo, defixisti apud extraneum manum tuam: illaqueatus es verbis oris tui, & captus propriis sermonibus tuis. Etenim si manum suam apud extraneum ille defigit, & reddendæ pro eo rationi sese obnoxium facit, qui pro amico sponderit: quanto magis tu ratiocinium Deo debes, qui non pro alieno, vel extraneo spondidisti, sed temetipsum Deo specialiter obtulisti? Cœpisti quidem divini amoris igne fervere, cum te decrevisti cœlestis militiæ obsequio mancipare: ardere scilicet per Spiritum cœpisti; sed per degenerem carnis ignaviam totus inte-  
puiisti. Coram hominibus stare conspiceris, sed in conspectu Domini cecidisti. Reverte-  
re igitur ad Deum tuum. Deprecare pro violata fide. De novo sponde, ut non amplius reminiscatur iniquitatum tuarum.

#### PUNCTUM QUARTUM.

**AN** ergo, ô Religiose! Deum non irrides non perficiendo vota tua? Si moratus fueris, reputabitur tibi in peccatum. An Deum non irrides violando vota tua? Initium superbiæ hominis, apostatare à Deo. An Deum non irrides frangendo fidem datam? Non faciet irritum verbum suum; sed omne, quod promisit, implebit. Dole,  
quod

quòd & tu vota saltem non perficiendo sæpe Deum irriseris. Propone

1. Vota perficere,
2. Vota non violare,
3. Fidem datam integram custodire.

\*\*\*\*\*

## DIES IV.

### De Laude lachrymarum.

Mala sua præterita cum lachrymis, vel gemitu quotidie in oratione Deo confiteri.

Cap. 4. Instr. 58.

### PUNCTUM PRIMUM.

**S**ANCTISSIMUS Pater noster merito nobis lachrymas recommendat, dicens; *mala sua præterita cum lachrymis, vel gemitu quotidie in oratione Deo confiteri*. Nihil enim efficacius est lachrymis. Mador quippe lachrymarum animam omni labe purificat, & ad proferenda virtutum germina nostri cordis arva fœcundat. Sæpe namque miserabilis anima velut sub pruinali glacie comas, & foliorum ornamenta deponit: & recedente gratia ipsa sibimet derelicta, tota remanet arida, & quasi decidentium florum videtur decore nudata. Sed mox ut lachrymæ ex munere intimi Inspectoris eruperint, protinus hæc eadem anima revirescit, torporis ignavi frigore solvitur: & tamquam arbor  
verna

verna Austri fomite recalescens , redivivo virtutum suarum flore vestitur. Dum igitur totus arefcis , multisque imperfectionibus scates , ac gratia sensibili destitueris ; anhela ad lachrymas , lachrymas quotidianis precibus à Deo flagita , & cum lachrymis ab omni nævo mundaberis.

## PUNCTUM SECUNDUM.

**M***ala sua præterita cum lachrymis , vel gemitu cordis quotidie in oratione Deo confiteri.* Nihil equidem efficacius lachrymis ; quia gratiam impetrant. Ipsæ porro divinæ exauditionis tribunal fiducialiter adeunt : & impetrantes præsto , quod petunt , de peccatorum nostrorum certa remissione confidunt. Lachrymæ sunt in fœderanda inter Deum , & homines pace sequēstres ; & veraces sunt , atque doctissimæ in qualibet humanæ ignorantia dubietate magistræ. Nam dubitantes ex aliquo , utrum Deo placeat nec ne , nunquam melius certitudinem à Deo accipimus , quàm cum veraciter lachrymantes oramus. Ecce ! quomodo lachrymæ diluant omne spurcitiarum in meretrice contagium , & immundis manibus tribuant , ut non solum pedum , sed & Dominici Capitis mereantur attactum. Lachrymare ergo , & gratiam invenies in conspectu Domini.

## PUNCTUM TERTIUM:

**M***ala sua præterita cum lachrymis , vel gemitu cordis quotidie in oratione Deo*  
con-



*confiteri.* Nihil namque efficacius est lachrymis ; quia dum per oculos carnis erumpunt, ad spem nos supernæ beatitudinis erigunt. Non enim possunt in sua petitione contemni, quæ & magnas voces habent in auribus Creatoris. Has voces ille frequenter ad Deum emiserat, & quid ad obtinendum possent, subtiliter noverat, qui dicebat : exaudi orationem meam Domine ! & deprecationem meam ; auribus percipe lachrymas meas. Qui enim non oculis attendi, sed auribus percipi lachrymas postulat, voces lachrymis inesse manifeste designat. Lachrymæ nempe, cum in conspectu pii Judicis supplicant, nihil hæsitant ; sed sic misericordiam, tanquam rem quamlibet proprii juris sibi met vendicant : & impetrâsse se, quod petierant, confidenter exultant. O lachrymæ deliciae spirituales, super mel videlicet, & favum, atque omni nectare dulciores ! fluite incessanter ex oculis nostris, ut spem Beatitudinis nobis faciatis.

#### PUNCTUM QUARTUM.

**AN** ergo, ô Religiose ! lachrymaris ad purificandam animam ? Petrus cœpit flere amarè. An lachrymaris ad gratiam impetrandam ? Magdalena cum lachrymis cœpit rigare pedes Jēsu. An lachrymaris ad obtinendam spem Beatitudinis ? Paulus Domino serviebat cum omni humilitate, & lachrymis. Dole, quòd hucusque tam parum  
pro

pro lachrymarum gratia oraveris. Propone deinceps ferventer eam à Domino postulare

1. Ad purificandam animam,
2. Ad impetrandam gratiam,
3. Ad obtinendam spem beatitudinis.

~~~~~

DIES V.

Quæ mala infelix anima Monachi patiat-
tur, cum ad inferiora revertitur.

Nobis desidiosis, & male viventibus, atque
negligentibus rubor confusionis est.

Cap. 37. v. 8.

PUNCTUM PRIMUM.

Quanta mala Monachus incurrat, cum ter-
renas, & mundanas consolatiunculas
appetit, Ss. Pater paucis, sed gravibus ver-
bis describit: *Nobis desidiosis & male viven-
tibus, atque negligentibus rubor confusionis
est.* Prô! qualis rubor confusionis nobis de-
sidiosis non est? Dum enim mundana, &
terrena solatia quærimus, ecce! quasi quæ-
dam conglobata turba omnium, quæ vidi-
mus, vel audivimus, nos rursus comitatur,
ut tumultuantium desideriorum strepitum
importune patiamur. Si enim mens nostra
orationi vacare enixius cœperit, ecce phan-
tasmata cogitationum, ecce imagines, quas
viderat, rerum! Et quidem homo renititur,

Spir. S. Ben. P. IV.

P

&

& quasi circumvolantes muscas abigere à suæ mentis ore conatur. At illæ mox ut abscedunt, redeunt; illico ut repelluntur, assistunt, & quasi fugitivum suum persequentes capere, & in propriæ servitutis moliantur exercitia revocare. Tunc infelix anima discit, quanti sibi constiterit quòd ad terrena, & mundana se applicaverit. Tu ergo noli per desidiâ ad ista declinare, ferventer insiste proposito tuo. Relinque hunc miserum mundum, ejusque oblectamenta, ne amplius tam turpiter tibi illudat.

PUNCTUM SECUNDUM.

N *Obis male viventibus rubor confusionis est.* Etenim dum vocationi nostræ non pro virili intendimus, male vivimus, & sensuâlitati nos dedimus, prò! qualiter confundimur? Tabescit siquidem anima nostra sicca, obscura, lapidea. In modum namque lapidis obdurata, nec in lachrymarum fluenta prorumpere, nec lumen potest tenebris undique circumfusa videre. Psalmorum quidem mysteriis, meditationi, S. Lectioni intendere nititur; sed tanquam lippientibus oculis intolerabili lumine reverberatur. Anhelat virtute, qua potest, ad summa contendere; sed quodam suo pondere prægravata in imis cogitur humiliata jacere. Cui Propheticum illud non inconvenienter aptatur: in tenebrosis collocavit me, quasi mortuos sempiternos; circum ædificavit adver-

sum

sum me, ut non egrediar, aggravavit com-
pedem meum; sed & cum clamavero, & ro-
gavero, excludet orationem meam. Moe-
ret, anxiatur, anhelat, & quia nec ipsam
hanc ejus miseriam sibi flere permittitur,
acriori doloris amaritudine repleta turbatur.
Tu igitur mortifica sensus tuos, ne in hanc
miseriam incidas, aut ab ea quantocius li-
bereris.

PUNCTUM TERTIUM.

Nobis negligentibus rubor confusionis est.

Equidem cum infideles sumus, mini-
ma negligimus, aut nimio ardore etiam ad
exercitia indifferentia, utpote studia &c. in-
cumbimus, devotionem paulatim amitti-
mus, & pro! qualis tunc confusio in anima?
Fit enim menti miseræ tam tenebrosæ confu-
sio, ut lucem, qua prius gaudebat, nulla-
tenus reperire possit. Quocunque se verte-
rit, nullam consolationem sentit. Quæcun-
que spiritualia exercitia persolvat, non nisi
ariditatem mentis reportat. Tædet proinde,
quidquid spirituale est. Amarum est, quid-
quid spiritui antea super mel, & favum erat.
Hæc autem in humana mente calamitas, est
pœna peccati. Justum quippe est, ut quod
quis per negligentiam volens admisit, pa-
tiatur invitus. Tu ergo devotionem cordis
omnibus aliis præpone, nihil neglige, fide-
lis esto; & semper ambulabis in magno lumi-
ne cum Deo tuo.

PUNCTUM QUARTUM.

AN igitur, ô Religiose! mundana oblectamenta respuis, ne obscuritatem animæ incurras? Et lumen oculorum meorum, & ipsum non est mecum. An sensualitatem mortificas, ne consolationem internam amittas? Idcirco ego plorans, & oculus meus deducens aquam; quia longe factus est à me consolator, convertens animam meam. An fidelis es in minimis vocationis tuæ, & devotionem cordis ante omnia conservas, ne calamitatem internam sentire debeas? Bonus est Dominus sperantibus in eum, animæ quærenti illum. Dole, quòd hucusque annos tuos in mera calamitate interna sine sapore Spiritûs transfegeris. Propone tandem in luce miserationum Domini respirare, & ideo.

1. Mundana oblectamenta respuere;
2. Sensualitatem tuam mortificare;
3. Fidelis esse in minimis Vocationis tuæ, ac devotionem cordis præ omnibus conservare.



DIES VI.

Quomodo Monachus per paupertatem ad veras divitias pervenire possit.

Omni vilitate, & extremitate contentus sit Monachus. Cap. 7. v. 61.

Pun-

PUNCTUM PRIMUM.

Non sine magno præmio Ss. Pater noster vult, ut *omni vilitate, & extremitate contentus sit Monachus.* Qui enim veras divitias appetit, facillime extremam paupertatem amplectitur. In hac enim una omnium dives erit, nec eorum, quæ sibi fuerint necessaria, copia poterit indigere. In hac possidebit aurum Divinæ sapientiæ, argentum ædificatricis eloquentiæ. In hac diversa pallia decoræ, & honestæ conversationis, bis tinctum videlicet coccum geminæ charitatis, colobium nitidæ castitatis. In hac byssum patientiæ, flammeum birotinum divini timoris, purpuram regiæ dignitatis. Quisquis enim sibi ita dominatur, ut omnem concupiscentiam terrenæ substantiæ mortificare festinet, merito spiritualis purpuræ decore vestitur. In hac habebit dirupisticum virentis semper spei, annulum fidei, armillas perfecti in activa vita operis, dextralia etiam speculativæ contemplationis. Quis igitur non omnem affectum ad terrenas divitias libenter abjiciat, omni vilitate contentus sit, ut veras virtutum divitias adipiscatur?

PUNCTUM SECUNDUM.

O*Mni vilitate, & extremitate contentus sit Monachus.* Facile necessariis vitæ contentus erit, qui bonâ cœlestia pauperibus Spiritu promissa ambit. Nam in illa ve-

ræ beatitudinis vita quanta tibi, & quàm
 potiora dabuntur, non est, fateor, nostra-
 rum virium disputare, non est nostræ facul-
 tatis evolvere. Hoc tantum ad compendio-
 sum inexplicabilis negotii exitum referre suf-
 ficiat; quia hoc accepturi sunt, qui omnia
 perfecte reliquerunt: quod oculus non vi-
 dit, nec auris audivit, nec in cor hominis
 ascendit, quæ præparavit Deus diligentibus
 se. Ecce! quot, & quantos sanctos spes
 harum cœlestium divitiarum ad extremam
 mundi paupertatem redegit? Cogita Pau-
 lum; primum Eremitam pane & aqua con-
 tentus est. Cogita Arsenium, qui ex Au-
 lico Imperatoris factus est tam pauper, &
 inops, ut non nisi ultimam necessitatem in
 victu, & amictu admittat. Cogita Ss. Pa-
 trem tuum; omnes, & amplissimas mundi
 possessiones relinquit, quibus tamen libere
 uti potuisset, & omni extremitate in Subla-
 censi specu contentus est. Desidera & tu
 bona cœlestia, & libenter eos sequêris.

PUNCTUM TERTIUM.

O *Mni vilitate, & extremitate contentus
 sit Monachus.* Nullam solitudinem
 pro terrenis habebit, qui pro suo thesauro
 hic, & ibi desiderat possidere Christum.
 Ipse enim nobis factus est Redemptor, &
 pretium, ipse promissor, & præmium, qui
 est vita hominum, & perennitas Angelorum.
 Hunc si in exedra tui pectoris diligenti cura
 recon-


recondideris, in illum quoque omnem cujus-
cunque necessitatis sollicitudinem projicies.
Et dum in ipso per assiduæ orationis collo-
quium delectaris, atque te vigilibus sancta-
rum cogitationum epulis reficis, ipse tibi
cibus est, & indumentum. Quod si nihilo-
minus cujusdam commodi exterioris indi-
geas, nihil hæsites, nihil de ejus fida pro-
missione diffidas, qua pollicetur, dicens :
Primum quærite Regnum Dei, & hæc om-
nia adjicientur vobis. Qui enim sitientibus
Israëliticæ plebis agminibus ex illo aridæ me-
tallo rupis uberes aquarum rivos jussit affue-
re, quique esurientibus cæleste manna per
annosa temporum potuit spatia ministrare ;
uni homuncioni suis jugiter obsequiis insi-
stenti non poterit necessaria providere ? Nos
certe minimæ fidei, compellimus Christum
esse tenacem. Nempe pusillanimatorum diffi-
dencia facit pauperem Christum ; at plena
fides divitem illum, & largum experitur in
exhibendis muneribus. Satage tantum in
histe exercere, quæ jussit ; & nulla prorsus
ex his maneat dubietas, quæ promisit. Sis
securus exactor, ubi ad reddendum promp-
tus est debitor. Sine causa diffiditur, ubi
ille promissor est, qui nunquam mentitur.
securus creditor graditur, cum simplex ve-
ritas promissione tenetur.

PUNCTUM QUARTUM.

AN ergo, ô Religiosè ! affectum ad terre-
nam substantiam abjicis, ut veras divi-

tias, virtutes acquiras? plane dives fuit pauper ille Lazarus, qui post mortem suam meruit in sinu Abrahæ requiescere. An necessariis contentaris, ut veras divitias celestia bona obtineas? Beati pauperes Spiritu; quoniam ipsorum est Regnum cœlorum. An nullam sollicitudinem alicujus terrenæ substantiæ geris, ut veras divitias Christum possideas? Ecce! hic est Filius meus, in quo complacuit sibi anima mea. Dole, quod paupertatis divitias non agnoveris. Propone ad earum obtentum

1. Affectum ad terrenam substantiam eradicare,
2. Necessary contentari,
3. Nullam sollicitudinem pro victu, aut amictu gerere.



DIES VII.

De Amore Cellæ, & S. Solitudinis.

Solus sit. Cap. 25. v. 3.

PUNCTUM PRIMUM.

Quantum Ss. Pater Solitudinem amaverit, patet ex eo, quod in tenera ætate ad eam se contulerit, diu in ea manserit, atque cellam suam diligentissime incoluerit. Ecce enim Riggo, Totila eum in cella offendunt, nec voluit Ss. Pater ad designationem ædifi-

can-

eandi novi Monasterii cellam relinquere, sed in somno Præposito apparuit, atque singula loca designavit. Unde & nobis summopere cellæ, ac solitudinis amorem commendat; dum ait: *solus fit.* Et quis cellam non amet? Cella enim est spiritualis exercitii mirabilis officina, in qua certe humana anima Creatoris sui in se restaurat imaginem, & ad suam redit originis puritatem. Ibi sensus obtusi ad subtilitatem sui acuminis redeunt, & vitiata naturæ azyma sincere reparantur. Ipsa dat, ut jejuniis videantur ora palentia, & mens divinæ gratiæ sit pinguedine saginata. Ipsa dat, ut homo mundo corde conspiciat Deum, qui suis involutus tenebris seipsum ignorabat. Ipsa hominem facit ad suum redire principium, & de exilii ejectione ad antiquæ dignitatis revocat celsitudinem. Ipsa facit, ut homo in mentis arce constitutus cuncta sub se videat terrena defluere, semetipsum quoque in ipsarum rerum labentium prospiciat decursione transire.

PUNCTUM SECUNDUM.

Solus fit. Quis cellam non amet? Cella est sacræ militiæ tabernaculum, procinctus triumphatoris exercitus, castra Dei, turris David, quæ ædificata est cum propugnaculis; mille clypei pendent ex ea omnis armatura fortium. Cella est campus divini prælii, spiritualis arena certaminis, Angelorum spectaculum: ubi Spiritus cum car-

ne congregitur, & fortis ab infirmitate non superatur. Fremat hostium circumfusa barbaries; qui in cella sunt, lorica fidei præmuniti sub Imperatoris sui invicta protectione tripudiant, & de hostium suorum dejectione jam certi triumphant. Quibus nimirum dicitur: Dominus pugnabit pro vobis, & vos tacebitis. Vel si unus est: Noli timere: plures enim nobiscum sunt, quàm cum illis. O solitudo mors vitiorum, & vita virtutum! in te agnoscuntur vitia, & vitiorum remedia, in te virtutes unice practicantur.

PUNCTUM TERTIUM.


Solus fit. Quis cellam non amet? Coelestis doctrinæ schola est, ac divinarum artium disciplina. Illic enim Deus est totum, quod dicitur; via, qua tenditur, per quam ad summæ veritatis notitiam pervenitur. Illic agnoscuntur Divinitatis mysteria, quæ non licet homini loqui. Illic veritatem Evangelicam penitus comprehendimus. Illic & totius vitæ, & mortis Christi notitiam obtenemus, & quidem non tantum eorum, quæ exterius gessit, sed & quæ intus in anima egit. Nemo vero ad tam sublimem veritatis agnitionem pervenit, nisi solitudinem amet. Nonne Moyses in solitudine cum Deo loquitur, & Divinæ veritatis oracula percipit? Nonne Elias in solitudine cognoscit pertranseuntem Dominum? Nonne Eliseus duplicem Magistri sui sortitur Spiritum in solitudine.

tudine? Nonne & Ss. Pater noster Creator-
rem primum vidit, quando solus in turri illâ
vigilabat & orabat?

PUNCTUM QUARTUM.

AN igitur, ô Religiose! cellam amas ad re-
staurandam imaginem Dei in animâ tuâ?
Solitudinem amare debet, quisquis Deo vi-
vere cupit. S. Thom. An cellam amas ad
superandos hostes tuos? Solitudo est præsi-
dium cedere nescientium propugnatorum.
S. Petr. Dam. An cellam amas ad cogno-
scendas æternas Veritates? Remotione con-
tinuâ illuminatur anima. Id. Dole, quod hu-
cusque cellam ita abhorrueris. Propone
eam amare

1. Ad restaurandam imaginem animæ tuæ,
2. Ad superandos hostes tuos,
2. Ad agnoscendam veritatem.



DIES VIII.

FESTIVITAS B. V. Mariæ sine labe
conceptæ.

De Felicitate B. V. sine labe conceptæ, &
animæ à concupiscentiis purgata.

Post concupiscentias tuas non eas. Cap.

7. v. 25.

Pun-

PUNCTUM PRIMUM.

O Immenſam Divinæ Bonitatis largitatem erga Beatiffimam Virginem Mariam! Gratiâ eam dotavit præveniente, quæ eam à peccato originali penitus exemit, ut anima ejus non priùs corpus animaverit, quàm charitas cor ejus repleverit. Hâc prærogativâ inter omnes puros homines ſola eminuit; quia Mater Dei fieri debuit. Tantâ enim puritate eam nitere decuit; quâ major infra Deum cogitari non poſſet. O quanta eſt iſta felicitas B. Virginis! ut hanc cognoscas, cogita, ſomittem peccati originalis, quot mala, & peccata poſt ſe trahat. Vix enim concepti ſumus, jam cum Prophetâ ingemiſcere debemus: ecce enim in iniquitatibus conceptus ſum, & in peccatis concepit me mater mea. Et licet ſacro Baptiſmate regeneremur, tamen remanet fomes peccati, unde ſemper ad malum exſtimulamur. Niſi ſemper ſpiritus cum carne congrediatur, eamque rationi ſubjiciat, de uno ad aliud peccatum impellimur. Quàm felix autem eſt & anima, quæ ad mentem ſanctiſſimi Patris *poſt concupiſcentias ſuas non it?* Saltem à peccato actuali cuſtoditur.

PUNCTUM SECUNDUM.

Beatiffima Virgo non ſolùm à peccato originali exempta eſt à Filio; ſed etiam tanta ei gratia collata eſt, ut omnem Angelorum,

rum, & hominum charitatem transcendit. Fundamenta quippe ejus in montibus sanctis; diligit Dominus portas Sion super omnia tabernacula Jacob. In vertice sanctitatis Angelicæ, & humanæ fundata est sanctitas Mariæ. Et plùs Deus dilexit initium sanctitatis illius, quàm consummationem perfectionis aliorum. Et ô quàm integrè huic gratiæ correspondebat? Quàm perfectè ejus instinctum secuta est? Nullum impedimentum sensit à fomite peccati originalis. Quid enim nos magis impedit, quàm concupiscentia, ne divinæ gratiæ obtemperemus? Ipsa mentem obscurat, ne eam agnoscat. Voluntatem debilitat, ne eam sequatur. Quàm felix autem est anima, quæ adhortationi Ss. Patris obaudit, ut *post concupiscentias suis non eat*; sic enim & ipsa ad exemplum sine labe conceptæ Virginis gratiæ instinctum vel à longè sequetur.

PUNCTUM TERTIUM.

BEatissima Virgo non solum à peccato originali exempta est à Filio; sed etiam ei tanta gratia concessa est, ut eam jugiter adaugeret. Sicut enim servus ille Evangelicus talenta sua multiplicata Domino suo restituit; ita & B. Virgo gratiam incessanter multiplicavit. Non fuit ei impedimento fomies peccati; quin non ex omni virtute gratiæ cooperaretur. At nos miseri, quod tot gratias negligamus, nonne in culpa est; quia
con-


concupiscentias nostras sequimur? Quàm felix illa anima, quæ Ss. Patrem nostrum sequitur; dum ait: *Post concupiscentias tuas non ens*; hōc enim modō faciliter ad imitationem B. V. Gratiæ sibi collatæ mensuram adimplebit. O dulcissima Virgo Maria! gratulor tibi ex intimō cordis affectu ad gratiam tuam, quā Deus tam mirabiliter te prævenit, ut te à peccato originali, ejusque fomite, atque ab omni post mortem corruptione exemerit. Eja! piissima Virgo, & Mater recipe me in filium per istam gratiam tuam, & per immaculatam tuam conceptionem munda cor, & corpus meum à concupiscentiis malis, quatenus peccata actualia fugiam, gratiæ instinctum sequar, & eandem semper adaugeam. Amen.

PUNCTUM QUARTUM.

AN non ergo, ô Religiose! post concupiscentias tuas non ibis, ne in peccata actualia incidas? sensus, & cogitatio humani cordis in malum prona sunt ab adolescentiâ suâ. An non post concupiscentias tuas non ibis, ut gratiæ instinctum sequaris? Nonne si benè egeris, recipies: sin autem male, statim in foribus peccatum tuum aderit; sed sub te erit appetitus ejus, & tu dominaberis illi. An non post concupiscentias tuas non ibis, ut mensuram gratiæ tuæ adimpleas? Dico autem; spiritu ambulate, & desideria carnis non perficietis. Dole, quod secundum con-

cupiscentiam potiùs, quàm gratiam vixeris.
Propone post concupiscentias tuas non ire,

1. Ne in peccata actualia incidas,
2. Ut instinctum gratiæ sequaris,
3. Ut eandem semper adaugeas.



DIES IX.

Quod post lapsum mox resurgen-
dum sit.

Exurgamus ergò excitante nos Scripturâ, ac
dicente; hora est, jam nos de somno sur-
gere. Prolog. §. 2. v. 6.

PUNCTUM PRIMUM.

NE diu in peccato persisteremus, sive ex
fragilitate, sive ex malitiâ in peccatum
lapsi essemus; Ss. Pater noster graviter nos
hortatur: *exurgamus ergò excitante nos Scri-
pturâ, ac dicente: hora est, jam nos de somno
surgere.* Exurge, ait, exurge, quæso, exper-
giscere, ô homo, qui peccati sopore depri-
meris: revivisce tandem, qui lethali coram
inimicis tuis gladio corruisti. Adest Aposto-
lus Paulus; audi, audi illum vociferantem,
pulsantem, concutientem, clarisque super te
vocibus inclamantem: exurge, qui dormis,
& exurge à mortuis & exsuscitabit te Chri-
stus. Qui Christum resuscitatore[m] audis,
cur

cur de tua resurrectione diffidis? Audi ex ore ipsius: qui credit in me, etiam si mortuus fuerit, vivet. Si vita vivificatrix te quærit erigere, tu cur ulterius feras in tua morte jacere? Cave, cave, ne te barathrum desperationis absorbeat. Mens tua fiducialiter ex divina pietate præsumat, ne pro magnitudine criminis obdurescat. Non enim est peccatorum desperare, sed impiorum: nec magnitudo criminum in desperationem adducit animam, sed impietas. Si enim tantum potuit Diabolus, ut te in vitii profunda demergeret; quanto magis te virtus Christi poterit ad eum, de quo lapsus es, verticem revocare? Exurge ergo qui dormis, & illuminabit te Christus.

PUNCTUM SECUNDUM.

Exurgamus ergo excitante nos Scriptura, ac dicente; hora est, jam nos de somno surgere. Exurge, exurge, quæso, ait Ss. Pater tuus, qui in peccato obdormisti! ecce! misericordia Dei te invitat. Cecidit asinus carnis tuæ in luto sub pondere; est stimulus poenitentiae, qui pungat; est manus spiritus, quæ viriliter extrahat. Vide! Samson ille fortissimus; quia malè blandienti mulieri secretum sui cordis aperuit, non solum septem crines, quibus virtus alebatur, amisit; sed etiam præda factus Allophylis oculos perdidit: postmodum vero capillis jam renascentibus, Domini Dei sui auxilium humiliter

liter petiit, templum Dagon stravit, & multo majorem, quam prius hostium multitudinem interemit. Si ergo Dæmon, caro, aut mundus te decepit, si septem dona Spiritus sancti abstulit, si lumen cordis extinxit, non concidas animo, noli funditus, desperare, adhuc te in vires collige, fortia tentare præsume, & sic per misericordiam Dei de inimicis tuis poteris triumphare. Cogita infinitam Dei misericordiam erga peccatores. Pharaonem impoenitentem quoties Dei misericordia ad poenitentiam revocavit? quam dulciter suscepit humiliatum Achab? Ad quantum sanctitatis gradum provexit Petrum, Mathæum, & Magdalenam? Quam pie Paradisum promisit poenitenti Latroni? Exurge ergo, qui dormis, & illuminabit te Christus.

PUNCTUM TERTIUM.

E*xurgamus ergo excitante nos Scriptura, ac dicente; hora est jam nos de somno surge-
re.* Exurge, exurge, quæso, instat Ss. Pater tuus, qui dormis adhuc in peccato. Audi terribiliter vociferantem Dei justitiam: Terribile est incidere in manus Dei viventis. Quot, qui converti tardarunt, post primum peccatum ad tartara misit? Quot, qui divinas inspirationes ad poenitentiam excitantes neglexerunt, in peccato suo mori permisit? Quot, qui converti usque ad mortem distulerunt, ad majorem eorum damnationem peccata peccatis adjicere sivit? O quam ter-

Spir. S. Ben. P. IV.

Q

ribi-

ribiliter divinæ justitiæ gladius sævit in peccatores? In igne zeli Domini devorabitur omnis terra, & in gladio ejus omnis caro. Ut quid ergo moraris converti? ut quid in peccato vel ad momentum perduras? Qui hoc momentum tibi ad pœnitentiam concedit, forsân alterum divinæ justitiæ reservavit. Exemplo tibi sit ille Eremita, qui cum multis virtutibus cum suo quodam collega Deo deservisset, hæc illi per diabolum injecta clades est: ut quandocumque libidine titillaretur, consentiret. At miserum! ob hoc dæmonibus moriens, vidente socio, traditus est. O quis exclamat hic virtutum ejus exercitia recolens, ô quis poterit salvus fieri? Quomodo iste periit? Cui mox Angelus: Ne turberis; iste enim, licet multa fecerit, per unam immunditiam cuncta scdavit. Exurge igitur, qui dormis, & illuminabit te Christus. Exurge, ne tenebræ mortis te comprehendant. Exurge, ne incidas in manus Dei viventis.

PUNCTUM QUARTUM:


AN ergo, ô Religiose! statim post lapsum surgis; quia ad pœnitentiam te invitat Christus? Nunquid, qui cecidit, non adjiciet, ut resurgat? An statim post lapsum resurgis; quia misericordia Dei te ad pœnitentiam vocat? Nolo mortem peccatoris, sed ut magis convertatur, & vivat. An post lapsum mox resurgis; quia divina justitia te excitat? Exacuam velut fulgur gladium meum. Dole,

quod

Quod post lapsum mox resurgendum sit. 243

quod & tu sæpiùs tardes à lapsu resurgere.
Propone statim pœnitentiam agere

1. Ob vocantem Christum,
2. Ob excitantem misericordiam,
3. Ob minitantem Justitiam.



DIES X.

Quomodo quivis attendere debeat sibi
ipsi ne in peccatum incidat.

Custodiens se omni hora à peccatis, & vitiis,
Cap. 7. v. 11.

PUNCTUM PRIMUM.

UT ad vigilantem nostrarum curam anima-
rum nos incitaret Ss. P. N., quemvis ad-
hortatur, ut *custodiat se omni hora à peccatis,
& vitiis.* Ex mente nempe S. Spiritus lo-
quitur: attende tibi ipsi, ne quando fiat ver-
bum occultum in corde tuo, iniquitas. Quot
enim cogitationes in corde exsurgunt, qui-
bus ni restiteris, mox fiunt in peccatum?
Quot Imaginatio species effigiat, quas ni re-
presseris, statim fiunt in peccatum? ubi igitur
ad peccandum proclivior via est, ibi cau-
tio prærogata sit celerior? En! ipsa anima-
lia bruta ad conservandam naturæ suæ sub-
stantiam noxia sollicitè fugiunt, & econtra
profutura sibi seligunt. Quanto magis tu,

Q 2

cum

cum sis ratione præditus, & divinis eruditus præceptis, peccatum ceu venenatum pabulum averfaberis, & justitiam ceu edules herbas confectaberis? Attende proinde continua cura tibi ipsi, tuis cogitationibus, tuæ voluntatis desideriis, ut noxia mox submoveas, & bona semper foveas. Per medios enim laqueos ingrederis, ab inimico nullo non loco laquei defixi sunt.

PUNCTUM SECUNDUM.

C*ustodiat se omni hora à peccatis, & vitiis.*

Attende tibi ipsi, nequando verbum occultum fiat iniquitas. Attende tibi ipsi, hoc est, non tuis, non iis item, quæ circa te sunt, sed tibi ipsi, & soli attendito. Ipsi enim nos, & aliud sumus, & aliud nostra sunt, aliud item, quæ circa nos conviſuntur. Sane sumus nos & anima, & animæ mens, quatenus ad conditoris nostri imaginem sumus facti. Nostrum autem corpus est, & qui per seipsum suum munus obeunt, sensus. Circa nos sunt divitiæ, artes, & reliqua vitæ suppellex, atque apparatus. Quid igitur Spiritus sanctus, & quid ex eo Ss. Pater tuus tibi præscribit! Attende, non carni, sed neque immodico studio confecteris ejus commoditatem, puta sanitatem, multifariam voluptatum fruitionem, neque divitias, nec gloriam, & dignitatis amplitudinem admirare. At ne tu quæcunque tandem vitæ istius temporariæ subsidia tibi suppeditant uberius, tanti esse dixeris,

ris, ut præ horum studio, & anxia sollicitudine, præcipuam vitæ tuæ portionem aspernare, & negligas. Nam corpus est mortale, anima vero immortalis est. Carnis vita, & omnia ei conjuncta celeri cursu prætercurrunt; animæ autem vita est immortalis, & omnia ei cognata nullam admittunt circumscriptionem. Attende igitur tibi ipsi, hoc est, animæ tuæ, ne aliquid ex sensibus, aut externis rebus fiat ei in peccatum.

PUNCTUM TERTIUM.

C*ustodiat se omni hora à peccatis, & vitiis.*
Attende tibi ipsi, ne verbum occultum fiat iniquitas. Ut strenuus pugil ipse habeto animæ oculum nusquam evagantem, sed sibi attentum, ac pervigilem. Premuni, ac tuere passis manibus partes, quarum plaga lethalis sit. Ne sis animo dormituriienti, ut ad instar juvenum de die somnies, atque varias tibi ipsi fingas cogitationes. Ipsi enim ædes possident luculentas, divitias multas, voluptates maximas, vanitates innumeras, quantas vanissima eorum cogitatio capere potest. Ne ejusmodi otiosis, vanis cogitationibus animam tuam impleas. Otiosæ prorsus, & cessantis animæ propria hæc est ægritudo, cernere insomnia vigili corpore. Hanc remissæ mentis laxationem, tumorem, ac vanitatem cogitationum comprime. Tibi ipsi attende, ne verbum istud occultum fiat iniquitas. Si enim de omni verbo otioso homines redditu-

ri sunt rationem nunquid & rationem reddent de cogitatione otiosâ, vana &c.

PUNCTUM QUARTUM.

AN igitur, ô Religiose! custodis omni horâ animam tuam, ne cogitatione malâ, aut desiderio perverso peccet? De corde exeunt malæ cogitationes. An custodis omni hora animam tuam, ne per sensus, aut res externas peccet? Nonne anima plus est, quam esca? An custodis omni horâ animam tuam, ne vanis, vel otiosis cogitationibus peccet? De omni verbo otioso, quod locuti fuerint homines, reddent rationem. Dole, quod hucusque tibi ipsi non rite attenderis, ne peccares. Proponere animæ tuæ soli attendere,

1. Ne per malas cogitationes, aut desideria peccet.
2. Ne per sensus, aut res externas peccet.
3. Ne per otiosas, vanas &c. cogitationes, vel desideria peccet.



DIES XI.

Quomodo in congregatione vivendum sit,

Zelum ferventissimo amore exercent Monachi. Cap. 72. v. 3.

Pun-

PUNCTUM PRIMUM.

Nullo plane capite S. Regulæ Ss. Pater modum bene vivendi in congregatione pulchrius delineat, quam penultimo, dum ait; *Zelum ferventissimo amore exerceant Monachi.* Hoc enim capite describit; qualiter se quis habere debeat erga seipsum in omni conversatione suâ, scilicet, ut *Deum timeat.* Ordinabiliter quippe vivit, qui in omni conversatione sua sollicitus est observare vias suas, & in conspectu Domini, & in conspectu proximi; cavens & sibi à peccato, & illi à scandalo. Semper talis levat se super se; quia semper ad illum respicit, qui est super se, ut taceat à strepitu diabolicarum suggestionum, à strepitu carnalium desideriorum, à strepitu mundi. Timet equidem Deum offendere, qui est super se, & contemnentes Deum permittit incidere in gehennam. Semper talis curat, ne quo peccato proximum suum scandalizet; quia semper auribus ejus insonat terribile illud Salvatoris edictum; vae homini, per quem scandalum venit! O quam ordinate ad se in omni loco, & tempore ambulat coram Deo & hominibus, qui sic timet Dominum!

PUNCTUM SECUNDUM.

Hunc *zelum ferventissimo amore exerceant Monachi* erga proximos suos, ut *infirmos sive corporum, sive morum patientis.*

simè tolerant. Sociabiliter equidem vivit, qui studet supportare non solum patienter, sed & libenter infirmitates fratrum; qui studet blandiri se, & affabilem omnibus exhibere; qui studet amari, & amare. O quam dulcis, jucunda, & bona est talis societas! verè Paradisus est, in quo Angeli terrestres habitant, & torrente voluptatis ex mutuâ charitate potantur. At in hoc Paradiso non versantur illi filii Adam, qui erraverunt in solitudine in inaquoso. Erraverunt planè, & errant à via veritatis, qui in solitudinem superbiæ recedentes, socialem vitam habere nolunt, pati, amare, & amari recusant, quorum singularitas associari non potest. Sed & in aquoso: quia nullo torrente divinæ consolationis irrigati in terra sterili, & arenti perpetua siccitate morantur. Propterea viam civitatis habitaculi in pace non invenerunt: quia inveterati in terrâ alienâ per aversiones coinquinati sunt cum mortuis, deputati sunt cum his, qui in inferno sunt. Ah Domine eripe me ab hoc inferno!

PUNCTUM TERTIUM.


Hunc *zelum ferventissimo amore exerceant Monachi erga Deum, ut amoris Christi omnino nihil præponant.* Verè enim diligit Deum, qui omnia ejus mandata observat, & nihilominus humiliter coram Deo conversatur. Hæc enim omnia cum fecerit, continuo studet spiritum vanitatis exsufflare, qui ex
hu-

hujusmodi nasci solet: & quantumcunque illum senserit, negat omnino consensum. O quantum placet ejusmodi humilis, & amorosa conversatio ad Deum! talem humilem Deus protegit, exaltat, ut pupillam oculi sui custodit, ne unquam offendat ad lapidem pedem suum; mutat fortitudinem ejus, ut de die in diem magis in amore crescat.

PUNCTUM QUARTUM.

AN igitur, ô Religiose! ordinabiliter conversaris tecum? Beati, qui timent Dominum. An sociabiliter conversaris cum fratribus? Ecce! quam bonum, & jucundum habitare fratres in unum. An humiliter conversaris cum Deo? Non autem ego, sed gratia Dei mecum. Dole, quod istum modum vivendi in Congregatione non observaris. Propone

1. Ordinabiliter tecum,
2. Sociabiliter cum proximis,
3. Humiliter cum Deo conversari.



DIES XII.

De Exemplis Charitatis fraternæ.

Charitatem fraternitatis casto impendant
amore. Cap. 72. v. 8.

PUNCTUM PRIMUM.

Verba quidem Ss. Patris nostri, *charitatem fraternitatis casto impendant amore*, ad dilectionem movent; sed exempla dulcissimæ illius in Fratres charitatis ad eandem fortiter trahunt. Quis enim non libenter inimicos Fratres supportet, qui recogitat, quo amore Ss. Pater suus Fratribus veneno illum extinguere conantibus veniam tribuerit, ac indulgentiam: misereatur vestri Fratres? Planè cor saxo durius habeat, qui illum non sequatur. Quæ enim bona dilectio ista ei non contulit? Nonne remissionem plenam peccatorum? si quibus maculatus extitit. Dimittite, & dimittemini. Nonne gratiam? Ille veraciter charitatem habet, qui amicum diligit in Deo, & inimicum propter Deum. Nonne nominis, & Ordinis sui splendorem? Multi ab eo ad omnipotentis Dei servitium sunt congregati, ita, ut pro uno duodecim Monasteria cum omnipotentis Jesu Christi Domini opitulatione gubernaret. Nonne regnum cœlorum? Beati, qui persecutionem patiuntur propter justitiam; quoniam ipsorum est regnum cœlorum.

PUNCTUM SECUNDUM.

Fortiter quidem verba ista Ss. Patris nostri, *charitatem fraternitatis casto impendant amore*, ad charitatem movent, sed fortius trahunt ejus exempla. Quis enim non libenter do-

do'entes in anima, & corpore consolabitur, dum cogitat, quod Ss. Pater suus eunte Dæmone ad tentandos Fratres pro ipsis orat, & vexatum ab eodem malo genio Monachum alapa sanum reddit? Sane magna charitas est, dolentem consolari. Quid enim in tribulatione siue interna, siue externa magis optamus, quam solatium? Unde qui tribulatio solatium impendit, etsi à malo penitus illum non liberet, tamen mirum in modum tribulationem ejus subleuat, juvat onus ejus portare, atque in patientia eum confortat. Verè, quod uni ex minimis hisce solatium impendisti, Christo impendisti. Vide igitur quo charitatis fervore deinceps omnes desolatos consolaris,

PUNCTUM TERTIUM.


VEhementer verba ista Ss. Patris nostri, *charitatem fraternitatis casto impendant amore*, cor ad charitatem movent, sed exempla illius vehementius ad imitationem trahunt. Quis enim recogitet, quod Ss. Pater suus ad orationem simul cum fratribus stet, & ad labores agri exeat, & ad portanda communia fratrum onera non excitetur? Equidem charitatis dilectio est operis exhibitio. Nam non solum lingua, sed opere, & veritate diligendus est proximus. Unde & recte Doctor dilectionis ait? quod *major merces, & charitas acquiritur* è communibus fratrum ministeriis. Charitas quidem; quia
teste

teste ipsa veritate vera dilectio est; si, quæ vultis, ut faciant vobis homines, & vos illis facitis. Merces autem; quia sic non solum implet, sed adimplet legem Christi. Lex etenim Christi ut S. Gregorius asserit, quid congruentius intelligi, quam charitas potest! Quam tunc verè perficimus, cum fraterna onera ex amore toleramus. Sequere ergo Ss. Patrem tuum, & charitas tua, & merces tua erit magna nimis.

PUNCTUM QUARTUM.

AN igitur, ô Religiose! ad exemplum Ss. Patris tui inimicis fratribus libenter ignoscis? Benefacite his, qui oderunt vos. An ad exemplum Ss. Patris tui dolentes in anima, & corpore consolaris? Educes de tribulatione animam meam, & in misericordia tua disperdes inimicos meos. An ad exemplum Ss. Patris tui communia fratrum ministeria obis? Alter alterius onera portate. Dole, quod ad tanta charitatis exempla nondum veraciter diligas confratres tuos. Propone ad Ss. Patris tui exempla

1. Inimicis fratribus ignoscere.
2. Dolentes in anima, & corpore consolari.
3. Communia ministeria exacte obire.



DIES XIII.

De Negligentiis in Horis canonicis.

Iners devotionis suæ servitium ostendunt
Monachi. Cap. 18. v. 26.

PUNCTUM PRIMUM.

I*Iners* ut Ss. Pater ait, *devotionis suæ servitium ostendunt Monachi*, qui absque præviâ præparatione accedunt ad horas canonicas. Necesse enim est, ut mens inter orandum eadem ruminet, quæ ante orationem cogitavit. Si namque cogitationes bonæ, cum fuerint ante in corde nostro conceptæ per memoriam Scripturarum, aut per recollectionem spiritualium actuum, aut certe per intuitum cœlestium Sacramentorum, adhuc tempore orationis quasi imperceptibiliter fugiunt, elabuntur, & protinus evanescent; qualiter cogitationes bonas retinebit, qui de his ante orationem nunquam cogitavit? Totus distractus accedit, totus distractus orat, totus distractus recedit. Sine fervore accessit, sine fructu, sine gustu recedet. An non iners valde hoc servitium devotionis est, cui maledixit Dominus; quia totum negligens, & tepidum est.

PUNCTUM SECUNDUM.

I*Ners devotionis suæ servitium ostendunt Monachi*, qui voluntariis distractionibus in horis canonicis occupantur. Et unde ista inertia? Solitudine rerum carnalium pleni sunt. Fervent ad sua externa negotia, & ad spiritualia exercitia tepent. Variis animi passionibus turbantur. Nunc tristitia, nunc lætitia inordinata exuberant. Non potest in hoc statu mens aliud cogitare, aut desiderare, quam quo cor ejus plenum est. Ubi enim Thesaurus tuus, ibi & cor tuum; & ubi cor tuum, ibi & cogitatio tua est. An non autem iners hoc devotionis servitium est, eo tempore Deum offendere, quem ad placandum, & exorandum pro tuis, totiusque Ecclesiæ necessitatibus venisti? Tu ergo cohibe cogitationes lubricas per memoriam divinæ præsentiae, & Ss. Angelorum, & ante omnia vitia & inordinatas passiones eradicare, atque virtutes implantare satage. Sic & non aliter stabilis in oratione perseverabis.

PUNCTUM TERTIUM.

I*Ners devotionis suæ servitium ostendunt Monachi*, qui non mente, & spiritu psallunt. Quomodo enim Deus illos audiet, qui seipsos non audiunt? Quomodo Deus inclinabitur ad illorum preces, qui nullo affectu ad ipsum feruntur? ^{parvo} Planè non orat, qui cogitationem & affectum suum ad Deum non ele-

elevat. Nunquid & hoc iners devotionis servitium est? Sed tu emenda te. Sequere illos antiquos Patres, qui ita absorpti in Deum psallebant, ut jam non Prophetæ verba, sed propria enunciarent. Ita fervide psallebant, ut cogitatio, & affectus ipsorum constanter Deo adhereret. Ita divinis intenti mysteriis psallebant, ut Angeli potius, quàm homines viderentur. O qui ita psalleret, quantas quotidie gratias à Deo pro se, & totâ Ss. Ecclesiâ obtineret! at prò dolor; quia in divinò servitiò toti inertes sumus, quot gratias & nobis, & aliis perdimus? Quàm strictam istarum negligentiarum rationem reddemus? utiquè officium nostrum est, puram Deo orationem offerre.

PUNCTUM QUARTUM.

AN non & tu, ô Religiosè! sine præparatione accedis ad orationem: Ante orationem præpara animam tuam, & noli esse quasi homo, qui tentat Deum. An non & tu distractè oras: Noli esse unus de populo, qui labiis Deum honorat, & non corde. An non & tu sine affectu oras: Maledictus homo, qui facit opus Dei negligenter. Dole, quòd etiam tuum devotionis servitium hucusque totum quantum iners fuerit. Propone

1. Ante orationem animam tuam præparare,
2. Sensui Psalmorum duntaxat attendere,
3. Ex proprio affectu Psalmos decantare.

DIES



DIES XIV.

Quod lingua tribus seris sit mun-
nienda,

Multum loqui non amare. Cap. 4. Inst. 53.

PUNCTUM PRIMUM.

NE multum loqui ames ad mentem Ss. Pa-
tris tui, pone custodiam ori tuo. Prima
sera sit deliberatio mentis, ut sine hac nun-
quam loquaris. Scriptum enim est: Os iusti
meditabitur sapientiam, & lingua ejus loque-
tur iudicium. Loquitur namque iustus iudi-
cium pro eò, quòd omnia rectò iudiciò, &
cum deliberatione, & cum consiliò loquitur.
Hinc nihil loquitur ex præcipitantiâ, nihil
per iracundiam, nihil per arrogantiam, nihil
ut hominibus placeat, nihil ex tristitiâ, nihil
ex metu, nihil ex lætitiâ; quia singula ista
solent utique non integrum hominibus ser-
vare iudicium. Lex etenim Dei ejus in
corde ipsius ut velut radix quædam in cor-
de iusti posita germinet verba justitiæ, verba
veritatis, verba sanctitatis. O qui ita cum
deliberatione loqueretur, certè nec multum,
nec malum, nec otiosum, nec offensivum
loqui amaret!

Pun-

PUNCTUM SECUNDUM.

NE multum loqui ames, altera sera linguæ tuæ sit, ut non loquaris nisi ex obedientia, aut præsumpta voluntate Superioris. Unde Ss. Pater ait: *Monachus taciturnitatem habeat usque ad interrogationem.* Et hoc Ss. Patris tui præceptum libenter custodies, si damna multiloquii rite consideraveris. Peccatum enim, quod per linguam admittitur, omnium fere propensissimum, sed & idem multiforme. Iratus es? Mox lingua occurrit. Concupiscentia teneris? Habes & hic linguam ante omnia quasi lenam, & conciliatricem, quæ cooperetur peccato, quæ per simulationem proximis imponat. Est tibi lingua quoque vice scuti ad iniquitatem, cum non ex corde loquitur, sed ea promit, quæ ad fraudem faciunt. Denique quid opus commemorare, quæ per linguam peccentur? Vita nostra referta est linguæ delictis. Ne igitur iram tibi in die Domini thesaurizes, prohibe linguam tuam à multiloquio; quia non effugies peccatum. Trade clavem linguæ tuæ Superiori, & non offendes verbo.

PUNCTUM TERTIUM.

NE multum loqui ames, tertia sera linguæ tuæ sit recta intentio, ut cunctis tuis sermonibus tum puram intentionem, tum devotam in corde orationem præmittas.

Spir. S. Ben. P. IV.

R

Ora-

Orationem quidem; quia sine adjutorio Dei lingua tam lubrica retineri intra claustrum non potest. Dic ergo cum Propheta: Domine labia mea aperies, & os meum annuntiabit laudem tuam. Intentionem vero; quia lingua alium in finem utendum est, nisi ad quem data est. Et quis iste finis est? Utique laus Dei. Ad hanc quippe solum Deus aperit os justorum. Unde Dominus Moyfi dixit: Ego aperiam os tuum, & instruam te, quæ oporteat te loqui. Beati, quorum os Deus aperit, ut loquantur. Aliud loqui non possunt, quàm verba Dei, & ad laudem Dei. Miseri autem sunt quorum os Diabolus aperit. Aliud non loquuntur, quàm verba malitiæ, & ad contemptum Dei. Væ his, qui spernunt, nonne & spernentur.


PUNCTUM QUARTUM.

AN ergo, ô Religiose! custodis os tuum à multiloquio, ut sine deliberatione nihil loquaris? Qui inconsideratus est ad loquendum, sentiet mala. An custodis os tuum à multiloquio, ut sine voluntate Superioris non loquaris? Si quis putat se Religiosum esse, non refrænans linguam suam, hujus vana est Religio. An custodis os tuum à multiloquio, ut absque præmissa oratione, & recta intentione non loquaris? lingua mea meditabitur justitiam tuam, tota die laudem tuam Dole, quòd toties Deum lingua offenderis.

Pro-

Propone custodiam ori tuo ponere, multum loqui præcavere, atque

1. Sine deliberatione,
2. Sine expressa, aut tacita voluntate Superioris,
3. Sine præmissa oratione, & recta intentione nihil unquam loqui.



DIES XV.

Quod Religiosus debeat esse speculum bonorum operum.

Ut ædificentur. Cap. 47. v. 3.

PUNCTUM PRIMUM.

UTi Ss. Pater factus est speculum bonorum operum, ita & Filii ejus Patrem suum in hoc repræsentare debent. Et sicut Ss. Pater crebro ædificationem nobis commendat, v. 9. *ut ædificentur audientes*, cap. 47. v. 3; ita hanc doctrinam opere nos complere oportet. Etenim exemplum bonum, est causa conversionis multorum. Nam ut ait beatus Job in persona peccatoris: instauras testes tuos contra me, & multiplicas iram tuam, & poenæ militant in me. Testes suos contra peccatorem Dominus instaurat; quia bona, quæ facere ipse negligit, hæc ad correptionem ipsius fieri ab aliis demonstrat, ut qui præceptis non accenditur, saltem exemplis

R. 2. exci-

excitetur, atque in appetitu rectitudinis nil sibi mens ejus difficile æstimet, quod perfecte peragi ab aliis videt. Et sit plerumque, ut cum alienæ vitæ bona conspicit, sua sollicitus damna timeat, defleat, emendet. Hinc quoque pœnæ militant in eo; quia dum miranda proborum facta conspicit, vitam suam, quæ ex eorum sibi comparatione displicet, studiosa semper afflictione cruciat, donec à peccatis suis ad Deum penitus convertatur. Vide ergo quantam obligationem habéas, ut peccantem mundum ædifices; quia per sacram Professionem spectaculum factus es Deo, & Angelis, & hominibus. Quantam damnationem tibi mundus procurabit, quando nulla bona opera se apud te vidisse testificabitur!

PUNCTUM SECUNDUM.

UT *ædificentur*. Exemplum bonum est causa perfectionis in multis. Habet enim unumquodque propositum suos principes, quos si secutus fueris, ad perfectionem infallibiliter pertinges. Habent namque Episcopi; & Presbyteri in Exemplum Apostolos, & Apostolicos viros, quorum honorem possidentes, habere nitantur & meritum. Habent Monachi sui instituti Principes Paulos, & Antonios, Julianos, Hilariones, Macarios, & eos, qui habitabant in agris, & solitudinibus, & faciebant sibi tabernacula juxta fluentia Jordanis. Et hos, quot non
secul-

secuti, optatam perfectionem assecuti sunt? Vim magnam etenim habet exemplum bonum. Trahit etiam nolentes. Hinc de sancto Ephrem sanctus Gregorius ait: nullus erat tam impudens, qui non intuens eum, rubore perfunderetur, seque ipso melior, & modestior fieret. Vide igitur, ut & tu tale speculum sis confratribus tuis, ut non solum in omni perfectione S. Regulæ eis præluceas, sed & eos fortiter ad eandem obtinendam tuo exemplo trahas. Hoc enim præceptum Domini est: luceat lux vestra coram hominibus, ut videant opera vestra bona, & glorificent Patrem vestrum, qui in cœlis est. O quam acriter te accusabunt juniores fratres, quod ex operibus tuis proficere non potuerint!

PUNCTUM TERTIUM.

UT *ædificentur.* Exemplum bonum est causa multarum coronarum. Quoniam si virtutem exercueris, facile videntes te homines ad similem virtutem incumbent. Quotquot autem ad opus pietatis tuo exemplo pertraxeris, tot tibi fabricabis coronas in cœlis. Etenim si justus Dominus sempiternum vix scandalizanti ingeminat, & misericors retributor augebit incrementa frugum justitiæ illi, qui proximum suum in bono, & ad bonum ædificaverit. Vide proinde, ut verum virtutum speculum omnibus te exhibeas; quatenus coronæ tuæ in cœlis

jugiter increſcant. Ad hoc namque te hortatur, qui unicuique tribuet juxta opera ſua. O quantum dolebis, quòd augmentum gloriæ tuæ non ſtudioſius procuraveris !

PUNCTUM QUARTUM.

AN ergo, ô Religioſe ! ſpectaculum es mun-
do peccanti, ut convertatur ? Ab omni
ſpecie mala abſtinete vos. An ſpectaculum
es Religioni, ut omnes in ea meliora chariſ-
mata æmulentur ? Vos eſtis lux mundi. An
ſpectaculum es omnibus hominibus, ut co-
ronæ tuæ in cœlis multiplicentur ? Qui fe-
cerit, & docuerit, hic magnus vocabitur
in regno Cœlorum. Dole, quòd defectu
bonorum operum nec mundo, nec Religio-
ni ædificationi hucusquæ fueris. Propone
omnes homines ædificare

1. Ad conversionem peccatorum,
2. Ad perfectionem iustorum,
3. Ad multiplicationem præmiorum.



DIES XVI.

De Sepulchro.

Mortuum sepelire. Cap. 4. Instr. 17.

PUNCTUM PRIMUM.

Merito Ss. Pater noster hortatur, *mortuum sepelire*. Nihil enim est utilius, quàm cre-

erebro meditari de sepulchro. Omnia vitia cogitatio sepulchri exterminat. Quomodo vitiis vacare poteris, si serio cogites, quod huic hodie, cras tibi idipsum continget? Quomodo superbire poteris, dum te in confratre cinerem, pulveremque esse aspicias? Quomodo invidiæ flammis inflammarier poteris, qui cernis omnia bona temporalia tam velociter à confratre fugisse? Quomodo luxuria incendi poteris, qui vides in confratre tam velociter omnem virorem humani corporis exaruisse? Quomodo gula titillari poteris, qui carnem confratris conspicias haud aliud esse, quàm escam vermium? Quomodo ira, aut odio moveri poteris, qui contemplaris omnem in confratre passionem tam subito sublatam esse? Verbo, vitium nullum est, quod non in cinerem, pulverem, nihilum abeat, quando sepulchrum serio cogitatur. An ista cogitas, cum mortuum sepelis?

PUNCTUM SECUNDUM.

Mortuum sepelire. Nihil sic facit præsens sæculum contemnere, quàm seria de sepulchro cogitatio. Quis vanitati, aut voluptati hujus mundi diutius inhæreat, quandoquidem omnia transitoria à defuncti cadavere penitus transisse conspicias? Nihil enim sic decipit genus humanum universim, quàm quod bona ista diutius possidere se posse autumet. At dum vanitatem, & brevitatem

eorum ex cineribus defuncti considerat, desipiunt ei omnia. & ea, quæ tam velociter transeunt, pro jam transactis habet. O qui ita sapienter tumulum suum consideraret certe nec vanitate, nec voluptate hujus mundi caperetur. Et tamen sapientis est, non tam cujuslibet rei initium, quàm finem, exitumque providere. Hunc ergo exitum mundanæ felicitatis cogita, quando mortuum sepelis, & à sæculi actibus te prorsus facies alienum.

PUNCTUM TERTIUM.


M*Ortuum sepelire.* Nihil sic ad virtutem excitat, quàm accurata, & vivax sepulchri meditatio. Quanto enim tempore in sepulchro jacere, atque ab omni opere bono cessare debemus? Nonne ergo instantè operandum nobis est, quidquid potest manus nostra, dum in hac luce sumus, ne tenebræ sepulchri concludant nos, & amplius bene mereri non valeamus. Inspice igitur sepulchrum, vide ibi mysteria, cerne dilapsam naturam, ossa corrosa, corpus putrefactum. Ubi fortitudo? An non omnia cinis! Nonne omnia pulvis?? Nonne omnia favilla? Nonne omnia vermis? Nonne omnia fætor? Hæc animo infere, dum mortuum sepelis, & virtuti præ omnibus, & unice studebis, quia sola manent tibi incorrupta ad gloriam.

Pun.

PUNCTUM QUARTUM.

AN ergo, ô Religiose! cùm mortuum sepelis confratrem, cogitas & sepulchrum tuum, ut vitiis moriaris? Memorare novissima tua, & in æternum non peccabis; an cùm mortuum sepelis, cogitas de sepulchro tuo, ut mundo moriaris? O Mors, quàm amara es homini, pacem habenti in substantiis suis. An cùm mortuum sepelis, cogitas de sepulchro tuo, ut ad virtutem exciteris? Currite, dum lumen vitæ habetis, ne tenebræ mortis vos comprehendant. Dole, quòd sepeliendo confratres tuos de futuro incolatu sepulchri tui nunquam, aut non serio cogitaveris. Propone serio tali occasione istud considerare,

1. Ut vitiis, &
2. Ut mundo moriaris, atque
3. Ut, ad virtutem exciteris.



DIES XVII.

De Adventu Domini nostri Jesu Christi.

Mittitur Angelus Gabriel ad Virginem desponsatam Joseph.

De Humilitate, qua B. Virgo se disposuit ad conceptionem Verbi.

Ad omnia, quæ sibi injunguntur, vult operarium malum, & indignum se judicet.

Cap. 7. gr. 4. v. 62.

R 5

Pun-

PUNCTUM PRIMUM.

Missus est Angelus Gabriel à Deo in civitatem Galilææ ad Virginem desponsatam Viro, cui nomen erat Joseph, de domo David, & nomen Virginis Maria. Et ingressus Angelus ad eam dixit: Ave gratia plena; Dominus tecum; Benedicta tu in mulieribus. Quæ cum audisset, turbata est in sermone ejus & cogitabat qualis esset ista salutatio. Ecce! turbatur Virgo superbenedicta in sermone Angeli; quia Angelicò se indignam & alloquio judicavit, & obsequio. O quanta est ista humilitas Virginis in tanta gratiarum sublimitate! prò? quàm longe ab ea distas? Nunquid & Ss. Pater tuus te hortatur, ut *ad omnia te indignum judices*? At quis se digniorem ad gratias supernaturales judicat, quàm tu te ipsum? Verùm cognosce peccata tua, quæ perpetrâsti; cognosce peccata, quæ adhuc dum tibi occulta sunt, sed in districto judicio Dei manifestabuntur; cognosce peccata, quæ ex pronitate tua ad malum singulis horis committeres, nisi Divina protectio te præservaret, & revera vilissimum te reputabis, & indignum omni Dei beneficio. Ipse tibi displicebis. Non nisi verberibus, & pœnis te dignum judicabis. Miraberis, quòd Deus tam vilem hominem, tam promptum ad omne malum, tam tardum ad omne bonum dignetur sibi in servum assumere. Hac autem tui cognitione iinitaberis

beris saltem à longe humilitatem Virginis. Per hanc cum illa exaltaberis. Ipsa enim teste S. Bernardo humilitate concepit Filium Dei.

PUNCTUM SECUNDUM.

Alt Angelus ei : ne timeas Maria, invenisti enim gratiam apud Deum. Ecce ! concipies in utero, & paries filium; & vocabis nomen ejus Jesum: hic erit magnus, & Filius Altissimi vocabitur, & dabit illi Dominus Deus sedem David Patris ejus, & regnabit in domo Jacob in æternum, & regni ejus non erit finis. Dixit autem Maria ad Angelum : quomodo fiet istud, quoniam virum non cognosco? Quò amplius exaltatur Virgo, eò amplius se deprimit. Audit se invenisse gratiam apud Deum; audit se invenisse, quod quærebat; audit se invenisse, quod nemo ante ipsam invenire potuit, Dei videlicet, & hominum pacem, mortis destructionem, vitæ reparationem: & nihilo minus indignam se tanta sublimitate æstimat, prætendebat virginitatem suam: quomodo fiet istud quoniam virum non cognosco? O quàm longe es ab hac Virginis humilitate? Nonne & Ss. Pater tuus te admonet, ut *ad omnia te indignum judices*? Verum cum laudaris, quàm avidè laudi tuæ intendis? Quàm cupidè honores ambis, & acceptas? Et quavis nulla laude te dignum scias, & in domo patria fortè non nisi contentibilis esse potuif-
les,

ses, tamen in schola humilitatis & superbiam amas, & honores appetis? Quando enim profundius te humiliasti, dum laudem tuam audire debuisti? Quando infirmitatem tuam sive corporis, sive animi, aut impotentiam tuam objecisti, dum tibi inunus aliquod honorilicentius oblatum est? Nonne potius presumptuose supra vires tuas onus in te suscepisti! Verum cogita: humilis est porta cœli; non nisi humiles admittit. Considera, vanam gloriam tineam esse, quæ omnia opera bona corrodit; cribrum esse, quod aquam sapientiæ retinere non potest; & verè cum super benedicta Virgine te humiliabis. Humilitus cum ea exaltaberis. Ipsa enim humilitate concepit Filium Dei.

PUNCTUM TERTIUM.

Respondens Angelus dixit ei: Spiritus sanctus superveniet in te, & virtus Altissimi obumbrabit tibi. Ideoque & quod nascetur ex te sanctum, vocabitur Filius Dei. Dixit autem Maria: ecce ancilla Domini, fiat mihi secundum verbum tuum. En! quomodo semper solet esse gratiæ divinæ familiaris virtus humilitas. Deus enim superbis resistit, humilibus dat gratiam. Humiliter ergo respondet, ut sedes gratiæ præparetur. Ecce, inquit, ancilla Domini. Quæ est hæc tam sublimis humilitas, quæ cedere non novit honoribus, intollescere gloria nescit? Mater Dei eligitur, & ancillam se nominat.

Non

Non mediocris revera humilitatis insigne,
nec oblata tanta gloria oblivisci humilitatem.
Non magnum est esse humilem in abiectione;
magna prorsus & rara virtus, humilitas hono-
rata. Si Deus me aliqua speciali gratia ex
abundantia pietatis suæ accumulatur, mox
propriæ infirmitatis meæ obliviscor. Si me
miserum homuncionem meis decepta simula-
tionibus ad aliquem vel mediocre honorem
provexerit obedientia, Deo nimirum hoc
vel propter meam, vel propter subditorum
peccata permittente: nonne statim oblitus,
quis fuerim, talem me puto, qualis ab ho-
minibus, qui cor non vident, putor! Cre-
do sane conscientiam non attendo, & repu-
tans non honorem virtutibus, sed virtutes
honori, eo sanctiorem, quò superiorem me
æstimo. Verè ad mentem Ss. Patris *ad om-
nia, quæ mihi inunguntur, velut opera-
rium malum me judicarem*, si vel solam istam
superbiam, non attentis aliis in talibus offi-
ciis admissis erroribus, exactius in me re-
prehenderem. Humilia ergo te o Anima
mea! cum B. Virgine, ut eum eadem vera-
citer exalteris. Ipsa enim humilitate con-
cepit Filium Dei.

PUNCTUM QUARTUM.

O Virgo, & Mater Dei! o Potentissima
Regina cœli, & terræ! quàm magna
tibi fecit, qui potens est? Quantis gratiis te
ornavit, qui te sibi in Matrem elegit? O
quàm

quàm sublimis , quàm alta , quàm incomprehensibilis est dignitas tua ? Post Deum major cogitari non potest. Et unde tibi tanta Excellentia ? Nonne quia Dominus respexit humilitatem ancillæ suæ ? Ah ! quântum obstupeo tuam profundissimam humilitatem in altissima sublimitate ? O quântum confundor de mea maxima superbia in vilissima vilitate mea ? Tu , ô gratia plena ! ô Benedicta inter mulieres ! turbaris , dum ita ab Angelo salutaris ; & ego vilissimus peccator , quàm impatienter fero consolationis ac gratiæ subtractionem , ac si jure mihi deberentur , qui non nisi perditionem ex me habeo , & propter mea peccata toties infernum mereor. Tu certior facta , quod inveneris gratiam apud Dominum , tamen te indignam judicas , ut Mater Dei sis , & ego inficius , utrùm amore , an odio dignus sim , supra vires meas onera dignitatum ambio , suscipio. Tu Mater Dei cùm sis , tamen te ancillam nominas ; & ego quia in omni statu meo offendo , me magnifico , justifico. O humillima Virgo ! verè digna es , ut concipias verbum æterni Patris ; quia humilis es. Ah ! aperi Virgo sinum ! expande gremium ! præpara uterum ! Dic tandem : fiat mihi secundum Verbum tuum , ut per gratiam etiam ad me veniat. Dic ; fiat mihi de Verbo secundum verbum tuum , ut & me in cognitionem mearum miseriarum ducat. Dic ; fiat Verbum , quod erat in principio apud Deum ,

Deum, caro de carne mea secundum verbum tuum, ut ego fragilitatem meam agnoscam. Nunquam enim illud mente concipiam; nisi meipsum agnovero, & vilificavero. *O Sapientia, quæ ex ore Altissimi prodiisti, attingens à fine usque ad finem, fortiter, suaviterque disponens omnia; veni ad docendum nos viam prudentiæ!* veni! doce nos humiles esse, ut possis habitare in nobis! an igitur, anima mea! te indignam reputabis ad omnem gratiam? Qui se humiliat, exaltabitur? An indignam te reputabis ad omnem dignitatem? Deus superbis resistit. An operariam malam in statu gratiæ, & dignitatis te reputabis? Humilibus dat gratiam. Dole, quod te tot gratiis indignam ob tuam superbiam reddideris. Propone, te ad illas exemplo B. Virginis per humilitatem disponere; atque ideo

1. Te indignam æstimare ad omnem gratiam,
2. Te indignam æstimare ad omnem dignitatem.
3. Te operariam malam æstimare in statu gratiæ, & dignitatis.

DIES XVIII.

Verbum æterni Patris incarnatur.

**De admirabili unione Humanitatis cum
Divinitate.**

Fiat illius voluntas in nobis. Cap. 7. gr. 1. v. 19.

Pun-

PUNCTUM PRIMUM.

Verbum caro factum est, & habitavit in nobis; dum Virgo vix verba illa: ecce ancilla Domini, fiat mihi secundum verbum tuum, compleverat. O quàm admirabilis est ista unio! nec potest doceri, nisi à donante; nec potest addisci, nisi à suscipiente. Ideoque quod nascetur ex te, vocabitur Filius Dei, ita ut quòd natum est ex ipso Patre, érit tuus; & quod nascetur ex te, erit ejus; & tamen non erunt duo filii, sed unus. Plane admirabilis est ista unio. Sed qui voluit humanitatem nostram suæ copulare Divinitati, vult, ut & nos unum simus cum ipso. Ad hoc enim venit in mundum. Ad hoc descendit de cœlo, non ut faceret voluntatem suam, sed voluntatem ejus, qui misit ipsum. In hoc posuit rationem, & summam omnis perfectionis nostræ. Ad istud quoque nos obligat Ss. Pater noster; asserens. *Fiat voluntas illius in nobis.* Verùm nunquam tuam cum Divina voluntate conformaveris voluntatem, nisi à voluntatibus tuis penitus aversus fueris. Sola tua propria voluntas separat hanc dulcem, amabilem, & admirabilem unionem.

PUNCTUM SECUNDUM.

Verbum caro factum est, ut faciat semper, quæ placita sunt Patri. Cibus enim ejus est, ut faciat voluntatem Patris sui, ita, ut non veniat ullum ipsius mandatum solvere, sed

sed adimplere. Hinc ex voluntate Patris per novem menses jacet in utero Virginis; visitat Joannem præcursoresuum; vult nasci in stabulo Bethlehemitico. Ideo in primo instanti conceptionis suæ se offert cum anima, & corpore Ss. voluntati æterni Patris sui, cui cupit fieri obediens usque ad mortem, mortem autem crucis. Ad hanc voluntatis Divinæ executionem te quoque obligat Verbum incarnatum, cum ait: Non omnis, qui dicit mihi, Domine, Domine, intrabit in regnum cœlorum, sed qui facit voluntatem Patris mei, qui in cœlis est. Ad hanc insuper te adstringit Ss. Pater tuus, cum dicit; *fiat voluntas illius in nobis*. Verum nunquam hanc unionem cum Divina voluntate impetrabis, nisi præcepta Dei quotidie factis adimpleveris, nisi in omnibus magistræ secutus fueris Regulam. Hoc est enim voluntas Dei. Hæc voluntas Dei est sanctificatio tua. Hanc voluntatem Dei faciens reportabis repromissiones Dei. Quidquid extra hanc voluntatem Dei feceris, te non sanctificabit, non salvabit. Vides igitur, quod sola prævaricatio mandatorum Dei, & Ss. Regulæ separet hanc unam necessariam ad salutem unionem.

PUNCTUM TERTIUM.

Verbum caro factum est, & ingrediens in mundum dicit: hostiam & oblationem noluisti; corpus autem aptasti mihi. Tunc
Spir. S. Ben. P. IV. **S** dixi;

dixi : ecce venio , ut faciam voluntatem tuam. Et quæ est ista ? ut pateretur , & moreretur. O quàm prompte ad omnem passionem se non offert , imo quanta ab instanti conceptionis suæ non patitur in utero Virginis ? cogita si modo cum tali ratione deberes reverti in uterum matris , quantum abhorreret , & quanta ibi pati deberes incommoda ? Et tamen Christus perfectissima ratione , imo omni perfectione animæ , & corporis , in primo instanti conceptionis suæ præditus non horruit Virginis uterum , omnia passus est ? Nonne igitur & tu ad exemplum Verbi Incarnati in cunctis adversis dices ; ecce venio , ut faciam voluntatem tuam Deus ? Ita præcipit tibi Verbum Incarnatum : tolle crucem tuam , & sequere me. Ita hortatur Ss. Pater tuus , dum ait : *fiat voluntas illius in nobis*. Et cur non libenter cum Verbo Incarnato patereris ad voluntatem Patris ? Omnia enim quæcunque , & à quocunque , & quomodocunque , excepto solo peccato , tibi accidunt , Dei nutu , imperioque ad salutem tuam accidunt. Dominus namque facit hæc omnia , nec est malum in civitate , quod non fecerit Dominus. Nullus respectu Dei casus est. Nonne duo passeret vaneunt dipondio , & unus ex illis non cadet super terram sine Patre vestro ? Sortes mittuntur in sinum , sed à Domino temperantur. Unde & fors cecidit super Mathiam. O qui ita ad voluntatem Dei omnia adversa susciperet , constanti pace ,

pace, ac quiete frueretur, Deoque gratissimum holocaustum offerret! sed quid te separat ab hac unione cum voluntate Dei? Nunquid non impatientia tua? Cum verbum ullum in te dictum audis &c. Canes imitaris; hi enim, si quis in ipsos lapidem jecerit, jaciente dimisso, lapidem remordent: Ita & tu Deo relicto, qui tibi tribulationes ad peccatorum tuorum purgationem procurat, ad próximos, ad causas secundas curris. Verum resipisce, uni te cum voluntate Dei, verbum Incarnatum imitaberis, & cum gaudio tolles crucem tuam.

PUNCTUM QUARTUM.

O Fili Dei vivi! O fili Mariæ Virginis? O amabilissime Redemptor, & Salvator meus? O verbum Incarnatum adoro te humillimè, laudo, & benedico te in æternum. O quàm magnas gratias tibi referre teneor, quòd è sinu Patris in sinum Virginis amore mei descenderis? Quid retribuam tibi pro gratia ista, quod me sordidum peccatorem respicias, & tua Ss. Incarnatione sanctifices, & salves? Nunquid magnum tibi dederò, si me totum tibi in servum tradiderò; si fecero voluntatem tuam. Ah! dulcissime JEsu! non mea, sed tua voluntas fiat in æternum. Ecce! amore tui, O JEsu! relinquo omnem proprietatem voluntatis meæ. Non mea, sed tua voluntas fiat, amantissime JEsu! ecce! amore tui firmiter statuo, mandata tua,

& S. Regulæ observare, nec unquam ab iis declinare. Non mea, sed tua voluntas fiat, suavissime JESU! ecce! amore tui resigno me tibi totum, suscipio de manu tua crucem, omnem passionem, mortem ipsam. Non mea, sed tua voluntas fiat, potentissime JESU! ecce! jam dedi tibi, quod à me tam desideranter postulasti. Non enim amplius mihi, sed tibi unice vivere statuo. Volo te sequi; volo adimplere voluntatem tuam, qui venisti in hunc mundum, non ut tuam, sed ut Patris tui faceres voluntatem. Ideo enim carnem assumpxisti, ut per te unirer voluntati Patris tui. *O Adonai, & Dux domus Israël, qui Moysi in igne flammæ rubi apparuisti, & ei in Sina legem dedisti: veni ad redimendum nos in brachio extento.* O Adonai, & Dux domus Israël duc me per semitas mandatorum tuorum, ut faciam voluntatem tuam. Ah! qui apparuisti in igne flammæ rubi, exure in me omnem proprietatem voluntatis meæ. Ah! qui dedisti legem in Sina; fac ut in omnibus me adversis tuæ sanctissimæ voluntati subjiciam. Veni! redime me in brachio extento à propria mea voluntate. An igitur, ô anima mea! unies te verbo Incarnato, ut omni rejecta voluntate propria facias voluntatem ejus? Fiat voluntas tua, sicut in coelo, & in terra. An unies te Verbo Incarnato, ut per observantiam mandatorum Dei & S. Regulæ facias voluntatem ejus? Veni adimplere legem. An unies

te Verbo Incarnato, ut cum gaudio suscipiens
adversa facias voluntatem ejus? Non quod
ego volo, sed quod tu. Dole igitur, quod te
Verbo Incarnato non unieris. Propone ejus
voluntatem facere

1. Per abnegationem propriæ voluntatis,
2. Per adimpletionem Præceptorum Dei,
- & S. Regulæ,
3. Per patientiam in adversis.



DIES XIX.

B. Virgo visitat Elisabeth.

De eximia charitate B. Virginis erga co-
gnatam suam Elisabeth.

Proximum diligere tanquam seipsum. Cap.
4. Instr. 2.

PUNCTUM PRIMUM.

EXurgens Maria in diebus illis abiit in mon-
tana cum festinatione in civitatem Juda;
& intravit in domum Zachariæ, & salutavit
Elisabeth. Tanta fuit B. Virginis, & Matris
Dei erga cognatam suam charitas, charitatis-
que affectio, ut exurgeret, abiret in montana,
festinaret in civitatem Juda ad congratulan-
dum ei de mirabili suo conceptu. Vera

namque charitas tarda molimina nescit. Gaudet de alieno bono, sicut de suo. An imitaris hanc charitatem Virginis? *An proximum diligis tanquam teipsum*, ut jubet Lex Dei, Regula Ss. Patris tui? Et quoniam tibi cognatione proximiores sunt, quam contrates tui? Omnes in Christo unum sumus. Quomodo igitur eos amas? Planè si dolentibus non compateris, si gaudentibus non congaudes, Virginem superbenedictam non imitaris, veram charitatem non possides. Hanc siquidem dum describit Apostolus, alia similitudine non utitur, quam corporis humani. Si quid, ait, patitur, unum membrum, compatiuntur omnia membra; siue gloriatur unum membrum, congaudent omnia membra.

PUNCTUM SECUNDUM.

Maria salutavit Elisabeth. Non dedignata est Mater Dei prior salutare cognatam suam. Ex abundantia charitatis os ejus semper loquebatur sapientiam. Sciebat, charitatem nullo magis accendi, foveri, quam verbo amoris, & honoris. Nescit enim amor superbire. Unde Salomon protestatur: non confundar amicum salutare. Amor amicum honore prævenit, nec unquam de puncto honoris sollicitus est. Amicus namque est alter ego. Inter amicos omnia paria sunt, & æqualia. Hinc & ipsa veritas dicit. Jam non dicam vos servos, sed amicos. Ideo etiam & Patrem suum, vocat Patrem eorum.

Mul-

Multum, ac permultum istud valet ad roborandam dilectionem, si alter alterum superiorem æstimat; amat servire subjectus, & gaudet Prælati sibi æquare subjectum. An sequeris ergo Virginis exemplum? An ad mentem Ss. Patris hoc modo vere *diligis proximum tuum tanquam teipsum*? An honorificè illum alloqueris, & de ipso loqueris? Verbum dulce multiplicat amicos.

PUNCTUM TERTIUM.

Maria intravit domum Zachariæ, ut Domina serviret ancillæ. Vera equidem charitas non contentatur solo dilectionis affectu, aut verbo; sed opere exhibet dilectionem. Ita hortatur dilectus Domini discipulus Joannes: Filioli! non diligamus solum lingua, aut verbo; sed opere & veritate. Alter alterius proinde onera portare studeat, qui vult vere proximum diligere tanquam seipsum. Alter alteri charitatis officia exhibere satagat, qui vult charitatem fraternitatis casto impendere amore. Piet & hoc; si frater non fratri, sed Christo in fratre serviat. Et si frater, cui servitur, servitium à fratre accipit ut servus ab Hero, ut Elisabeth à Maria: unde mihi hoc, ut veniat Mater Domini mei ad me. Hoc siquidem modo charitatis opera miro modo dulcorantur, & ex dulcore multiplicantur. An ita imitaris Virginem Benedictam, ejusque Sanctissimam cognatam? An juxta monitum Ss. Pa-

tris tui sic verè diligis proximum tuum sicut teipsum?


PUNCTUM QUARTUM.

O Virgo, & Mater! unde tanta tibi charitas? Ignem æternæ charitatis in sinu tuo gestas. Et quid mirum, quod tantum incendium dilectionis evapores? Quid mirum, quod tanto charitatis affectu flagres, honorem tuum non cures, sed Domina famulam salutes, Mater Dei, Matri Præcursoris inservias? O Verbum Incarnatum! O Salvator meus, qui venisti ignem mittere in terras, qui aliud non vis, quam ut accendatur! eja! unam scintillam de isto divino igne immitte in cor meum! ah! hucusque totus frigidus in amore fui. Usque modò nemo potuit cognoscere; quia discipulus tuus sum; quia nemo potuit in me invenire dilectionem proximi. O unica salus, & vita animæ meæ tua sancta charitate vivifica me! *O Radix Jesse, qui stas in signum populorum, super quem continebunt Reges os suum, quem gentes deprecabuntur: veni ad liberandum nos, jam noli tardare!* O Radix Jesse, utinam germinares in me fructus charitatis? O qui stas in signum populorum electorum, utinam & ego ex dilectione tua agnoscerer unus de electis tuis! O Rex divini amoris, super quem Reges præ dulcedine charitatis os suum continent, utinam ego vel unam guttulam hujus coelestis consolationis

de-

de gustare possem! O Domine Dominantium, quem gentes deprecantur, ah! veni per omnium gentium desideria, & suspiria! veni ad liberandum me de morte, in qua tamdiu sine charitate mansi. Ah! noli tardare, ut resuscites me! O Virgo, & Mater spira, & inspira mihi hunc spiritum charitatis, quem de amantissimo corde Verbi Incarnati trahis, & vivam! nunquid ergo, O anima mea! omni cordis affectione amabis proximum tuum? Omne animal diligit simile sibi, sic & omnis homo proximum sibi. Nunquid verbis honorificis, & amorosis amorem proximo tuo contestaberis? Verbum bonum super datum optimum. Nunquid opere proximum tuum amabis? Sic Deus dilexit nos, & nos debemus alterutrum diligere. Dole, quod amorem Matris Dei non secutus fueris. Propone imitari;

1. Ut affectione cordis,
2. Verbis honorificis, & amorosis,
3. Opere diligas proximos tuos.



DIES XX.

**Verbum Incarnatum sanctificat Præcur-
sorem suum.**

Quanto edio Salvator peccatum prosequatur. Oderit vitia. Cap. 44.

v. 14.

S s Pun-

PUNCTUM PRIMUM.

ET factum est, ut audivit salutationem Mariæ Elisabeth, exultavit infans in utero ejus. Verbum incarnatum per verbum Matris sanctificavit omnium primum Joannem Præcursoresuum. Tanto videlicet odio prosequitur Salvator peccatum ut nullas moras nectere voluerit, sed fortiter impulerit Matrem suam, quatenus festinaret ad liberandum Præcursoresuum à peccato originali. Solus quippe Salvator perfectè agnoscit malitiam peccati, qui ideo in mundum venit, ut nos mundaret ab ea in sanguine suo. Peccatum enim infinitam offensam Dei continet. Tam grande malum est, ut Deus propter unum originale totum genus humanum morti temporali, & æternali addiderit. Tam grande malum est, ut peccatorem tradat in potestatem Sathanæ infensissimi inimici sui. Tam grande malum est, ut ob infinitatem offensæ infinitò valore Incarnationis, & passionis aboleri debuerit. Meritò igitur infinito odio illud prosequitur Verbum Incarnatum. Meritò properat ad sanctificandum Præcursoresuum. Meritò gaudet, & exultat iste in utero, quod à tanto malo liberatus fuerit. Sed nunquid & tu ad mentem Ss. Patris tui *oderis vitia?*

PUNCTUM SECUNDUM.

ECce enim ut facta est vox salutationis tuæ in auribus meis exultavit in gaudio infans

fans in utero meo. O immensum Verbi Incarnati odium erga peccatum! vix conceptum est, iter suscipit, ut munus destructoris peccati erga Joannem exerceat. Solū quippe comprehendit infinitam ejus malitiam. Comprehendit imensam bonitatem &c. In quam insurgeret peccatum. Comprehendit vilitatem, quæ offenderet infinitam Majestatem. Hinc noluit Præcursorem suum diutius inimicum Dei Patris sui esse, qui amicus sponsi fieri deberet. Noluit illum in tenebris ignorantie, & in obscuritate intellectus permanere, qui lucem, quæ illuminat omnem hominem, annunciare deberet. Exulta igitur, ô Præcursor Sanctissime! contestare gaudium tuum, quo modo meliori potes. Dignus planè est omni gratitudinis contestatione, qui à tanto te malo liberavit. Sed nunquid & tu tandem cum Verbo Incarnato *oderis vitia?*

PUNCTUM TERTIUM.

UNde hoc mihi, ut veniat Mater Domini mei ad me? Ne mireris, ô sanctissima cognata Matris Dei; quod in utero gerit Verbum Incarnatum, hoc Matrem suam excitavit, ut veniret ad te, ut per Filium suum sanctificaret filium tuum. Infinito enim odio odit peccatum. Præscit, imo jam sentit dolores, quos per omnem vitam, & mortem suam passurus est, ut peccatores Deo per sanguinem suum reconciliet. Scit æstimare

mare pretium, quo redimi debent. Agnoscit, quo diutius peccatum regnet in peccatore, eo infirmiores ejus voluntatem fieri ad resistendum peccato. Hinc non vult illum sub jugo peccati diu detineri, qui poenitentiam, & remissionem peccatorum prædicare deberet. Exulta, ô Joannes, exulta Præcursor Domini! tuo gaudio & nobis prædica magnitudinem peccati, de quo te tam mirabiliter liberatum gaudes. Sed nonne & tu piam adhortationem Ss. Patris tui sequeris? Nunquid imitaberis Verbum Incarnatum, & oderis vitia?

PUNCTUM QUARTUM.

O Verbum Incarnatum! siccinè jam in utero Matris zelus domus tuæ comedit te, ut mox festinares ad redimendum Præcursorem tuum à servitute peccati? O lux vera, quæ illuminas sedentem in tenebris! siccinè odisti peccatum, ut odium hoc tuum præ omnibus aliis virtutibus tuis signo externo, exultatione videlicet mirifica Præcursoris tui mundo manifestare velis. Et cur non odisses? Peccatum quoque fatali odio te persequitur? Quot enim pressuras, & angustias cordi tuo adhuc sub corde Virgineæ Matris suæ latenti causat? O me cæcum, miserum, & miserabilem homuncionem, qui adhuc dum non odi odio perfecto inimicum tuum, & meum? Qui toties ab eo turpissimè deceptus, & vita spoliatus supernaturali, ta-

men

men adhuc ab eo decipi, & mortificari gaudeo? O Verbum Incarnatum! ecce & hic miserrimum peccatorem habes, quem non solum ut Joannem ab uno, sed ab innumeris liberes peccatis! O vita animæ meæ! O lux vera mentis meæ! O fortitudo animi mei! vivifica, illumina, & conforta me, ut pari deinceps odio prosequar peccatum. Agnosco, sed serò ah! agnosco, quàm malum sit, & amarum offendere te! *O clavis David, & sceptrum domus Israel, qui aperis, & nemo claudit; claudis, & nemo aperit: veni & educ vinctum de domo carceris, sedentem in tenebris, & umbra mortis.* O Virgo Mater veni ad me, loquere de verbo, & per Verbum tuum Incarnatum ad me, exaltabo & ego in salutari tuo, & persequar inimicos meos; donec deficient! an igitur, ô anima mea, oderis peccatum! quia infinita offensa Dei est? ecce! Agnus Dei, ecce qui tollit peccatum mundi. An oderis peccatum; quia intellectum ignorantia & erroribus obscurat? Ecce! ostendit super nos divitias gratiæ suæ. An oderis peccatum; quia voluntatem debilem reddit, ac infirmam? Ecce! lex spiritus vitæ, liberat à lege peccati, & mortis. Dole, quod cum Verbo Incarnato hucusque peccatum non oderis. Propone illud omni, quo potes, odio persequi

1. Quia infinita offensa Dei est;
2. Quia intellectum obscurat;
3. Quia

3. Quia voluntatem debilitat, & animam enecat.



DIES XXI.

IN FESTO S. THOMÆ APOSTOLI.

De Prærogativis Fidei.

Succinctis fide lumbis nostris per ducatum Evangelii pergamus. Prolog.

§. 3. v. 18.

PUNCTUM PRIMUM.

OB tres causas nobis commendat Ss. Pater noster fidem, dum dicit : *succinctis fide, vel observantia bonorum actuum lumbis nostris perducatur Evangelii pergamus itinera ejus*. Prima est; quia intellectum sanctificat. Hinc vult, ut *succingamus lumbos nostros fide*. Sunt quippe teste Apostolorum vertice Petro & lumbi mentis. Hos igitur fides sanctificat; quando intellectum dominio Dei immolat, Dei gloriæ consecrat, Dei sapientiæ conjungit. Hos fides sanctificat; quando intellectum lumine divinæ veritatis illustrat, ut infallibiliter verbo Dei revelato absque ulla hæsitacione assentiatur. Hos fides sanctificat; quando intellectum per sensus exteriores, neque per rationem naturalem, sed per

per suas æternas veritates quaslibet res facit discernere. En! S. Thomas, antequam Christus ei apparuit, solum naturali suæ rationi innixus, & incredulus erat; at vix illi veritas apparuit, credidit, & exclamavit Dominus meus, & Deus meus! sanctificavit fides intellectum ejus. O Religiose! fulgetne hisce sanctitatis radiis intellectus tuus? In tenebris est, & errat, si hoc in lumine non ambulat.

PUNCTUM SECUNDUM.

ALtera causa est; quia fides voluntatem movet, ad observantiam mandatorum Dei. Hinc Ss. Pater vult, ut *fide pergamus per ducatum Evangelii*. Sanè nullum præceptum in Evangelio tam grave est, -cujus executionem voluntas non amplectatur; dummodo viva fide credat à Deo præscriptum esse. Quomodo ausit illi resistere, qui potestatem habet corpus, & animam perdere in gehennam ignis? Quomodo non libenter omnia præcepta Dei factis impleat, qui diligentibus se vitam promittit æternam? En! sanctus Thomas ad Indos usque peragrat, verbum Dei ubique promulgat, nullum laborem abhorret, ut præcepto Magistri sui de prædicatione Evangelii satisfaciat. Profecto tepiditatis nostræ in exequendis mandatis Dei origo alia non est, quam languor fidei nostræ. Et quod ex quotidiano auditu Evangelii, lectione, & meditatione verbi Dei non emendemur, in causa est; quia fidem vivam divi-

næ veritati non adhibemus. Crede, & non solum voluntas tua, sed etiam operatio tua erit in mandatis Dei.


PUNCTUM TERTIUM.

Tertia causa est; quia fides cor virtutibus exornat. Hinc Ss. Pater vult, ut *fide, vel observantia bonorum actuum lumbos nostros succingamus*. Fides equidem nos continet in humilitate, cum parvulis duntaxat introitum in Regnum cœlorum promittit. Fides nos ipsos abnegare facit, cum mortificatos solum in scholam Jesu recipit. Fides nos mites reddit, ac patientes; cum patientiæ opus perfectum tantum adscribit. Fides nos misericordes facit, cum misericordibus misericordiam adstipulatur. Fides nos mundicordes reddit, cum mundis corde visionem Dei repromittit. Nullum Consilium Evangelicum reperies, quod cor non exequi desideret, si fide viva præditum sit. En omnes virtutes istas in S. Thoma, ita ut infideles gentes ad sui admirationem, & amorem Jesu commoveret. Tantum demum in virtutibus fides ejus crevit, ut Calaminæ pro eadem telis confodi non metueret. O quantum est donum fides, quæ cor tot virtutibus ornat, quibus precibus à Deo non semper petenda est, sine cujus munere illam habere non possumus.

PUNCTUM QUARTUM.

AN igitur, ô Religiose! fide sanctificas intellectum tuum? Desponsabo me tibi in fide, & scies, quia ego sum Dominus. An fide voluntatem tuam ad observantiam legis moves? Nonne anima mea subiecta eris Deo tuo? An per fidem cor tuum virtutibus ornas? Abraham credidit Deo, & reputatum est ei ad iustitiam. Dole, quod hisce fidei prærogativis usus non sis. Propone cum S. Thoma

1. Fide intellectum sanctificare.
2. Voluntatem ad observantiam legis movere.
3. Cor virtutibus exornare.



DIES XXII.

B. Virgo intonat Canticum Magnificat.

De gratitudine B. Virginis pro beneficio Incarnationis.

Bonum aliquid in se cum viderit, Deo applicet non sibi. Cap. 4. Instr. 42.

PUNCTUM PRIMUM.

ET ait Maria: Magnificat anima mea Dominum, & exultavit spiritus meus in Deo
Spir. S. Ben. P. IV. T salu-

salutari meo. Hisce verbis primo dona sibi specialiter concessa per Incarnationem confitetur; deinde generalia Incarnationis beneficia, quibus humano generi in æternum consulere non desistit, grata mente enumerat. Ejus autem anima Dominum magnificat, & omnes interioris hominis sui affectus divinis laudibus consecrat. Ejus spiritus in Deo salutari suo exultat, & eam sola illius, à quo omnis salus speratur, memoria delectat. O quis hic gratam Virginis Matris affectionem erga Verbum Incarnatum cogitare potest, quæ corporali illius conceptione gaudebat, & perpetuum salutis Auctorem de carne sua nasciturum esse sciebat? Imitare eam, ô Religiosa anima! quando canis dulcissimum istud Canticum, ut saltem aliquo modo grata sis pro immenso Incarnationis beneficio, atque satisfacias Ss. Patris tui præcepto: *bonum aliquid in se cum viderit, Deo applicet, non sibi.* Ab Incarnatione Domini omne tibi bonum profluxit.

PUNCTUM SECUNDUM.

Quia respexit humilitatem ancillæ suæ: ecce enim ex hoc beatam me dicent omnes generationes. Hisce superbenedicta Virgo, & Mater Dei testatur, quàm vilia de se ipsa sentiat, & quod omne, quicquid boni meriti habet, hoc supernæ gratiæ adscribat. Humilem quippe Christi ancillam suo judicio se fuisse demonstrat; sed respectu gratiæ cœlestis

lestis repentē sublimatam se pronunciat, atque in tantum glorificatam, ut sua beatitudo præcipua merito cunctarum gentium voce miretur. Addit etiam adhuc divinæ pietatis munera, quæ mirabiliter accepit, & digna gratiarum actione summum suum Benefactorem collaudat. Imitare eam, ô Religiosa anima! ad canticum magnificat, atque humiliter juxta præscriptum Regulæ, *bonum ali- quid in te cum videris, Deo applica, non tibi;* & sic digna eris semper novas gratias recipere. Etenim gratiarum actio, est nova petitio.

PUNCTUM TERTIUM.

Quia fecit mihi magna, qui potens est, & sanctum nomen ejus. Nil his verbis suis meritis tribuit, sed totam magnitudinem suam ad illius donum refert, qui essentialiter potens, & magnus existit. Hic quippe fideles suos de parvis, & infirmis fortes facit, & magnos; esurientes justitiam replet bonis gratiæ; timentibus se misericordiam impendit; atque humiles exaltat. Solum superbos deponit, & qui divitiis terrenis inhiant, relinquit gratiis suis inanes. Bene autem laudat B. Virgo sanctum nomen ejus; quoniam & ipsa per hoc nomen omnes gratias acceperit: Israël salvatorem suum juxta promissum Abrahæ, & semini ejus factum suscepit, & omnes credentes sanctitatis, & salutis participes futuri sint juxta illud Pro-

pheticum : omnis quicumque invocaverit nomen Domini salvus erit. Imitare Virginem, & Matrem Dei, sanctissimo Nomini Domini *bonum aliquid in te cum videris, applica, non tibi*; sic tandem & tu per ipsum salvus fies.

PUNCTUM QUARTUM.


O Verbum Incarnatum! & anima mea magnificat te Dominum meum. Exultat in salutari tuo Spiritus meus. Quidquid enim boni sive in anima, sive in corpore habeo, à te accepi, per te possideo. O quàm in immensum tibi obligor, ô Fons omnium bonorum meorum! quia respexisti humilitatem animæ meæ. Ego enim vilis, ac sordidus peccator nullam gratiam promeritus sum, & tamen innumeris me beneficiis cumulâsti. Ego ingratiſſimus homo nullam amplius gratiam propter meam ingratitudeſperare audeo, & tamen novas, & novas de hora in horam à te accipio. Sanctificetur igitur millies, & millies, ô Verbum Incarnatum, nomen tuum! laudent illud cœlum, & terra, à quo, & per quod, & in quo omnem salutem accepi! magnificet, & sanctificet nomen tuum pro me Virgo Mater tua; quia dignas tibi gratiarum actiones reddere ego nequaquam valeo. Saltem pro gratiarum actione opto, ut singula suspiria cordis mei, & omnes motus animæ, & corporis mei laudem tuam resonent: laudetur
mil-

millies sanctissimum Incarnationis & Nominis tui Mysterium! tu tantum, *ô Oriens, splendor lucis æternæ, & sol iustitiæ: veni & illumina sedentes in tenebris, & umbra mortis*, ut omnes agnoscamus te salutis nostræ Auctorem, & cum perpetua gratiarum actione collaudemus. An igitur, *ô anima mea!* cum Beatissima Virgine Maria intimo gratitudinis affectu recales beneficia Dei? Gratias agere debemus semper Deo. An humilitatem, & indignitatem tuam ad beneficia Divina recognoscere? Quid est homo, quod memores ejus? An sanctissimo Nomini Domini salutem tuam adscribes? Non nobis Domine! non nobis: sed nomini tuo da gloriam. Dole, quod hucusque Verbo Incarnato tam ingratus extiteris. Propone cum B. Virgine, & Matre Dei

1. Intimo gratitudinis affectu beneficia divina recolere,

2. Indignitatem tuam ad eadem recognoscere,

3. Salutem tuam Nomini Domini in acceptis referre.



DIES XXIII.

S. Joseph Virgineus Sponsus Matris Dei de Mysterio Incarnationis instruitur.

Quòd S. Joseph indignum se judicaret, ut cohabitaret Virgineæ Sponsæ suæ.

Omnibus se inferiorem, & viliorem intimo cordis credat affectu. Cap. 7. gr. 7. v. 64.

PUNCTUM PRIMUM.

Cum esset desponsata Mater Jesu Maria Joseph, antequam convenirent, inventa est in utero habens de Spiritu sancto. Joseph autem vir ejus, cum esset justus, & nollet eam traducere: voluit occultè dimittere eam. Quare voluit dimittere eam? Accipe non meam, sed optimarum aliarum mentium meditationem: propter hoc Joseph voluit dimittere eam, propter quod & Petrus Dominum à se repellebat, dicens; exi à me, Domine; quia homo peccator sum: propter quod & centurio à domo sua eum prohibeat, cum diceret: Domine non sum dignus, ut intres sub tectum meum. Ita ergo & Joseph indignum, & peccatorem se reputans dicebat intra se, à tali, & à tanta non debere sibi ultrà familiare præstari contubernium, cujus supra se mirabilem expavescebat dignitatem. Admiraris hujus sancti humilitatem; sed magis mirare, quòd tu, cum ita vilis, & abjectus in peccatis sis, in schola humilitatis nondum didiceris septimum humilitatis gradum: *omnibus se inferiorem, & viliorem intimo cordis credat affectu.* Nescis pla-

plane quis sit, aut futurus sit Confrater tuus; bene verò scis, qualis tu ob peccata es. Cur ergo non omnibus te viliozem credas?

PUNCTUM SECUNDUM.

Voluit occulte dimittere eam. Videbat nimirum Joseph, & horrebat Mariam Divinæ præsentia certissimum gestantem insigne: & quia mysterium penetrare non poterat, volebat occulte dimittere eam. Miraris, quòd Joseph prægnantis sese consortio Virginis judicabat indignum, cum audias, & sanctam Elisabeth ejus non posse ferre præsentiam, nisi cum tremore quodam & reverentia? Ait namque; unde hoc mihi, ut veniat Mater Domini mei ad me? Ideo itaque Joseph voluit occulte dimittere eam. Indignum se aestimavit, qui tantæ Virginis frueretur consortio. Expavit Divinæ potentia magnitudinem; expavit Divinæ præsentia Majestatem. Exhorruit miraculi novitatem, mysterii profunditatem. O qui ad exemplum hujus sancti in Confratre gratias Divinæ potentia duntaxat respiceret, quam libenter *se omnibus inferiore, & viliozem intimo cordis crederet affectu?*

PUNCTUM TERTIUM.

Hæc autem eo cogitante, ecce! Angelus Domini apparuit in somnis ei dicens; Joseph fili David, noli timere accipere Mariam conjugem tuam, quod enim in ea na-


tum est, de Spiritu sancto est. Exurgens autem Joseph à somno, fecit, sicut præcepit ei Angelus Domini, & accepit conjugem suam. Vide, quantas gratias per hanc humilitatem promeruerit S. Joseph. Ab Angelo de mysterio Incarnationis meruit instrui; putari meruit Pater Jesu; meruit rursus accipere conjugem suam, etiam Deo homine gravidam; meruit conscius fieri cœlestium sacramentorum; meruit fidelis servus & prudens constitui super familiam Domini sui, suæ Matris solatiū, suæ carnis Nutritium; meruit solus denique in terris, magni consilii coadjutor esse fidelissimus. Ita Deus humilis exaltat. Sic erunt novissimi primi. Nunquid & tandem aliquando ad mentem Ss. Patris tui *te omnibus inferiorem, & viliozem intimo cordis affectu credes?*

PUNCTUM QUARTUM.

AH! quando tandem, ô Verbum Incarnatum! discam humilitatem? Tu, ô Deus potentissime, Majestas interminabilis, excellentia infinita! doces me humilitatem, quandoquidem nihilum naturæ meæ assumpsisti. Humilitatem docet me Mater tua, quæ ancillam humilem se profitetur. Humilitatem docet me Nutritius tuus, qui præ humilitate non audet Virginæ suæ Sponsæ cohabitare. Et tamen humilis, & vilis videri recusò. Sed quid superbio terra, & cinis? Cur me moveo canis mortuus, vernis, & non homo? Quare me aliis præfero, qui totus

tus in peccatis natus, & educatus sum? O si me recte inspicerem? ô si peccata mea ante oculos meos statuerem! ô si peccata confratrum post dorsum projicerem, & eorum recte facta coram solum attenderem, nonne infra omnes me humiliarem? Nonne eorum consortio me penitus indignum aestimarem? Nonne vilissimum me toto cordis affectu & crederem, & infimus tractari vellem? Eja igitur, anima mea! humilia te, pulveriza, ut omnes super te gradi possint. Non agnosces mysterium Incarnationis, non recipies gratiam Incarnationis, non gloriaberis in Verbo Incarnato, nisi te omnium minimam reputaveris. *O Rex gentium, & desideratus earum, lapisque angularis, qui facis utraque unum, veni: & salva hominem, quem de limbo formasti*, ne amplius superbiat terra, & cinis. An non igitur, ô anima mea! te omnium infimam credes ad exemplum S. Josephi ob peccata tua? Ego sum minimus. An non te omnium vilissimam credes ob aliorum probitatem? In humilitate superiores sibi invicem arbitrantur. An non te omnium infimam credes, ut gratiam Incarnationis accipias? Qui inclinaverit oculos, ipse salvabitur. Dole, quod humilitatem S. Josephi non sectatus fueris. Proponne omnium te infimum credere

1. Ob peccata tua,
2. Ob probitatem Confratrum,
3. Ad obtinendam gratiam Incarnationis.



DIES XXIV.

In Vigilia Nativitatis Domini.

S. Joseph cum Maria prægnante in civitatem suam Bethlehem proficiscitur.

De Obedientia Verbi Incarnati.

In ipsa Obedientia patientiam amplectatur.
Cap. 7. gr. 4. v. 36.

PUNCTUM PRIMUM.

Factum est autem in diebus illis, exiit editum à Cæsare Augusto, ut describeretur universus orbis. Ascendit autem & Joseph à Galilæa de civitate Nazareth in Judæam, in civitatem David, quæ vocatur Bethlehem; eo quod esset de domo, & familia David, ut profiteretur cum Maria desponsata sibi uxore prægnante. Sic Verbum Incarnatum adhuc sub utero delitescens voluit obedire Principi terreno, superbo, & avaro, ut tu ad mentem Ss. Patris tui *in ipsa obedientia patientiam amplecti*, & Superiori discolori obedire non detrectares. Qualis enim sit Superior, sive bonus, sive malus, sive amicus, sive inimicus, obediendum ei est. Ex quo motivo sive bono, sive malo, sive ex amore, sive ex odio præcipiat, obediendum ei est, quamdiu peccatum illud, quod

quod præcipit, non est. Non est enim alius Superior, quam is, qui personam Dei sustinet. Quemadmodum igitur Deo, ita & ipsi obtemperandum est. Et sicut pastori suo, quomocunque vestitus sit, oves obtemperant, & viam quamcunque ille vult, ingrediuntur; licet ipse alia via incedat: ita, qui ex Deo pietatis cultores sunt, moderatoribus suis obsequi debent, licet ipsi peccatores sint, & latam viam incedant; dummodo angustam viam doceant. Quid enim refert, utrum tibi asinus, an Angelus aliquis voluntatem Dei indicet? Quid interest, utrum bonus, vel malus sit, qui tibi viam ostendit, si tamen viæ terminum attingas? Sequere igitur Verbum Incarnatum, & Divinæ voluntati in imperio Superioris etiam discoli obtempera.

PUNCTUM SECUNDUM.

FACTUM est autem in diebus illis, exiit editum. Ascendit Joseph in civitatem David, ut profiteretur cum Maria desponsata sibi uxore prægnante. Ita voluit Verbum Incarnatum in illis diebus videlicet tempore hyemis, instantis partûs sui, Imperio Augusti, quod in his circumstantiis omnino injustum videbatur submisit obedire, ut tu juxta monitum Ss. Patris tui disceres *in ipsa obedientia patientiam amplecti*, & iudicium tuum humiliter iudicio Superioris subicere. Nihil enim de Superiorum jussis perscrutari debe-

debemus, quamdiu libera sunt à peccato. Deum judicat, qui Superiorem dijudicat. Sicut enim faber singulis artis instrumentis pro arbitrio utitur suo, neque unquam illud inventum est instrumentum, quod ad quemcunque ille usum voluisset, non se facile tradendum præbuerit; ita convenit subditum in omnibus rebus, in quibus Superior judicat, ad complendam spirituales fabricam parere, ne si id facere recusaverit, impedimento sit, quo minus spirituale opus compleatur. Et ut instrumentum opus sibi ipsi non deligit, ad quod usurpandum sit, sic subditus gubernationem sui Superioris prudentiæ, & consilio debet concedere. Et quidem eò libentius, quo proprium iudicium amore proprio infectum semper à vero iudicio aberrat. Sequere igitur Verbum Incarnatum, quod edicto iniusto se submittit, nihil discute, quod tibi præceptum est, omnia age, nisi præcepta aperte sint in se peccaminosa.

PUNCTUM TERTIUM.

Ascendit Joseph, ut profiteretur cum Maria desponsata sibi uxore prægnante. Factum est autem, cum essent ibi, impleti sunt dies, ut pareret. Et peperit filium suum primogenitum, & reclinavit eum in præsepio; quia non erat eis locus in diversorio. Hoc modo Verbum Incarnatum iter in utero Virginali instituit, iussisque Imperatoris

toris obedit, licet prævideat, partum suum in stabulo inter totincommoda futurum esse, ut tu *in ipsa obedientia patientiam amplecti*, & dura quævis imperia exequi non metueres. Eò enim obedientia est Deo acceptior, quò durior est. Eò obedientia purior est, quò à propria voluntate per ignem adversitatis decoctior est. Hoc bene intellexit magnus ille Abraham, qui Filium suum S. obedientiæ sacrificare non exhorruit. Et quantum inde Deo non placuit? Pater credentium factus est. Hoc non ignorârunt S. Apostoli, qui ad imperium Christi inter persecutiones, & mortes Evangelium prædicarunt. Et quantum inde promeriti sunt præmium? Principes cœli, & terræ constituti sunt. Hæc ergo obedientia in duris, & contrariis rebus est via, per quam itur ad Deum. Hæc crux est Monachi, quam tollere tenetur, & Christum sequi. Hæc patientia est, quam cum Christo pati oportet Religiosum, & ita intrare ingloriam suam. Sequere ideo Verbum Incarnatum, dura, & aspera imperia patienter exequere!

PUNCTUM QUARTUM.

Quis poterit unquam, ô Verbum Incarnatum! comprehendere consilia sapientiæ tuæ? Magnifico, & exalto te in æternum. Utinam digne possem adorare te, quantum mereris, ô Salus animæ meæ! tu enim te subdis, tu obtemperas Principi terrenò,

reno, superbo, avaro; & ego Superioribus probis obedire recuso. Tu obedis in iis circumstantiis, ubi imperium irrationabile, injustum, & intolerabile est; & ego salutaribus, justis, ac rectis præceptis obtemperare detrecto. Tu obedis in re molestissima, incommoda, & undequaque te indigna; & ego subinde ex mera malitia etiam commodam obedientiam implere renuo. Ah! quousque devenit superbia mea? Quamdiu humilitatem, & obedientiam tuam spernam, & contemnam? Frustra ergo, ô Verbum Incarnatum! pro me carnem assumpseris? Frustra mihi exemplum obedientiæ in catæne mortali demonstraveris? O piissime Domine! Absit hæc ingratitudo inhumanissima à me! te unice sequi opto. Ad tuum exemplum obedire desidero. *O Emmanuel, Rex & Legisfer noster, expectatio gentium, & Salvator earum; veni ad salvandum nos, Domine Deus noster!* ô Rex obedientium regna super me! ô Legisfer meus! tuam voluntatem in voluntate Superioris semper adimplebo! ô expectatio gentium! te exspecto, libera me à dura cervice, libera me à propria voluntate, & judicio, libera me ab inobedientia, quam à primis parentibus meis hæreditavi. An igitur, ô anima mea! obedies ad exemplum Verbi Incarnati Superiori etiam discolo? Qui vos audit, me audit. An obedies judicium tuum judicio Superioris in omnibus licitis submittendo? Qui vos spernit,
me

me spernit. An obedies Superiori in rebus duris, & contrariis? Non veni facere voluntatem meam, sed ejus, qui misit me, Patris. Dole, quòd tam illustre Verbi Incarnati exemplum in obedientia contempseris. Propone

1. Superiori Discolo,
2. Judicio tuo mortificato,
3. In rebus duris obedire.



DIES XXV.

IN GRATIOSA NATIVITATE D. N.
J. CHRISTI.

De Imitatione Neonati Salvatoris.
Sequatur Christum. Cap. 4. Instr. 10.

PUNCTUM PRIMUM.

FACTUM est autem, cum essent ibi, impletum est tempus, ut pareret. Ecce! quomodo Deus Pater Verbum fecit abbreviatum. Vis nôsse, quàm longum, quàm breve fecit? Cœlum (inquit hoc Verbum) & terram ego impleo. Nunc caro factum de intemerato Virginis utero sine læsione Virginalis integritatis procedens in angusto locatur præsepio. A sæculo, ait Propheta, & in sæculo tu es Deus: & ecce! factus est infans diei unius. Ad quid hoc, aut quæ necessitas fuit, ut sic exinaniret se, sic humi-

miliaret se, sic abbreviaret se Dominus Majestatis, nisi ut nos similiter faciamus? Jam clamat exemplo, quod postmodum prædicaturus est verbo: discite à me; quia mitis sum, & humilis corde: ut verax inveniat, qui dicit: cœpit JESUS facere, & docere. Non patiamur proinde sine causâ tam pretiosum exemplar nobis exhibitum esse, sed conformemur illi, ad mentem Ss. Patris, *sequamur Christum*, & renovemur Spiritu mentis nostræ. Studeamus humilitati, quæ fundamentum est, custosque virtutum. Sedtemur illam, quæ sola potest salvare animas nostras. Quid enim magis indignum, quid detestandum amplius, quid gravius puniendum, quàm ut videns Deum cœli parvulum factum, ultrâ apponat homo magnificare se super terram? intolerabilis impudentiæ est, ut ubi sese exinanivit Majestas, vermiculus infletur, & intumescat. O JESU parvule! ô JESULE humillime! ô JESULE suavissime! adoro te; gratias tibi ago, quòd ita te amore mei exinanire dignatus es. O quàm amabilis es mihi; dum ita parvulum, & mitem te conspicio, Magne Deus, Summe Deus, Deus immense! in manus meas te recipio, nec dimittam te; donec benedixeris mihi, ut & ego unus ex parvulis illis fiam, quorum est regnum cœlorum.

PUNCTUM SECUNDUM.

ET pannis eum involvit. Considera circumstantias hujus Nativitatis, ut *sequa-*

vis Christum. Pro te enim faciunt, tibi apponuntur, tibi proponuntur ad imitationem. Hyeme natus est. Nunquid credis casu factum, ut in tanta aëris inclementia, in tenebris, in aperto stabulo nasceretur, cujus est hyems, & æstas, dies & nox, cœlum & terra? Non eligunt cæteri parvuli, quando nascantur; quippe quibus adhuc vix incipientibus vivere nullus subest rationis usus, nulla eligendi libertas, facultas nulla deliberandi. At Christus etsi homo erat, erat tamen in principio apud Deum, & Deus erat ejusdem, cujus nunc est, Sapientiæ, & potestatis, utpote Dei virtus, & Dei Sapientia. Nasciturus itaque Dei filius, (cujus in arbitrio erat, quodcunque vellet eligere tempus,) elegit quod molestius est, præsertim parvulo, & pauperis matris filio, quæ vix pannos haberet ad involvendum, præsepe ad reclinandum. Et cum esset tanta necessitas, nullam audio pellium fieri mentionem. Primus Adam pelliceis vestitur tunicis, pannis secundus involvitur. Non est tale judicium mundi. Aut iste fallitur, aut mundus errat. Sed divinam falli Sapientiam impossibile est. Merito proin & carnalis prudentia, (mors siquidem & ipsa) inimica est Deo, & sæculi quoque prudentia stultitia nominatur. Quid enim? Christus qui utique non fallitur, elegit, quod carni molestius est. Id ergo melius, id utilius, id potius eligendum: & quisquis aliud docet

vel suadet, ab eo tanquam à seductore cavendum. O Jesule! ô amor animæ meæ! Amo te, laudo te, benedicite in æternum. Jam non quod carni meæ, sed quod tibi placeat, eligo. Te, ô parvule! sequi volo omnibus diebus vitæ meæ, ut crescam tecum ætate, & Sapientia.

PUNCTUM TERTIUM.


ET reclinavit eum in præsepio. Quando? Nocte. Cur nocte? Nocte voluit nasci, ut damnaret ostentationem mundi. Christus elegit, quod salubrius judicat, tu eligis, quod reprobat ille. Quis prudentior è duobus. Cujus judicium justius? Cujus sententia sanior? Tacet Christus, non se extollit, non prædicat, & ecce, annunciat eum Angelus, laudat multitudo cœlestis exercitus. Et tu ergo juxta monitum Ss. Patris tui, *Christum sequere*, inventum absconde thesaurum. Ama nesciri, laudet te os alienum, sileat tuum. Ubi nascitur? In stabulo? Ubi reclinatur? In præsepio. Et nonne ipse est, qui dicit: meus est orbis terræ, & plenitudo ejus! Quid ergo stabulum, quid præsepe elegit? Plane ut reprobet gloriam mundi, damnet sæculi vanitatem. Necdum lingua loquitur, & quæcumque de eo sunt, clamant, prædicant, evangelizant. O sapientia, quæ de occultis traheris! ô verè Incarnata, & velata Sapientia! tu es promissus per Isaiam parvulus, sciens reprobare
ma-

malum , & eligere bonum. Sic ergo malum est voluptas corporis , bonum vero afflictio est. Sic malum est iūperbia vitæ , bonum vero humilitas est. Siquidem & hanc eligis , & illam , reprobas puer sapiens , verbum infans ! ô Verbum Caro factum , caro infirma , caro infantilis , caro tenera , caro impotens omnis operis , omnis laboris impatiens ! millies te exaltent , & magnificent pro me omnes Angeli , & sancti Dei ! te sequi volo usque ad mortem.

PUNCTUM QUARTUM.

AN ergo , ô Religiose ! humilitatem JEsuli amplecteris ? Qui se humiliat , exaltabitur. An cum JEsulo prudentiam carnis damnas ? Abneget semetipsum. An cum JEsulo vanitatem mundi contemnis ? Fugite mundum. Dole , quèd JEsulum parvulum secutus non fueris. Propone illum sequi

1. In humilitate ,
2. In Asperitate vitæ ,
3. In contemptu mundi.



DIES XXVI.

IN FESTO S. STEPHANI PROTO-
MARTYRIS.

De vera S. Stephani dilectione erga inimicos suos.

Inimicos diligere. Cap. 4. Instr. 31.

U 2

Pun-

PUNCTUM PRIMUM.

Stephanus plenus gratia, & fortitudine faciebat prodigia, & signa magna in populo. Surrexerunt autem quidam de Synagoga disputantes cum Stephano, & non poterant resistere sapientiæ, & Spiritui, qui loquebatur. Redarguebantur enim ab eo cum omni fiducia. Et cur duros cervice, refractarios Spiritûs sancti, incircumcisos corde, homicidas Salvatoris appellat? Plane non ex odio, sed ex magna charitate, ut correpti se emendent, ac emendati salventur. Nonne hæc vera est dilectio inimicorum? Hi mortem ipsi machinabantur. Ipse vitam illis offerebat. Nonne ipse onus totum ipsorum portabat; quando onus peccatorum, maxime homicidii ab ipsis tollere, & amputare satagebat? Nonne omnem legem charitatis adimplebat; quando Magistrum charitatis secutus in lenitate, & mansuetudine Fratres suos corripiebat? Sequere igitur Protomartyrem, *dilige inimicos*, ut Ss. Pater tuus jubet, corripe ipsos, ut salves correctione fraterna animas eorum.

PUNCTUM SECUNDUM.

ET lapidabant Stephanum invocantem, & dicentem: Domine Jesu accipe Spiritum meum: positis autem genibus exclamavit voce magna dicens: Domine! ne statuas illis hoc peccatum. O maximam & sinceram dilectio-

lectionem inimicorum orare pro ipsis! ne tu dicas, inimicum habeo scelestum, corruptum, incorrigibilem; non est major illis, quos diligit, & pro quibus orat S. Stephanus. Nondum enim eripuit tibi vitam, quod faciunt Judæi illi. Orat tamen pro inimicis, avertit iram Dei ab eis; & tu ob levem injuriolam nonnisi magnam vindictam spiras; optas, ut à Deo castigetur inimicus tuus. Estne hoc *inimicum diligere*, quod præcipit Ss. Pater tuus? Estne hoc amare proximum sicut semetipsum, quandoquidem ei facis, & optas, quod tibi ipsi fieri minime velles? Quomodo remissionem peccatorum obtinebis, si non dimiseris ex corde inimico tuo? Quomodo aliquam à Deo gratiam per orationes tuas obtinebis, si non consentias cum inimico tuo? Quomodo vita vives, si non diligas?

PUNCTUM TERTIUM.


TEstes deposuerunt vestimenta sua secus pedes adolescentis, qui vocabatur Saulus. Nullum infensorem hostem habuit S. Stephanus, quàm Saulum istum, qui, ut in omnium manibus esset, & lapidaret, omnium vestimenta servavit. Sed quam retributionem retulit ab amantissimo Stephano? Egregiam, & mirabilem conversionem, ut ex lupo in Agnum, ex persecutore in Apostolum, ex vase reprobationis in vas electionis mutaretur. Omnes enim Patres istam S.

Pauli conversionem precibus B. Stephani adscribunt. Ita benefecit ei, qui oderat se. Merito igitur vidit gloriam Dei, qui ita ut Pater cœlestis perfectus fuit, qui solem suum facit oriri super bonos, & malos. Tu non videbis, nisi ipsius exemplum, & Ss. Patris tui monitum secutus *tuos inimicos similiter dilexeris*. Nemo enim in cœlum assumitur, nisi perfectus. Nil coinquinatum intrabit in Regnum cœlorum.

PUNCTUM QUARTUM.

AN ergo, ô Religiose! verè diligis inimicos tuos? Corripe illum inter te, & ipsum solum; & salvabis animam ejus. An verè diligis inimicos tuos? Ora pro persecutibus te. An verè diligis inimicos tuos? Benefac his, qui oderunt te. Dole, quod veram dilectionem inimicorum hucusque non habueris. Propone S. Stephanum imitari

1. Corripiendo in charitate, & mansuetudine inimicos tuos,
2. Orando pro ipsis,
3. Benefaciendo illis.



DIES XXVII.

IN FESTO S. JOANNIS EVANGELISTÆ.

De præcipuo amore Jesu erga S. Joannem.
Non unus plus ametur, quàm alius; nisi quem in bonis actibus invenerit meliorem.

Cap. 2. v. 12. & 13.

Pun-

PUNCTUM PRIMUM.

JESUS sanctum Joannem præ cæteris Apostolis dilexit, quando ei in ultima cœna supra pectus suum requiescere concessit. Meruit hunc specialem amoris affectum ob speciale studium cognoscendi Divinitatis, & Humanitatis mysteria. Ipse hac de causa copiosius fluente Evangelii de ipso sacro Dominici pectoris fonte potavit. Ipse Divinitatem verbi nobis patefecit: in principio erat Verbum, & Verbum erat apud Deum. Ipse ante omnes Dominum in littore post Resurrectionem suam stantem agnovit: Dominus est. An sequeris JESUM? An imples illud Ss. Patris tui: *non unus plùs ametur, quàm alius; nisi quem in bonis actibus invenerit meliorem?* Plane ordinata charitas requirit, ut eò plùs proximum diligamus, quò plùs de bonitate Dei participat. Ordinata charitas requirit, ut eò amplius proximum diligamus, quò magis à Deo diligitur. Etenim proximum in Deo, & propter Deum diiigere oportet.

PUNCTUM SECUNDUM.

JESUS præ cæteris Apostolis dilexit Joannem; unde in cruce illi propriam Matrem in suam Matrem dedit: ecce Mater tua. Meruit hanc amoris prærogativam, quia Virginitatem illibatam conservavit. Debuit enim Virgo non alteri, quàm Virgini commendari. An sequeris charitatem JESU? An observas

illud Ss. Patris tui: *Non unus plus ametur, quàm alius, nisi quem in bonis actibus invenerit meliorem?* Si alia de causa plus diligis, personarum acceptor es. Nec parvi te rerum peccati existimes contra charitatem, si facies peccatorum fumis, & non potius diligis gratiam meritorum in justis. Eorundem plane vitiorum te reum facis, propter quæ diligis proximum tuum. Prævaricator cognosceris illius præcepti, quo juberis odisse peccatorem, & iniquitatem ejus. Ergo dilige justum propter justitiam suam, & quo justior est, eo charior tibi sit. Naturaliter enim plus amamus id, quod melius est: Quanto magis supernaturaliter plus amemus id, quod secundum Deum, & gratiam ejus melius est?

PUNCTUM TERTIUM.

Jesus præ cæteris Apostolis dilexit Joannem; unde in pace animam ejus jam senio confecti suscepit. Meruit hunc specialem amorem; quia dolores, & angustias mortis jam semel sub cruce stans toleravit. An sequeris charitatem JESU? An adimpleas illud Ss. Patris tui: *Non unus plus ametur, quàm alius, nisi quem in bonis actibus invenerit meliorem?* Si alia de causa plus diligis, vitium familiaritatis incurris. Unde enim nascitur amor inordinatus, & nimia animorum conjunctio, quàm ex familiaritate? At prò! quàm infelices fructus gignit impia ista mater? Odia, dis-

diffensiones, scandala, mille suspiciones, & perturbationes fuscitat. Hinc est, quòd Ss. Patertam severe prohibeat, *ne quavis occasione prasumat alter alterum defendere Monachum in Monasterio, aut quasi tueri.* Nul- lum igitur alia de causa magis dilige, quàm majorum meritorum gratia.

PUNCTUM QUARTUM.

AN ergo, ô Religiose! omnes æqualiter diligis exceptis iis, qui in actibus bonis meliores sunt? Petrus vidit discipulum illum, quem diligebat Jesus. An non ex acceptione Personarum unum plus altero diligis? Apud Deum non est personarum acceptio. An non ex familiaritate unum plus alio diligis? Dili- ges proximum tuum, sicut teipsum. Dole, quòd sæpius contra præceptum charitatis fra- ternæ peccaveris. Propone

1. Omnes æqualiter diligere, nisi quos in actibus bonis inveneris meliores, & ideo
2. Neminem ex acceptione personarum,
3. Aut ex familiaritate plus amare.



DIES XXVIII.

IN FESTO SS. INNOCENTII.

Quòd passio prædominans sit mortifi-
canda; quia est periculosa, pernicio-
sa, & exitialis.

Abnegare semetipsum sibi. Cap. 4. Instr. 10.

U

Pun-

PUNCTUM PRIMUM.

MERITO Ss. Pater jubet, *abnegare semetipsum sibi*: nam passio prædominans, si non mortificetur, est periculosa. Exemplum cape ab Herode. Rex erat ambitione plenus; hinc cum intellexisset ex Magis, Regem Judæorum natum esse, mox turbatus est. Et quanta exinde pericula non incurrit? Misit illos in Bethlehem, ut reversi renunciarent sibi inventum Regem. Ad quid! non ut adoraret, sed ut interficeret eum. Haud aliter & tua passio, quæ te præ cæteris infestat, tibi periculosa est. Christum in corde tuo enecat: animam tuam occidit, si eandem secutus fueris. Ex hac enim radice peccatum pullulat. Peccatum autem mortem invehit. Ideo Cain dicitur; appetitus tuus erit sub te, tu dominaberis illi. Nisi enim continua impugnatione passio prædominans eradicetur, statim in foribus aderit peccatum, & secus introitum delectationis mors posita erit.

PUNCTUM SECUNDUM.

RECITE jubet Ss. Pater, *abnegare semetipsum sibi*; nam passio prædominans, nisi mortificetur, perniciofa est. Vide, quot scelerum causa fuerit, atque damnorum ambitio Herodis. Videns, quod illusum esset à Magis, iratus est valde; & mittens occidit omnes pueros, qui erant in Bethlehem & in om-

omnibus finibus ejus à bimatu, & infra, secundum tempus, quod exquisierat à Magis. Haud minora damna infert animæ tuæ tua passio prædominans. Ipsa enim causa est omnium peccatorum tuorum. Unde hanc si sustuleris, fontem cæteris obstruxisti. Hanc, quamdiu foveris, à cæteris vitiis quoque numquam immunis eris. Hinc prima pugna contra passionem, quæ te magis infestat, assumenda est. Hac devicta semper infensior rursus extirpanda venit. Hunc ordinem pugnandi contra hostes animæ nostræ nos docuit Dominus; quando ait: non timebis eos; quoniam Deus tuus in medio tui est. Deus magnus, & terribilis consumet nationes has in conspectu tuo paulatim, atque per partes. Non poteris eas delere pariter, ne forte multiplicentur contra te bestię terræ. Dabitque eos Dominus Deus tuus in conspectu tuo; & interficies eos, donec penitus deleantur. Nî ergo velis cum Herode in profundum peccatorum venire, abnega temetipsum.

PUNCTUM TERTIUM.

Iuste præcipit Ss. Pater noster, *abnegare semetipsum sibi*; nam passio prædominans, nisi mortificetur, exitialis est. Aspice exitum Herodis. In peccato suo mortuus est. Sub altare Dei enim auditæ sunt voces occisorum dicentium; quare non defendis sanguinem nostrum? Et acceperunt Divinum responsum? Adhuc sustinete modicum tempus,

pus, donec impleatur numerus fratrum vestrorum. Haud alium exitum & tu habebis, si passionem dominantem secutus, malam ejusdem consuetudinem contraxeris. Qualis enim affectio non assiduitate duratur? Quantis, quod præ amaritudine prius exhorrebant, usu ipso in dulce conversum est? Audi justum, quid lamentetur super hujusmodi: quæ prius tangere nolebat anima mea, nunc præ angustia cibi mei sunt. Primum importabile tibi videbitur peccatum prædominantis passionis tuæ: processu temporis, si assuescas, non judicabis adeo grave, paulo post & leve senties, paulo post nec senties, paulo post etiam delectabit. Ita paulatim in cordis duritiam itur, & ex hac in damnationem perpetuam. O Jesule! per sanguinem Ss. Parvulorum vindica me ab hoste meo, à prædominante passione mea, ne in peccatis meis moriar.

PUNCTUM QUARTUM.

AN ergo, ô Religiose! abnegas passionem prædominantem ob ejus pericula? Concepit dolorem, & peperit iniquitatem. An abnegas passionem prædominantem ob ejus perniciem? Vir peccator adjiciet ad peccandum. An abnegas passionem prædominantem ob ejus exitium? Vultus Domini super facientes mala, ut perdat de terra memoriam eorum. Dole, quod passionem tuam prædominantem post tot annos in schola mortificatio-

cationis consumptos nondum extirpaveris:
Propone eandem penitus delere

1. Ob ejus pericula,
2. Ob ejus perniciem,
3. Ob ejus exitium.

~~~~~

DIES XXIX.

**Christus natus annuntiatur Pa-**  
**storibus.**

**De Divinis Judiciis in Pastoribus de-**  
**monstratis.**

Deum timeant. Cap. 72. v. 9.

**PUNCTUM PRIMUM.**

**P**Astores erant in regione eadem vigilantes,  
& custodientes vigiliis noctis, super gre-  
gem suum, & ecce Angelus Domini fletit  
juxta illos. Quibus se revelat Christus? Non  
ambitioso, & superbo Herodi, sed humilibus  
Pastoribus. Deus enim superbis suam gra-  
tiam denegat, humilibus autem dat gratiam.  
Time vero & contremisce, subtracta gratia  
tanquam mox casurus. Time; quia reliquit  
te custodia tua. Nec dubites in causa esse su-  
perbiam, etiamsi non appareat, etiamsi ni-  
hil tibi conscius sis. Quod enim tu nescis,  
scit Deus, & qui te judicat, ipse est, qui  
ob superbiam tuam occultam gratiam suam  
tibi subtrahit. Nam neque qui seipsum com-  
mendat, ille probatus est, sed quem Deus  
com-

commendat. Nunquid commendat te Deus, cum gratia privat? Aut nunquid qui humilibus dat gratiam, auferet datam? Ergo argumentum superbiæ, privatio est gratiæ. Unde non minima est gratia, si ne superbiamus subtrahitur cordis pax aut sensibilis gratia devotionis. Habes hujus rei evidens documentum de Apostolo, qui stimulos carnis suæ sustinebat invitus, non quia extollebatur, sed ne extolleretur. Sed sive jam existens, sive nondum superbia tamen semper erit in causa subtractæ, aut suspensæ qualiscunque demum gratiæ. Hinc *Deum timeas*, ut hortatur Ss. Pater, ne te ut superbum Herodem gratia prætereat.

#### PUNCTUM SECUNDUM.

**ET** claritas Dei circumfulsit illos, & timuerunt timorem magno. Cui revelatur Christus? Non prudentibus secundum carnem Phariseis, sed simplicibus Pastoribus. Cum simplicibus quippe sermocinatio ejus. Ibi Salvator lumen suum admirabile infundit, ubi simplicitas fidei corda purificat, & illuminatos reddit oculos cordis. Ubi enim oculus tuus lucidus fuerit, totum corpus lucidum erit. Hanc lucem habere nequeunt, qui duntaxat suæ rationi innituntur. Hac luce indigni sunt, qui non nisi experimento sensum credunt. Hac luce privantur, qui Divina Mysteria superbe perscrutari volunt. Tu *Deum timeas*, ut simpliciter cum Pasto-  
bus

bus credas, ne gratia Salvatoris, quæ omnibus hominibus apparuit tibi soli non appareat.

PUNCTUM TERTIUM.

**E**Vangelizo vobis gaudium magnum, quod erit omni populo; quia natus est vobis hodie Salvator. Et hoc vobis signum: invenietis infantem pannis involutum, & positum in præsepio. Cui se revelat Salvator? Non hominibus carnalibus, aut divitibus, sed vigilantibus, & pauperibus Pastoribus. Væ vobis divites, & carnales homines, qui habetis consolationem vestram, ut jam non mereamini habere cœlestem. Quam multi enim nobiles secundum carnem hora illa in stratis molliibus quiescebant, & nemo eorum dignus habitus est, novam videre lucem, scire magnum illud gaudium, Angelos audire cantantes: gloria in excelsis Deo, & in terra pax hominibus bonæ voluntatis. Agnosce igitur, ô homo? quia qui in labore hominum non sunt, visitari ab Angelis non merentur. Agnosce, quàm placeat supernis civibus paupertas, & labor, cujus spiritualis intentio est; quando quidem & eos, qui pro victu corporis, corporali urgente necessitate laborant, suo dignantur alloquio, & alloquio tam felici. Nimirum humanam in eis agnoscunt ordinationem, qua constituit Deus, ut in sudore vultûs sui vescatur Adam pane suo. *Timeas ergo Deum*, ne per otium, & carnalem re pausationem amittas claritatem lucis




cis increata. O JESU mi dulcissime ! illumina me, ut cognoscam te, & me, & amem te semper super me, & omnia solum; quia Deus meus es.

### PUNCTUM QUARTUM.

**A**N ergo, ô Religiose ! times divina judicia, & humilitatem amplecteris, ut gratiam Salvatoris obtineas ? Humilibus dat gratiam. An times divina judicia, & simplicitatem amplecteris, ut gratiam Salvatoris obtineas ? Benefacit Dominus bonis, & rectis corde. An times divina judicia, & laborem amplecteris, ut gratiam Salvatoris obtineas ? In sudore vultus tui vesceris pane tuo. Dole, quod timorem divinorum judiciorum non semper ante oculos habueris. Propone eadem expavescere, & ideo

1. Te humiliare,
2. Simplificare,
3. Laborare.



### DIES XXX.

De Cantu Angelico, Gloria in excelsis Deo.

Non nobis Domine, non nobis ; sed Nomini tuo da gloriam. Prolog. v. 23.

Pun-

## PUNCTUM PRIMUM.

ET subito facta est multitudo militiæ celestis exercitus laudantium Deum: gloria in excelsis Deo, & in terra pax hominibus bonæ voluntatis. Optima sane partitio est, quod Deo gloriam, nobis autem pacem angeli annuncient. Ad hanc gloriam Deo tribuendam & Ss. Pater nos hortatur, cum ait: *non nobis Domine, non nobis, sed Nomini tuo da gloriam.* Et merito. Origo fontium, & fluminum omnium sicut mare est; ita virtutum & scientiarum Dominus est. Quis enim Dominus virtutum, nisi ipse est Rex gloriæ? Sed & juxta Annæ canticum, idem ipse Deus scientiarum Dominus est. Continentia carnis, cordis industria, voluntatis rectitudo ex illo fonte manant. Non solum autem, sed & si quis callet ingenio, si quis nitet eloquio, si quis moribus placet, inde est. Inde scientiæ, inde sapientiæ sermo est. Thesauri siquidem sapientiæ, & scientiæ ibi omnes absconditi sunt. Quid casta consilia, iusta iudicia, sancta desideria, nonne fontis illius rivuli sunt? Quod si copiæ aquarum secretis, subterraneisque recursibus incessanter æquora repetunt, ut inde rursus ad visus, usque nostros jugi, & infatigabili erumpant obsequio: cur non etiam spirituales rivi, ut arva mentium rigare non desinant, proprio fonti gloriæ divinæ sine fraude, & sine intermissione reddantur? Pacem non habebit, qui gloriam

*Spir. S. Ben. P. IV. X riam*

riam Deo non tribuit. Zelatur enim Deus honorem suum.

### PUNCTUM SECUNDUM.

**G**Loria in excelsis Deo, & in terra pax hominibus bonæ voluntatis. Justissima angelorum ista partitio est. Putas enim, tu habes aliquid, quod non accepisti? Si ergo accepisti, vide, ne non integre dona tua resignes Deo, ejusque gloriæ deputes, & tibi inflectens aliquid de gloria, & honore ipsius, fraudis juste arguaris, & fraudis in Deum. Si namque de aliquo te jactas, aut ex te tibi quicquam arrogas, fraudas Deum sua gloria, suo honore. Et quomodo exinde cum Ss. Patre tuo ex Propheta dicere poteris; *non nobis Domine, non nobis; sed Nomini tuo da gloriam*; Quid respondebis Apostolo præscribenti, & dicenti; soli Deo honor, & gloria? Si nihilominus dicis, labiis quidem Deum honoras, sed ex cordis sententia temetipsum. Sed nunquid pacem habebis, si Deum sua gloria defraudes: Quis restitit ei, & pacem habuit? Audies plane. Existimasti inique, quod ero tui similis? Arguam te, & statuam contra faciem tuam.

### PUNCTUM TERTIUM.

**G**Loria in excelsis Deo, & in terra pax hominibus bonæ voluntatis Non nova, sed antiqua ista angelorum partitio est. Joseph, cum domum, & omnia bona Ægypti  
sui

sui Domini sibi credita sciret, dominam non ignoravit exceptam, & ob hoc non acquievit contingere. Non est, inquit, ex omnibus bonis Domini mei, quod non in mea potestate sit, vel non tradiderit mihi, præter te, quæ uxor ejus es. Mulierem noverat gloriam esse viri, & iniquum sibi judicavit vice contraria inglorium facere eum, qui se fecerat gloriosum. Quid ergo? Homo zelat gloriam suam, & Deum audet velle fraudare de sua quasi non zelantem? sed audi, quid dicat? gloriam meam alteri non dabo. Quid ergo dabis Domine, quid dabis nobis? Pacem, inquit, do vobis, pacem relinquo vobis. Sufficit mihi: gratanter suscipio, quod relinquis, & relinquo, quod retines. Sic placeat, sic mea interesse non dubito. Abjuro gloriam prorsus, ne forte, si usurpavero non concessum, perdam merito & oblatum. Pacem volo, pacem desidero, & nihil amplius. Cui non sufficit pax, non sufficis tu. Tu es enim pax nostra, qui fecisti utraque unum. Hoc mihi necessarium, hoc satis est, reconciliari tibi, reconciliari mihi. Nam ex quo posuisti me contrarium tibi, factus sum etiam mihi metipsi gravis. Cautus sum, ne ingratus sim beneficio datæ pacis, nec sacrilegus inuasor gloriæ tuæ. Tibi Domine! tibi gloria tua maneat illibata, mecum bene agitur, si pacem habuero. Omnes cogitationes, verba, & opera, ô JESU parvule! resonent ex corde, ore, & opere: *non nobis, Do-*



*mine! non nobis; sed Nomini tuo da gloriam,*  
ut pace tua fruar in æternum.

### PUNCTUM QUARTUM.

**A**N ergo, ô Religiose! ut pacem coram Deo reperiās, gloriam illi tribuis; quia omnia bona ab eo recepisti? Qui gloriatur, in Domino gloriatur. An ad conservandam pacem gloriam Deo tribuis, ne Deum sua gloria defraudes? Abominatio Domini est omnis illusor. An gloriam Deo tribuis ad fruendum pace ejus; quia zelatur gloriam suam? In igne zeli sui devorabit omnem terram. Dole, quod gloriam Dei tibi usurpando toties pacem amiseris. Propone Deo gloriam in omnibus dare, ut pacem illius possideas;

1. Ne origini Deo tuo non omnia bona adscribas;
2. Ne Deum sua gloria defraudes;
3. Ne cogas Deum in te gloriam suam zelari.



### DIES XXXI.

### Recollectio Menstrua.

#### De ultimo anni Die.

Propter emendationem malorum hujus dies  
vitæ nobis ad inducias relaxantur.

Prolog. §. 3. v. 28.

Pun-

## PUNCTUM PRIMUM.

**M**Axime hoc die ultimo anni te cum Ss. Patre tuo confer in desertum Sublacenſe. Forſan ultimus vitæ tuæ eſt. Quod ſi eſſet, quidnam optares te hoc anno, hoc menſe feciſſe? Cogita igitur, quomodo hoc menſe præcipue obligationi tuæ erga Deum ſatiſfeceris; An Neonatum Salvatorem ſecutus es in humilitate, aſperitate vitæ, & contemptu mundi? Qui ſequitur me, non ambulat in tenebris; ſed habebit lumen vitæ. An ſtudiſti divinam voluntatem adimplere per abnegationem propriæ voluntatis, per obſervantiam præceptorum Dei, & S. Regulæ, per patientiam in adverſis? Non veni facere voluntatem meam, ſed ejus, qui miſit me. An fide intellectum ſanctificaviſti, voluntatem moviſti, & eor virtutibus exornaviſti? Nonne anima mea ſubjecta erit Deo? An intimo gratitudinis affectu beneficia divina recogitaſti? Gratias agere debemus ſemper Deo. An Deo gloriam in omnibus tribuiſti, ut pacem coram eo reperires? Gloriam meam alteri non dabo. An divina judicia in Paſtoribus demonſtrata expaviſti? Cum ſimplicibus ſermocinatio ejus. An odiſti peccatum? Ecce Agnus Dei, ecce, qui tollit peccatum mundi. An lacrymas fudiſti ad purificandam animam? Paulus Domino ſerviebat cum omni humilitate, & lachrymis. An mox poſt lapſum ſurrexiſti, & at-

tendisti tibi soli, ne rursus peccares? Nonne anima plus est, quam esca? Prô! jam iterum transiit annus, mensis. Jam hoc anno, mense morti proximior sum. Ubi pœnitentia mea? Ubi emendatio mea? Ubi profectus meus? Dole anima mea, quod obligationi tuæ erga Deum hoc anno, hoc mense minime satisfeceris. Propone saltem in futuro te emendare. Ad hoc serio tecum pensa illud Ss. Patris tui: *Propter emendationem malorum hujus dies vitæ vobis ad inducias relaxantur.*

#### PUNCTUM SECUNDUM.

**H**odie ultimus dies anni, & mensis est, & forsân ille, in quo respondebo Judici meo de singulis momentis ejus. Sed quomodo, aut quid respondebo? Nunquid gratiis in Religione acceptis respondi? An obligationi meæ erga Religionem satisfeci? An non, quia vota mea non perfeci, violavi; Deum irrisi? Ab eo se damnandum sciat, quem irridet. An per paupertatem ad veras divitias pervenire studui? O quam dives fuit pauper ille Lazarus, qui post mortem suam meruit in sinu Abrahamæ requiescere! an obedivi Superiori discolor in rebus duris? Qui vos audit, me audit. An amavi cellam? Solitudinem amare debet, quisquis Deo vivere cupit. An non sine præparatione, distracte, & sine affectu psalli? Maledictus, qui facit opus Dei negligenter.

An

An agnovi utilitatem, necessitatem correptionum, & ideo eas desideravi? Melior est manifesta correptio, quam amor absconditus. Prô! rursus transiit annus, transiit mensis. Nunc isto anno, isto mense propinquior sum durissimo illi judicio. Fors hac die adhuc audiam: jam non poteris villicare. Redde rationem villicationis tuæ! ah! quam reddam! Miserere mei Deus secundum magnam misericordiam tuam, & secundum multitudinem miserationum tuarum dele iniquitatem meam. Agnosco enim iniquitatem meam; quia non satisfeci obligationi meæ erga religionem. Agnosco, quia cum tempore transeo, & eo in domum æternitatis meæ. Ah! saltem hac vice adhuc concede mihi spatium pœnitentiæ. Propono sequenti mense, & anno me emendare. In hunc finem semper cogitabo illud Ss. Patris mei: *Propter emendationem malorum hujus dies vitæ nobis ad inducias relaxantur.*

### PUNCTUM TERTIUM.

**H**odie ultimus hujus anni & mensis dies est, & forsan ille, in quo Remunerator meus laborem vitæ meæ, & charitatem meam remuneraturus est. An mercedem secure exspecto? An charitatem habeo? An ordinabiliter, & sociabiliter, ac humiliter in congregatione vixi? Ecce quam bonum,



& quam jucundum habitare Fratres in unum. An inimicis ignovi, dolentes consolatus sum. Fratres corde, ore, opere dilexi? Qui non diligit, manet in morte. An solum propter merita, unum altero plus dilexi? Apud Deum non est personarum acceptio. Sic ergo denuo annus, mensis abiit, & ego nihil, aut parum pro coelo egi, quia obligationi charitatis erga confratres meos non satisfeci. O Jesu bone! tu jam clamas ad me; ecce merces mea mecum est! & quæ merces? Utique quam nec oculus vidit, nec auris audivit, nec in cor hominis ascendit. Ah! si metieris mihi eadem mensurâ gloriam, quâ charitatem confratribus meis emensus sum; quàm timeo, ne vel jam clausa mihi sit janua coeli, vel exigua mihi merces remaneat. Eja misericordissime Jesu! indulge mihi adhuc spatium emendationis. Nunc primum vere agnosco, quodvis temporis momentum tantum valere, quantum coelum. Nullum deinceps sine charitate, sine merito transibit. Ideo semper revolvam illud Ss. Patris mei: *Propter emendationem malorum hujus dies vitæ ad inducias nobis relaxantur.*

#### PUNCTUM QUARTUM.

**H**odie ultimus hujus anni, & mensis dies est, & forsan ille, in quo Paterfamilias fru-

fructum ultimo expetet, postquam patienter tot annos arborem infructuosam in terra Sanctorum sustinuit. Quod si nullum repererit, nonne excindet eam, & in ignem mittet? Qualem ergo fructum retuli hoc ultimo anno, mense. An passiones malas, & concupiscentias extirpavi? Vir peccator adjiciet ad peccandum. An linguam tribus seris munivi? In multiloquio non effugietur peccatum. An non sæpe ad inferiora reversus sum? Lumen oculorum meorum, & ipsum non est mecum. An me verè ad omnia indignum, & operarium malum credidi? Qui se humiliat, exaltabitur. An Speculum bonorum operum mundo factus sum? Vos estis lux mundi. En! transiit annus, transiit mensis. Nunquid ut illi, quin in inferno sunt, gemere debeat, & ululare? Ergo erravimus a via veritatis, & justitiæ lumen non luxit nobis, & sol intelligentiæ non est ortus nobis. Lassati sumus in via iniquitatis, & perditionis, & ambulavimus vias difficiles; viam autem Domini ignoravimus. Quid nobis profuit superbia? Aut divitiarum jactantia quid contulit? Transierunt omnia illa tanquam umbra, & tanquam nuncius percurrentes, aut tanquam sagitta emissa in locum destinatum; divisus aër continuo in se reclusus est, ut ignoretur transitus illius: Sic & nos nati continuo desinimus esse: & virtutis quidem nullum signum valuimus

330 *December Dies XXXI. De ult. &c.*

ostendere: in malignitate autem nostra consumpti sumus. O Domine Jēsu! concede mihi per sanctam Nativitatem tuam spatium poenitentiae, ut obligationi erga meipsum satisfacere possim, ne ita æternum gemere cogar. Ad hoc cogitabo illud SS. Patris mei: *Propter emendationem malorum hujus dies vitæ ad inducias nobis relaxantur.*

Ah! parce mihi in æternum.

Hic satisfaciam.

F I N I S.

*Emendationem malorum hujus  
dies vitæ ad inducias nobis relaxantur.*



INDEX



## INDEX P. IV.

### SPIRITUS SS. PATRIS N. BENEDICTI

Seu

Meditationum supra Regulam,  
& Vitam ejusdem Almi Patris  
Nostri.

#### OCTOBER.

|                  |                                                                                                              |         |
|------------------|--------------------------------------------------------------------------------------------------------------|---------|
| <i>Medit. I.</i> | <b>I</b> N Festo SS. Rosarii B. V. M. <i>De puritate, compunctione, &amp; intentione recitandi Rosarium.</i> | Fol. 3. |
| II.              | In Festo SS. Angelorum Custodum. <i>De Angelorum custodia.</i>                                               | 6       |
| III.             | In Dedicatione Ecclesiæ. <i>De Oratorio.</i>                                                                 | 11      |
| IV.              | <i>De incertitudine Mortis.</i>                                                                              | 14      |
| V.               | <i>De Martyrio spirituali.</i>                                                                               | 18      |
| VI.              | <i>De Avaritiæ malo.</i>                                                                                     | 21      |
| VII.             | <i>De probatione Spiritus.</i>                                                                               | 25      |
| VIII.            | <i>De suspicionibus.</i>                                                                                     | 28      |
| IX.              | <i>De Peccato omissionis.</i>                                                                                | 30      |
| X.               | <i>De vitanda anxietate.</i>                                                                                 | 33      |
|                  |                                                                                                              | XI.     |



# INDEX

|                                                                           |     |
|---------------------------------------------------------------------------|-----|
| XI. <i>De Examine Nocturno.</i>                                           | 36  |
| XII. <i>De Alu'ationis vitio.</i>                                         | 40  |
| XIII. <i>De crebra lectione S. Regula.</i>                                | 43  |
| XIV. <i>Quidnam Monachus in itinere vitare debeat.</i>                    | 46  |
| XV. <i>De præsumptione vitanda.</i>                                       | 49  |
| XVI. <i>De mutua Obedientia.</i>                                          | 52  |
| XVII. <i>De vera devotione,</i>                                           | 56  |
| XVIII. <i>De selectu L brorum.</i>                                        | 59  |
| XIX. <i>Quod Deus velociter adest his, qui in veritate quærunt illum.</i> | 62  |
| XX. <i>De Timore incomprehensibilem iudiciorum Dei.</i>                   | 65  |
| XXI. <i>De fuga peccati ob illius nocumenta.</i>                          | 68  |
| XXII. <i>De consuetudine mala.</i>                                        | 72  |
| XXIII. <i>De Homine interiore.</i>                                        | 75  |
| XXIV. <i>De vivacitate fidei.</i>                                         | 79  |
| XXV. <i>De sui diffidentia.</i>                                           | 82  |
| XXVI. <i>De felicitate Pacificorum.</i>                                   | 85  |
| XXVII. <i>De perfectiorum Religiosorum tentationibus.</i>                 | 89  |
| XXVIII. <i>De afflictione iustorum.</i>                                   | 92  |
| XXIX. <i>De dignis Pœnitentiæ fructibus.</i>                              | 95  |
| XXX. <i>De Amicitia.</i>                                                  | 99  |
| XXXI. <i>Recollectio menstrua.</i>                                        | 102 |

## NOVEMBER.

|                                                          |     |
|----------------------------------------------------------|-----|
| I. In Festo Omnium Sanctorum. <i>De Cultu Sanctorum.</i> | 105 |
| II. In                                                   |     |

## P A R T I S. IV.

- II. In Commemoratione Omnium fidelium Defunctorum. De consolando animas in Purgatorio dolentes. 109
- III. De exercitio amoris Dei. 112
- IV. De tribus patientiæ gradibus. 116
- V. De mediis conservandi castitatem usque ad mortem. 120
- VI. De exercitio voti castitatis. 124
- VII. De sublimi Religiosorum statu. 127
- VIII. De periculosa Religiosorum ruina. 131
- IX. Quam grata debeat esse Monachis Monasterii sui paupertas. 134
- X. De crebra votorum renovatione. 138
- XI. De imitatione humilitatis S. Martini. 142
- XII. De necessitate spei. 145
- XIII. In Festo Omnium SS. Monachorum O. SS. P. B. De exemplo Majorum. 149
- XIV. De miseria Religiosorum a sua vocatione deficientium. 152
- XV. De quotidiano charitatis proximi exercitio. 156
- XVI. Quod pœnæ æternæ sunt veluti præfentes considerandæ. 159
- XVII. Quod in ordinariis potius, quam in singularibus quærenda sit perfectio. 162
- XVIII. De triplici Religiosorum statu. 166
- XIX. Quod à Religiosæ vitæ deliciis abstrahi sit grave & dolendum. 169
- XX. De falsa Religione. 173
- XXI.

# I N D E X

|                                                                            |     |
|----------------------------------------------------------------------------|-----|
| XXI. In Festo Præsentationis. B. V. M.<br><i>De vera Religione.</i>        | 175 |
| XXII. <i>Quod non liceat aliis Ordinibus ob-<br/>trectare.</i>             | 179 |
| XXIII. <i>Quibus mediis amor proprius eva-<br/>dicandus sit.</i>           | 183 |
| XXIV. <i>De nociva familiaritate cum sæ-<br/>cularibus.</i>                | 186 |
| XXV. In Festo S. Catharinæ V. & M.<br><i>Quomodo sapientia acquiratur.</i> | 189 |
| XXVI. <i>De misericordia S. Conradi Ep.<br/>erga tribulatos.</i>           | 193 |
| XXVII. <i>Quomodo abusus invalescant, ut<br/>pro ordine teneantur.</i>     | 197 |
| XXVIII. <i>De contemptu laudis humanæ.</i>                                 | 201 |
| XXIX. <i>De contemnendis vituperiis homi-<br/>num.</i>                     | 204 |
| XXX. In Festo S. Andreæ Apostoli. <i>Re-<br/>collectio menstrua.</i>       | 207 |

## DECEMBER.

|                                                                                 |     |
|---------------------------------------------------------------------------------|-----|
| I. <i>Cur omni hora vita æterna consideran-<br/>da sit.</i>                     | 212 |
| II. <i>De necessitate, utilitate, &amp; desiderio<br/>correctionum.</i>         | 215 |
| III. <i>Quod, qui vota non perficit, aut violat,<br/>Deum videtur irridere.</i> | 219 |
| IV. <i>De laude Lachrymarum.</i>                                                | 222 |
| V. <i>Quæ mala infelix anima Monachi pa-<br/>tiatur,</i>                        |     |

# PARTIS IV.

*tiatur, cùm ad inferiora revertitur.*

225

VI. *Quomodo Monachus per paupertatem  
ad veras divitias pervenire possit.*

228

VII. *De amore cellæ.*

232

VIII. *In Festo Immaculatæ Conceptionis  
B. V. Mariæ. De felicitate B. V. M. sine  
labe conceptæ, & animæ à concupiscen-  
tiis purgatæ.*

235

IX. *Quod post lapsum mox resurgendum  
sit.*

239

X. *Quod quisque attendere debeat sibi ipsi,  
ne in peccatum incidat.*

243

XI. *Quomodo in Congregatione vivendum  
sit.*

246

XII. *De Exemplis charitatis fraternæ.*

249

XIII. *De negligentis in horis canonicis.*

253

XIV. *Quod lingua tribus se ipsis sit munien-  
da.*

256

XV. *Quod Religiosus debeat esse speculum  
bonorum Operum.*

259

XVI. *De Sepulchro.*

262

XVII. *De Adventu D. N. J. Christi. De  
humilitate, qua B. V. se disposuit ad con-  
ceptionem Verbi.*

265

XVIII. *De admirabili Unione Humanita-  
tis cum divinitate.*

271

XIX. *De eximia charitate B. V. erga cog-  
natam suam Elisabeth.*

277

XX.




# INDEX PARTIS IV.

- XX. *Quanto odio Verbum Incarnatum  
prosequitur peccatum.* 281
- XXI. In Festo S. Thomæ Apost. De præ-  
rogativis fidei. 286
- XXII. De gratitudine B. V. pro beneficio  
Incarnationis. 289
- XXIII. Quod S. Joseph indignum se judi-  
caverit, ut cobabitaret Virgineæ sponsæ  
sue. 293
- XXIV. In Vigilia Nativitatis Domini. De  
Obedientia Verbi Incarnati. 298
- XXV. In Gratosissima Nativitate D. N.  
J. Christi. De Imitatione Neonati Sal-  
vatoris. 303
- XXVI. In Festo S. Stephani Proto-Marty-  
ris. De vera S. Stephani dilectione erga  
inimicos suos. 307
- XXVII. In Festo S. Joannis Evangelistæ.  
De præcipuo amore Jesu erga S. Joan-  
nem Evangelistam. 310
- XXVIII. In Festo SS. Innocentum. Quod  
passio prædominans sit mortificanda;  
quia periculosa, perniciofa, & exitialis  
est. 313
- XXIX. De divinis judiciis in Pastoribus  
demonstratis. 317
- XXX. De Cantu Angelico; Gloria in ex-  
celsis Deo. 320
- XXXI. Recollectio menstrua. De ultimo  
annui die. 326



m  
I  
-  
6  
o  
9  
-  
e  
3  
e  
8  
I.  
-  
3  
-  
a  
7  
-  
-  
o  
d  
;  
is  
3  
us  
7  
-  
o  
vo  
6



C

F



